

2018

Tusitaulima 2

Taitaiina o le Ekalesia

2018

Tusitaulima 2

TAITAIINA O LE EKALLESIA

Lolomi e
Le Ekalesia a Iesu Keriso o le Au Paia o Aso e Gata Ai
Aai o Sate Leki, Iutā

© 2010, 2018 Puletaofia e le Intellectual Reserve, Inc.
All rights reserved.
Lolomi i le Lunaite Setete o Amerika
Faamaonia le faaperetania: 10/18
Faamaonia le faaliliuga: 10/18
Faaliliuga o le *Handbook 2: Administering the Church, 2018*
Samoan
08702 890

Anotusi

Faatomuaga	iv
1. O Aiga ma le Ekalesia i le Fuafuaga a le Atua	1
2. Mataupu Faavae o le Perisitua	7
3. Taitaiga i le Ekalesia a Iesu Keriso	11
4. O Le Aufono a le Uarota	16
5. O Le Galuega o le Faolataga i le Uarota ma le Siteki	21
6. Mataupu Faavae o le Uelefea ma le Taitaiga	36
7. Perisitua Mekisateko	43
8. Perisitua Arona	55
9. Aualofa	72
10. Tamaitai Talavou	87
11. Peraimeri	104
12. Aoga Sa	115
13. Gaoioiga	121
14. Musika	136
15. Faatulagaga o le Siteki	144
16. Tagata Nofofua o le Ekalesia	148
17. Laugatasia ma Fetuunaiga	156
18. Sauniga i le Ekalesia	162
19. Valaauga i le Ekalesia	186
20. Faauga ma Faamanuiaga o le Perisitua	201
21. Aiaiga ma Taiala Filifilia a le Ekalesia	216
Faopoopoga: Lisi o Aitema e Faasino i Ai	243

O Le Faatomuaga

Ua apoapoi mai le Alii, “Tuu atu nei i tagata taitoatasi e aoao lona tiute, ma galue i le tofi ua tofi i ai o ia, i le filiga atoa” (MFF 107:99).

E sailia e taitai o le Ekalesia ia faaaliga patino e fesoasoani ai ia te i latou e aoao ma faataunuu tiute o o latou valaauga.

O le suesueina o tusitusiga paia ma aoaoga a perofeta o aso e gata ai o le a fesoasoani i taitai e malamalama ai ma faataunuina o latou tiute. Ua apoapoiina e le Alii ia taitai ina ia faatauaina e le aunoa i o latou mafaufau ia afioga a le Atua, ina ia latou nofouta ai i uunaiga a le Agaga (tagai MFF 84:85)

E aoaoina foi e taitai o latou tiute e ala i le suesue i faatonuga o loo i totonu o tusitaulima a le Ekalesia. O nei faatonuga e faigofie ai ona maua ni faaaliga pe afai e faaoga ina ia maua ai se malamalamaaga i mataupu faavae, o aiaiga faavae, ma faiga faavae e faaoga a o sailia le taitaiga a le Agaga.

Tusitaulima mo Taitai o le Ekalesia

Ua saunia e le Ekalesia ia tusitaulima e lua mo taitai:

Tusitaulima 1: Peresitene o Siteki ma Epikopo O le tusitaulima leni o loo otooto atu ai tiutetauave aoao o peresitene o siteki ma epikopo ma o loo tuuina atu ai ni faamatalaga auiliili e uiga i aiaiga ma faiga faavae.

Tusitaulima 2: Taitaiina o le Ekalesia O leni tusitaulima o se taiala mo tagata o le aufono a uarota ma siteki. O mataupu muamua e lua o loo tuuina atu ai le faavae faaaoaoga faavae o le galuega a le Ekalesia: o le faaolataga o tagata taitoatasi ma le faamauina ma le faacaga o aiga e ala i le mana o le perisitua. O isi mataupu o loo tuuina atu ai faatonuga po o aoaoga mo le faatautaia o korama o le perisitua ma ausilali. O loo tuuina atu ai foi mataupu faavae ma taiala e faaoga i faalapotopotoga eseese i le uarota.

O ulutala ma soāulutala i nei tusitaulima ua faanumeraina ia faigofie ai ona maua pe faasino atu i autu. Nai lo le faasino i se itulau po o ni itulau, e mafai e taitai ona tagai i se autu patino e ala i lona numeraga. Mo se faataitaiga, i se talanoaga e faatautau i le galuega faifeau faamisiona a le uarota, e mafai e se epikopo ona fai atu i sui auai o le aufono a le uarota e suesue le 5.1.2 i le *Tusitaulima 2*. O le numeraga 5 e faasino i le mataupu, o le numeraga 1 e faasino i se vaega o le mataupu, ma le numeraga 2 e faasino i se soavaega.

Faafouga ma Faaopoopoga i Faatonuga

E i ai taimi o le a faafou ai pe faaopoopo ni faamatalaga i nei tusitaulima e auala atu i tusi, faaaliga, ma isi fesootaiga mai le Au Peresitene Sili, Korama a le Toasefululua, ma le Au Epikopo Pulefaamalumu. Afai e tupu leni mea, e tatau i taitai ona tusia ia suiga i totonu o a latou kopi o tusitaulima. E tatau i taitai ona teuina faatasi ia tusitaulima ma nei vaega faaopoopo.

Fesili e uiga i Faatonuga

O taitai e i ai ni a latou fesili e uiga i faamatalaga o i le tusitaulima pe uiga foi i mataupu e le o ta'uina atu ai, e tatau ona tuusa'o atu ia fesili i lo latou taitai pulefaamalumu.

Faaogaina i Paranesi, Itu, ma Misiona

Mo faamoemoega faaletaitaiga, o faaupuga *epikopo* ma le *au epikopo* i tusitaulima e faasino foi i peresitene o paranesi ma au peresitene o paranesi. O faaupuga *peresitene o le siteki* ma le *au peresitene o le siteki* e faatatau foi i peresitene o itu ma au peresitene

o itu. Peitai, o tofi o le epikopo ma le peresitene o le paranesi e le tutusa i le pule ma le tiutetauave. E le tutusa foi tofi o le peresitene o le siteki ma le peresitene o le itu. O le epikopo o se tofi i le perisitua, ma o le faauuga e na o le Au Peresitene Sili e faataga mai ai. O peresitene o siteki e valaauina e le Au Pulega Aoao ma Fitugafulu Eria.

O faamatalaga e faatatau i uarota ma siteki e masani lava ona faatatau foi i paranesi, itu, ma misiona.

Faafesootaia o le Laumua o le Ekalesia po o le Ofisa o le Pulega ua Tofia

O nisi mataupu o leni tusitaulima o loo aofia ai faatonuga e faafesootai le laumua o le Ekalesia po o le ofisa o le pulega ua tofia. O le faatonuga e faafesootai le laumua o le Ekalesia, e faatatau i taitai perisitua ma failautusi i le Iunaite Setete ma Kanata. O le faatonuga e faafesootai le ofisa o le pulega ua tofia, e faatatau i taitai perisitua ma failautusi i fafo atu o le Iunaite Setete ma Kanata.

Tufatufaga

Tusitaulima 2: Taitaiina o le Ekalesia e tatau ona tufatufa atu faapenei:

- Au Pulega Aoao, Fitugafulu Eria, sui o Au Peresitene Aoao o Ausilali, ulu o matagaluega a le Ekalesia, faatonu o mataupu faaletino (1 le kopi a le tagata)
- Au peresitene o le misiona (3 kopi)
- Au peresitene o le siteki po o le itu (3 kopi)
- Failautusi a le siteki po o le itu (1 le kopi mo le faila)

- Failautusi faapitoa a le siteki po o le itu (1 le kopi)
- Fautua maualuga (12 kopi)
- Au peresitene o Alii Talavou o le Siteki, Aualofa, Tamaitai Talavou, Peraimeri, ma le Aoga Sa (3 kopi a le au peresitene)
- Au epikopo po o le au peresitene o le paranesi (3 kopi)
- Failautusi a le uarota po o le paranesi (1 le kopi mo le faila)
- Failautusi faapitoa a le uarota po o le paranesi (1 le kopi).
- Au peresitene o le korama a toecaina (3 kopi)
- Au peresitene o Alii Talavou o le Uarota, Aualofa, Tamaitai Talavou, Peraimeri, Aoga Sa (3 kopi a le au peresitene)
- Taitai misiona a le uarota (1 kopi)

O leni tusitaulima ua saunia patino lava mo le faa-aogaina e taitai aoao o le Ekalesia ma taitai i le lotofale e faatautaia ai mataupu a le Ekalesia. E le tatau ona faia se kopi pe tuuina atu i soo se isi lava tagata. O le lisi o le tufatufaga e aofia ai se kopi o le faila ia tausia i se nofoaga malupuipua e failautusi taitasi o siteki ma uarota. E mafai ona ia tagai i ai mo faamatalaga e uiga i mea tautupe ma faamaumauga ma mo faamatalaga i le lagolagoina o le peresitene o le siteki po o le epikopo.

Afai e faamalolo ia taitai o le Ekalesia o loo i ai se kopi o leni tusitaulima, latou te tuuina atu loa lava le kopi i e ua suitulaga ia i latou, pe tuuina atu foi i lo latou taitai pulefaamalumu.

1.

O Aiga ma le Ekalesia i le Fuafuaga a le Atua

1.1

O Le Fuafuaga a le Atua le Tama mo Lona Aiga Faavavau

1.1.1

O Le Aiga o le Atua i le Muai Olaga

O le aiga ua faauuina e le Atua. O le iunite sili lea ona taua i le olaga nei ma le faavavau. E oo lava ae tatou te lei fananau mai i le lalolagi, sa avea i tatou ma vaega o se aiga. O i tatou taitoatasi “o se atalii po o se afafine agaga faapelepele o ni matua faalelagi” ua i ai “se natura paia ma se taunuuga” (“O Le Aiga: O Se Folafolaga i le Lalolagi,” *Ensign*, Nov. 1995, 102). O le Atua o lo tatou Tama Faalelagi, ma na tatou ola faatasi i Lona afioaga o se vaega o Lona aiga i le muai olaga. O iina sa tatou aoaoina ai a tatou uluai lesona ma sa sauniunia ai mo le olaga faitino (tagai i le MFF 138:56).

1.1.2

O Le Faamoemoega o le Olaga Faitino

Ona o le alofa o le Atua mo i tatou, sa Ia saunia ai se fuafuaga sa aofia ai lo tatou o mai i le lalolagi, lea o le a tatou maua ai tino ma tofotofoina ina ia mafai ai ona tatou alualu i luma ma avea atili ai e faapei o Ia. O leni fuafuaga ua faaigoaina “o le fuafuaga o le faaolataga” (Alema 24:14), “o le fuafuaga tele o le fiafia” (Alema 42:8), ma “o le fuafuaga o le togiolaina” (Alema 12:25; tagai foi i fuaiupu 26–33).

O le faamoemoega o le fuafuaga a le Atua o le taitai o i tatou i le ola faavavau. Ua tautino mai e le Atua, “Faauta, o la’u galuega ma lo’u mamalu leni—ia faataunuu le faaofuina o le tagata i le tino ola pea ma le ola faavavau” (Mose 1:39). O le ola faavavau o le meaalofa aupito silisili a le Atua i Ana fanau (tagai i le MFF 14:7). O le faacaga lea i le tikeri aupito maualuga o le malo selesitila. E ala i le fuafuaga o le

faaolataga, e mafai ai ona tatou maua leni faamanu-
iaga o le toe foi atu i le afioaga o le Atua ma maua ai
le atoaga o le fiafia.

1.1.3

O Le Togiola a Iesu Keriso

Ina ia mafai ona maua le faacaga i le malo o le Atua, e tatau ona tatou faatoilaloina mea faalavefau e lua o le olaga faitino: o le oti ma le agasala. Talu ai e le mafai ona tatou faatoilaloina ia mea faalavefau e i tatou lava, o lea na auina mai ai e le Tama Faalelagi Lona Alo, o Iesu Keriso, e avea ma o tatou Faaola ma Togiola. O le taulaga togiola a le Faaola ua mafai ai e fanau uma a le Atua ona faatoilalo le oti faaletino, mafai ona toetu, ma maua le tino ola pea. O le Togiola foi ua mafai ai e i latou o ē salamo ma mulimuli ia te Ia ona faatoilalo le oti faaleagaga, toe foi atu i le afioaga o le Atua e mau ai faatasi ma Ia, ma maua ai le ola e faavavau (tagai i le MFF 45:3–5).

1.1.4

O Le Matafaioi a Aiga i le Fuafuaga a le Atua

O se vaega o le fuafuaga a lo tatou Tama Faalelagi, na tatou fananau mai ai i aiga. Na ia faavaeina ia aiga ia tatou maua ai le fiafia, e fesoasoani ia i tatou e aoaoina mataupu faavae sa’o i se siosiomaga alofa, ma ia sauniuni ai i tatou mo le ola e faavavau.

Ua i ai i matua le tiutetauave taua e fesoasoani a i latou fanau e sauniuni e toe foi atu i le Tama Faalelagi. E faataunuu e matua leni tiutetauave e ala i le aoaoina o a latou fanau e mulimuli ia Iesu Keriso ma ola i Lana talalelei.

1.1.5**O Le Matafaioi a le Ekalesia**

Ua saunia e le Ekalesia faalapotopotoga ma auala mo le aoaoina atu o le talalelei a Iesu Keriso i fanau uma a le Atua. E maua ai le pule o le perisitua e faatautaia ai sauniga o le faaolataga ma le faacaga i tagata uma ua agavaa ma loto ia taliaina na sauniga.

1.2**O Le Toe Foi atu i le Tama****1.2.1****O Le Talalelei a Iesu Keriso**

O le fuafuaga o le olataga o le atoaga lea o le talalelei. Ua aofia ai le Fofoaga, o le Pau, le Togiola a Iesu Keriso, ma tulafono uma, o sauniga, ma aoaoga faavae o le talalelei. Ua saunia ai le ala mo i tatou e maua ai le olioli i le olaga faitino (tagai 2 Nifae 2:25) faapea foi faamanuiaga o le ola faavavau.

O le Togiola a Iesu Keriso, ua mafai ai ona faamainaina i tatou ma faapaiaina mai agasala ma saunia ai e toe ulu atu i le afioaga o lo tatou Tama Faavavau. Ina ia maua leni faamanuiaga, e tatau ona tatou mulimuli i mataupu faavae ma sauniga o le talalelei (tagai Mataupu Faavae o le Faatuatua 1:3). E tatau ona tatou:

1. Faaali le faatuatua i le Alii o Iesu Keriso, le Alo Pele e Toatasi o le Atua.
2. Liliu atu i le Atua e ala i le salamo faamaoni, ia i ai se suiga i le loto ma ta'uta'u atu agasala ma lafoaia.
3. Ia maua sauniga faaola o le papatisoga mo le faamagaloina o agasala.
4. Ia faamauina o se tasi o le Ekalesia ma maua le meaalofa o le Agaga Paia e ala i le faaee atu o lima.
5. Tumau e oo i le iuga e ala i le tausia o feagai-ga paia.

Na aoao mai lava nei mataupu faavae talu mai ona po o Atamu. A oo ina tatou malamalama ma talitonu i nei upumoni ma maua se molimau mausali ia Iesu Keriso, tatou te taumafai e usita'ia Ana poloaiga ma mananao e faasoa atu o tatou faamanuiaga i lo tatou aiga ma isi (tagai 1 Nifae 8:9--37). O le i ai o leni faavae mautu o le molimau, e mulimuli mai ai lava isi elemene o le malolosi i le Ekalesia.

E tulai mai le tuputupu ae faaleagaga o le tagata lava ia pe a tatou faalatalata atu i le Atua e ala i le tatalo, susesue i tusitusiga paia, mafaufau loloto, ma usiusitai. Na aoao mai Nifae:

“Pe a uma ona outou i ai i leni ala lauitiiti ma le vaapiapi, ou te fesili atu pe ua uma ona faia o mea uma? Faauta, ou te fai atu ia te outou, E leai; ona tou te lē oo mai iinei pe a na lē seanoa le afioga a Keriso faatasi ma le faatuatua lē mafaamaluelueina ia te ia, ma le faalagolago atoa i galuega a ia o lē ua malosia aoao e laveai.

“O le mea lea, e tatau ai ona outou fetaoimi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai o le a outou fetaoimi atu i luma, ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai le Tama: O le a outou maua le ola e faavavau” (2 Nifae 31: 19--20).

E tofi i tatou ma le tiutetauave i luma o le Atua e aoao ma tausii Ana poloaiga ma ola i le talalelei. O le a faamasinoina i tatou e tusa ma a tatou taga e fai, o naunauga o o tatou loto, ma le ituaiga o tagata ua avea ai i tatou. A oo ina avea i tatou ma soo moni o Iesu Keriso, tatou maua se suiga tele o le loto ma “le toe i ai se manao e faia mea leaga” (Mosaea 5:2; tagai foi Alema 5:12–15; Moronae 10:32–33). A o tatou ola i le talalelei a Iesu Keriso, tatou te tuputupu ae i lea upu ma lea upu, ma avea atili ai e faapei o le Faaola i le alofa ma le auauna atu i isi.

1.2.2**O Le Matafaioi a Taitai ma Faiaoga o le Ekalesia**

E taumafai taitai Perisitua ma ausilali ma faiaoga e fesoasoani i isi ia avea o ni soo moni o Iesu Keriso (tagai Mosaea 18:18–30). Ina ia fesoasoani i tagata taitoatasi ma aiga i leni taumafaiga, latou te:

1. Aoa atu ma molimau atu i le mama a'ia'i o aoaoga faavae o le talalelei a Iesu Keriso.
2. Faamalolosa tagata taitoatasi ma aiga i a latou taumafaiga e tausia a latou feagaiga paia.
3. Tuuina atu fautuaga, lagolagosua, ma avanoa mo auuaunaga.

E le gata i lea, ua i ai i ni taitai patino o le perisitua le pule e vaavaaia ai le faatinoga o sauniga faaola o le perisitua.

1.3**Faavaeina o Aiga Faavavau**

O aiga e totonugalemu i le fuafuaga a le Atua, e saunia ai se ala mo sootaga faaleaiga e oo i talaatu o le tuugamau. O sauniga ma feagaiga paia o le malu-malu, e tausia ma le faamaoni, e fesoasoani tatou te toe foi atu ai i le afioaga o le Atua, e faatasia ai e faavavau ma o tatou aiga.

1.3.1**Tane ma le Ava**

O le faaega i le vaega aupito maualuga o le malo selesitila, e mafai ona maua e na o i latou ua ola faamaoni i le talalelei a Iesu Keriso ma ua faamauina o ni soa e faavavau.

O le faamauga o le tane ma le ava mo le olaga nei ma le faavavau e le pule o le perisitua—lea foi ua iloa o le faaiipoipoga i le malumalu—o se avanoa ma se matafaioi paia e tataui i tagata uma ona taumafai ia maua. O le faavae lea o se aiga faavavau.

O le natura o agaga o le tane ma le fafine e faapea e faaatoatoa ai le tasi ma le isi. Ua faamoemoe o alii ma tamaitai ia aga'iga'i faatasi i luma i le faaega.

Ua poloaia e le Alii ia tane ma ava e pipii atu le tasi i le isi (tagai i le Kenese 2:24; MFF 42:22). I leni poloaiga, o le upu *pipii atu* o lona uiga ia matua tuuto atoatoa atu ma le faamaoni i se tasi. O ulugalii faaiipoipo e pipii atu i le Atua ma le tasi i le isi e ala i le tautua ma le alofa o le tasi i le isi e ala i le tausia o feagaiga i le faamaoni atoatoa o le tasi i le isi faapea foi i le Atua (tagai i le MFF 25:13).

E ao i se ulugalii ona tasi i le faavaeina o lo latou aiga e fai ma faavae o se olaga amiotonu. E tuua e tane ma ava o le Au Paia o Aso e Gata Ai o latou olaga nofo toatasi ae faavae a latou faaiipoipoga e avea ma uluai faamuamua i o latou olaga. Latou te le faatagaina lava se isi tagata po o se mea e fiafia i ai, ia sili a'e se faamuamua i o latou olaga nai lo le tausia o feagaiga ua latou osia ma le Atua faapea foi le tasi i le isi. Ae ui o lea, e faaauau pea e ulugalii ua faaiipoipo ona alolofa ma lagolago o latou matua ma o latou tei a o taulai atu i o latou lava aiga. E faapena foi, e iloa e matua popoto e faaauau pea o latou tiutetauave faaleaiga i o latou olaga i se agaga o le alofa ma le faamalosiua.

O le tasi i le faaiipoipoga e manaomia ai le faapaaga atoa. Mo se faataitaiga, na galulue faatasi Atamu ma Eva, sa tatalo ma tapuai faatasi, sa ositaulaga faatasi, sa aoaoina faatasi a la'ua fanau i le talalelei, ma sa faanoanoa faatasi i a la fanau vaogatata (tagai Mose 5:1, 4, 12, 27). Sa tutufaatasi i la'ua o le tasi ma le isi faapea ma le Atua.

1.3.2**Matua ma Fanau**

“O le uluai poloaiga na tuuina e le Atua ia Atamu ma Eva, e faatatau i lo la agavaa mo le tulaga faamātua, o se tane ma se ava. . . . O le poloaiga a le Atua i Ana fanau ia fanafanau ma uluuluola i le lalolagi o loo tumau pea ona faamalosiua” (“O Le Aiga:

O Se Folafolaga i le Lalolagi”). O le mamanu paia, e manaomia ai se tane ma se fafine e aumaia fanau i le lalolagi ma saunia se nofoaga sili mo le tausaiina ma le faafaileleina o le fanau.

O le faafitia atoatoa o feusuaiga a o lei faaipoipo ma le faamaoni a’ia’i i totonu o le faaipoipoga, e puipuia ai le paia a’ia’i o leni tiutetauave paia. E ao i matua ma taitai perisitua ma ausilali ona faia mea uma latou te mafaia e faamalosiaina ai leni aoaoga.

E faatatau i matafaioi a tama ma tina, ua aoao mai e taitai o le Ekalesia: ”E tatau ona pulefaamalumu le tamā i o latou aiga i le alofa ma le amiotonu ma o i latou e saunia mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina lea o a latou fanau. I nei tiutetauave paia, e ao i tama ma tina ona fesoasoani le tasi i le isi o se paaga tutusa” (“O Le Aiga: O Se Folafolaga i le Lalolagi”). Afai e leai se tama i le fale, o le tina e pulefaamalumu i le aiga.

Ua i ai i matua se tiute paia “e tausai a latou fanau i le alofa ma le amiotonu, ia tuuina atu i ai mea e manaomia faaletino ma le faaleagaga, ma ia aoao i latou e alolofa ma feauna’ia, ia tausai polo-aiga a le Atua ma avea ma tagatanuu usiusitai i tulafono i soo se mea latou te nonofo ai” (“O Le Aiga: O Se Folafolaga i le Lalolagi”; tagai foi i le Mosaea 4:14–15).

O matua popoto e aoao a latou fanau e faaoga le mana faamalolo, tofaalelei, ma le faamalosiaina o le Togiola i totonu o o latou aiga. E faapei foi o le agasala, o vaivaiga faaletino, tiga faalelagona, ma le tiga o tulaga ia e vavaese ai fanau a le Atua mai ia te Ia, o ia lava foi tulaga e mafai ona vavaeseina ai tagata o le aiga mai le tasi ma le isi. O tagata taitoatasi o le aiga ua i ai se tiutetauave e taumafai mo le lotogatasi o le aiga. O fanau o e aoao e taumafai mo le lotogatasi i le aiga o le a iloa e faigofie atu ona faia foi i fafo atu o le aiga.

1.3.3

Tagata o le Ekalesia e le i Faaipoipo

O tagata uma o le ekalesia, tusa lava pe e lei faaipoipo lava pe le o i ai foi ni aiga i le Ekalesia, e tatau ona taumafai mo le mea aupito sili o le ola lea i se aiga faavavau. O lona uiga o le sauniuni ia avea ma toalua agavaa ma tama po o ni tina alolofa. I nisi o tulaga, o le a le faataunuuna nei faamanuiaga seia aulia le isi olaga, ae e tutusa lava le sini maua luga mo tagata uma.

O tagata faamaoni o le ekalesia o e le faatagaina i latou e o latou tulaga ma laasaga e mauaina faamanuiaga o le faaipoipoga e faavavau ma le tulaga faamātua i leni olaga, o le a mauaina faamanuiaga folafolaina uma i le faavavau, pe afai latou te tausai feagaiga sa latou osia ma le Atua.

1.4

O Le Aiga ma le Ekalesia

I aoaoga ma faiga a le talalelei toefuataiina, e fesoasoani le aiga ma le Ekalesia ma fefaamalosia’i e le tasi le isi. Ina ia agavaa mo faamanuiaga o le ola faavavau, e manaomia e aiga ona aoao i aoaoga faavae ma maua ia sauniga o le perisitua ia e na o le Ekalesia e maua ai. Ina ia avea o se faalapotopotoga malosi ma olaola, e manaomia e le Ekalesia aiga amiotonu.

Ua faaalua mai e le Atua se mamanu o le alualu i luma faaleagaga mo tagata taitoatasi ma aiga e ala i sauniga, aoaoga, polokalama, ma gaoioiga ia e taulai i le aiga ma lagolagoina e le Ekalesia. Ua i ai faalapotopotoga ma polokalama a le Ekalesia ina ia faamanuiaina ai tagata taitoatasi ma aiga ae ua le na ona faia ma muta ai lava. E saili taitai perisitua ma ausilali ma faiaoga e fesoasoani atu i matua, ae le faasilia pe suitulaga ia i latou.

E tatau i taitai perisitua ma ausilali ona taumafai e faamalolosia le paia o le fale e ala i le faamautinoa o gaoioiga uma a le Ekalesia e lagolago ai olaga o tagata taitoatasi ma aiga. E ao ina faaeteete taitai o le Ekalesia ia aua nei faalofituina aiga i le tele naua o

tiutetauave i le Ekalesia. E galulue faatasi matua ma taitai o le Ekalesia e fesoasoani i tagata taitoatasi ma aiga ia toe foi atu i lo tatou Tama o i le Lagi e ala i le mulimuli ia Iesu Keriso.

1.4.1

Faamalosia o le Aiga

Ua valaaulia soo o Keriso ia “faapotopoto faatasi,” “tutu i nofoaga paia,” ma “aua le masii ese” (MFF 45:32; 87:8; 101:22; tagai foi i le 2 Nofoaiga a Tupu 35:5; Mataio 24:15). O nei nofoaga paia e aofia ai malumalu, fale, ma falesa. O le i ai o le Agaga ma amioga a i latou i totonu o nei fausaga faaletino o mea na e aveva ai ma “nofoaga paia.”

Po o fea lava e nonofo ai tagata o le Ekalesia, e tatau ona latou faatulagaina se fale e mafuta ai le Agaga. E mafai e tagata uma o le Ekalesia ona faia ni taumafaiga e faamautinoa ai ua maua i mea latou te nonofo ai se nofoaga o le sulufa'iga mai le lalolagi. O fale uma i le Ekalesia, pe telē pe laitiiti, e mafai ona aveva ma se “fale tatalo lea, o se fale o le anapogi, o se fale o le faatuatua, o se fale o le aoaoga, o se fale o le mamalu, o se fale maopoopo, o se fale o le Atua” (MFF 88:119). E mafai e tagata o le Ekalesia ona valaaulia le Agaga i totonu o o latou fale e ala i nai auala faigofie e pei o ni faafiafiaga lelei, musika lelei, ma galuega o faatufugaga musuia (mo se faataitaiga, o se atavali o le Faaola po o se malumalu).

O se fale e i ai ni matua alolofa ma faamaoni o le nofoaga lea e aupito sili ona taulima lelei ai manaoga faaleagaga ma faaletino o le fanau. O se fale e faatotonugalemu ia Keriso e ofo atu ai i tagata matutua ma tamaiti se nofoaga o le puipuiga mai le agasala, malutaga mai le lalolagi, faamalologa mai tiga faalelagona ma isi, ma le alofa tautino, faamaoni.

E poloaiina lava e le aunoa ia matua ina ia tausi a'e a latou fanau “i aoaiga ma apoapoaga a le Alii” (Efeso 6:4; Enosa 1:1) ma “i le malamalama ma le upumoni” (MFF 93:40). Na tautino mai e le Au Persitene Sili:

“Matou te talosaga atu i matua ina ia tuu atu a latou taumafaiga aupito sili i le aoaoina ma le faafaileleina o a latou fanau i mataupu faavae o le talalelei lea o le a taofia faalatalata mai i latou i le Ekalesia. O le aiga o le faavae lea o se olaga amiotonu, ma e leai se isi mea e mafai ona suitulaga ai pe faataunuaina ona tiute taua i le faatinoina o tiutetauave na tuuina mai e le Atua.

“Matou te fautua atu i matua ma fanau ina ia tuu le faamuamua aupito sili i tatalo faaleaiga, afiafi faaleaiga, suesue ma aoao i le talalelei, ma gaoioiga lelei faaleaiga. Po o le a lava le taua ma le talafeagai o i ai isi mea e fai po o gaoioiga, e le tatau ona faatagaina e suitulaga i tiute ua tofia mai le lagi, ia e na o matua ma aiga e mafai ona faatinoina lelei” (Tusi a le Au Persitene Sili, Fep. 11, 1999).

Ua i ai i matua le uluai tiutetauave mo le fesoasoani i a latou fanau ia iloa le Tama Faalelagi ma Lona Alo, o Iesu Keriso (tagai Ioane 17:3). Ua poloaiina tama ma tina o le Au Paia o Aso e Gata Ai e aoao atu aoaoga faavae o le talalelei, sauniga, feagaiga, ma ala o le ola amiotonu ia latou fanau (tagai i le MFF 68:25–28). O fanau ua faapena ona faafailele ma aoaoina e tele ina saunia i se tausaga talafeagai e maua ia sauniga o le perisitua ma osia ma tausia feagaiga ma le Atua.

O le faamalolosia o tagata taitoatasi ma aiga o le taulaiga lea o le auaunaga (tagai i le MFF 20:47, 51) faapea ai ma polokalama musuia a le Ekalesia e pei o afiafi faaleaiga. E pei ona i ai i mea uma lava, ua faatulaga e Iesu le faataitaiga o le ulu atu i fale o aiga e tausi, aoao atu, ma faamanuia atu (tagai i le Mataio 8:14–15; 9:10–13; 26:6; Mareko 5:35–43; Luka 10:38–42; 19:1–9).

1.4.2

Afiafi Faaleaiga

Ua fautuaina e perofeta o Aso e Gata Ai ia matua ia faia se afiafi faaleaiga i vaiaso taitasi e aoao ai a latou fanau i le talalelei, tuu atu molimau i lona moni, ma faamalolosia le lotogatasi faaleaiga. E tatau i taitai

o siteki ma uarota ona faaavanoa afiafi o Aso Gafua mai fonotaga uma ma gaoioiga faale-Ekalesia ina ia mafai ai ona fai ia afiafi faaleaiga.

O le afiafi faaleaiga e mafai ona aofia ai le tatalo faaleaiga, aoaoga o le talalelei, fefaasoai o moli-mau, viiga ma pese o le Peraimeri, ma gaoioiga lelei faafiafia. (Mo faamatalaga e uiga i le faaaogaina o musika i le fale, tagai 14.8.) E avea o se vaega o le afiafi faaleaiga, pe fai ese foi, e mafai foi e matua ona talo se fono faaleaiga faavaitaimi e faatutu ai sini, foia ai faafitauli, faamaopoopo ai taimi o fuafuaga, ma tuu atu ai le lagolago ma le malosiaga i tagata o le aiga.

O afiafi faaleaiga o se taimi paia, ma patino faaleaiga i lalo o le taitaiga a matua. E le tatau i taitai perisitua ona tuuina atu ni faatonuga po o le a le mea e tatau i aiga ona fai i le taimi lea.

1.4.3

Faamalolosa o Tagata Taitoatasi

E ao i taitai o le Ekalesia ona nofouta faapitoa i tagata taitoatasi o e e le o talisapaia i le taimi nei le lagolago a se aiga o tagata malolosi i le Ekalesia. O nei tagata e ono aofia ai tamaiti ma talavou e le auai i le Ekalesia o latou matua, o isi tagata e le lolotu uma aiga, ma le aumatutua nofofua o tausaga uma. O i latou o tagata o le feagaiga o le aiga faavavau o le Atua, e matua'i alofa i ai o Ia. E ao ina tuu atu i nei tagata taitoatasi ni avanoa e auauna ai i le Ekalesia. E mafai e le Ekalesia ona saunia ni fegalegaleaiga lelei ma le faaumea e le mafai e nei tagata auai ona maua i se isi lava nofoaga.

E taua tagata uma o le Ekalesia e pei o isi foi. O le fuafuaga a le Atua ua saunia mo Ana fanau faamaoni uma ia maua ai faamanuiaga uma o le ola faavavau, ma faaecaina i aiga e faavavau.

2.

Mataupu Faavae o le Perisitua

O le perisitua o le pule ma le mana o le Atua. Na i ai pea lava e le aunoa ma o le a faaauau pea ona i ai e aunoa ma se iuga (tagai i le Alema 13:7–8; MFF 84:17–18). E auala mai i le perisitua, na foafoaina ai e le Atua ma puleaina ai lagi ma le lalolagi. E ala i le mana lenei, Na te faaecaina ai Ana fanau usiusitai, ma faataunuaina ai le faaofuina o le “tino ola pea ma le ola faavavau o le tagata” (Mose 1:39; tagai foi i le MFF 84:35–38).

I le olaga faitino, o le perisitua o le mana ma le pule ua tuu mai e le Atua i le tagata e faia ai mea uma e tatau ai mo le faaolataga o fanau a le Atua. O faamanuiga o le perisitua o loo avanoa ia i latou uma o e talia le talalelei.

O fuaitau taua mai tusitusiga paia e uiga i le perisitua mo taitai e suesue i ai e aofia ai le Alema 13 ma le Mataupu Faavae ma Feagaiga 13, 20, 84, 107, 121, ma le 124.

2.1

Pule o le Perisitua

Ua vaevacina le perisitua i ni vaega se lua: o le Perisitua Arona ma le Perisitua Mekisateko.

O le Perisitua Arona o le perisitua mauualalo ma “o se faaopoopoga i . . . le Perisitua Mekisateko” (tagai i le MFF 107:13–14). Ua ta’ua o le Perisitua Arona aua sa faaee atu i luga o le uso o Mose o Arona ma atalii o Arona.

O le Perisitua Arona e aofia ai ki o le auaunaga a agelu, o le talalelei o le salamo, ma le papatisoga e ala i le faatofuina mo le faamagaloga o agasala (tagai i le MFF 13:1; 84:26–27; 107:20). O i latou o e umia le Perisitua Arona e mafai ona faatagaina e taulima ia “sauniga o fafo” o le papatisoga ma le faamanatuga (tagai i le MFF 107:14). O le epikopo o le peresitene o le Perisitua Arona i le uarota. O se

vaega o lenei tiutetauave, na te faatautaia ai mataupu faaletino e pei o le uelefea ma tupe i totonu o le uarota (tagai i le MFF 107:68).

O le Perisitua Mekisateko o le perisitua e maualuga atu pe sili atu foi. E i ai ma e gaoioi i soo se taimi e i ai le Ekalesia a Iesu Keriso i luga o le fogaelele i lona atoaga. Sa faaigoaina muamua “o le Perisitua Paia, e tusa ma le faatulagaga a le Alo o le Atua. Ae ona o le faaaloalo po o le migao i le suafa o Lē Silisili, ina ia aloese ai mai le ta’u soo o lona suafa, na faaigoaina ai lea perisitua ia Mekisateko, po o le Perisitua faa-Mekisateko, e i latou, le ekalesia, i aso anamua” (MFF 107:2–4). O Mekisateko o “se faitaulaga sili ta’uta’ua” (MFF 107:2) o le na soifua i ona po o Aperaaamo.

E ala i le pule o le Perisitua Mekisateko, e taiala ai e taitai o le Ekalesia le Ekalesia, faatonutonu le tala’iina o le talalelei i le lalolagi atoa, ma faatautaia le galuega faalecagaga uma a le Ekalesia, (tagai i le MFF 84:19–22; 107:18). O le Peresitene o le Ekalesia o le faitaulaga sili pulefaamalumu lea i le Perisitua Mekisateko.

A tuuina atu i se alii le Perisitua Mekisateko, e osi feagaiga o ia e faamaoni, ia faalautele ona valaauga, ma ia ola i upu uma e o’o mai i le fofoga o le Atua ma Ana auauna (tagai i le MFF 84:33–44).

2.1.1

O Ki o le Perisitua

O ki o le perisitua o le pule lea ua tuuina mai e le Atua i taitai perisitua e faatonu ai, faafoe ai, ma pulea ai le faaogaina o Lana perisitua i luga o le fogaelele. O le faaogaina o le pule o le perisitua e pulea lea e i latou o e umia ona ki (tagai i le MFF 65:2; 81:2; 124:123). O i latou e umia ki o le perisitua ua i ai le aia tatau e pulefaamalumu ai ma taitaia le Ekalesia i totonu o se puleaga.

O Iesu Keriso o loo umia ki uma o le perisitua e faatatau i Lana Ekalesia. Na Ia faaee atu i luga o Ana Aposetolo taitasi ki uma e faatatau i le malo o le Atua i le fogaeleele. O le Aposetolo sinia o loo soifua, o le Perisitene o le Ekalesia, ua na o le pau lea o le tagata i luga o le fogaeleele ua faatagaina e faaaogaina ki uma o le perisitua (tagai i le MFF 43:1–4; 81:2; 107:64–67, 91–92; 132:7).

E galulue Fitugafulu e ala i tofiga ma le faamatuu mai o le pule mai le Au Perisitene Sili ma le Korama a Aposetolo e Toasefululua. E tofia Perisitene o Eria e faatautaia ia eria i lalo o le faatagaga a le Au Perisitene Sili ma le Toasefululua. E vaetofia le Au Perisitene o Fitugafulu ma tuuina atu i ai ki e pulefaamalumu ai i Korama a Fitugafulu.

E faamatuu atu e le Perisitene o le Ekalesia ia ki o le perisitua i isi taitai perisitua ina ia mafai ai ona latou pulefaamalumu i o latou eria o tiutetauave. E faaee atu ki o le perisitua i luga o perisitene o malumu, misiona, siteki, ma itu; epikopo; perisitene o paranesi; ma perisitene o korama. O le pule e pulefaamalumu ai e tauaogaina mo na o tiutetauave ua tofia i ai ma i totonu o le puleaga o le faataatiaga faafaafanua o le valaauga o taitai taitoatasi. A oo i le taimi e faamalolo ai taitai perisitua mai o latou valaauga, latou te le toe umiaina ki e o faatasi ma na valaauga.

O fesoasoani i taitai perisitua e le tuuina atu i ai ni ki. E vaetofia i latou ma galulue i o latou valaauga e ala i tofitofiga ma le pule e faamatuu atu i ai.

O faalapotopotoga uma a ausilali o uarota ma siteki, e faagaioia i lalo o le taitaiga a le epikopo po o le perisitene o le siteki, o lē o loo umiaina ki e pulefaamalumu ai. E le tuuina atu i perisitene o ausilali ma o latou fesoasoani ni ki. E tuuina atu ia i latou le pule faamatuu atu e galulue ai i o latou valaauga.

2.1.2

Sauniga

E manaomia le pule o le perisitua e faatino ai sauniga o le talalelei. O se sauniga o se faatinoga paia faaletino

e i ai uiga faafaatusa, e pei o le papatisoga, faamauga, po o le faamanatuga. O sauniga taitasi e tatala ai le faitotoa mo faamanuiaga e tele faaleagaga. E fesoasoani faatusa i tagata e manatua ai le alofa o le Tama, le Togiola a le Alo, ma le tosinaga a le Agaga Paia.

O sauniga o se vaega lava e le aunoa o le talalelei a Iesu Keriso. O le papatisoga, mo se faataitaiga, sa faavacina i ona po o Atamu ma Eva ma o loo faia lava i le Ekalesia a le Alii i ona po nei. Ua poloaiina tagata o le Ekalesia ina ia faapotopoto soo faatasi e aai ma feinu i le faamanatuga e manatua ai e le aunoa le Faaola ma faafou ai feagaiga ma faamanuiaga o le papatisoga (tagai i le Moronae 6:6; MFF 59:8–9).

O nisi sauniga e moomia mo le faaega i le malo selesitila mo tagata uma ua mafai ona tali atu. O nei sauniga e aofia ai le papatisoga, faamauga, faauuga i le Perisitua Mekisateko (mo alii), faaega paia i le malumu, ma faamauga i le malumu. E taliaina e tagata o soifua o le Ekalesia nei sauniga faola ma le faaaina e i latou lava. O tagata ua maliliu e mafai ona mauaina e ala i tagata sui. E pau lava le taimi e aoga ai sauniga e fai ai ma sui, pe afai lea e talia e tagata ua maliliu ia o loo faatino i ai nei sauniga, i le lalolagi o agaga ma faamamalu ia feagaiga e faatatau i ai.

Mo faamatalaga patino e uiga i le faatinoina o sauniga ma le mauaina mai o faatagaga e tatau ai, tagai i le mataupu e 20.

2.1.3

Feagaiga

O sauniga uma e manaomia mo le faaolataga ma le faaega e i ai faatasi ma feagaiga ma le Atua. O se feagaiga o se folafolaga paia lea ma le tumau e faia i le va o le Atua ma Ana fanau. Ua tuuina mai e le Atua ia tuutuuga mo le feagaiga, ma e malilie Ana fanau e gauai atu i na tuutuuga. Ua folafola mai e le Atua faamanuiaga e i ai tuutuuga i luga o le tagata e faataunuina ma le faamaoni le feagaiga.

A faamamaluina ma tausia e tagata o le Ekalesia a latou feagaiga, e matua faamanuiaina lava i latou

i le olaga nei ma agavaa ai mo le faaeaga (tagai i le Esoto 19:3–5; Faamasino 2:1; 3 Nifae 20:25–27; Moronae 10:33; MFF 42:78; 97:8).

Ina ia saunia se tagata mo le auai i le faatinoga o se sauniga, e tatau i matua, o isi tagata o le aiga, taitai perisitua ma ausilali, ma faiaoga ona mautinoa ua malamalama le tagata i feagaiga o le a ia osia (tagai i le Mosaea 18:8–11). A uma le sauniga, latou te fesoasoani ia te ia ia tausia na feagaiga (tagai i le Mosaea 18:23–26).

2.2

O Le Faamoemoega o le Ekalesia

O Le Ekalesia a Iesu Keriso o le Au Paia o Aso e Gata Ai sa faatulagaina e le Atua e fesoasoani ai i Lana galuega ia faataunuina le faaolataga ma le faaeaga o Ana fanau. Ua valaaulia e le Ekalesia tagata uma ia “o mai ia Keriso, ma ia faaatoatoaina ia te ia” (Moronae 10:32; tagai foi i le MFF 20:59). O le valaaulia ia o mai ia Keriso e faatautu i tagata uma o loo ola, pe o le a ola, i le lalolagi.

A maua e tagata taitoatasi ia sauniga o le papatisoga ma le faamauga, ua avea i latou ma tagata o le Ekalesia. E lagolagoina e le Ekalesia i latou ma o latou aiga e ala i le avea “o se sulufaiga mai le afa” o tosinaga ma le amioleaga o le lalolagi (MFF 115:6). E saunia e le Ekalesia ia avanoa mo auaunaga, faamanuiaga, ma le tuputupu ae patino. O polokalama ma gaioioiga a le Ekalesia e lagolago ai ma faamalolosia tagata taitotasi ma aiga.

I le faataunuina o lona faamoemoega e fesoasoani i tagata taitoatasi ma aiga ia agavaa mo le faaeaga, e taulai atu le Ekalesia i tiutetauave ua tofia mai le lagi. O nei tiutetauave e aofia ai le fesoasoani i tagata o le ekalesia ia ola i le talalelei a Iesu Keriso, faapotopotoina o Isaraelu e ala i le galuega faafai-feautalai, tausia o e matitiva ma e le tagolima, ma faataunuina le faaolataga o e ua maliliu e ala i le fausiaina o malumalu ma le faatinoina o sauniga sui mo i latou.

2.3

O Le Perisitua ma le Aiga

O tane ma tamā taitasi i le Ekalesia, e ao ina taumafai ia agavaa e umia le Perisitua Mekisateko. Faatasi ma lana ava e avea o se paaga tutusa, e pulefaamalumu o ia ma le alofa, ma avea ma taitai faaleagaga o le aiga. Na te taitai le aiga i tatalo masani, suesueina o tusitusiga paia, ma afiafi faaleaiga. E galulue o ia faatasi ma lana avā e aoao a la fanau ma fesoasoani ia i latou ia saunia e maua ia sauniga o le faaolataga (tagai i le MFF 68:25–28). Na te tuuina atu faamanuiaga faaleperisitua mo le taitaiga, faamalologa, ma le faamafanafanaga.

E toatele tagata e le o i ai ni e o umia le Perisitua Mekisateko ma le faamaoni i o latou fale. E tatau i taitai o le Ekalesia ona avatu le gauaiga faapitoe e alolofa ai ma lagolago nei tagata e ala i le tausia musuia ma le mataāla, e aofia ai le tofiaina o uso ma tuafafine o auaunaga ma tuuina atu faamanuiaga faaleperisitua.

2.4

Faaogaina o le Pule o le Perisitua

2.4.1

Mauaina o le Pule

Mo faamatalaga e uiga i le faauuina o uso i tofi o le perisitua, tagai i le 20.7. Mo faamatalaga e uiga i le faagasologa o valaauga, lagolagoina, ma le vaetofiaina o tagata e galulue i valaauga i le Ekalesia, tagai i le mataupu 19.

2.4.2

Faamatuina Atu o le Pule

E mafai e taitai perisitua ona faamatuu atu le pule e ala i le tofia o isi e fesoasoani ia i latou i le faataunuina o se valaauga. Mo faamatalaga e uiga i le faamatuina atu, tagai i le 3.3.4.

2.4.3**Faaaogaina ma le Amiotonu o le Pule o le Perisitua**

E ao ona faaoga le perisitua e faamanuia ai olaga o isi. O taitai perisitua magafagafa e pulefaamalumu i le alofa ma le agalelei. Latou te le taumafai e tulei faamalosi atu o latou manao i luga o isi. Nai lo lena, latou te fefautuaai ma isi ma taumafai ia latou maua se maliega autasi e ala i faaliga. Ua ta'u mai e le Alii e le mafai ona faaoga le mana o le perisitua sei vagana ai i le amiotonu (tagai i le MFF 121:36). O le faaogaina tatau o le perisitua e faia i le faatauanau, tali-tiga, agamauualalo, agamalu, alofa faamaoni, ma le agalelei (tagai i le MFF 121:36, 41–42). Afai e taumafai se tagata e faaoga sese le mana o le perisitua “e aveese e le lagi i latou lava; e faanoanoa le Agaga o le Alii; ma a aveesea, Amene i le perisitua po o le pulse a lena tagata” (MFF 121:37).

2.4.4**Aufono Pulefaamalumu**

O aufono e maua ai se auala mo taitai e o mai faatasi ai i le lotogatasi ma le faatuatua e sailia faatasi le

finagalo o le Alii. E saunia foi e aufono se avanoa e faamaopoopo ai le galuega a korama ma ausilali. O faataitaiga o aufono pulefaamalumu i le lotoifale, o au peresitene o siteki, aufono a siteki, au epikopo, ma aufono a uarota. Mo faamatalaga pe faapefea ona galulue ia aufono, tagai i le 4.1.

2.4.5**Faalauteleina o Valaauga o le Perisitua**

E faalautele e e umia le perisitua o latou valaauga a o latou galulue i o latou lava aiga ma i isi o le Au Paia ma a o latou faataunuuna ma le filiga o latou tiutetauave e tofia i ai. Ua apoapoi mai le Alii, “Ia tuu atu nei i tagata taitoatasi e aoao lona tiute, ma galue i le tofi ua tofia ai o ia, i le filiga atoa” (MFF 107:99). E faalautele e e umia le perisitua o latou valaauga a o latou auauna atu ma le maelega, aoao atu ma le faatuatua ma molimau, ma siitia, faamalolosia, ma faafailele ia talitonuga maumaututu o le amiotonu i olaga o i latou o i ai o latou tiutetauave.

3.

Taitaiga i le Ekalesia a Iesu Keriso

3.1

O Le Ala a le Faaola e Taitai Ai

O taitai uma o le Ekalesia ua valaauina e fesoasoani i isi tagata ia avea ma “soo moni o . . . Iesu Keriso” (Moronae 7:48). Ina ia faia lenei mea, e taumafai muamua lava taitai ia avea ma soo faamaoni o le Faaola, e ola i aso taitasi ina ia mafai ona latou toe foi atu e nonofo i le afoaga o le Atua. Ona mafai lea ona latou fesoasoani i isi e atiina ae ni molimau malolosi ma faalatalata atili atu i le Tama Faalelagi ma Iesu Keriso. E fesoasoani polokalama ma gaio-oiga a le Ekalesia ia ausia nei faamoemoega.

O le ala sili e mafai e taitai ona aoao atu ai isi ia avea ma “soo moni” o a latou lava faataitaiga patino. O lenei mamanu---o le avea o se soo faamaoni ina ia mafai ai ona fesoasoani i isi ia avea ma soo faamaoni---o le faamoemoega lea o loo i tua atu o valaauga uma i le Ekalesia.

A auauna atu taitai e tusa ai ma lenei mamanu, ua latou fesoasoani i tagata o le Ekalesia ina ia naunau e agavaa mo se faaipopoga i le malumalu ma faama-nuiaga o se aiga e faavavau.

3.2

Mataupu Faavae o le Taitaiga o le Talalelei

3.2.1

Saunia Faaleagaga

Na poloaiina Peteru e le Faaola, “Pe a liua mai oe, ona e faamalosi ai lea i ou uso” (Luka 22:32). A oo ina liua mai taitai ma ua tuputupu ae faaleagaga, e mafai ona latou fesoasoani i isi ia liua ma tuputupu ae faaleagaga.

E saunia e taitai i latou lava faaleagaga pe a latou tausi i poloaiga, suesue i tusitusiga paia ma aoaoga a perofeta o aso e gata ai, tatalo, anapogi, ma faama-ualalo i latou lava i luma o le Alii. Faatasi ai ma lenei tapenapenaga, e mafai ai ona latou maua musumu-suga e taiala ai i latou i o latou olaga patino, o o latou tiutetauave i le aiga, ma o latou valaauga.

3.2.2

Auai i Aufono

I aufono, e fono ai taitai i lalo o le taitaiga a taitai pulefaamalumalu e talanoaina auala e fesoasoani ai i tagata taitoatasi ma aiga. E taiala e le Agaga Paia, latou te galulue faatasi e fuafua auala tauaogaina e tautuaina ai tagata o a latou faalapotopotoga. O nisi o faataitaiga o aufono i le Ekalesia o le aufono a le uarota, aufono a le siteki, au epikopo, ma au perezitene o korama ma ausilali. Mo se taiala i le auai i aufono, tagai mataupu 4.

3.2.3

Auauna Atu i Isi

E faapei o le Faaola, e saili ia taitai e auauna atu i tagata taitoatasi ma aiga, i le faaleagaga ma le faaletino. Latou te popole mo tagata taitasi, ae le na o le puleaina o se faalapotopotoga. Latou te aapa atu i tagata fou, o tagata ua le toaaga mai, ma i latou atonu ua tuuatoatasi pe o manaomia le faamafanafanaga.

O le faamoemoega o le auaunaga o le fesoasoani lea i isi ia avea ma soo moni o Iesu Keriso. O le auau-naga i isi e aofia ai le:

- Manatuaina o o latou igoa ma faamasani ma i latou (tagai i le Moronae 6:4).
- Alofa ia i latou e aunoa ma le faamasinoina o i latou (tagai i le Ioane 13:34–35).
- Vaavaaia o i latou ma faamalosi lo latou faatuatua “taitoatasi,” e pei ona faia e le Faola (3 Nifae 11:15; 17:21).
- Faavaeina o se faigauo faamaoni ma i latou ma asiasi atu ia i latou i o latou fale ma isi nofoaga (tagai i le MFF 20:47).

E faaopoopo atu i le ave a ai ma ni tuaoi manatu popole ma ni tagatanuu lelei, ua i ai foi i tagata o le Ekalesia ni tofiga patino e auauna atu i tagata taitoatasi ma aiga o ni uso ma tuafafine o auaunaga (tagai i le 7.4, 9.5).

3.2.4

Aoao Atu le Talalelei a Iesu Keriso

O taitai uma lava o ni faiaoga. O le aoao atu ma le mataalia e musuia ai tagata e faamalolosia a latou sootaga ma le Atua ma ola e tusa ai ma mataupu faavae o le talalelei.

O aoaoga aupito mamana a taitai e maua mai i a latou faataitaiga faaletagata lava ia. E aoao atu foi taitai e ala i le faasoaa atu o a latou molimau ma faatautaia talanoaga faaleaoaoga faavae i fonotaga faaleautaitai, o vasega, ma gaoioiga. Latou te aoao atu mai tusitusiga paia ma upu a perofeta o aso e gata ai. Latou te iloa “o le talai atu o le afioga . . . [ua] i ai sona uiga mamana tele atu . . . nai lo le pelu, po o se isi lava mea” (Alema 31:5).

E le gata i le aoao atu o le talalelei e i latou lava, o taitai perisitua ma ausilali ua i ai le tiutetauave mo le maualuga o le aoaoina ma le aoao atu i a latou faalapotopotoga. Latou te faamaunoina o aoaoga e tuu atu ia latou vasega e ‘anoa, e faagaetia, ma e ogatusa ma aoaoga faavae.

Mo nisi taitaiga e uiga i le aoao atu o le talalelei ma le vaaiga o taumafaiga e faaleleia atili ai le aoaoina ma le aoao atu, tagai i le 5.5.

3.2.5

Taitaiina o Faalapotopotoga a Perisitua po o Ausilali

E sili atu ona mataalia taitai i a latou taumafaiga e faamalosi i isi pe a latou mulimuli i taiala faavae a le Ekalesia. O loo maua taiala mo le taitaiina o faalapotopotoga a perisitua ma ausilali i mataupu e 7–12.

3.3

Faatonuga Faaopoopo mo Taitai

3.3.1

Fai ma Sui o le Alii ma Lana Ekalesia

Ona o taitai o le Ekalesia ua valaauina e le Alii e ala i Ana auauna tofiaina, ua fai ai i latou ma sui o Ia ma Lana Ekalesia. O le ave a ai ma sui o le Faola, e vaa-vaai atu taitai ia te Ia e fai ma o latou faaa’oa’o. Sa Ia fetalai mai: “O a ituaiga o tagata e tatau ona outou i ai? E moni, ou te fai atu ia te outou, e pei lava o a’u nei” (3 Nifae 27:27).

3.3.2

Fausia le Lotogatasi ma le Galulue Faatasi

Na fetalai mai le Alii, “Ia tasi outou; ma afai tou te lē tasi e lē a a’u outou” (MFF 38:27). E faamalosiaua e taitai pulefaamalumu le lotogatasi e ala i le sailia o fautuaga mai alii ma tamaitai o loo latou galulue faatasi. E fesoasoani uso o au peresitene ma aufono e faavae le lotogatasi e ala i le fefaasoai o lagona ma manatu faamaoni, fesootai manino atu, ma faalogo- logo le tasi i le isi.

A mulimuli taitai o faalapotopotoga a le Ekalesia i o latou taitai perisitua, ma a lotogatasi sui auai o au peresitene ma aufono, e mafai ona latou maua le

taitaiga mai le Agaga Paia ma taitai e tusa ai ma le finagalo o le Alii.

3.3.3

Saunia Isi e Avea ma Taitai ma Faiaoga

I nisi uarota, e faalagolago tele taitai i se vaega toaitiiti o tagata e tuuina atu auaunaga i faalapotopotoga faaleperisitua ma ausilali. O lena mea e mafai ona mamafatu i ni nai tagata toaitiiti faamaoni, ma e mafai foi ona le maua ai e isi aafiaga e ono fesoaosani ia i latou e aoao ma tuputupu ae ai. O taitai magafagafa e tuu atu i tagata auai uma ia avanoa e galulue ai.

A manatunatu ma le agaga tatalo ia taitai pulefaamalumu i tagata e faatumuina tofiga faaleautaitai ma faiaoga, e tatau ona latou manatua o le a faaagavaaina e le Alii i latou Na te valaauina. E le moomia e tagata o le ekalesia ona matua maoae se poto masani a o lei avea o ni faiaoga ma taitai. E mafai ona latou aoao mai aafiaga, e ala i le faaaogaina o le faatuatua ma le galulue ma le maelega, ma e ala i le mauaina o faatonuga ma le lagolago mai o latou taitai.

O taitai pulefaamalumu e vaavaai mo auala e tuu atu ai avanoa mo auaunaga, i tagata fou, o tagata ua toe toaaga mai i le Lotu, ma talavou nofofua matutua. E sagisagi fiafia tagata fou ma e ua toe foi mai e uiga i le talalelei toefuataiina, ma e tele ina latou saunia mo avanoa e auauna atu ai i isi ma aoao ai e uiga i le Ekalesia. E manaomia e talavou nofofua matutua ia avanoa e saofaga atu ai i le galuega a le Alii ma tuputupu ae ai faaleagaga.

Mo faamatalaga e uiga i le fautuaina atu o tagata e galulue i valaauga i le Ekalesia, tagai i le 19.1.1 ma le 19.1.2.

3.3.4

Faamatuu Atu Tiutetauave ma Faamautinoa e Tali Atu I Ai

E le mafai ma e le tatau i taitai taitoatasi ona latou faia mea uma e i latou lava. O taitai e taumafai e soona fai

le mau mea o le a “matua tigaina” (Esoto 18:18), ma o le a faapena foi i tagata latou te auauna i ai. E ao i taitai ona faamatuu atu i isi avanoa e auauna atu ai, e pei o fesoasoani, failautusi, ma sui o aulou po o komiti.

O le faamatuu atu e tele atu mea e aofia ai nai lo le na ona tuuina atu o se tofiga i se tagata. E aofia ai elemene nei:

- Faamalamalama ia faamoemoega o le tofiga, fautuaina atu auala e mafai ona faia ai, ma faamalamalama atu pe o afea e tatau ona maea ai. E ao i le tagata ua tofia ona malamalama ma talia le aia e faatino ai le tofiga ma lipoti atu.
- Tausi se faamaumauga tusitusia o le tofiga ma siaki le tulaga alualu i luma mai lea taimi i lea taimi.
- Faaaloogia taumafaiga a le tagata na tofia e atiina ae fuafuaga ma faataunuu le tofiga. E tuu atu e taitai le faamalosiuga ma le fesoasoani pe a manaomia ai.
- Fesili atu i le tagata e toe lipoti atu e uiga i le tofiga. A uma ona mau le lipoti, e talia e le taitai ia taumafaiga sili a le tagata ma faali atu i ai le agaga talisapaia mo mea lelei na faia e le tagata.

3.3.5

Lapata'ia i le Agasala ae Alofa i le Tagata Agasala

E manaomia ona mausali ia taitai ma ia le maluelue ia latou lapataiga e faasaga i amioga agasala ae ia mutimutialofa ma agalelei ia i latou o e agasala. Latou te taulimaina isi e faapei ona taulimaina ai i latou e le Faaola. O le faia o lena mea e fesoasoani ai i tagata auai ia lagonaina le alofa o le Alii mo i latou a o latou faaaogaina le Togiola i o latou olaga.

3.3.6

Faamalosiuga Atu ia Migao

O le migao o se uiga tauagafau ma le toafilemu o le tapuai ma le faaloalo i le Atua. E taitai atu ai i le

aoaoina o le talalelei ma faaaliga patino. O le migao moni e sau mai totonu o tagata taitoatasi.

E mafai ona fesoasoani taitai e atia'e se siosiomaga migao i faapotopotoga a le Ekalesia. I sauniga faamanatuga, o konafesi faalesiteki, ma fonotaga faapena, e faatuina e taitai se faataitaiga o le migao a o latou alaala i luga o le tulaga. E faamalosiuaia foi e taitai le migao e ala i le fuafuaina o musika tapuai ma lauga musuia. E mafai e faiaoga ona uunaia le migao i totonu o potuaoga e ala i le saunia o lesona musuia, vave faatulagaina o potu, faaaogaina o ata ma musika talafeagai, ma le faafeiloaiina o tagata o le vasega i se ala toafilemu, ma le alofa. E faaleleia atili ia sauniga tapuai ma vasega i le Lotu pe a faia e le uarota atoa se taumafaiga ia migao.

3.3.7

Saunia Lisi Tusitusia o Mataupu mo Fonotaga

E mafai ona avea lisi tusitusia o mataupu o ni taiala mo taitai pe a latou talanoaina auala e feaunaai ai. Afai e tufa ia lisi o mataupu a o lei amataina le fono po o le fuafuaina o fonotaga, o le a sili ona saunia taitai mo talatalanoaga. O loo maua taiala mo le sauniaina o lisi o mataupu talanoaina mo fonotaga eseese i le mataupu 4 ma mataupu e 7--12.

3.3.8

Fuafua ma se Faamoemoega

E mafai e taitai ona fuafua ia gaoioiga, lesona, ma isi taumafaiga e faamanuia ai olaga o tagata o le uarota. Latou te fuafuaina lava e le aunoa faatasi ma se faamoemoega i le mafaufau ina ia aoga a latou taumafaiga ia i latou o loo latou tautuaina. I le fuafuaina o gaoioiga, e mulimuli ia taitai i mataupu faavae o i le 13.1 ma le 13.2. I le fuafuaina o aoaoga faamasani ma aoaoga faaletalalelei, latou te mulimuli i mataupu faavae o i le 5.5.

E faia foi e taitai ni fuafuaga mo se taimi umi mo a latou faalapotopotoga. E aofia ai i lena mea le tausia

o se kalena faaletausaga, faatutuina o sini, ma le iloiloina faavaitaimi o le gasologa e ausia ai na sini.

Faatasi ma le fesoasoani a failautusi, e tausia ai e taitai se talafaamaumau tusitusia o a latou fuafuaga ma iloa ai le alualu i luma i le faamacaina o tofitofiga. A uma ona faatino a latou fuafuaga, latou te iloiloina pe o le a le lelei na ausia ai e fuafuaga o latou faamoemoega. E fesoasoani leni iloiloiga i fuafuaga i le lumanai.

3.3.9

Faaaoga Punaoa a le Ekalesia e Aoa Ai Tiute

E faaoga e taitai punaoa nei e fesoasoani latou te aoa ai ma faataunuu o latou tiute:

- O le tusitaulima leni. E tatau i au peresitene o siteki ma au epikopo ona faamasani i le tusitaulima atoa leni. O isi taitai e tatau ona faamasani i mataupu 1–6, o mataupu e uiga i a latou faalapotopotoga, ma nisi lava faamatalaga e faatatau i o latou tiutetauave. Ua aoa mai e le tusitaulima ia mataupu faavae ma faiga e mafai ona fesoasoani ia i latou e auauna atu ai ma le mataalia.
- Lipoti. E tuuina atu e failautusi i taitai ia lipoti o loo faaali ai le alualu i luma o tagata taitoatasi ma vaega. E fesoasoani leni faamatalaga i taitai e malamalama ai pe o ai tagata ma faalapotopotoga e manaomia ona latou gauai faapitoa atu i ai.
- Faatonuga mai taitai i le lotoifale. A uma loa lava ona lagolagoina, e tatau i taitai fou uma lava ona maua se aoaoga faamasani e uiga i le valaauga. O taitai e tuuina atu le aoaoga faamasani e faaauu pea ona tuuina atu aoaoga ma le lagolago i fonotaga faaleautaitai ma fesoootaiga patino.
- O anomea mo aoaoga a le Ekalesia. O loo maua nei punaoa i le vaega o le Auauna Atu i le Ekalesia o le LDS. Org pe mai le laumua o le Ekalesia po o le ofisa o le pulega ua tofia.
- Mekasini a le Ekalesia ma isi lomiga a le Ekalesia.

3.4

Faamoemoega o Taitaiga

Ua faatuina e le Au Peresitene Sili ma le Korama a Aposetolo e Toasefululua ia faamoemoega nei mo taitai e mafaufau pea i ai a o latou faalateleina o latou valaauga.

E faamalosiaina e taitai ia tagata uma o le ekalesia ia maua sauniga tataua uma o le perisitua, ia tausia feagaiga e faatatau i ai, ma ia agavaa mo le faaeaga ma le ola e faavavau. E taiala e taitai o le Ekalesia ia taumafaiga a korama o le perisitua, ausilali, ma aufono a le siteki ma uarota e fesoasoani ina ia fua mai taunuuga nei:

Aiga: Aoao atu e aupito maualuga le taua o le aiga ma le auaiga o le iunite faavae faatulagaina o le Ekalesia. Faamamafa atu le tulaga o le perisitua maualuga e fesoasoani ai i tagata taitoatasi ma aiga ia agavaa mo le faaeaga (tagai MFF 84:19–22). Ia uunaia tagata taitoatasi o le aiga--matua ma fanau--ia suesue i tusitusiga paia, tatalo e le aunoa, ma ola i le talalelei a Iesu Keriso.

Tagata Matutua: Ia uunai tagata matutua taitoatasi ina ia agavaa mo le mauaina o sauniga o le malumalu. Aoao tagata matutua uma ia faailoa o latou augatuaa ma faia sauniga e fai ma sui o i latou i le malumalu.

Autalavou: Fesoasoani e saunia alii talavou taitoatasi ia maua le Perisitua Mekisateko, ia maua sauniga o le malumalu, ma ia agavaa e tala'i faamisiona. Fesoasoani e saunia tamaitai talavou taitoatasi ina ia agavaa e osia ma tausia feagaiga paia ma maua sauniga o le malumalu. Ia faamalolusia le autalavou e ala i le auai i gaoioiga 'anoa.

Tagata Uma o le Ekalesia: Fesoasoani i taitai perisitua ma ausilali, aufono a uarota, faifeau faamisiona a le uarota, ma le au paia e galulue soosoo tau'au i se taumafaiga paleni e laveai mai tagata taitoatasi, faamalolusia aiga ma iunite o le Ekalesia, ia faateleina le toaaga o le au perisitua, ma faapotopoto mai Isaraelu e ala i le liliu mai, faatumauina, ma le faatoaagaina mai. Ia aoao tagata o le au paia ia saunia mea e manaomia mo i latou lava ma o latou aiga, ma ia fesoasoani atu i le ala a le Alii i ē matitiva ma ē le tagolima.

4.

O Le Aufono a le Uarota

4.1

Aufono i le Ekalesia

O le Ekalesia a le Alii e pulea e ala i aufono i faatulagaga aoao, eria, siteki, ma uarota. O nei aufono e taua i le faatulagaga o le Ekalesia.

I lalo o ki o le taitaiga a le perisitua i faatulagaga taitasi, e soalaupule faatasi taitai mo le manuia o tagata taitoatasi ma aiga. E fuafuaina foi e sui auai o aufono le galuega a le Ekalesia e faatatau i o latou tofiga. O aufono magafagafa e valaaulia le faaalia atoatoa o manatu mai sui auai uma o le aufono ma tuufaatasia a latou taumafaiga e tali atu ai i manaoga o tagata taitoatasi, aiga, ma faalapotopotoga.

I le avea ai ma faitaulaga sili pulefaamalumalu o le uarota, e pulefaamalumalu le epikopo i aufono e tolu e faatatau i ai: o le au epikopo, komiti taitai o le perisitua, ma le aufono a le uarota. Ua tuuina atu i lenei mataupu se faamalalamalama o nei aufono taitasi.

4.2

Au Epikopo

Ua i ai i le au epikopo le tiutetauave mo tagata uma o le uarota, faalapotopotoga, ma gaoioiga. E masani ona fonu le au epikopo e le itiiti ifo i le taitasi i le vaiaso. E auai ai le failautusi o le uarota ma le failautusi faapitoa. Mo mataupu fautuaina, tagai 18.2.6.

E sili ona lelei le faailoa atu o faaiuga a le epikopo ma faatino pe a faia pe a uma ia talatalanoaga ma ona fesoasoani ma, pe a talafeagai ai, le aufono a le uarota. I nei faatalatalanoaga e le faasoa atu ai e le epikopo mea e tatau ona ia le faalauaiteleina.

4.3

Komiti Taitai o le Perisitua

O le komiti taitai o le perisitua a le uarota e aofia ai le au epikopo, failautusi a le uarota, failautusi faapitoa a le uarota, taitai vaega o faitaulaga sili, peresitene o le korama a tocaina, taitai misiona a le uarota, ma le peresitene o Alii Talavou.

E fonu e le aunoa le KTP e talanoaina ai mataupu tau i le perisitua. O le mea masani, e le tatau ona talanoaina e le KTP ia mataupu o le a talanoaina e le aufono a le uarota. Peitai, e ono aoga mo le KTP ona muai iloiloaina ni nai mataupu o le a i ai i le lisi o mataupu o le fonu a le aufono a le uarota. Mo le faafaigofieina, e mafai ona fonu le KTP ma sosoo atu ai lava ma le fonu a le aufono a le uarota.

A manaomia ai, e mafai e le epikopo ona valaaulia le peresitene o le Aualofa e auai atu i nisi o fonotaga a le komiti taitai o le perisitua a le uarota, e talanoaina ai mataupu faaleulefe e le faalauaiteleina, ma faamaopoopo ai tofitofiga o faiaoga o aiga ma faiaoga asiasi.

4.4

Aufono a le Uarota

O le aufono a le uarota e aofia ai le au epikopo, failautusi a le uarota, failautusi faapitoa a le uarota, taitai vaega o faitaulaga sili, peresitene o le korama a tocaina, taitai misiona a le uarota, ma peresitene o le Aualofa, Alii Talavou, Tamaitai Talavou, Perimeri, ma le Aoga Sa.

O tagata o le aufono a le uarota e taumafai e fesoasoani i tagata taitoatasi e fausia ni molimau, maua

sauniga faaola, tausia feagaiga, ma avea ma soo faapaiaina o Iesu Keriso (tagai i le Moronae 6:4–5). O sui uma o le aufono a le uarota ua i ai se tiutetauave aoao mo le soifua-manuia o tagata o le uarota. Ua i ai foi i taitai o le perisitua ma ausilali se tiutetauave patino e vaavaaia ma faamalosi i tagata taitasi i a latou faalapotopotoga.

E masani lava, e mafafuaina e le aufono atoa a le uarota na o mataupu e (1) aoga mai le galulue faatasi o faalapotopotoga, (2) e aoga mai le talanoaga ma taumafaiga tuuafaatasi a le aufono, pe (3) o se popolega aoao mo le uarota atoa. O le tele o mataupu e patino i le faalapotopotoga a le au perisitua po o ausilali, e tatau lava ona soalaupule e taitai i lena faalapotopotoga, ae le o le aufono atoa a le uarota. E le gata i lea, e mafai e sui taitasi o le aufono ona talanoa atu i le epikopo i ni mataupu maaleale pe le faalauaitelina.

4.5

O Le Galuega a le Aufono a le Uarota

4.5.1

Fesoasoani i Tagata Taitoatasi ia Alualu i Luma

E fai ai e tagata o le aufono a le uarota le tele o a latou galuega i fafo atu o fonotaga a le aufono o le uarota. Latou te galulue faatasi ma o latou fesoasoani faapea ma faiaoga o aiga, faiaoga asiasi, faapea ma isi e aapa atu ai ma auauna atu i tagata o a latou faalapotopotoga ma isi e manaomia le fesoasoani.

E taumafai sui o le aufono a le uarota ia iloa e uiga i manaoga, soifua-manuia, ma le alualu i luma faaleagaga o tagata o a latou faalapotopotoga. E tatau foi ona latou iloa e uiga i tagata o loo feagai ma luitau po o tulaga fesuisui. O lena faamatalaga e mafai ai e i latou ona faamalolosia i latou o e sili ona manaomia la latou fesoasoani. O le taimi foi lava lea, latou te faaloaloga ai tulaga patino o

le tagata ma le aiga. E na o le epikopo e taulimaina mataupu o le agavaa o le tagata.

E mafai ona fesoasoani punaoa nei i sui auai o le aufono a le uarota ia latou silafia ai le alualu i luma o tagata o le ekalesia ma tagata sailiili:

1. Lipoti o le auai o tagata, e pei o le Lipoti Faa-lekuata. O lipoti nei e saunia e le failautusi o le uarota. E aumaia ai faamatalaga e uiga i le toaaga mai i le Lotu, tulaga o sauniga, ma mea o agaigai i ai tagata taitoatasi, o vai-tausaga, ma le uarota atoa. I uarota e faaoga ai polokalama otometi mo le tausiga o faamaumauga, e mafai e le failautusi ona saunia isi lipoti o loo i ai faamatalaga aoga.
2. Lipoti mai faiaoga o aiga ma faiaoga asiasi.
3. Fomu o le Alualu i Luma o Tagata Fou ma Tagata Ua Toe Foi Mai E faaoga sui o le aufono a le uarota lea fomu e fuafua ai auala patino e aoao atu ai ma faamalolosia tagata fou mai le taimi o o latou papatisoga ma faamauga seia oo ina latou maua faaega o le malumalu. E mafai foi ona faaoga e sui o le aufono a le uarota lea fomu e fuafua ai pe faapefea ona fesoasoani i tagata ua le toaaga mai e saunia ai ia maua ia sauniaga e talafeagai ma o latou tausaga, e aofia ai ma sauniga o le malumalu.
4. Pepa Faamaumau o le Alualu i Luma. E faaoga e faifeautalai faamisiona le fomu lea e tusia ai le tulaga alualu i luma o le tagata sailiili. E faasoa e faifeautalai lena faamatalaga i le taitai misiona a le uarota, o le na te faasoa atu i le aufono a le uarota.

4.5.2

Fesoasoani e Faamalosi le Uarota

E galulue faatasi sui o le aufono a le uarota e fausia le malosi faaleagaga ma le lotogatasi i totonu o le uarota. E vaavaaia foi e le aufono a le uarota le fuafuaga o gaoioiga mo le uarota. E ao ona fuafuaina

gaoioiga e faataunuu ai faamoemoega e taulai i le talalelei. Mo nisi faamatalaga e uiga i gaoioiga, tagai i le mataupu 13.

4.6

Fonotaga a le Aufono a le Uarota

E fono e le aunoa le aufono a le uarota (a laitiiti e tasi i le masina). E masani o le umi o le fono e 60 i le 90 minute.

O le epikopo e pulefaamalumu i le fonotaga. Afai e le i ai, e mafai ona ia tofia se fesoasoani e pulefaamalumu. Peitai, e le faia ni faaiuga tuga pe a le o i ai le epikopo.

Pe a fautuaina ai e le taitai misiona a le uarota, e mafai e le epikopo i nisi taimi ona valaaulia faifeautalai faamisiona e fono ma le aufono a le uarota.

4.6.1

Mataupu Faavae e Taiaina Ai

O taitai perisitua ma ausilali e auai i fonotaga a le aufono a le uarota i ni tulaga patino se lua: (1) o sui auai o le aufono a le uarota e fesoasoani i le epikopo e talanoaina manaoga ma atugaluga o le uarota ma sailia ni tali ma le (2) o ni sui o a latou faalapotopotoga. E sailia e nei taitai le taiala a le Agaga Paia a o latou tutufaatasi i le alofa ma le popole mo i latou o loo latou tautuaina.

O fonotaga a le aufono a le uarota, e tatau ona taulai atu i mataupu o le a faamalolosia ai tagata taiotasi ma aiga. E itiiti se taimi e faaalu e le aufono i le faakalenaina, fuafuaina o gaoioiga, ma isi pisinisi faaleautaitai.

I le taimi o le fonotaga, e faamalalama e le epikopo mataupu taitasi ua mafauaina, ae e masani ona ia le filifili pe faapefea ona foia le faafitauli sei vagana ua ia faafofoga i le talanoaina. Na fautuaina le talanoaga e aunoa ma le fuuaoina. Na te fesili atu i fesili ma e mafai ona fesili i sui patino o le aufono mo a latou fautuaga. E faalogologo o ia ma le toto'a

a o lei faia se faaiuga. O nei talanoaga e tatau ona aumaia ai se agaga o musumusuga.

E fautuaina sui o le aufono e talanoa faamaoni mai o latou lava aafiaga patino ma mai o latou tulaga o ni taitai o faalapotopotoga. E tatau ona lagona e alii ma tamaitai o o latou manatu faaalua e faatauaina o ni tagata auai atoatoa i fonotaga. E sailia e le epikopo manatu mai taitai o le Aualofa, Tamaitai Talavou, ma le Peraimeri i mataupu uma e mafauaina e le aufono a le uarota. O nisi taimi o manatu faaalua o tamaitai e ese mai manatu o alii, ma e faaopoopo atu i le vaaiuga e tatau ai mo le malamalama ma le tali atu i manaoga o tagata o le uarota.

A maca se talanoaga felafolai, e mafai e le epikopo ona faia o se faaiuga, pe e mafai foi ona faatali e talanoaina atili le mataupu faatasi ma ona fesoasoani. A uma ona ia faia o se faaiuga, e ao i sui o le aufono ona lagolagoina i se agaga o le lotogatasi ma le paegamalie.

Afai e malosi ni lagona lē mautinoa o sui auai o le aufono e uiga i se faaiuga taua, e mafai ona faatali le epikopo mo le isi fonotaga a le aufono, e iloilo atili ai le mataupu ma sailia le faamautinoaga faaleagaga ma le lotogatasi.

E tatau i sui auai o le aufono ona tausisia le lē faalauaitelina o soo se faamatalaga patino pe maaleale e uiga i tagata o le au paia, ma mataupu o loo talanoaina.

4.6.2

Lisi Faataitai o Mataupu o le Fono

I lalo o le taitaiga a le epikopo, e saunia ai e le failautusi faapitoa se lisi o mataupu o le fono mo le fonotaga a le aufono. E valaaulia e le epikopo sui o le aufono e faafesootai le failautusi faapitoa e tuu a latou mataupu i le lisi. E mafai foi e le failautusi faapitoa ona fautuaina mataupu o le lisi, e aofia ai ma mea mai fonotaga talu ai ia e ono manaomia ona toe talanoaina pe tulitatao. E mafai foi ona saunia e le failautusi faapitoa se kalena o mea o loma a le uarota mo le toeiloiloina e sui o le aufono.

O loo i lalo se lisi o mea e ono aofia ai i le lisi o mataupu o le fonu. E le tatau ona taumafai le epikopo e fai uma nei mea i fonotaga uma. Ae nai lo lena, na te faamuamua i lisi o mataupu o fonu taitasi e soalaupule muamua mataupu e sili ona taua. Nai lo le talanoaina o le mau mataupu i se ala faapalepalealuga, e sili atu le taulai i ni nai mea o le a faamanuiaina ai le toatele o tagata taitoatasi ma aiga. E faalagolago le epikopo i musumusuga e iloa ai pe o a mataupu e sili ona taua i se taimi patino.

1. Ni lipoti pupuu e uiga i tofiga mai le fonotaga talu ai.
2. Soifua manuia faaleagaga ma le faaletino. Talanoaina le soifua-manuia faaleagaga ma le faaletino o tagata ma aiga e filifilia. Fai fuafuaga e fesoasoani ai ia i latou e taulima o latou manaoga, e aofia ai manaoga mo se taimi umi. Talanoaina pe faapefea ona faamalolosia aiga. Mo nisi faamatalaga, (tagai 6.2.2).
3. Faifeautalai. Atia'e ma toeiloilo le fuafuaga a le uarota mo misiona (tagai 5.1.8). Faaoga le Pepa Faamaumau o le Alualu i Luma, e iloilo ai tagata e papatiso ma tagata sailiili ua agaigai i luma i le taimi nei. E mafai e le epikopo ona fesili i le taitai misiona e taitai lenei iloiloga. Mo nisi faamatalaga, (tagai i le 5.1.2).
4. Faatumauina o tagata liliu mai Iloilo le alualu i luma o uso fou taitasi o loo lisi i le fomu o le Alualu i Luma o Tagata Fou ma Tagata ua Toe Foi Mai; fuafua ni auala e fesoasoani ai ia i latou e faaauau le agaigai i luma (tagai i le 5.2.3).
5. Faatoagaina mai. Iloilo le alualu i luma ma le faaumeaina o tagata ua le toaaga mai o loo lisi i le fomu o le Alualu i Luma o Tagata Fou ma Tagata ua Toe Foi Mai i le Ekalesia; fuafua ni auala e fesoasoani ai ia i latou e faaauau ai le alualu i luma (tagai 5.3.2).
6. Malumalu ma talafaasolopito o aiga. Iloilo le alualu i luma o tagata taitoatasi o le au paia o e o loo sauniuni mo le mauaina o sauniga o

le malumalu. A lagona e le epikopo le mea e manaomia, ia talanoaina pe faapefea ona faamalolosia tagata e auai atili atoatoa i le galuega o le malumalu ma talafaasolopito o aiga. Mo nisi faamatalaga, (tagai 5.4.2).

7. Aoa mai ma le aoao atu o le talalelei. Talanoaina pe faapefea ona faaleleia atili le aoao mai ma le aoao atu o le talalelei i faatulagaga i le Lotu ma i le aiga (tagai i le 5.5.2).
8. Lipoti o le galuega a le korama a toeaina, vaega a le au faitaulaga sili, ma faalapotopotoga a ausilali. O le vaega leni o le fonotaga e tatau ona puupuu ina ia le faalavelaveina ai le taulai atu o le aufono i tagata taitoatasi.
9. Fuafuaga o le kalena ma gaoioiga e fesoasoani ai i le taulimaina o manaoga faaleagaga, faaletino, ma agafesootai a tagata o le uarota (tagai i le mataupu e 13).
10. Tupe Faaagaaga mo Aoga (i nofoaga ua faamania ai le polokalama). Toe iloilo le agaigai i luma o tagata o faaogaina le polokalama.
11. Aoaoga faaii mai le au epikopo.

4.6.3

Auala e Faatino ai se Faaiuga

E sailia e le aufono a le uarota ia musumusuga e atia'e ai se auala o le faatinoga ia manuia ai olaga o tagata o le uarota. O le taulaiga a le aufono o le fesoasoani lea i tagata, ae le o le faatautaia o polokalama.

E faaoga e taitai perisitua ma ausilali a latou lava fonotaga faaleautaitai e iloilo ai faaiuga a le aufono o le uarota, ma tauanau le fesoasoani a isi taitai ma faiaoga i a latou faalapotopotoga e faataunuu tofitofiga a le aufono. E faapena foi, e faia e le taitai misiona se fonotaga faamaopoopo faaifeautalai faatasi ma faifeautalai faamisiona ma faifeautalai a le uarota e faatino ia faaiuga a le aufono a le uarota. O

lenei galuega i faalapopototoga o se faalautega o le agaga ma le faamoemoega o le aufono a le uarota.

A oo ina faia se auala o le faatinoga, e ao i sui o le aufono ona faeteete ina ia taumamao mai le soona faatigainaina o tagata taitoatasi ma aiga (tagai Mosaea 4:27; MF&F 10:4). O le uluai faamuamua a tagata taitasi o lona aiga lea. E faamautinoa e le aufono a le uarota se paleni talafeagai i le va o matafai oi a le sui mo lona aiga ma ona tiutetauave i le Ekalesia.

E iloilo e le aunoa e sui o le aufono a le uarota ala taitasi o le faatinoga ma lipoti atu o latou tofitofiga. I le tele lava o mea, o le alualu i luma o le a moomia ai le gauai atu faifaipea ma tofitofiga e tulitatao.

4.6.4

Tiutetauave o le Failautusi a le Uarota

O le failautusi o le uarota na te tausia se faamaumauga o tofiga ma faaiuga e faia i fonotaga a le aufono. Na te faamautinoa e sa'o atoatoa ma talafeagai faamatalaga e faa'oga e le aufono a le uarota. Na te saunia ia kopi aupito lata mai o le fomu o le Alualu i Luma o Tagata Fou ma Tagata ua Toe Foi Mai. Na te saunia foi faamatalaga faafuainumera e tatau ai mai le polokalama otometi o faamaumauga

a le Ekalesia. Na te taulamua i le faailoa atu i le au epikopo ma sui o le aufono a le uarota e uiga i faamatalaga na te maua i nei punavai nai lo le faatalitali sei o latou fesili atu ia te ia.

O isi tiutetauave o le failautusi o le uarota o loo ootoo atu i le *Tusitaulima 1*, 13.4.2.

4.6.5

Tiutetauave o le Failautusi Faapitoa

O le failautusi faapitoa e saunia ia lisi o mataupu o fonotaga a le aufono a le uarota e pei ona ootoo atu i le 4.6.2. E mafai foi i le epikopo ona fesili atu ia te ia e fesoasoani e tulitatao ia sui o le aufono a le uarota i o latou tofitofiga. E le gata i lea, e mafai foi e le epikopo ona fesili atu ia te ia ia maua mai lipoti mai sui o le aufono e uiga i tulaga o tagata sailiili, tagata fou, ma tagata ua toe toaaga mai, ma isi mataupu.

E mafai e le failautusi faapitoa ona saunia le sootaga i le va o le aufono a le uarota ma le komiti taitai o le perisitua.

O isi tiutetauave o le failautusi faapitoa a le uarota o loo ootoo atu i le *Tusitaulima 1*, 13.4.4.

5.

O Le Galuega o le Faaolataga i le Uarota ma le Siteki

E auina atu tagata o le Ekalesia a Iesu Keriso “e galulue i lona tovine mo le faaolataga o agaga o tagata” (MF&F 138:56). O leni galuega o le faaolataga e aofia ai le galuega faamisiona a tagata o le au paia, faatumauina o tagata liliu mai, faatoaagaina mai o tagata ua le malolosi mai, galuega o le malumu ma talafaasolopito o aiga, ma le aoaoina atu o le talalelei. E faatonutonu e le au epikopo leni galuega i le uarota, ae fesoasoani i ai isi sui auai o le aufono a le uarota.

E ui e umia e le epikopo le tiutetauave laualuga i nei vaega, ae e faamaopoopo e le taitai misiona le galuega faifeautalai ma tagata o le uarota, e faamaopoopo e le taitai vaega o faitaulaga sili le galuega o le malumu ma talafaasolopito o aiga, a o le peresitene o le Aoga Sa e fesoasoani i isi taitai o le uarota i le faaleleia atili o le aoao mai ma le aoao atu o le talalelei. E mafai e le epikopo ona tofi se tasi o ona fesoasoani e faamaopoopoina le faatumauina o tagata liliu mai a o le isi e faamaopoopoina le faatoaagaina mai. E fesoasoani taitai perisitua ma ausilali taitasi i le faateleina o le galuega o le faaolataga o lana faalapotopotoga.

5.1

Galuega Faafaifeautalai a Tagata o le Au Paia

5.1.1

Epikopo ma Ona Fesoasoani

E taitai e le epikopo le aufono a le uarota e saunia ma mulumulita’ia se fuafuaga a le uarota mo le misiona, e pei ona faamalamalama mai i le 5.1.8.

E valaau e le epikopo ma vaetofia se e umia le Perisitua Mekisateko e avea ma taitai misiona a le uarota.

E mafai e le epikopo ma ona fesoasoani ona valaau ma vaetofia isi tagata o le au paia e avea ma faifeautalai o le uarota.

E tuu atu e le epikopo ma ona fesoasoani le faamuumua i le galuega faafaifeautalai a tagata o le au paia. Latou te aoao atu aoaoga faavae o le galuega faafaifeautalai e le aunoa. Latou te fautuaina tagata o le au paia e galulue ma faifeautalai faamisiona e saili, aoao, ma papatiso ia tagata sailiili. Latou te faia se faaitaiga e ala i le sailia ma le saunia o tagata taitoatasi ma aiga mo faifeautalai faamisiona e aoaoina.

E fesoasoani le epikopo ma ona fesoasoani ia i latou ua faamoemoe e faamisiona talai, e aofia ai tuafafine ma ulugalii, ia saunia e auauina atu i misiona.

5.1.2

Aufono a le Uarota

E sili ona lelei le galuega faafaifeautalai a tagata o le au paia pe a punouai atoatoa sui o le aufono a le uarota i taumafaiga faafaifeautalai. I korama ma ausilali, latou te fautuaina tagata e auai i le galuega faafaifeautalai i auala nei:

1. Sue ma saunia tagata ina ia aoaoina.
2. Fesoasoani i faifeautalai pe a latou aoao atu (i fale o le au paia, pe a mafai).
3. Faaumea tagata sailiili.
4. Saunia i latou lava ma a latou fanau e avea ma faifeautalai faamisiona.

I fonotaga a aufono a le uarota, e faia e sui o le aufono ma iloilo le fuafuaga o le misiona a le uarota (tagai 5.1.8). Latou te iloiloina tagata o le a papatiso, o isi tagata sailiili, ma isi mataupu mai Faamaumauga o le Alualu i Luma na saunia e faifeautalai faamisiona.

Latou te faia ni fuafuaga e fesoasoani ai i le agaigai i luma o tagata sailiili taitasi. Latou te ofoina atu fautuaga e uiga i faiaoga o aiga ma faiaoga asiasi e tatau ona i ai mo tagata sailiili ua sauniuni e papatiso ma faamauina.

Pe a fautuaina ai e le taitai misiona a le uarota, e mafai e le epikopo i nisi taimi ona valaaulia faifeautalai faamisiona e fono ma le aufono a le uarota.

5.1.3

Taitai Misiona a le Uarota

I lalo o le taitaiga a le epikopo, o le taitai misiona a le uarota e i ai tiutetauave nei:

Na te faamaopoopoina ia taumafaiga a le uarota e saili, aoao, ma papatiso ia tagata sailiili. Na te faamaopoopoina leni galuega faatasi ai ma le galuega a faifeautalai faamisiona ma faifeautalai a le uarota. I fonotaga a le aufono a le uarota, e mafai e le epikopo ona talosagaina o ia e taitai ia talanoaga e uiga i le galuega faafaifeautalai.

Na te faatautaia fonotaga faamaopoopo faafaifeautalai ma taitai le galuega a faifeau faamisiona a le uarota.

Na te faatulagaina ia tele ni avanoa e aoao atu ai faifeautalai faamisiona i vaiaso taitasi.

Na te faatulagaina sauniga o papatisoga o tagata liliu mai, ae fesoasoani i ai faifeautalai faamisiona (tagai i le 20.3.4).

E fesoasoani o ia e faamaopoopo ia faamauga o papatisoga o tagata fou i sauniga faamanatuga.

E auai o ia faatasi ma faifeautalai faamisiona i le aoaoina ma le faaumeaina o tagata sailiili.

E auai o ia i le vasega o Mataupu Faavae o le Talalelei, ma e mafai foi ona faiaoga i le vasega pe a tofia ai e le au epikopo.

E mafai ona valaauina se e umia le Perisitua Meki-sateko e avea ma fesoasoani i le taitai misiona a le uarota.

5.1.4

Faifeautalai a le Uarota

O le au epikopo ma le taitai misiona a le uarota e fuafuaina pe tofia faifeautalai a le uarota e moomia i le uarota. E galulue faifeautalai a le uarota i lalo o la latou taitaiga. O e umia le perisitua, tuafafine, ma ulugalii faaipoipo e mafai ona avea ma faifeautalai a le uarota. E le tau tofia ni a latou soa, ae e le tatau ona latou o taitoatasi pe a asiasi i fale. E le asiasi faatasi se alii ma se tamaitai o ni faifeautalai a le uarota sei vagana o se tane ma se ava.

E valaauina ia faifeautalai a le uarota mo se vaitaimi patino e auauna atu ai, e pei o le lua tausaga. E masani lava e le toe i ai nisi o latou tiutetauave i le Ekalesia, sei vagana ai tofitofiga e pei o faiaoga o aiga po o faiaoga asiasi, aemaise i aiga e le lolotu uma po o aiga foi ua le toe toaaga mai. Latou te le faaogaina ni pine o igoa.

O faifeautalai a le uarota e sueina ma saunia tagata mo faifeautalai faamisiona e aoao. Latou te fesoasoani foi i le faaumeaina ma le aoaoina o tagata sailiili.

E asiasi atu faifeau faamisiona a le uarota i aiga o le au paia e faamalosiau atu i tagata ia sailia aafiaga faafaifeautalai, ia faailoa mai tagata e mafai e faifeautalai ona aoao, ma saunia tagata ina ia aoaoina.

5.1.5

Fonotaga Faamaopoopo a Faifeautalai

O le taitai misiona e faatautaia se fonotaga faamaopoopo a faifeautalai faatasi ma faifeautalai a le uarota ma faifeautalai faamisiona. E faia e le aunoa lea fonotaga. Afai e i ai nisi uarota e galulue ai faifeautalai faamisiona, latou te auai soo mai pe a tusa ai ma tulaga talafeagai.

I le fonotaga lea, e faamaopoopo e le taitai misiona le galuega a faifeautalai faamisiona ma tagata o le uarota. E mafai foi e le taitai misiona a le uarota ona fuafua, faatulaga i le tele e mafai ai ia tagata e aoaoina e faifeautalai, ma fuafua foi ia i ai tagata o le au paia i le tele e mafai ai pe a aoaoina ia tagata sailiili.

5.1.6**Tagata o le Ekalesia ma Faifeautalai Faamisiona e Galulue Faatasi**

O le peresitene o le misiona na te umia ki mo le papatisoina ma le faamauiina o tagata liliu mai. I lalo o lana taitaiga, o faifeautalai faamisiona e i ai le tiutetauave muamua mo le aoaoina o tagata sailiili. I lalo o lana taitaiga, e faatautaia ai e faifeautalai faamisiona ia faatalanoaga o papatisoga ma le faamauga mo tagata taitoatasi ma faatagaina ia sauniga ina ia faia.

E faamasani le epikopo i tagata sailiili uma ma tulitataoina lo latou agaigai i luma. E ui na te le faatalanoaina tagata o le a papatiso, ae e feiloai o ia ma i latou taitoatasi a o lei papatisoina. Na te vaavaaia foi taumafaiga a tagata o le uarota e faaumea i latou. E peiseai o le a papatiso ma faamauiina tagata sailiili ma tumau le malolosi pe a mafana a latou faauooga ma tagata o le Ekalesia.

E masani lava, e le tuueseeseina soa a faifeautalai faamisiona ina ia galulue ai ma tagata o le uarota. Ae peitai, e mafai ona tuueseese e galulue ma tagata o le uarota pe a tatau ai ina ia faataunuu ai se aofaiga tele o ni aoaoga sa faatonuina. I tulaga faapea, e faamautinoa e le taitai misiona a le uarota ua malamalama ma taliaina e i latou o e galulue e fai ma soa i faifeautalai faamisiona ia tulafono o le misiona. Na te faatonuina i latou e le tatau ona tuua se faifeautalai faamisiona e aunoa ma se soa ua faatagaina.

5.1.7**Sauniga o Papatisoga ma Faamauga**

E tatau ona faatulaga ia sauniga o le Papatisoga i le taimi lava e tautino mai ai se tagata sailiili o le a papatiso. E le tatau ona masani ona toloina ia sauniga i tua atu o leni aso vagana e lei saunia se tagata. E le tatau ona tolopoina ia papatisoga o tagata o le aiga sei mafai e le tama ona maua le perisitua ma faatino e ia lava ia papatisoga.

O le sauniga o le papatisoga e maua ai avanoa e sue ai ma faamalosiua isi tagata sailiili. E ao ona faamalosiua tagata liliu mai e valaaulia tagata o o latou aiga, o isi latou te aiga, ma uo. E mafai foi e taitai o le Ekalesia ma faifeautalai ona valaaulia isi tagata sailiili o e ua aoaoina, o tagata e ono sailiili, ma taitai ma tagata o le au paia o le a galulue ma tagata fou. E mafai foi ona auai mai isi tagata o le uarota.

E faamauiina tagata liliu mai i se sauniga faamantuga i le uarota latou te nonofo ai, ae sili ai le Aso Sa e sosoo ma o latou papatisoga.

O taiala mo sauniga o papatisoga ma faamauga, e aofia ai taiala mo papatisoga ma faamauga o le au ta'i 8 tausaga, o loo maua i le 20.3.

5.1.8**Fuafuaga o le Misiona a le Uarota**

I lalo o le taitaiga a le epikopo, e atia'e ai e le aufono a le uarota se fuafuaga o le misiona a le uarota. E ao ona puupuu ma faigofie le fuafuaga. E ao ona aofia ai sini patino ma gaoioiga e fesoasoani ai i tagata o faalapotopotoga o le perisitua ma ausilali a le uarota e auai i le faatinoga o le galuega faafaifeautalai, faatumauina, ma le faatoaagaina mai. E faamaopoopo e le aufono a le uarota le fuafuaga o le misiona a le uarota faatasi ma fuafuaga a faifeautalai faamisiona ua tofi atu i le uarota. E ono fesoasoani laasaga nei i le faagasologa o lea fuafuaga:

1. Mafaufau i manaoga ma punaoa a le uarota i le galuega faamisiona a le uarota, faatumauina, ma faatoaagaina mai, e aofia ai le i ai o faifeautalai faamisiona.
2. Faatutu ni sini patino mo le galuega faamisiona a tagata o le au paia, faatumauina, ma le faatoaagaina mai ina ia ausia i le tausaga a sau.
3. Fuafua pe faapefea ona ausia ia sini. E mafai e taitai ona fuafua ni auala e siitia ai le vaaiga aoa o le uarota ma uiga faaalua e faatatau i le galuega faafaifeautalai. E mafai ona latou atia'e manatu

ma gaoioiga e fesoasoani ai i faifeautalai faamisiona e sue, aoao, ma papatiso nisi tagata sailiili. E mafai foi ona latou fuafuaina ni auala e faauo ai ma faamalolosa tagata fou ma faaleleia atili le faatoaagaina mai o tagata ua tau le o mai.

E iloiloia pea lava pea e le aufono a le uarota le fuafuaga a le uarota mo le misiona ma toe faatonu-tonu pe a manaomia ai.

5.1.9

Taitai o le Siteki

Peresitene o le Siteki ma Ona Fesoasoani

E tuu atu e le peresitene o le siteki ma ona fesoasoani le faamuamua i le galuega faafaifeautalai. Latou te aoao atu ia aoaoga faavae o le galuega faafaifeautalai e le aunoa ma fautuaina tagata o le siteki e galulue faatasi ma faifeautalai faamisiona e sue, aoao, ma papatiso ia tagata sailiili. Latou te faia se faataitaiga e ala i le sailia ma le saunia o tagata taitoatasi ma aiga mo faifeautalai faamisiona e aoaoina.

I ana faatalanoaga faifai pea ma epikopo taitasi, e fesili atu le peresitene o le siteki mo se lipoti e uiga i le alualu i luma o tagata sailiili i le uarota a le epikopo.

E fono e le aunoa le peresitene o le siteki ma le peresitene o le misiona e faamaopoopo le galuega a faifeautalai faamisiona i le siteki. O mataupu e talanoaina e aofia ai le numera ma nofoaga o faifeautalai, o le matafaioi a tagata o le au paia i le galuega faafaifeautalai, o le fesoasoani a faifeautalai i taumafaiga mo le faatumauina ma le faatoaagaina mai, o le fesoasoani a faifeautalai i le aoaoina o tagata auai i le lotoifale, ma fafaga, fale, ma fela'uaiga o faifeautalai.

Fautua Maua-luga e Tofia i le Galuega Faamisiona

E tofia e le au peresitene o le siteki se fautua maua-luga e naunau i le galuega talai e fesoasoani ia i latou i le vaai o taumafaiga ale siteki e sue, aoao, papatiso,

ma faamauina ia tagata sailiili. E mafai e leni fautua maua-luga ona taitaia ia talatalanoaga e uiga i nei autu i fonotaga a le komiti taitai o le perisitua, fonotaga a aufono a le siteki, fonotaga faaleautaitai a perisitua o le siteki, ma isi fonotaga a le siteki.

O le fautua maua-luga e tofia i le galuega faifeautalai e faia aoaoga faamasani a taitai misiona faatoa tofia a uarota. Na te saunia foi aoaoga faifai pea ma famalosiauga i taitai misiona uma o uarota, taitoatasi ma o se vaega. Faatasi ai ma le faamaoniga a le peresitene o le siteki, e mafai foi ona ia aoaoina taitai o uarota ma faifeautalai a uarota.

5.2

Faatumauina o Tagata Liliu Mai

O tagata fou o le Ekalesia e manaomia le lagolago ma le faauooga a taitai o le Ekalesia, faiaoga o aiga, faiaoga asiasi, ma isi tagata o le au paia. E fesoasoani leni lagolago i tagata fou ia mausali ai lo latou “liliu mai i le Alii” (Alema 23:6).

5.2.1

Manaoga o Tagata Fou o le Ekalesia

O le suiga e avea ma tagata auai o le Ekalesia e faigata tele mo le toatele o tagata. E tele ina aofia ai le taliaina o aoaoga fou faalelotu ma se ituaiga olaga fou. O tagata uma o le Ekalesia, aemaise o tagata fou, e tolu mea latou te manaomia e fesoasoani e faatumau lo latou malolosi i le Lotu: faauooga, avanoa e faamatua ai ma auauna i le Ekalesia, ma le fafagina i le afioga a le Atua (tagai Moronae 6:4). I lalo o le taitaiga a le au epikopo, e fesoasoani ia taitai o le perisitua ma ausilali i tagata fou i vaega nei.

5.2.2

Epikopo ma Ona Fesoasoani

O le epikopo e i ai le tiutetauave aoao mo le faatumauina o tagata liliu mai. Ina ia fesoasoani ia toaaga mai ia tagata fou i le Lotu, ua i ai i le epikopo ma

ona fesoasoani ia tiutetauave nei. E mafai e le epikopo ona tofia se tasi o ona fesoasoani e faamaopopo nei taumafaiga.

Latou te vaavaaia taumafaiga e faamautinoa ai ua maua e tagata fou taitasi le faaaumeaga.

Latou te faamautinoa ua maua e tagata fou matutua taitasi se valaaga po o isi avanoa e auauna atu ai.

Latou te faamautinoa o uso ua ta'i 12 tausaga ma matutua ae ua faauuina i le tofi talafeagai o le Perisitua Arona i se taimi vave pe a uma lo latou faamauga, e masani lava i totonu o se vaiaso. Latou te tagai foi ua maua e nei uso ia avanoa e faaoga ai le perisitua. O uso ua agavaa e papatiso ma faamauina, ua agavaa foi e maua le Perisitua Arona.

O le epikopo ma ona fesoasoani e vaaia le galuega a le taitai vaega o faitaulaga sili ma le peresitene o le korama a toecaina i le fesoasoani atu i uso ua ta'i 18 tausaga ma matutua ae e saunia mo le mauaina o le Perisitua Mekisateko. O uso e lei leva ona papatisoina ua 18 tausaga ma matutua ae e faauuina o ni toecaina pe a mavae ona latou auauna atu o ni ositaulaga, ua lava le malamalama ua atiina ae o le talalelei, ma faaalua lo latou agavaa. E leai se taimi patino e moomia ona avea ai ma se tagata o le ekalesia.

5.2.3

Aufono a le Uarota

I fonotaga a le aufono a le uarota, e iloilo e sui o le aufono a latou sini mo le faatumauina o tagata liliu mai e pei ona otooto atu i le fuafuaga o le misiona a le uarota (tagai 5.1.8). Latou te talanoaina le agaigai i luma o tagata fou taitoatasi ma faailoa mai vaega e ono manaomia ai e ia se lagolago atili. E mafai ona latou faaogaina le fomu o le Alualu i Luma o Tagata Fou ma Tagata Ua Toe Foi Mai e fai ma taitala o la latou talanoaga. Latou te fefautuaai i auala e fesoasoani ai i tagata fou ia lagonaina le alofa o isi tagata o le au paia, le olioli i le auauna atu i le malo o le Alii, ma le filemu e maua mai le ola ai i mataupu faavae o le talalelei.

E mafai e le aufono a le uarota ona talanoaina auala e mafai ai e le taitai misiona a le uarota ona galulue ma isi taitai perisitua ma ausilali e faamalolosia tagata faatoa liliu mai. E mafai foi e sui o le aufono a le uarota ona fautuaina mai avanoa e ono i ai mo le auaunaga e mafai ona tuuina atu i tagata fou, e pei o galuega i le malumalu ma le talafaasolopito o aiga.

5.2.4

Taitai Perisitua ma Ausilali

E pei ona faatonuina ai e le au epikopo, o taitai perisitua ma ausilali e saunia avanoa e fesoasoani ai i tagata fou ia matutua faaleagaga ma tumau le toaaga i le Lotu. Mo se faataitaiga, o le peresitene o le Aualofa ua i ai le tiutetauave e fesoasoani i tuafafine matutua e liliu mai. Talu ai o se alii ua matua e liliu mai o se toecaina faolioli, a le o le peresitene o le korama a toecaina o le taitai vaega o faitaulaga sili e i ai le tiutetauave e fesoasoani ai ia agaigai i luma, pei ona fuafuaina ai e le au epikopo. A silia ma le tasi le tagata o le aiga e auai i le Ekalesia, e faamaopoopo e taitai perisitua ma ausilali a latou taumafaiga i fonotaga a le aufono a le uarota.

E mafai e taitai perisitua ma ausilali ona fesoasoani i tagata fou i auala nei:

Latou te fesoasoani i tagata fou ia malamalama ma faaoga aoga faavae ma mataupu faavae o i lesona a faifeautalai.

Latou te faamautinoa ua iloa e tagata fou ia faiga faavae a le Ekalesia, e pei o le auala e tuu atu ai moli-mau, totogi sefuluai ma isi taulaga, ola i le tulafono o le anapogi, tuu atu se lauga, faatino sauniga o le perisitua, auai i le faatinoina o galuega o talafaasolopito o aiga, faatino papatisoga ma faamauga mo e ua maliliu (i mea e mafai ai), ma avea ma se faiaoga o aiga po o se faiaoga asiasi.

Latou te faamautinoa ua i ai ni tusitusiga paia a tagata fou, mekasini a le Ekalesia, ma soo se tusi lesona latou te ono manaomia mo vasega latou te auai ai i le Lotu.

Afai ua agavaa ia tagata fou mo le seminare po o le inisitituti, e fesoasoani taitai perisitua ma ausilali e lesitala i latou.

A oo ina agavaa ia tagata fou mo le mauaina o sauniga o le malumalu, e fesoasoani taitai perisitua ma ausilali ia i latou ia saunia, a le o se semina sauniuni mo le malumalu po o se isi auala.

E mafai e taitai perisitua ma ausilali ona tofia ni tagata poto masani o le au paia e fesoasoani e faaaumea ia tagata fou. Atonu e mafaufau ia taitai e tofia tagata o le au paia e aiga lelei ma tagata fou ona e tutusa mea e fiafia i ai pe tutusa foi luitau sa latou feagai.

O taitai perisitua ma ausilali (po o tagata latou te tofia) ia mata'ituina i vaiaso taitasi pe o auai tagata fou o a latou korama po o ausilali faatoa papatiso i le sauniga faamanatuga. Latou te faia ni tofiga e asiati atu ia i latou o e le'i auai mai ma valaaulia i latou e o mai i le vaiaso a sau.

5.2.5

Faiaoga o Aiga ma Faiaoga Asiasi

O faiaoga o aiga ma faiaoga asiasi e i ai tiutetauave taua e amatalia ni faauooga ma uso fou. I le feutagai ai ma le epikopo, e tuu atu e taitai o le Perisitua Mekisateko ma le Aualofa le faamuamua maua i le tofiaina o faiaoga tuuto o aiga ma faiaoga asiasi i tagata fou.

Pe a faatagaina ai e le peresitene o le misiona, e mafai e faifeautalai faamisiona ona lagolago atu i faiaoga o aiga po o faiaoga asiasi o tagata fou.

5.2.6

Faifeau Faamisiona a le Uarota ma Faifeautalai Faamisiona

E ui o le faatumauiina o le tiutetauave totino a taitai perisitua o le uarota ma ausilali, e fesoasoani ia faifeautalai a le uarota ma faifeautalai faamisiona i le galuega. E toe aoao atu e faifeautalai a le uarota

ia lesona muamua e fa i tagata fou uma lava (tagai *Tala'i La'u Talalelei*, mataupu 3). Latou te aoao atu foi le lesona 5. E mafai ona fesoasoani ia faifeautalai faamisiona i faifeautalai a le uarota pe a manaomia.

5.2.7

Tosinaga a Isi Tagata o le Uarota

E fautuaina e taitai perisitua ma ausilali tagata o le uarota e faamalolosi i tagata fou e ala i le faaalua o le alofa ma faavae ni faauooga. E mafai e taitai ona fautuaina tagata o le uarota e valaaulia tagata faatoa liliu mai ia latou afiafi faaleaiga, sauniga Lotu, vasega, ma gaioioiga ma i latou, saunia ala e feavea'i ai pe a manaomia.

5.2.8

Vasega o Mataupu Faavae o le Talalelei

O tagata ua le toaaga mai e ta'i 18 tausaga ma matutua ae, e auai i le vasega o Mataupu Faavae o le Talalelei i le taimi o le Aoga Sa, faatasi ai ma tagata sailiili. E masani lava o tagata fou e auai i le vasega o Mataupu Faavae o le Talalelei mo ni nai masina. Afai ua latou saunia, ona auai lea i le vasega o Aoaoga Faavae o le Talalelei.

O le taitai misiona a le uarota e auai i le vasega o Mataupu Faavae o le Talalelei. Na te faamaopoopoina le vasega ma isi taumafaiga mo le faatumauiina i le uarota. E mafai e se tasi o le au epikopo ona tofia o ia e faiaoga ai. E mafai foi ona auai isi faifeautalai o le uarota.

O faiaoga o aiga, faiaoga asiasi, ma isi tagata o le au paia e mafai ona auai i le vasega e avatu ai le faaaumea. O nisi taimi e mafai e le faiaoga ona valaaulia tagata o le uarota e auai ma faasoa atu o latou aafiaga ma molimau. Mo se faataitaiga, e mafai e le faiaoga ona valaaulia tagata o le uarota e faasoa atu a latou molimau i faamanuiaga o le sefuluai, o o latou aafiaga i le faatoilaloina o luitau, po o faamanuiaga ua latou maua a o latou auauna atu i valaauga i le Ekalesia.

O tiutetauave nei o faiaoga o le kosi leneci:

Latou te filifilia ma aoao atu lesona mai *Mataupu Faavae o le Talalelei*. A latou aoao atu, latou te faaao-gaina pea lava pea ia tusitusiga paia, aemaise lava o le Tusi a Mamona. Latou te fetuunaia lesona ia fetau ma manaoga o tagata o le vasega ma valaaulia tagata o le vasega e faasoa mai o latou manatu ma aafiaga.

Latou te faatupuina se siosiomaga e valaaulia ai le Agaga, ma tuuina atu soo ia molimau.

Latou te faamalosiaina tagata o le vasega e faitau e le aunoa le Tusi a Mamona ma faasoa o latou lagona mai mea na latou faitauina.

5.2.9

Taitai o le Siteki

Peresitene o le Siteki ma Ona Fesoasoani

O sui o le au peresitene o le siteki e vaaia ia taumafaiga e faamalolosia tagata fou i le siteki. Latou te aoao ma faamalosiaina isi taitai ia latou taumafaiga. Latou te feiloai ma tagata fou pe a latou asiasi atu i uarota. E mafai ona latou faia i nisi o taimi se fonotaga mo tagata fou i le taimi o se konafesi faalesiteki.

I ana faatalanoaga faifai pea ma epikopo taitasi, e tapā e le peresitene o le siteki se lipoti e uiga i le alualu i luma o tagata fou i le uarota a le epikopo.

I lana fonotaga e le aunoa ma le peresitene o le misiona, e mafai e le peresitene o le siteki ona tuuina atu se lipoti e uiga i le alualu i luma o tagata fou i le siteki.

Fautua MauaLuga

O fautua mauaLuga o loo galulue ma taitai o le Perisitua Mekisateko ma fautua mauaLuga o loo galulue ma taitai misiona a uarota e mafai ona fesoasoani e aoao atu ma faaumea tagata fou. E mafai foi ona latou auai i taumafaiga e fesoasoani i

toeaina faaolioli e saunia mo le mauaina o le Perisitua Mekisateko.

Au Peresitene o Ausilali a le Siteki

E mafai e au peresitene o ausilali a le siteki ona galulue i nisi taimi ma taitai o ausilali a uarota i le aoaoina atu ma le faaumeaina o tagata fou.

5.3

Faatoaagaina mai

E taumafai pea lava pea ia taitai perisitua ma ausilali o uarota e fesoasani i tagata ua le toaaga mai ia toe foi mai ma malolosi i le Lotu. Na fetalai mai le Faaola, “Aua o tagata faapena ia outou galulue pea i ai; ona tou te le iloa pe o le a latou toe foi mai ma salamo, ma o mai ia te au ma le faamoemoe atoa o le loto, ma o le a ou faamaloloina ai i latou; ma o le a avea outou ma ala e aumai ai le faaolataga ia te i latou” (3 Nifae 18:32).

E masani lava o tagata ua le toaaga mai e talitonu pea lava i le talalelei, ae atonu na feagai ma ni tofo-tofoga faigata ua mafua ai ona lagonaina le faaletonu e auai mai i le lotu. E peiseai foi e toaitiiti ni a latou uo i le Lotu, o lea atonu latou te le lagonaina lo latou iai faatasi ma ni uo pe a o mai i sauniga a le uarota. O i latou e toe malolosi mai e tele ina latou faia o lea pe a vaai ua i ai se mea ua misi mai o latou olaga. O le taunuuga, latou te iloa latou te manaomia le faia o suiga i le ala e ola ai. O taimi faapena, latou te manaomia ai le alofa ma le faauo a tagata malolosi o le Ekalesia e manatu alofa, o e e taliaina i latou i o latou lava tulaga ma faali atu le fiafia patino ia i latou.

5.3.1

Epikopo ma Ona Fesoasoani

O le epikopo ma ona fesoasoani ua i ai le tiutetauave aoao mo le faatoaagaina mai. Latou te

faatonutonuina ia taumafaiga a korama o le perisitua ma ausilali e toe faamumu le faatuatua ma faamautinoa ua maua e tagata e toe foi mai le faaumea ma le lagolago. Latou te fesoasoani i uso ua toe foi mai e siitia i le perisitua, ma e latou te fesoasoani i uso ma tuafafine ia maua sauniga o le malumalu pe ia agavaa e toe ulu atu ai i le malumalu.

E mafai e le epikopo ona tofia se tasi o ona fesoasoani e faamaopoopo le faatoaagaina mai.

5.3.2

Aufono a le Uarota

I lalo o le taitaiga a le au epikopo, e iloilo e sui o le aufono a le uarota a latou sini mo le faatoaagaina mai e pei ona otooto atu i le fuafuaga o le misona a le uarota (tagai 5.1.8). Latou te fefaasoai fautuaga mo le auaunaga i tagata o a latou faalapotopotoga ua le toaaga mai. O le iloaina pea lava pea o manaoga ma tulaga o tagata ua le toaaga mai, e mafai e sui o le aufono a le uarota ona iloaitino pe a saunia aiga ma tagata taitoatasi e tali atu i se valaaulia e talia asiasiga a le Ekalesia, auai i se gaoioiga a le Ekalesia, pe auai i se semina sauniuni a le malumalu.

E faailoa mai ma le agaga tatalo e le aufono a le uarota tagata ua le toaaga mai o e ua foliga mai e toe foi mai ma malolosi. Latou te filifili foi pe o ai taitai ma tagata o le au paia e sili ona mafai ona faamalolosi maia tagata ua le toaaga mai ma fausia ni sootaga patino ma i latou. A silia ma le tasi le tagata o se aiga ua le toaaga mai, e faamaopoopo e taitai a latou taumafaiga i fonotaga a le aufono a le uarota.

O fonotaga a le aufono a le uarota e aofia ai e le aunoa ia lipoti o le alualu i luma o nei tagata. A toe malolosi mai ni tagata o le au paia pe teena foi ia valaaulia e foi mai, e faailoa mai e le aufono a le uarota isi e ono taliaina. E mafai e taitai ona faaoga le fomu o le Alualu i Luma o Tagata Fou ma Tagata Ua Toe Foi Mai e matau ai nei taumafaiga.

5.3.3

Faiaoga o Aiga ma Faiaoga Asiasi

I le feutagai ai ma le epikopo, e tofia e taitai o le Perisitua Mekisateko ma le Aualofa ni faiaoga tuuto o aiga ma faiaoga asiasi i tagata ua le toe toaaga mai. E taulai atu e nei taitai a latou taumafaiga i tagata ua le toaaga mai o e foliga e tali mai i valaaulia e toe toaaga mai.

5.3.4

Faifeautalai Faamisiona ma Faifeau Faamisiona a le Uarota

O le taitai misiona a le uarota, faifeautalai faamisiona, ma faifeau faamisiona a le uarota e mafai ona fesoasoani i taumafaiga e faatoaaga mai ai pe a talafeagai, aemaise lava pe afai o lo latou aoaoina o tagata ua le toaaga mai o le a maua ai avanoa mo faifeautalai e aoao ai uo po o aiga le lolotu o nei tagata.

5.3.5

Vasega o Mataupu Faavae o le Talalelei

O tagata ua le toaaga mai e ta'i 18 tausaga ma matutua ae, e mafai ona auai i le vasega o Mataupu Faavae o le Talalelei i le taimi o le Aoga Sa (tagai i le 5.2.8).

5.3.6

Taitai o le Siteki

Peresitene o le Siteki ma Ona Fesoasoani

I ana faatalanoaga faifai pea ma epikopo taitasi, e tapā e le peresitene o le siteki se lipoti e uiga i le alualu i luma o tagata ua le toaaga mai i le uarota a le epikopo. E talanoaina e le peresitene o le siteki ma le epikopo ia fuafuaga ma sini na saunia e le aufono a le uarota mo nei tagata.

A oo i le taimi e fono ai le peresitene o le siteki ma le peresitene o le misiona e talanoaina le galuega

faamisiona, e mafai foi ona la talanoaina le fesoasoani a faifeautalai faamisiona e mafai ona tuuina atu e galulue ai ma tagata o le ekalesia ua le toaaga mai.

Fautua Maualuga

O fautua maualuga e galulue ma taitai o le Perisitua Mekisateko a uarota, e mafai ona fesoasoani e aoao ma faaumea tagata ua le toaaga mai. E mafai foi ona latou auai i taumafaiga e fesoasoani i toaaina faaolioli e saunia mo le mauaina o le Perisitua Mekisateko.

Au Peresitene o Ausilali a le Siteki

E mafai e au peresitene o ausilali a le siteki i nisi taimi ona galulue ma taitai o ausilali a le uarota i le aoaoina ma le faaumeaina o tagata ua le toaaga mai.

5.4

Galuega o le Malumalu ma Talafaasolopito o Aiga

I malumalu, e maua e tagata o le Ekalesia ia sauniga ma osia feagaiga paia ia e tatau ai mo le faaeaga. E o foi tagata o le Ekalesia i malumalu e faatino ia sauniga mo tagata ua malilili o e e lei mauaina ia sauniga.

E aoao atu e taitai o le perisitua ma ausilali tagata o le uarota e uiga i tiutetauave faavae i le galuega o malumalu ma le talafaasolopito o aiga, e pei ona otooto atu i parakalafa nei:

Latou te fautuaina tagata ia maua o latou lava sauniga o le malumalu ma fesoasoani i tagata o o latou aiga patino ia maua foi o latou sauniga. E aoao e taitai ia tagata e faapea o le faamoemoega o le faaeega o le saunia lea mo le faaeaga, ae le na ona saunia mo se faaiipoipoga po o se misiona.

E faamalosiua e taitai le tasi ma le isi o tagata ua faaeeina ia umia se pepa faataga o aoga o le malumalu

ma o soo i le malumalu pe a faatagaina ai e o latou tulaga ma manaoga faaleaiga. E fautuaina foi e taitai tagata matutua e lei maua faaeega ma talavou ua ta'i 12 tausaga ma matutua ae, e aofia ai ma tagata fou, ia maua ni pepa faataga e tapulaa le taimi e faaoga ai ma o soo i le malumalu e papatiso ma faamauina mo e ua malilili. E le faia e taitai ni fuainumera faatagaina po o ni faiga e lipotia ai le auai i le malumalu. E fuafua lava e tagata taitasi le tele o lona auai i le faatinoina o galuega o le malumalu.

E aoao e taitai perisitua ma ausilali ia tagata ina ia auai i le faatinoina o le galuega o talafaasolopito o aiga e ala i le faailoa o tagata o o latou tupuaga faaleaiga, talosagaina sauniga o le malumalu mo i latou pe a manaomia, ma tuuina atu nei sauniga e i latou lava i le malumalu pe a mafai.

E fesoasoani taitai ia malamalama e le tatau ona latou talosaga ia faia sauniga o le malumalu mo soo se tagata latou te le aiga e aunoa ma le faamaoniga a se tagata o le aiga e sili ona vavalalata i ai o lo o soifua. E fesoasoani foi taitai ia malamalama tagata o le au paia e le tatau ona faia ni talosaga faapena mo tagata lauiloa latou te le aiga po o tagata foi na latou ao maia faamatalaga mai galuega faatino o faasino igoa e le faatagaina.

5.4.1

Epikopo ma Ona Fesoasoani

O le epikopo ma ona fesoasoani e vaaia galuega o le malumalu ma talafaasolopito i le uarota. Latou te faamautinoa o loo aoao atu e le aunoa ia aoaoga faavae ma faamanuiaga o galuega o le malumalu ma talafaasolopito i fonotaga a le uarota.

A feiloai le epikopo ma tagata o le uarota, e fesoasoani o ia ia latou sauniuni mo le mauaina o sauniga o le malumalu ma ia agavaa e faaauau ona o soo i le malumalu pe a faatagaina ai e o latou tulaga.

E faamalosiua e le epikopo ma ona fesoasoani ia tagata ia iloa tagata o o latou tupuaga faaleaiga ma faia sauniga o le malumalu mo i latou.

O isi tiutetauave o le au epikopo e faatatau i galuega o le malumalu, o loo ootoo atu i le *Tusitaulima 1*, mataupu e 3.

5.4.2

Aufono a le Uarota

E le itiiti ifo i le faalekuata ona iloiloia e taitai i se fonotaga a le aufono a le uarota ia mataupu e faatatau i galuega faalemalumalu ma talafaasolopito o aiga, e pei o nei:

Latou te talanoaina ni auala e fesoasoani ai i tagata taitoatasi ma aiga ia maua sauniga o le malumalu ma o soo i le malumalu pe a talafeagai ai.

Latou te iloiloia ma le agaga tatalo ia tagata o le uarota o ē mafai ona valaaulia e auai i semina sauniuni mo le malumalu pe galulue foi ma faufautua o talafaasolopito o aiga.

Latou te talanoaina ni auala e fesoasoani ai i tagata ia auai i le galuega o talafaasolopito o aiga.

E mafai ona latou talanoaina ni auala e faaoga ai le galuega o talafaasolopito o aiga e saili ai tagata mo faifeautalai faamisiona e aoao, ma aapa atu ai i tagata fou ma tagata ua le toaaga mai.

5.4.3

Taitai Vaega o Faitaulaga Sili

O le taitai vaega o faitaulaga sili e faamaopoopo ia taumafaiga a le aufono a le uarota e uunaia le galuega o malumalu ma talafaasolopito o aiga i le uarota.

E faamaopoopo foi e le taitai vaega o faitaulaga sili galuega o le malumalu ma faufautua o talafaasolopito o aiga. Afai e i ai se ofisa tutotonu o talafaasolopito o aiga i le siteki, na te tofia faufautua e avea ma tagata faigaluega iina pe a talosagaina ai e le fautua o le siteki mo talafaasolopito o aiga. Afai e faia e le siteki ia faasino igoa i le FamilySearch, na te fautua atu tagata e faigaluega i le faiga o faasino igoa i le FamilySearch.

Afai e leai se taitai vaega o faitaulaga sili a le uarota, o le peresitene o le korama a toaina po o se isi o loo umia le Perisitua Mekisateko ua tofia na te faatumuina le matafaioi lea.

5.4.4

Faufautua mo Malumalu ma Talafaasolopito o Aiga

I lalo o le taitaiga a le taitai vaega o faitaulaga sili, o tiutetauave nei o faufautua mo malumalu ma talafaasolopito o aiga. Latou te faaogaina le *Tusi Taitala a le Tagata mo Galuega o le Malumalu ma Talafaasolopito o Aiga* e fai ma punaoa.

Latou te fesoasoani i tagata o le au paia e faailoa mai tuua o o latou aiga. Latou te fesoasoani i tagata e saunia faamatalaga ina ia mafai ai ona faatino ia sauniga o le malumalu mo tagata o o latou aiga. Latou te fesoasoani i tagata e leai ni komepiuta pe le iloa foi ona faaoga komepiuta. Afai e mafai, latou te tuuina atu leni fesoasoani i fale o le au paia.

Latou te galulue e le aunoa o ni tagata faigaluega i se nofoaga tutotonu o talafaasolopito o aiga, pe a tofia i ai. E mafai foi ona tofia i latou e faiaoga i vasega o le talafaasolopito o aiga i le uarota.

Mo nisi faamatalaga faaopoopo e uiga i tiutetauave o faufautua o talafaasolopito o aiga, tagai i le *Tusi Taitala a le Faufautua mo Galuega o le Malumalu ma Talafaasolopito o Aiga*, lea o loo maua i le LDS. Org.

5.4.5

Vasega ma Punaoa o le Malumalu ma Talafaasolopito o Aiga

Semina e Sauniuni ai mo le Malumalu

O le faamoemoega o nei semina sauniuni o le malumalu o le fesoasoani lea i tagata o le ekalesia ina ia mauaina sauniga ma faamanuiaga o le malumalu. E fuafuaina nei semina i lalo o le taitaiga a le epikopo. E aoaoina i faletapu ai po o se aiga i le tele e manaomia ai.

O semina sauniuni o le malumalu e faapitoa le aoga mo tagata fou, tagata sa le toaaga mai a ua toe foi mai ma malolosi i le Lotu, ma tagata ua maua faacega ae lei toefaafoua a latou pepa faataga mo se taimi umi. E mafai foi ona fesoasoani ia semina mo tagata malolosi o loo sauniuni ia maua o latou faacega.

I lalo o le taitaiga a le epikopo, e filifili ai ma le agaga tatalo e sui auai o le afono a le uarota ia tagata e valaaulia i semina taitasi.

E valaau e le au epikopo se tasi pe sili atu faiaoga, atonu o se tane ma se ava. O lesona ma faatonuga mo le faatulagaina o le kosi o loo maua i le *Faaeina mai Luga: Tusi Lesona a le Faiaoga o le Semina Sauniuni o le Malumalu*. O i latou e auai i le semina e tatau ona maua a latou lava kopi o le tamaitusi *Saunia e Ulufale atu i le Malumalu Paia*.

Vasega o Talafaasolopito o Aiga

E mafai ona aoa se vasega o talafaasolopito o aiga i le taimi o le Aoga Sa po o se isi taimi e sili ona talafeagai mo tagata. E faatulagaina leni vasega i lalo o le taitaiga a le au epikopo nai lo le peresitene o le Aoga Sa. E faaoga e le faiaoga le *Tusi Taiala a le Faiaoga i le Galuega o le Malumalu ma Talafaasolopito o Aiga* e aoa atu ai lesona. O le faiaoga e masani lava o se faufautua mo le malumalu ma talafaasolopito o aiga e tofia e le au epikopo. O lesona e masani lava e faatautaia o ni galuega faatino e faatutumu tonu ai lava e tagata galuega o talafaasolopito o aiga.

Mafai ona Maua Punaoa o Talafaasolopito o Aiga i le Initoneti

E fesoasoani punaoa a le Ekalesia i le initoneti mo talafaasolopito o aiga i tagata o le au paia e iloa ai tagata o o latou aiga, faatulaga faamatalaga o augatuaa, ma auina atu talosaga mo sauniga o le malumalu ina ia faatinoina mo nei tagata o aiga. O le tele o nei punaoa o loo maua i le saite

Initoneti a le Ekalesia o talafaasolopito o aiga, FamilySearch.org.

O nofoaga e i ai i falelotu o uarota po o le siteki ni komepiuta e maua ai le Initoneti, po o nofoaga o i ai komepiuta a le siteki po o uarota ua tuu i ai polokalama o talafaasolopito o aiga, e faamautinoa e le au peresitene o le siteki ma le au epikopo o avanoa nei komepiuta mo tagata o le au paia latou te faaogaina i taimi talafeagai. E mafai e faufautua o talafaasolopito o aiga ona fesoasoani e faatulaga taimi mo komepiuta ma aoa tagata ia iloa faaoga.

O tagata e faaogaina komepiuta faalepulega a le Ekalesia mo galuega o talafaasolopito o aiga, e le tatau ona faataga i faamatalaga o pepa faamaumau po o mea tautupe.

5.4.6

Taitai o le Siteki

Peresitene o le Siteki ma Ona Fesoasoani

O le peresitene o le siteki ma ona fesoasoani e vaaia galuega o le malumalu ma talafaasolopito o aiga i le siteki. Latou te faamautinoa ua aoa e le aunoa ia aoaoga faavae ma faamanuiaga o leni galuega i fonotaga faalesiteki.

A feiloai atu le peresitene o le siteki ma tagata o le au paia, e fesoasoani o ia ia latou sauniuni mo le mauaina o sauniga o le malumalu ma ia agavaa e faaauau ona o soo i le malumalu pe a talafeagai ma o latou tulaga.

E fautuaina e le peresitene o le siteki ma ona fesoasoani ia tagata ia iloa tagata o o latou tupuaga faaleaiga ma tuuina atu sauniga o le malumalu mo i latou.

O isi tiutetauave o le au peresitene o le siteki e faatau i le galuega o le malumalu o loo ootoo atu i le *Tusitaulima 1*, mataupu e 3.

O Le Fautua Maua luga po o Fautua Maua luga e Tofia i le Galuega o le Malumalu ma Talafaasolopito o Aiga

E mafai e le peresitene o le siteki ona tofia se tasi pe sili atu foi fautua maua luga e aoaoina ia taitai vaega o faitaulaga sili ma taitai o le korama a toeaina i o latou tiutetauave o le malumalu ma talafaasolopito o aiga. A manaomia, e faamaopoopo foi e nei fautua maua luga ia taumafaiga a le siteki i le faia o faasino igoa i le FamilySearch ma nofoaga tutotonu o talafaasolopito o aiga.

5.4.7

Punaoa o le Malumalu ma Talafaasolopito o Aiga i le Siteki

Polokalama Faasino Igoa o le FamilySearch i le Siteki

I le faiga o faasino igoa i le FamilySearch, e faaaoga e i latou e auai a latou komepiuta e maua ai ata o faamaumauga e pei o faamaumauga o tusigaigoa, lesitala a ekalesia, ma faamaumauga taua. Mai nei ata, latou te fatufatuina ai faasino igoa otometi ona mafai lea ona maua e ala i le FamilySearch.org.

O tagata taitasi, e aofia ai ma i latou e le o ni tagata o le Ekalesia, e mafai ona faia faasino igoa e i latou lava i le FamilySearch. Peitai, e mafai e le au peresitene o le siteki ona fuafua faapea e sili ona lelei mo tagata o le siteki ona galulue faatasi i se polokalama faasino igoa. O lena taumafaiga e mafai ona maua ai avanoa e auauna atu ai tagata e le o toaaga mai pe ua nofofale foi. E mafai foi ona auai le autalavou e faatino.

Mo faamatalaga i le amataina o se polokalama faasino igoa o le FamilySearch, tagai i le *Taiala Faaletaitaiga mo Talafaasolopito o Aiga*, lea o loo maua i le LDS.org.

Ofisa Autu o Talafaasolopito o Aiga

E i ai nisi siteki ua i ai nofoaga tutotonu mo talafaasolopito o aiga, ia ua i ai faapitoa ina ia fesoasoani i tagata o le Ekalesia e faailoa mai tagata o o latou aiga ma tuuina atu ia sauniga o le malumalu mo i latou. E talia foi tagata o nuu e faaoga ia punaoa i nofoaga autu mo talafaasolopito o aiga.

E tuuina atu e nei nofoaga autu le faatagaga i faamaumauga mataninii a le Ekalesia o talafaasolopito o aiga, o komepiuta o talafaasolopito o aiga ma punaoa faa-Initoneti e pei o le FamilySearch, ma aoaoga i le auala e faia ai galuega o talafaasolopito o aiga.

Mo nisi faamatalaga e uiga i nofoaga autu o talafaasolopito o aiga, tagai i le *Taiala Faaletaitaiga mo Talafaasolopito o Aiga*, o loo maua i le LDS.org.

5.5

Aoaoina Atu o le Talalelei

O le lelei o le aoaoina atu o le talalelei e fesoasoani i tagata e tuputupu ae ai i a latou molimau ma lo latou faatuatua i le Tama Faalelagi ma Iesu Keriso. E faamalolosia ai tagata o le au paia ia latou taumafaiga e ola e tusa ai ma mataupu faavae o le talalelei. Pe a aoaoina atu le afoaga a le Atua faatasi ma le mana faaleagaga, e i ai “sona uiga mamana tele atu i luga o mafaufau o tagata nai lo . . . se isi lava mea” (Alema 31:5). O taitai perisitua ma ausilali e fautuaina aoaoga faagaetia i a latou faalapotopotoga. Latou te manatua o tagata o le Ekalesia e auai i fonotaga latou te sailia le mana, filemu, ma musumusuga e maua mai i le afoaga a le Atua.

5.5.1

Epikopo ma Ona Fesoasoani

O le epikopo ma ona fesoasoani e aoaoina atu le talalelei i le mana o le Agaga ma faaitaitaiga patino.

Latou te taitaia taumafaiga a le aufono a le uarota e faamautinoa ai e faagaetia ia aoaoga i le uarota ma e sa’o aoaoga faavae.

5.5.2

Aufono a le Uarota

I lalo o le taitaiga a le au epikopo, e fefautuaai faatasi e le aunoa ia sui o le aufono a le uarota e uiga i auala e faaleleia atili ai le aoao mai ma le aoao atu i totonu o le uarota. E mafai e le epikopo ona valaaulia le peresitene o le Aoga Sa e taitai nei talatalanoga ma tuuina atu aoaoga.

5.5.3

Taitai Perisitua ma Ausilali

O taitai perisitua ma ausilali e taumafai e aoao atu ma le mataalia le talalelei. Ua ia i latou le tiutetauave mo taumafaiga e faaleleia atili le aoao mai ma le aoao atu i a latou faalapotopotoga. I nei taumafaiga, e mafai ona latou fefautuaai ma le au peresitene o le Aoga Sa.

Fautuaina Atu o Tagata E Avea ma Faiaoga

E tuu atu e taitai perisitua ma ausilali a latou fautuaga i le au epikopo mo tagata o le au paia e valaau e avea ma faiaoga ia latou faalapotopotoga. E ao i taitai ona fautuaina atu ia faiaoga o le a taumafai e sauniuni ia lesona e musuia ai tagata o le vaega e ola e tusa ai ma mataupu faavae o le talalelei. O le faia o lea, latou te mulimuli ai i mataupu faavae o i le 19.1.1 ma le 19.1.2.

Aoaoina Faamasani o Faiaoga Faatoa Valaau

E fono taitoatasi taitai perisitua ma ausilali ma faiaoga faatoa valaau ia latou faalapotopotoga, e sili pe a fai a o loma le uluai lesona a le faiaoga. I nei fonotaga, e aoao faamasani ai e taitai ia faiaoga faapenei:

Latou te fesoasoani i faiaoga e amata ona faamasani i tagata o le vasega, pe a manaomia ai. Latou te avatu se lisi o tagata o le vasega i faiaoga ma fautuaina i latou e aoao ia igoa o tagata o le vasega. Latou te fautuaina foi faiaoga e atia’e ni sootaga fealofani ma tagata o le vasega.

Latou te fesoasoani i faiaoga ia malamalama pe faapefea ona faaoga le *Aoao Atu, E Leai Se Isi Valaauga e Sili Atu*. Latou te avatu i faiaoga taitasi se kopi o le tusi ma faasoa atu i ai se vaaiiga aoao o ona anotusi.

Pe a manaomia ai, latou te fesoasoani i faiaoga ia malamalama pe faapefea ona saunia se lesona. Latou te avatu i faiaoga anomea o mataupu aoaoina ua faamaonia ma faamalamalama atu i ai pe faapefea ona faaogaina. Latou te toe iloiloia foi le vaega ua faaulutala “Sauniaina o Lesona” o i itulau 98–99 i le *Aoao Atu, E Leai Se Isi Valaauga e Sili atu*. (Mo se lisi o anomea o mataupu aoaoina ua faamaonia ma faatonuga pe faapefea ona oka, tagai i *Faatonuga mo Mataupu Aoaoinao* i ai nei.)

Tuuina Atu o le Lagolago Faifai Pea mo Faiaoga

E atia’e e taitai perisitua ma ausilali se sootaga felagolagoma’i ma le fealofani ma faiaoga. A uma le latou uluai fonotaga faamasani, e feiloai e le aunoa ia taitai ma faiaoga taitoatasi e iloa ai manaoga o faiaoga taitoatasi, talanoaina manaoga o i latou e faiaoga ai, ma toe iloilo mataupu faavae o loo ootoo atu i le vaega lenei. Latou te fautuaina faiaoga e faatutu ni sini e tusa ai ma le vaega ua faaulutalaina “Faia o se Fuafuaga e Faaleleia ai Lou Aoao Atu” i itulau e 24–27 i le *Aoao Atu, E Leai Se Isi Valaauga e Sili atu*.

Faamautinoa e Faagaetia le Aoao Atu ma Sa’o Aoaoga Faavae

E matau ma le toto’a e taitai perisitua ma ausilali le aoao mai ma le aoao atu i taimi o vasega a le Aoga

Sa ma isi lesona. O taitai e le auai mai pea i vasega taitasi, e pei o sui o au peresitene o le Aoga Sa ma le Peraimeri, fuafua ma faiaoga ia auai mai i nisi taimi i vasega. E faavae ia latou matauga, e fefautuagai taitai ma faiaoga pe faapefea ona faaleleia atili le aoaoina i vasega.

E faamautinoa e taitai e faaoga e faiaoga ia tusitusiga paia, o aooga a perofeta o aso e gata ai, ma anomea o mataupu aoaoina ua faamaonia e pei ona otooto mai i *Faatonuga mo Mataupu Aoaoina i le taimi nei*. Latou te fesoasoani i faiaoga ia malamalama pe faapefea ona faaopoopo i mataupu aoaoina ia mekasini a le Ekalesia, aemaise lava o lomiga o le konafesi aoao o le *Ensign* ma le *Liahona*.

5.5.4

Faiaoga ma Taitai

A o aoao atu e faiaoga ma taitai le talalelei, e taialaina i latou e mataupu faavae nei.

Alofa Ia I Latou E Te Aoaoina

E faaalia e faiaoga ma taitai le alofa ma le naunau faamaoni mo i latou e faiaoga ai. Latou te aoaoina igoa o tagata o le vasega. Latou te iloiloina faamatalaga o le auai ina ia mafai ai ona latou iloa tagata o le vasega e le auai soo mai. E mafai ona latou faafe-sootaia nei tagata i fafo atu o le vasega ma faamalo-siauína lo latou auai mai.

Aoao Atu e ala i le Agaga

O faiaoga ma taitai e sailia le taiala a le Agaga Paia i le sauniaina ma le aoaoina atu o lesona. Latou te sailia le taiala e ala i le tatalo ma faailoa atu ma le lotomaulalalo lo latou faalagolago i le Ali. I le taimi o lesona, latou te valaaulia le Agaga i le tuuina atu o molimau i aooga faavae latou te aoao atu.

Aoao Atu le Aooga Faavae

E faaoga e faiaoga ma taitai ia tusitusiga paia, o aooga a perofeta o aso e gata ai, ma anomea o

mataupu aoaoina ua faamaonia ma molimau atu i aooga faavae o le talalelei. O anomea o mataupu aoaoina ua faamaonia mo vasega taitasi po o korama o loo lisi atu i *Faatonuga mo Mataupu Aoaoina* i ai nei. A manaomia, e faaopoopo e faiaoga ma taitai i anomea o mataupu aoaoina ia mekasini a le Ekalesia, aemaise o lomiga o konafesi aoao o le *Ensign* ma le *Liahona*.

Valaaulia Le Aoao ma le Filiga

E fautuaina e faiaoga ma taitai ia tagata o le vasega e tauave le tiutetauave mo a latou lava aooga o le talalelei o ni tagata taitoatasi, i o latou aiga, ma i le taimi o aooga i vasega. Latou te fautuaina tagata o le vasega e aumai a latou lava kopi o tusitusiga paia pe a mafai ai. O faiaoga ma taitai e tuuina atu avanoa mo tagata o le vasega e auai atoatoa i talanoaga, ma latou te valaaulia tagata o le vasega ia ola i le talalelei ma ia maua ai faamanuiga folafolaina.

5.5.5

Peresitene o le Aoga Sa i le Uarota ma Ona Fesoasoani

O sui auai o le au peresitene o le Aoga Sa a le uarota, e avea o ni punaoa e fesoasoani i isi taitai i taumafaiga e faaleleia atili ai le aoao mai ma le aoao atu o le talalelei. E mafai ona valaaulia i latou e fesoasoani i taitai i le aoaoina faamasani, aoao, ma tuuina atu le lagolago faifai pea mo faiaoga.

5.5.6

Punaoa Lolomi ma Punaoa e Maua i le Initoneti mo le Aoao Mai ma le Aoao Atu

Ina ia fesoasoani i tagata e faaleleia atili i le aoao mai ma le aoao atu o le talalelei, ua saunia e le Ekalesia ni lomiga se lua: *Aoao Atu*, *E Lei Se Isi Valaauga e Sili atu* ma le *Tusitaila Faafaiaoga*. O loo maua nei punaoa lolomi ma i le LDS.org. O loo maua foi isi punaoa i luga o le LDS.org

5.5.7**Vasega mo le Aoaoina Atu o le Talalelei**

O le au epikopo ma le aufono a le uarota e mafai ona filifili e faia i lea taimi ma lea taimi le vasega o le Aoaoina Atu o le Talalelei i le uarota. O leni vasega e mafai ona manuia ai faiaoga o i ai nei ma fesoasoani ai foi e saunia faiaoga mo le lumanai. E masani ona faia lea vasega i le taimi o le Aoga Sa. O lesona mo le vasega lea o loo maua i itulau e 196–254 o le *Aoao Atu, E Lei Se Isi Valaauga e Sili Ai*. E tofi e le au

epikopo le au peresitene o le Aoga Sa e faiaoga i le vasega lea pe valaau se isi tagata o le au paia e faia.

5.5.8**Peresitene o le Siteki ma Ona Fesoasoani**

O le peresitene o le siteki ma ona fesoasoani e aoao atua le talalelei e ala i le mana o le Agaga ma faataitaiga patino. Latou te taitaia taumafaiga e faamautino ai o aoaoga i totonu o le siteki e faagaetia ma e sa'o aoaoga faavae.

6.

Mataupu Faavae o le Uelefea ma le Taitaiga

6.1

O Faamoemoega o le Uelefea a le Ekalesia

O faamoemoega o le uelefea a le Ekalesia o le fesoasoani lea i tagata ia faalagolago ia i latou lava, ia tausia e matitiva ma e le tagolima, ma tuuina atu le auaunaga.

I le 1936, sa ootoo mai ai e le Au Peresitene Sili se fuafuaga o le uelefea mo le Ekalesia. Sa latou saunoa mai: “O lo tatou uluai faamoemoega lava o le faatuina lea . . . o se faiga e le toe i ai le fetuu ona o le paie, le toe i ai le amioleaga o le maua fua o se mea, ae ua toe faatuina le tutoatasi, o le galulue, o le ola faasoasoa lelei ma le faaloalo i o tatou tagata. O le faamoemoega o le Ekalesia o le fesoasoani lea i tagata ia fesoasoani ia i latou lava. E tatau ona toe faamalosia le galue e avea ma mataupu taiala i olaga o tagata auai o la tatou Ekalesia” (i le Ripoti o le Konafesi, Oke. 1936, 3).

6.1.1

Ola Faalagolago o le Tagata ia te la Lava

O le ola faalagolago o le tagata ia te ia lava o le tomiai, tautinoga, ma le taumafaiga e saunia mea faaleagaga ma faaletino e manaomia o le olaga mo le tagata lava ia ma le aiga. A ola faalagolago tagata o le Ekalesia ia i latou lava, o le a sili atu ona lelei lo latou auauna atu ma tausia isi.

O tagata o le Ekalesia ua ia i latou le matafaioi mo lo latou lava soifua manuia faaleagaga ma le faaletino. Ona ua faamanuiaina i le meaalofa o le faitalia, o lea ua latou maua ai le avanoa e faatulaga ai o latou lava olaga, foia o latou lava faafitauli, ma taumafai ai ia ola faalagolago le tagata ia te ia lava. E fai e tagata o le Ekalesia lenei mea i musumusuga a le Alii faatasi ai ma galuega a o latou lava lima.

A faia e tagata o le Ekalesia mea uma e mafai ona latou faia e tausi ai i latou lava ae le gafataulimaina ai mea taua latou te manaomia, e masani lava e tatau ona latou liliu atu muamua i o latou aiga mo se fesoasoani. Afai e le lava lea, pe le o talafeauga, o loo nofo saunia le Ekalesia e fesoasoani atu.

O nisi o itu e tatau ona faalagolago ai tagata ia i latou lava o loo ootoo atu i parakalafa nei.

Soifua Maloloina

Na poloaiina e le Alii le au paia e tausi lelei o latou mafaufau ma tino. E tatau ona latou usiusitai i le Upu o le Poto, taumamafa i meaai paleni, faamalositino e le aunoa, pulea lo latou mamafa, ma ia lava le moe. E tatau ona latou aloese mai mea po o faiga e faatautala ai o latou tino po o mafaufau ma ono avea ai ma vaisu. E tatau ona latou ola tumama lelei ma ia maua le tausiga talafeagai faafomai ma le tausiga o oloa. E tatau foi ona latou taumafai e atiina ae ni mafutaga lelei ma tagata o aiga faapea ma isi.

Aoga

O le a’otauina e maua ai le malamalama ma tomiai e mafai ona fesoasoani i tagata e atiina ae ai le faalagolago ia te ia lava. E tatau i tagata o le Ekalesia ona sutesue i tusitusiga paia ma isi tusi lelei. E tatau ona latou faaleleia lo latou tomiai e faitautusi, tusitusi, ma faia matematika faigofie. E tatau ona a’otauina i latou i le mea sili latou te mafaia, e aofia ai aoga aloaia po o aoga o matata eseese i nofoaga e mafai ai. O le a fesoasoani lea ia i latou e atiina ae a latou taleni, maua galuega talafeagai, ma faia ai se saofaga taua i o latou aiga, o le Ekalesia, ma nuu.

Galuega

O le galue o le faavae lea e taoto ai le ola faalagolago o le tagata ia te ia lava ma le soifua manuia faaletino. E tatau i tagata o le Ekalesia ona sauniuni ma ia filifili ma le totoa se galuega talafeagai po o sana lava pisinisi ina ia maua ai mea e manaomia e tausi ai i latou lava ma o latou aiga. E tatau ona limalelei i a latou galuega, ia filiga ma ia faatuatua, ma ia tuuina atu ni galuega faamaoni mo le totogi ma faamanuiaga latou te maua.

Teuina o Meaai a le Aiga

Ina ia fesoasoani i le tausiga o i latou lava ma o latou aiga, e ao i tagata o le au paia ona faaputu se sapalai e tolu-masina o meaai ia e masani ona aai ai. O nofoaga e faatagaina ai i tulafono ma tulaga i le lotoifale, e ao ona latou faaputupuutu malie se sapalai mo se taimi umi atu o meaai masani e lagoonago ai le olaga. E ao foi ona latou teuina ni vai inu ina nei faaleagaina pe motusia le sapalai o le suavai. (Tagai *Ia Saunia Mea Tatau Uma: Teuina o Meaai a le Aiga*, 3.)

Tupe

Ina ia faalagolago le tagata ia te ia lava i mea tautupe, e tatau i tagata o le au paia ona totogi ia sefuluai ma taulaga, aloese mai aitalafu e le tatau ai, faaoga se paketi, ma ola e tusa ai ma se fuafuaga. E tatau ona latou faaputupuutu malie se tupe faaleoleo e ala i le teuina e le aunoa o se vaega o a latou tupe maua. (Tagai *Ia Saunia Mea Tatau Uma: O Mea Tautupe a le Aiga*, 3.)

Malosi Faaleagaga

E taua le malosi faaleagaga i le soifua-manuia o le tagata i le olaga nei ma le faavavau. E tuputupu ae tagata o le Ekalesia i le malosi faaleagaga pe a latou atiina ae a latou molimau, faaoga le faatuatua i le Tama Faalelagi ma Iesu Keriso, usitai i poloaiga,

tatalo i aso taitasi, suesue i tusitusiga paia ma aoaoga a perofeta o aso e gata ai, auai i sauniga a le Ekalesia, ma auauna atu i valaauga ma tofitofiga i le Ekalesia.

6.1.2

Taumafaiga a Tagata o le Ekalesia e Tausia e Matitiva ma e Le Tagolima ma Tuuina Atu le Auaunaga

E ala mai i Lana Ekalesia, ua saunia ai e le Alii se ala e tausia ai e matitiva ma le tagolima. Ua Ia poloaia tagata o le Ekalesia ia foai atu ma le limafoai e tusa ma mea ua latou maua mai ia te Ia. Ua Ia poloaia foi Lona nuu e “asiasi atu i e ua matitiva ma e ua le tagolima ma fesoasoani atu i lo latou toomaga” (MF&F 44:6). Ua fautuaina tagata o le Ekalesia ina ia tuuina atu ni auaunaga alofa a le tagata lava ia ia i latou e le tagolima. E tatau ona latou “galulue ma le naunautai i mea lelei,” e auauna atu e aunoa ma le tau poloaia pe tofi foi (tagai MF&F 58:26–27).

Ua faavaeina e le Alii se tulafono o le anapogi ma taulaga anapogi e faamanuiaina ai Lona nuu ma tuuina atu ai se auala mo i latou e auauna atu ai ia i latou e le tagolima” (tagai Isaia 58:6–12; Malaki 3:8–12). A anapopogi tagata o le ekalesia, ua poloaia i latou e foai atu i le Ekalesia se taulaga anapogi ia le itiiti ifo ma le tau o taumafa semanu latou te taumamafaina. Afai e mafai, e tatau ona latou limafoai ma foai faasili atu. O faamanuiaga e o mai faatasi ma le tulafono o le anapogi e aofia ai le latalata atu i le Alii, faateleina le malosi faaleagaga, soifua-manuia faaletino, silisili le tigaalofa, ma se naunautaiga malosi e auauna atu.

O nisi o avanoa e tausia ai i latou o e le tagolima e maua e ala i valaauga o le Ekalesia. O loo maua isi avanoa i totonu o aiga o tagata o le ekalesia, i le lotoifale, ma nuu, e pei o ia e faamaopoopoina e JustServe (i le Iunaita Setete ma Kanata, tagai JustServe.org). E mafai foi e tagata o le au paia ona

fesoasoani i e matitiva ma e le tagolima o faatua-tuaga uma i le lalolagi atoa e ala i le lagolagoina o taumafaiga a le Ekalesia e fesoasoani ai i tagata, e ala i le auai i le tali atu i faalavelave e ala i Lima Fesoasoani o Mamona (i nofoaga e faaoga ai), ma i taumafaiga patino e auauna atu ai i e manaomia le fesoasoani.

O le saunia i le ala a le Alii e faalotomauualalo ai le mauoa, e faeaina ai le mativa, ma faapaiaina ai i la'ua uma (tagai i le MF&F 104:15–18). Na aoao mai Peresitene J. Reuben Clark Jr:

“O le faamoemoega mamao moni o le Fuafuaga o le Uelefea, o le atiina ae lea o uiga auau mama i tagata o le Ekalesia, o e e foai atu ma e e talia mai, ma laveai mai ai uiga lelei uma ua ia i latou, e faafotu ae ai ma fua mai uiga tamaoaga natia o le agaga, o le misiona ma le faamoemoe ma le pogai lea o le i ai i le Ekalesia leni” (i ni fonotaga faapitoa a peresitene o siteki, Oke. 2, 1936).

6.1.3

O Le Faleteuolooa a le Alii

Ua faatuina e le Ekalesia i nisi nofoaga ni fale ua ta'ua o faleteuolooa a epikopo. A maua e tagata o le au paia se faatagaga mai lo latou epikopo, e mafai ona latou o i le faleteuolooa o epikopo e maua mai ai meaai ma lavalava. Peitai o le faleteuolooa a le Alii e le faatapulaaina i se fale e faaogaina e tufatufa ai meaai ma lavalava i e matitiva. E aofia ai foi le ofoina atu e tagata o le Ekalesia o o latou taimi, taleni, tigailofa, oloa, ma mea tautupe ua avatu i le epikopo e fesoasoani ai e tausua e matitiva ma e le tagolima. O lea la, o le faleteuolooa a le Alii e i ai i uarota taitasi. O nei taulaga e “tuu ai i le faleteuolooa a le Alii, . . . e taitoatasi le tagata ma saili i le lelei o lē la te tuaoi, a o faia mea uma i le manatu tasi i le mamalu o le Atua” (MF&F 82:18–19). O le epikopo o le sui lea o le faleteuolooa a le Alii.

6.2

Taitaiga o le Uelefea i le Uarota

6.2.1

Epikopo

O le epikopo e taitaia le galuega o le uelefea i le uarota. Ua i ai ia te ia se tiutetauave paia e saili atu ma tausua e matitiva (tagai MF&F 84:112). O lana sini o le fesoasoani atu lea i tagata o le uarota ia fesoasoani ia i latou lava ma ia ola faalagolago ia i latou lava.

O fesoasoani o le epikopo, peresitene o le Aualofa, taitai vaega o faitaulaga sili, o le peresitene o le korama a toecaina, ma isi sui auai o le aufono a le uarota, e fesoasoani i le epikopo i le faataunuaina o nei tiutetauave.

E tausisia e le epikopo le le faalauaitelaina o fesoasoani o le uelefea o loo tuuina atu i tagata. Na te puipuia ma le faaeteete tulaga patino ma le mamalu o tagata o loo tuuina atu i ai fesoasoani. A manatu o ia faapea e mafai e isi taitai o le uarota ona fesoasoani i tagata o loo manaomia le fesoasoani, e mafai ona ia faasoa atu i ai faamatalaga e tusa ai ma taiala o loo i le 6.4.

O nisi faamatalaga e uiga i tiutetauave faaleuelefea, e aofia ai taiala mo le faatautaia o fesoasoani mai tupe o le taulaga anapogi, o loo maua i le *Tusitaulima 1*, 5.2.

6.2.2

Aufono a le Uarota

I fonotaga a le aufono a le uarota, e aoao ai e le epikopo ia mataupu faavae o le uelefea ma faatonuina sui o le aufono i o latou tiutetauave o le uelefea. E mafafau sui o le aufono i itu faaleagaga ma faaletino o le uelefea e pei o nei:

Latou te fefautuaai faatasi i auala e fesoasoani ai i tagata o le uarota ia malamalama ma mulimuli i mataupu faavae o le uelefea.

Latou te lipoti atu i manaoga o le uelefea faaleagaga ma le faaletino i uarota, ma e maua mai faamatalaga mai asiasiga patino ma mai lipoti a faiaoga o aiga ma faiaoga asiasi. A oo ina matua le tatau lava ona faa-soa faalauaiteleina faamatalaga i le aufono atoa a le uarota, e talanoa patino taitai ma le epikopo pe i le fonotaga a le komiti taitai o le perisitua (tagai 6.2.3).

Latou te fuafuaina auala e fesoasoani ai i tagata patino o le uarota e taulima ai o latou manaoga faaleagaga ma faaletino, e aofia ai manaoga mo taimi uumi. Latou te fuafuaina se auala e fesoasoani ai i tagata e i ai tulaga le atoatoa po o isi manaoga faapitoa. Latou te le faalauaiteleina nei talanoaga (tagai 6.4).

Latou te faamaopoopoina taumafaiga e faamautinoa ai o tagata o le au paia e tuu atu i ai le fesoasoani a le Ekalesia e maua avanoa e galulue ai pe tuuina atu auaunaga. Latou te tuufaatasia ma tausia se lisi o avanoa 'anoa e galulue ai. Afai o loo i ai le polokalama o le uelefea a le Ekalesia i le eria, e mafai e nei polokalama ona maua ai avanoa faigaluega ma aoaoga mo tagata o e manaomia le fesoasoani a le Ekalesia.

Latou te tuufaatasia ma tausia se lisi o tagata o le uarota e i ai tomai atonu e aoga e tali atu ai i manaoga mo se taimi puupuu, taimi umi, po o faalavelave matuia.

Latou te amatalia ma tausia se fuafuaga tusitusia faigofie mo le uarota e tali atu ai i faalavelave faafuasei (tagai *Tusitaulima 1*, 5.2.11). Latou te faamaopoopoina lenei fuafuaga faatasi ma fuafuaga faapea i le siteki ma nuu.

6.2.3

Komiti Taitai o le Perisitua a le Uarota

A manaomia, e talanoaina e le komiti taitai o le perisitua mataupu e le faalauaiteleina o le uelefea. E mafai e le epikopo ona valaaulia le peresitene o le Aualofa e auai i nei talanoaga.

6.2.4

Vaega a Faitaulaga Sili, Korama a Toeaina, ma le Aualofa

O le uelefea e totonugalemu i le galuega a le vaega o faitaulaga sili, o le korama a toeaina, ma le Aualofa. I fonotaga faaleautaitai o le vaega a faitaulaga sili, le au peresitene o le korama a toeaina, ma le au peresitene o le Aualofa, e fuafua e taitai ni auala e aoa atu ai mataupu faavae o le faalagolago o le tagata ia te ia lava ma le auauna atu ma taulima ai manaoga faaleuelefea. I lalo o le taitaiga a le epikopo, e fesoasoani nei taitai i tagata o le au paia ia faalagolago ia i latou lava ma sailia vaifofo mo atugaluga faaleuelefea mo taimi pupuu ma taimi uumi.

Manaoga mo Taimi Pupuu

A tuuina atu e le epikopo le fesoasoani mo se taimi puupuu, e mafai ona ia tuuina atu ni tofitofiga i taitai Perisitua Mekisateko ma le Aualofa.

E masani ona tofi e le epikopo le peresitene o le Aualofa e asiasi i tagata o loo manaomia le fesoasoani mo taimi pupuu. E fesoasoani o ia ia i latou i le iloiloina o o latou manaoga ma fautua atu i le epikopo po o a fesoasoani e tuuina atu. E mafai e le epikopo ona faatonuina o ia e saunia se fomu o le Oka a le Epikopo mo Oloa mo ia [epikopo] e faamaonia ma saini.

O le matafaioi a le peresitene o le Aualofa i le faia o nei asiasiga i aiga e manaomia, o loo faamatala atoatoa atu i le 9.6.1. Mo faamatalaga e uiga i isi tiutetauave mo le uelefea i taimi pupuu ia e faatatau patino i le peresitene o le Aualofa ma ona fesoasoani tagai 9.6.2 ma le 9.6.3.

Manaoga Faaleuelefea mo se Taimi Umi

O le tele o faafitauli mo taimi pupuu e afua mai faigata mo taimi uumi e pei o le lelei o le soifua maloloina, leai ni tomai, le lava le a'otauina po o galuega, mausa o le ituaiga olaga e ola ai, ma luitau faalelagona. Ua i ai i taitai o le Perisitua Mekisateko ma le Aualofa se tiutetauave faapitoa e fesoasoani

i tagata e taulima nei popolega. O la latou sini o le taulimaina o popolega e uumi taimi i ni auala e taitai atu ai i se suiga e tumau.

A silafia e taitai o le Perisitua Mekisateko ma le Aualofa manaoga mo taimi uumi, latou te tali atu ma le mutimutialofa e fesoasoani ai i tagata taitasi ma aiga. Latou te faaogaina punaoa e maua i a latou faalapotopotoga ma i totonu o le uarota. Latou te tatalo mo le taitaiga ia iloa pe faapefea ona tuuina atu le fesoasoani.

Ina ia maua se malamalama atili pe faapefea ona fesoasoani, e masani i taitai o le Perisitua Mekisateko ma le Aualofa ona asiasi i tagata o le au paia o e e i ai manaoga faaleulefea. E mafai ona latou faaogaina le fomu o Auiliiliga o Mea e Manaomia ma Risosi a leai ia mulimuli i ona mataupu faavae e fesoasoani ai i tagata e fuafua auala e tali atu ai i manaoga faaleulefea.

A o fesoasoani ia taitai e tali atu i manaoga o taimi uumi, latou te fefautuaai ma le epikopo. I nisi o tulaga, e galulue faatasi ai taitai o le Perisitua Mekisateko ma le Aualofa.

Lipoti atu i le Epikopo ma Sailia Lana Taitaiga Faifai Pea

O le taitai vaega o faitaulaga sili, peresitene o le korama a toaina, ma le peresitene o le Aualofa e lipoti atu e le aunoa i le epikopo mea o loo latou faia ma a latou faalapotopotoga e taulima ai manaoga faaleulefea mo taimi pupuu ma taimi uumi i le uarota. Latou te sailia le taitaiga faifai pea a le epikopo ia latou taumafaiga faaleulefea.

Afai e i ai ni faafitauli mo taimi pupuu a ni tagata taitoatasi ma aiga latou te le mafai ona foia e i latou lava, ma e le mafai foi ona foia e taitai Perisitua Mekisateko ma le Aualofa, ia vave ona logo e taitai le epikopo.

A silafia e taitai Perisitua Mekisateko ma le Aualofa ni atugaluga e ono tulai mai i le agavaa po o

mataupu maaleale faaleaiga, latou te faasino atu tagata i le epikopo.

Faiaoga o Aiga ma Faiaoga Asiasi

O fesoasoani i le uelefea faaleagaga ma le faaletino e tele ina amata i faiaoga o aiga ma faiaoga asiasi. I se agaga o le agalelei ma le faauo lea e oo i talaatu o asiasiga faalemasina, e fesoasoani ai faiaoga o aiga ma faiaoga asiasi i tagata taitoatasi ma aiga e manaomia le fesoasoani. Latou te lipotia manaoga o i latou o loo latou asia i taitai perisitua po o taitai o le Aualofa.

Sailia o le Auaunaga mai Sui Auai o Korama ma le Aualofa ma Isi

E mafai e taitai o le Perisitua Mekisateko ma le Aualofa ona sailia le auaunaga a tagata e i ai tomai po o le poto masani e mafai ona fesoasoani ai i e e manaomia. E mafai e tagata o le au paia ona tuuina atu auaunaga e pei o le saunia o taumafa po o le vaaia o le fanau po o le faasoa atu o faamatalaga e uiga i galuega o loo i ai. E mafai foi e tagata o le au paia ona tuuina atu taiala e fesoasoani ai i manaoga faaleulefea mo se taimi umi, e pei o le soifua maloloina, tumama, o mea'ai, tapenaina mo se galuega, sailia o avanoa mo le a'otauina, amatina o se pisinisi laititi, po o le pulcaina foi o tupe a le aiga.

A uma ona talosagaina e taitai isi tagata e tuuina mai le fesoasoani, latou te fesootei pea ma tagata taitoatasi po o aiga lē tagolima e tuu atu i ai le faamalosiuga ma fesoasoani atu ai i isi auala e tatau ai.

E mafai ona fesoasoani atu taitai i le epikopo pe a ia faasino atu tagata o le au paia i matata faaleulefea a le Ekalesia e pei o faleteuolao o epikopo, nofoaga tutotonu o le Ekalesia mo punaoa faigaluega, Desert Industries, ma le LDS Family Services. E mafai foi e taitai ona fesoasoani i tagata ia maua le fesoasoani e ala i sui o nuu ma le malo.

6.2.5**O Tagata o le Uarota e Faapitoa mo le Uelefea**

O tagata o le uarota e faapitoa mo le uelefea e avea ma punaoa e fesoasoani i le au epikopo ma taitai o le Perisitua Mekisateko ma le Aualofa e faatino o latou tiute faaleulefea.

E mafai e le au epikopo ona valaau se tagata tomai faapitoa mo galuega e fesoasoani e saunia tagata mo le sailia o galuega talafeagai. E mafai foi e le au epikopo ona valaau isi tagata tomai faapitoa e fesoasoani i tagata e i ai manaoga e pei o a’oga, aoaoga faamasani, meaai paleni, tumama, meaai e teu i fale, tausiga faasoifua maloloina, mea tautupe a le aiga, ma le Tupe Faaagaga mo Aoga.

6.3**Taitaiga o le Uelefea i le Siteki****6.3.1****Peresitene o le Siteki**

O le peresitene o le siteki e vaaia galuega faaleulefea i le siteki. O nisi faamatalaga i ona tiutetauave faaleulefea o loo maua i le *Tusitaulima 1, 5.1*

6.3.2**Aufono a le Siteki**

I fonotaga a le aufono a le siteki, e manatunatu ai taitai i mataupu tau i le uelefea faaleagaga ma le faaletino e pei ona ta’ua i lalo:

Latou te faailoaina atugaluga faaleulefea ma sailia ni auala e taulima ai na atugaluga. Peitai, latou te le tauaveina le tiutetauave e foia ai mataupu tau i le uelefea i uarota.

Latou te fuafuaina auala e aoao atu ai mataupu faavae o le uelefea i taitai o le siteki ma uarota.

Latou te talanoaina auala e faailoa atu ai i taitai o uarota ia tagata o i le siteki e mafai ona avea ma punaoa e fesoasoani atu i manaoga tau i le uelefea.

Latou te amatalia ma tausia se fuafuaga tusitusia faigofie mo le siteki e tali atu ai i faalavelave faafua-sei (tagai i le *Tusitaulima 1, 5.1.3*) O lena fuafuaga e tatau ona faamaopoopoina faatasi ai ma fuafuaga faapea a isi siteki i le aufono faamaopoopo ma faatasi ai ma fuafuaga i le nuu.

Latou te fuafuaina gaoioiga faaleulefea, ma le faateete ia le tuuina atu ni avega e le talafeagai i luga o taitai o uarota.

Latou te fuafuaina auala e tali atu ai i tofiga faaleulefea a le siteki.

Pe a tofia ai e se uso o le Au Peresitene o Fitugafulu po o le Au Peresitene o le Eria, latou te saunia le taitaiga ma le lagolagosua mo se faatinoga o le uelefea.

Afai ua tofia se epikopo e taulimaina talosaga mo fesoasoani i tagata o e fai mai pe leai ni mea e nonofo ai, e fuafua e sui auai o le aufono a le siteki pe faapefea ona faaavanoa punaoa a le siteki i lena epikopo.

6.3.3**O Tagata o le Siteki e Faapitoa mo le Uelefea**

E mafai e se uso o le au peresitene o le siteki po o se fautua maua luga e tofia ona valaau se tagata tomai faapitoa o le siteki mo galuega ma isi tagata faapitoa mo le uelefea. E avea tagata tomai faapitoa o le siteki ma punaoa mo epikopo ma isi taitai o uarota. E mafai ona fesoasoani ia tagata faapitoa i manaoga faaleulefea e pei o mea o loo lisi atu i le 6.2.5.

6.4

O Le Le Faalauaiteleina

A silafia e le epikopo ma isi taitai o le uarota manaoga faaleulefeā o tagata o le au paia ma fesoasoani ua tuuina atu, latou te tausisia le le faalauaiteleina o na faamatalaga. Latou te puipuia ma le faaeteete tulaga patino ma le mamalu o tagata o loo tuuina atu i ai fesoasoani. Latou te faaeteete ia le faamaasi-asia tagata o loo manaomia le fesoasoani.

Atonu e i ai taimi e ono fesoasoani ai mo le aufono atoa a le uarota, ma atonu ma isi foi tagata o le

uarota, ona iloa e uiga i manaoga faaleulefeā o se tagata po o se aiga. Mo se faataitaiga, a i ai se tagata e le o faigaluega pe o loo sailia se galuega e sili atu, e ono fesoasoani isi e fesoasoani i le tagata e sue vave se galuega. I tulaga faapena, e sailia lava e le epikopo ma isi taitai se faatagaga mai tagata o loo moomia le fesoasoani, ina ia faasoa atu faamatalaga e uiga i o latou tulaga.

A talosagaina e taitai isi e fesoasoani, latou te faasoa atu i ai tau lava o le faamatalaga e moomia e faatau-nuu ai le mea ua tofi i ai. E faatonuina foi e taitai i latou ina ia tausisia le le faalauaiteleina.

7.

Perisitua Mekisateko

7.1

Faauigaga ma Faamoemoega o le Perisitua Mekisateko

O le perisitua o le mana ma pule a le Atua. E faaee atu i luga o tama tane agavaa uma o le Ekalesia. O i latou o e umia ki o le perisitua e faatonutonuina le faatautaiga o sauniga o le talalelei, le talaiga o le talalelei, ma le pulega o le malo o le Atua i le fogaelele.

O le Perisitua Mekisateko e umia “ki o faamanuiaga uma faaleagaga o le ekalesia” (MFF 107:18).

Mo nisi faamatalaga e uiga i faamoemoega o le perisitua ma ki o le perisitua, tagai i le mataupu e 2.

7.1.1

O Tofi ma Tiute o le Perisitua Mekisateko

O tofi o le Perisitua Mekisateko o le toeaia, faitaulaga sili, peteriaka, Fitugafulu, ma le Aposetolo. E tofu ia tofi o le perisitua ma aia tatau ma tiutetauave o le auauna atu, e aofia ai le pule e faatautaia ia sauniga o le perisitua. O le mataupu leni o loo i ai faamatalaga mo taitai o toeaia ma faitaulaga sili. Mo faamatalaga e uiga i le faauuina i tofi o le toeaia ma le faitaulaga sili (tagai i le 20.7).

Toeaina

E mafai e uso agavaa ona mauaina le Perisitua Mekisateko ma faauuina o ni toeaia pe a 18 tausaga pe matutua atu foi. O aia tatau ma tiutetauave o toeaia o loo faaalua mai i le Mataupu Faavae ma Feagai-ga 20:38–45; 42:44; 46:2; ma le 107:11–12. E umia foi e toeaia le pule o tiakono, aoao, ma ositaulaga.

Faitaulaga Sili

E faauuina uso o ni faitaulaga sili pe a valaauina i latou i le au peresitene o le siteki, fautua maualuga,

po o le au epikopo, pe a lē o lea, a ua fuafuaina ai e le peresitene o le siteki. O aia tatau ma tiutetauave o faitaulaga sili o le pulefaamalumu lea ma umia le pule uma o toeaia (tagai i le MFF 107:10).

O uso i itu e le faauuina i le tofi o le faitaulaga sili.

7.1.2

O Korama o le Perisitua Mekisateko

O se korama o le perisitua o se vaega faatulagaina o uso. O faamoemoega autu o korama o le auauna atu lea i isi, fausia le lotogatasi i le usoga, ma aoao ia tagata o le au paia i aoaoga faavae, mataupu faavae, ma tiute.

O Aposetolo ma Fitugafulu e faatulagaina i korama i le tulaga aoao o le Ekalesia.

E tofu le siteki ma se korama e tasi o faitaulaga sili. O le au peresitene o le siteki o le au peresitene lea o lena korama. O uso o lena korama o ni faitaulaga sili o loo auauna atu i le taimi leni i valaauga nei: o le peresitene o le siteki ma ona fesoasoani, o epikopo i le siteki ma o latou fesoasoani, o fautua maualuga, ma peteriaka o loo galulue. O failautusi, failautusi faapitoa, ma au peresitene o paranesi e le o ni uso o le korama a faitaulaga sili.

I Aso Sa, o uso o le korama a faitaulaga sili e fono ma le korama a toeaia pe afai e le o tofiaina i nisi valaauga i se isi mea.

E i ai i uarota taitasi se korama e tasi a toeaia pe sili atu foi. E aofia i le korama a toeaia ia toeaia uma ma toeaia faolioli i le uarota. E aofia ai foi ma faitaulaga sili e le o auauna atu i le taimi nei i valaauga nei: o le peresitene o le siteki ma ona fesoasoani, o le epikopo ma ona fesoasoani, o fautua maualuga,

ma peteriaka o loo galulue. O uso o le korama a toecaina—pe o ni toecaina, fitugafulu, po o ni faitaulaga sili—e tumau pea tofi o o latou perisitua o loo i ai nei.

O uso o au peresitene o malumalu, misiona, ma nofoaga autu e aoao ai faifeautalai o ni uso o korama a toecaina a o latou uarota.

Afai e i ai i se uarota se aofaiga tele e le masani ai o ē e umiaina le Perisitua Mekisateko e toaaga i le lotu, e mafai e le au peresitene o le siteki ona faatulagaina se korama faaopoopo a toecaina (tagai i le MFF 107:89). I tulaga faapena, e tataui korama taitasi ona i ai se paleni o tausaga o le matutua, pototo masani, ma tofi ma le malosiaga o le perisitua.

E faauuina toecaina o ni faitaulaga sili pe a valaauina i latou e auuina atu o se peresitene o le siteki po o se tasi o ona fesoasoani, o se epikopo po o se tasi o ona fesoasoani (mo se tuusaunoaga, tagai i le “Taitaiga” i le *Tusitailima 1*, 9.1.6), i le au faitua maualuga, po o nisi taimi pe a fautuaina ai e le epikopo ma faamaoniaina e le peresitene o le siteki.

7.2

Taitaiga o le Perisitua Mekisateko i le Siteki

7.2.1

Au Peresitene o le Siteki

O le peresitene o le siteki o le faitaulaga sili pulefaamalumalu i le siteki. O ia ma ona fesoasoani ua faia ai le au peresitene o le korama a le au faitaulaga sili o le siteki.

O le peresitene o le siteki e vaavaaia le faaecina atu o le Perisitua Mekisateko ma le faauuina i tofi o le toecaina ma le faitaulaga sili (tagai i le *Tusitailima 1*, 16.7.1).

O le peresitene o le siteki e valaauina se toecaina po o se faitaulaga sili i uarota taitasi e avea ma peresitene o le korama a le au toecaina. A o lei valaauina se peresitene fou o le korama a toecaina, e feutagai le peresitene o le siteki ma le epikopo o le uarota. E mafai e le epikopo ona fautuaina atu po o ai e valaau.

O le peresitene o le siteki, se fesoasoani e tofia, po o se fautua maualuga foi e tofia, e valaauina fesoasoani i le au peresitene o le korama a toecaina. O le peresitene o le korama a toecaina, i le feutagai ai ma le epikopo, e mafai ona fautuaina atu fesoasoani. E mafai ona ia fautuaina atu a le o ni faitaulaga sili po o ni toecaina e avea ma fesoasoani.

O fautuaga uma mo le valaauina o uso o au peresitene o korama a toecaina e manaomia ai le faamaoniga a le au peresitene o le siteki ma fautua maualuga.

A valaauina uso fou o le au peresitene o le korama a toecaina, o se tasi o le au peresitene o le siteki po o se fautua maualuga na te tuuina atu i latou i uso o le korama mo se palota lagolago.

O le peresitene o le siteki e vaetofiaina se peresitene fou o le korama a toecaina ma faace atu i ai ki o lona valaauga. O se sui o le au peresitene o le siteki po o se fautua maualuga e vaetofiaina ia fesoasoani i le peresitene o le korama a toecaina.

Mo faamatalaga e uiga i valaauga o le korama a toecaina i paranesi i misiona, tagai i le Siata o Valaauga i le mataupu e 19.

7.2.2

Fautua Maualuga

I lalo o le taitaiga a le au peresitene o le siteki, o fautua maualuga e vaia le galuega a le Ekalesia i le siteki. O o latou tiutetauave e faatatau i korama a toecaina o loo faamatala atu i le 15.3.1.

7.3**Taitaiga o le Perisitua Mekisateko i le Uarota**

O loo taulai atu leni mataupu i le taitaiga o le korama a toeaina i se ala e faamalolosia ai tagata taitoatasi ma aiga. E ao i taitai Perisitua Mekisateko ona iloilo ina soo le Mataupu 3, lea o loo ootoo atu ai mataupu faavae aoao o le taitaiga. O nei mataupu faavae ua aofia ai le saunia faalecagaga, auai i aufono, auaina atu i isi, ma le aoao atu o le talalelei a Iesu Keriso.

7.3.1**Au Epikopo**

O le epikopo o le faitaulaga sili pulefaamalumalu i le uarota. E galulue vavalalata o ia ma ona fesoasoani faatasi ma le perisitene o le korama a toeaina i le leoleoina o uso o le korama ma o latou aiga, fausiaina o le malosiaga i totonu o le korama, ma faamautinoa o loo faataunuaina le galuega a le au perisitua.

O le perisitene o le korama a toeaina e lipoti sa’o atu i le au perisitene o le siteki. Peitai, o le epikopo, i le avea ai ma faitaulaga sili pulefaamalumalu i le uarota, e fono foi e le aunoa ma le perisitene o le korama a toeaina. E fefautuaai faatasi le epikopo ma ia ma tuuina atu le taitaiga e uiga i le ala e auaina atu ai ma faamanuia ia tagata o le uarota, e galulue felagolagoma’i ma faalapotopotoga uma a le uarota. E talosagaina e le epikopo o ia e lipoti atu ona tiutetauave, e aofia ai taumafaiga a uso o auunaga.

7.3.2**Au Perisitene o le Korama a Toeaina**

O le au perisitene o le korama a toeaina e pulefaamalumalu, e fono faatasi, ma aoao atu ia uso o le korama (tagai i le MFF 107:89). Latou te taitaia taumafaiga a le korama e faalatele le galuega o le faaolataga i le uarota (tagai i le mataupu 5). Latou

te maua faatonuga mai le au perisitene o le siteki, uso e tofia o fautua maua, ma le epikopo.

Perisitene o le Korama a Toeaina

Ua i ai i le perisitene o le korama a toeaina ia tiutetauave nei:

E galue o ia o se tasi o le aufono a le uarota. I le avea ai o se sui o leni aufono, e auai o ia i taumafaiga e fausia ai le faatuatua ma faamalolosia tagata taitasi ma aiga (tagai i le mataupu 4).

Na te aoao atu i uso o le korama o latou tiute, e faa-aoga ai leni tusitaulima e avea ma punaao.

I le feutagai ai ma le epikopo, na te tuuina atu fautuaga mo uso ina ia valaauina e avea ma fesoasoani i le au perisitene o le korama a toeaina. Na te tuuina atu foi fautuaga i le epikopo mo uso ina ia valaauina e avea ma failautusi, o ni faiaoga, ma isi valaauga i le korama a toeaina. I le faia o nei fautuaga, e mulimuli o ia i taiala o loo i le 19.1.1 ma le 19.1.2.

Na te vaaia faamaumauga, lipoti, paketi, ma tupe a le korama. E fesoasoani le failautusi o le korama i leni tiutetauave.

Perisitene o le Korama a Toeaina ma Fesoasoani

Ua i ai i le au perisitene o le korama a toeaina tiutetauave nei: E tofia e le perisitene o le korama a toeaina ona fesoasoani e vaaia nisi o nei tiutetauave. E le sili atu ma le toalua fesoasoani e mafai ona valaauina.

Latou te fautuaina uso o le korama e faataunuu o latou tiute o le perisitua, aemaise lava o latou tiute o ni tane ma tamā. E faataunuuina e taitai o le korama leni tiutetauave i le taimi o fonotaga a le korama ma i le taimi o faatalanoaga ma asiasiga ma uso o le korama.

Latou te faamaopoopoina le auunaga faatasi ma le au perisitene o le Aualofa, faatulaga ma vaavaaia le galuega a uso o auunaga, ma faia ia faatalanoaga o auunaga.

Latou te vaavaaia taumafaiga e faaleleia atili le aoao mai ma le aoao atu o le talalelei i le korama a toea-ina. I nei taumafaiga, latou te mulimuli i mataupu faavae o i le 5.5.3 ma le 5.5.4.

Latou te faamaopoopoina ia taumafaiga a le aufono a le uarota e uunaia le galuega o malumalu ma talafaa-solopito o aiga i le uarota (tagai i le 5.4.3). Latou te faamaopoopoa foi le galuega a faufautua o malumalu ma talafaasolopito o aiga a le uarota.

Latou te faia fonotaga a le au peresitene o le korama a toeaia.

I lalo o le taitaiga a le epikopo ma le galulue faatasi ai ma le au peresitene o le Aualofa, latou te fuafua ai auala e taulimaina ai manaoga faaleuelefea i le korama ma tuu atu ai auunaga alofa (tagai i le 7.5 ma le mataupu 6).

Latou te asiasi atu pe faatalanoa foi uso o le korama ia le itiiti ifo ma le faa-tasi i le tausaga. Latou te talanoaina tiute o le perisitua ma le tulaga manuia o lē umiaina le perisitua ma lona aiga. O leni asiasiga po o le faatalanoaga e le tatau ona tuufaatasia ma se faatalanoaga o auunaga lea e i ai foi ma le soa.

E mafai ona latou faatulagaina uso o le korama e faataunuuina le galuega a le korama ma faataunuu tofitofiga e tuuina mai i fonotaga a le aufono a le uarota (tagai i le 7.3.5).

Latou te fesoasoani i toeaia faaolioli ia maua le Perisitua Mekisateko (tagai i le 7.6).

Faatasi ai ma le faamaoniga mai le epikopo, e mafai ona latou fuafuaina i nisi taimi ia gaoioiga. O nei gaoioiga e tatau ona tausisia taiala o loo i le mataupu 13 ma e tatau ona faamaopoopoina faatasi ma le aufono a le uarota.

Pe a tofia ai e le epikopo, latou te galulue ma matua ma taitai o Alii Talavou e fesoasoani i alii talavou ua ta'i 18 tausaga e sauniuni mo le mauaina o le Perisitua Mekisateko, ma faia se suiga sologa lelei mai le korama a ositaulaga i le korama a toeaia.

O le peresitene o le korama a toeaia e tofia se tasi o ona fesoasoani e faamaopoopoina taumafaiga a le korama ma alii talavou nofofua matutua i le uarota. Afai e i ai se komiti o talavou nofofua matutua a le uarota, e galue le fesoasoani lea i le komiti. (Tagai 16.3.3 ma le 16.3.4.)

7.3.3

Failautusi a le Korama a Toeaia

Faatasi ai ma le faamaoniga a le epikopo, o le peresitene o le korama a toeaia po o se tasi o ona fesoasoani e valaauina ma vaetofiaina se toeaia po o se faitaulaga sili e avea ma failautusi o le korama a toeaia. Ua i ai i le failautusi a le korama ia tiutetau-ave nei:

E feutagai o ia ma taitai o le korama e saunia lisi o mataupu talanoaina mo fonotaga a le au peresitene. E auai atu o ia i nei fonotaga, tusia minute, ma tuli-loa ia tofitofiga.

E mafai ona ia faatulagaina ia faatalanoaga o auunaga mo le peresitene o le korama a toeaia ma ona fesoasoani.

O kuata taitasi, na te tuufaatasia ai se lipoti o le auai o sauniga a le korama ma faatalanoaga o auunaga sa faia. Na te iloiloaina leni lipoti faatasi ma le peresitene o le korama a toeaia ma auina atu i le failautusi a le uarota.

Afai e fuafuaina e le korama ni gaoioiga o le a i ai ni tupe e faaalu ai, e fesoasoani failautusi i taitai e saunia se paketi faaletausaga ma le tala mo tupe faaalu.

7.3.4

Faiaoga o le Korama a Toeaia

Faatasi ai ma le faamaoniga a le epikopo, e mafai e le peresitene o le korama a toeaia po o se tasi o ona fesoasoani ona valaauina ma vaetofiaina se toeaia po o se faitaulaga sili se toatasi pe sili atu e avea ma faiaoga o le korama a toeaia.

O taitai o le korama e tofaina faiaoga e aoao atu aoaoga faavae ma taitai talanoaga o lesonea i le taimi o sauniga a le au perisitua. E mulimuli faiaoga i mataupu faavae o loo ootoo atu i le 5.5.4.

7.3.5

Isi Valaauga a le Korama a Toeaina

O valaauga o loo i ai i lenei vaega e tuu i le faitalia. E mafai e le epikopo ma le peresitene o le korama a toeaina ona filifili e faapea e le manaomia nei tofiga, pe atonu foi latou te lagonaina e manaomia ni valaauga faaopoopo. O le au peresitene o le koama a toeaina e fautuaina atu ia uso e auauna atu i nei valaauga. Faatasi ai ma le faamaoniga a le epikopo, o le peresitene o le korama a toeaina po o se tasi o ona fesoasoani e tuuina atu nei valaauga.

Failautusi Fesoasoani ma Failautusi o Auaunaga

O le au peresitene o le korama a toeaina e mafai ona valaauina se failautusi fesoasoani se toatasi pe sili atu e fesoasoani i tiutetauave faafailautusi (tagai i le 7.3. 3). E mafai ona auauna atu toeaina faaolioli o ni failautusi fesoasoani.

Afai e manaomia e le au peresitene se fesoasoani faaopoopo i le faatulagaina o faatalanoaga o auunaga ma saunia le lipoti faalekuata (tagai i le 7.4), e mafai ona latou fefautuaai faatasi ma le epikopo e uiga i le valaauina o se failautusi se toatasi pe sili atu o le auunaga. E le faia e ni failautusi o auunaga ni faatalanoaga o auunaga. E mafai ona auauna atu toeaina faaolioli o ni failautusi o auunaga.

Taitai Faamaopoopo o Auaunaga ma Fesoasoani

Pe a manaomia, e mafai e le au peresitene o le korama a toeaina ona valaauina se uso o le korama e faamaopoopoina ia auunaga. E mafai foi ona valaau ni fesoasoani.

Taitai Faamaopoopo o Gaoioiga ma Fesoasoani

Pe a manaomia, e mafai e le au peresitene o le korama a toeaina ona valaauina se uso o le korama e faamaopoopoina ia gaoioiga e le faia i le Aso Sa. E mafai foi ona valaau ni fesoasoani.

O Isi Valaauga ma Tofiga

Pe a manaomia, e mafai e le au peresitene o le korama a toeaina ona valaauina pe tofaina ni uso o le korama e faataunuuina le galuega o le faaolataga. Mo se faataitaiga, e mafai ona latou fefautuaai faatasi ma le epikopo e uiga i le valaauina o tagata e fesoasoani i le faamalolosia o talavou nofofua matutua, faia o galuega o malumalu ma talafaasolopito o aiga, ma le faasoaina atu o le talalelei. E le tau valaauina ma vaetofaina uso i ni tofiga mo se taimi puupuu. O uso e taitai pe auauna atu i ni tofiga mo se taimi umi, e valaauina ma vaetofaina e se uso o le au peresitene o le korama a toeaina.

7.4

Auaunaga

Sa faaali mai e le Faaola e ala i faataitaiga le uiga o le auauna atu a o Ia auauna atu ona o le alofa mo Lona Tama, ma mo fanau a Lona Tama (tagai i le Ioane 15:9–10). Sa Ia alofa atu, aoao atu, tatalo mo [isi], faamafanafana atu, ma faamanuia i latou sa siomiaina o Ia, ma valaaulia tagata uma ia mulimuli ia te Ia (tagai i le Mareko 8:34). E saili atu ma le agaga tatalo uso o auunaga e auauna atu e pei o le a Ia faia. Ina ia tuuina atu se tausiga faapea, ua i ai i aiga taitasi o le au paia ni uso o le perisitua ua tofia o ni uso o auunaga e leoleo i le aiga po o tagata taitoatasi o e o loo nonofo ai iina (tagai i le MFF 20:47, 59).

E aoao atu e au peresitene o korama a toeaina ia uso o auunaga i le auala e tausia ai ma faamalolosia aiga ma tagata taitoatasi. E mafai e uso o le au peresitene ona tuuina atu leni aoaoga i faatalanoaga o auunaga po o sauniga i le Aso Sa.

O le auauna atu o se uso o auaunaga o se tiutetauave faaleperisitua o aoao, ositaulaga, ma i latou e umia le Perisitua Mekisateko. O lea, e tofia ai uso o auaunaga e taitai perisitua. E le valaauina, e le tuuina atu mo le lagolagoina, pe vaetofiaina i latou.

Talu ai e nafa au peresitene o siteki ma au epikopo ma tagata uma o le siteki po o uarota, e le mafai ai ona tofia nei uso e avea o ni uso o auaunaga i tagata taitoatasi po o ni aiga patino. O fautua maua ma peteriaka o loo galulue e mafai ona tofi, e fua lea i tulaga faalelotoifale, e pei ona fuafuaina e le peresitene o le siteki. Afai e tofia i latou, e fai e se uso o le au peresitene o le korama a toecaina le tofiga.

O uso o le korama a faitaulaga sili o le siteki, o o latou faletua, ma o latou aiga ua i ai uso ma tuafafine o auaunaga ua tofia ia i latou e o latou au peresitene o korama a toecaina ma le Aualofa, i lalo o le taitaiga a le epikopo.

7.4.1

O Tiutetauave o Uso o Auaunaga

O uso o auaunaga e fai ma sui o le Alii, le epikopo, ma taitai o le korama. Latou te “asiasi atu i fale o tagata taitoatasi o le ekalesia, ma apoapoai atu ia te i latou ia tatalo atu ma le leo ma i le mea lilo ma faasaga i tiute uma faaleaiga” (MFF 20:51). E tofia i latou i aiga ma tagata taitoatasi e “leoleo . . . ma faatasi ma faamalosi i latou” (MFF 20:53). Latou te “lapatai atu, folafola atu, apoapoai atu, aoao atu ma valaau atu i tagata uma ia o mai ia Keriso” (MFF 20:59).

E saili atu uso o auaunaga ina ia taitaiina e le Agaga a o latou tuuina atu le tausiga FaaKeriso. Latou te fefautuaai faatasi ma i latou ua tofia i ai i latou ma saili atu i musumusuga e uiga i le auala sili e faafetaia'ia ai o latou manaoga, e faaoga ai le taimi ma punaoa o loo maua.

E fetuutuunai uso o auaunaga i auala latou te auauna atu ai. Latou te fetuunaia a latou fesoootaiga,

auaunaga, ma soo se savali e faafetaia'ia ai manaoga o tagata o le ekalesia. E taua asiasiga patino i taimi e mafai ona faia ai. E mafai foi e uso o auaunaga ona aapa atu e ala i valaau i telefoni, tesi, imeli, tusi, fesoootaiga i le lotu, auai i mea e tutupu i le aiga, ma auaunaga.

O le faafetaia'ia o manaoga taitoatasi e amata i iloiloga ma le agaga tatalo atoatoa ai ma le faia o se talanoaga ma tagata taitoatasi ma aiga ua tofia i ai i latou. E faalogo atu uso o auaunaga ina ia mafai ona latou malamalama i le auala sili e auauna atu ai. Latou te talanoaina le tulaga fai soo ma le ituaiga o fesoootaiga e manaomia e tagata o le au paia. Latou te talanoaina foi le ituaiga o savali o le a fiafia i ai tagata o le ekalesia.

E mafai ona avea uso o auaunaga ma se punavai taua o fesoasoaniga i tagata o le au paia. O loo lisi atu i lalo nisi o auala:

1. Latou te fesoasoani i tagata o le au paia ia faamalosi lo latou faatuatua i le Tama Faalelagi ma Iesu Keriso.
2. Latou te fesoasoani i tagata o le au paia ia saunia mo o latou sauniga e sosoo ai. E mafai ona latou fesoasoani i matua e faamautinoa ua faamanuia a latou fanau, papatiso, ma faamauiina. E mafai foi ona latou fesoasoani i matua e faamautinoa ua faaee i o latou atalii le Perisitua Arona ma le Perisitua Mekisateko ma ua faauuina i tofi o le perisitua i tausaga talafeagai.
3. Latou te faamasani i manaoga ma mea e fiafia i ai tagata o le aiga, ma latou te aloaia mea faapitoa e tutupu i o latou olaga.
4. Latou te ofo atu le fesoasoani pe a leai ni galuga a tagata o le au paia, mama'i, tuulafoaiina, siitia i se isi nofoaga, po o isi manaoga o i ai.
5. Latou te fesoasoani i tagata o le au paia ia ola-tutoatasi.

7.4.2

Faamaopoopoina o le Auaunaga

O le auaunaga o se taumafaiga e faamaopoopoina i le va o le korama a toeaina ma le Aualofa. I le galulue ai i lalo o le taitaiga a le epikopo, e faamaopoopo ai ma le agaga tatalo e au peresitene o le korama a toeaina ma le Aualofa le auaunaga i vaega nei:

1. E fautua atu e le au peresitene o le korama a toeaina i le epikopo ia soa o auaunaga ma tofiga faaleauaunaga mo tagata taitoatasi ma aiga o le uarota. E fautua atu e le au peresitene o le Aualofa ia soa o auaunaga ma tofiga faaleauaunaga mo tuafafine o le Aualofa. E talanoaina e le au peresitene o le korama a toeaina ma le au peresitene o le Aualofa ia tofiga patino a o lei fautuaina atu i le epikopo.
2. Pe a talafeagai ai, e mafai ona talanoaina faatasi e uso ma tuafafine o auaunaga a se tagata po o se aiga a latou taumafaiga e faafetaia'ia ai manaoga. Pe a talafeagai ai, e mafai ona latou faafesootaia o latou au peresitene o le korama po o le Aualofa mo se fesoasoani ma punaoa faaopoopo.
3. E faia e uso o le au peresitene o le korama a toeaina ia faatalanoaga ma uso o auaunaga e le itiiti ifo ma le faalekuata (tagai i le 7.4.4).
4. E fono i kuata taitasi le au peresitene o le korama a toeaina ma le au peresitene o le Aualofa e talanoaina malosiaga ma manaoga o tagata taitoatasi ma aiga na iloaina e ala i faatalanoaga o auuunaga. Pe a manaomia ai, latou te faamaopoopoina foi tofiga faaleauaunaga.
5. E sosoo ai ma lena fonotaga, e fono faatasi faalekuata le peresitene o le korama a toeaina ma le peresitene o le Aualofa ma le epikopo e talanoaina manaoga o tagata taitoatasi ma aiga. E mafai foi ona latou faamaopoopoina tofiga faaleauaunaga ma maua mai le faamaoniga a le epikopo mo a latou fautuaga.
6. Pe a manaomia, e talanoaina e le peresitene o le korama a toeaina ma le peresitene o le Aualofa

faatasi ma le aufono a le uarota ia malosiaga ma manaoga na faailoaina mai faatalanoaga o auaunaga. E fai e tagata o le aufono a le uarota ia fuafuaga e auauna atu ma faamanuia ai tagata o le uarota.

7.4.3

Faatulagaina o le Auaunaga e Faafetaia'ia ai Manaoga i le Lotoifale

E fautua atu ma le agaga tatalo e le au peresitene o le korama a toeaina i le epikopo ia tofiga mo uso o auaunaga e tausia ai tagata taitoatasi ma aiga i le uarota. E talanoaina e uso o le au peresitene ia malosiaga ma manaoga o tagata taitoatasi ma aiga. Latou te fautuaina atu ni uso o auaunaga e tuuto mo ni tagata fou, o tagata le toaaga o e atonu e sili ona taliaina [auaunaga], ma isi e pei o matua nonofo taitoatasi, fafine ua oti tane, po o tane ua maliliu avā.

A maea ona tuu atu e le epikopo le faamaoniga, e feiloai se uso o le au peresitene o le korama a toeaina faatasi ma uso o auaunaga e tuu atu i ai o latou tofiga ma fautua atu i ai e uiga i malosiaga, manaoga, ma luitau o i latou o loo auauna atu i ai ia uso. O leni talanoaga e mafai ona faia i se faatalanoaga o auaunaga pe i soo se taimi e manaomia ai.

E masani ona tofia e le au peresitene o le korama a toeaina ni uso i soa ta'itoalua. E mafai ona tofia se ulugalii faaipoipo e auauna atu faatasi pe afai e sili atu ona aoga lea e faafetaia'ia ai manaoga o se tagata patino po o se aiga.

E auauna atu aoao ma ositaulaga o ni soa i e umia le Perisitua Mekisateko. I le mavae ai ona feutagai ma matua ma taitai, e tuu atu e se uso o le au peresitene o le korama a toeaina ni tofiga faaleauaunaga i aoao ma ositaulaga.

O le taiala e faapea e toalua ni tagata matutua lelei e ao ona auai faatasi ma se talavou, e le faaaogaina i tofiga o soa o auaunaga. Peitai, i lalo o le taitaiga a lo latou epikopo, e tatau i taitai ona faaaoga le

atamai ma saili atu i musumusuga pe a tofiaina talavou o ni soa i tagata matutua.

E tatau i soa matutua ona aloese mai tulaga ia e ono malamalama sese ai. E tatau ona latou faateete e faatatau i tulaga e tuua ai na'o latou taitoatasi ma se talavou e toatasi ina ia maua e le autalavou se aafiaga saogalemu ma tauia i le auauunaga. E le gata i lea, e tatau ona faaoga e taitai le atamai i le le tofiaina o le autalavou i ni aiga faigata po o ni faafitauli faaleaiga.

Pe a tofiaina le autalavou i se soa e le o se matua, e tatau ona faamautinoa e taitai e le o tetee i ai matua i le tofiga.

O taitai o le korama a toecaina i uarota a talavou nofofua matutua latou te fautuaina atu i le epikopo ia uso o auauunaga mo tagata taitasi i le uarota. O tagata nofofua o le au paia e nofo'oga faatasi i se falemautotogi e mafai ona asia e le soa e tasi o uso o auauunaga. Peitai, e tatau i uso o auauunaga ona tau-lai atu i le auauuna atu i tagata taitoatasi ma e tatau ona lipoti eseese atu ia tagata taitasi.

Faatasi ai ma le faamaoniga mai le peresitene o le misiona, e mafai ai e taitai ona iloilo e talosagaina faifeautal'ai faamisiona e fesoasoani i le auauunaga i se tulaga faatapulaa. E ta'u atu e le peresitene o le misiona lena faamaoniga i le peresitene o le siteki, o le na te faailoa atu i epikopo. A tuuina atu lena faamaoniga, ona tofia muamua lea o faifeautal'ai faamisiona e asiasi i tagata fou, aiga e le lolotu uma, ma tagata ua le toaaga mai.

7.4.4

Faatalanoaga o Auauunaga

E faia e uso o le au peresitene o le korama a toecaina ia faatalanoaga ma uso o auauunaga (e aofia ai aoao ma ositaulaga) e le itiiti ifo ma le faatasi i kuata taitasi. E mafai ona faia faatalanoaga i le gasologa o le kuata atoa ma e le manaomia ona faaumi ina ia lelei ai.

Ae e sili atu le faia o nei faatalanoaga faafesaga'i ma faatasi ma uso uma e toalua o le soa. O se ulugalii

faaiipoipo e tofia e auauuna atu faatasi e mafai ona fono ma o la taitai o le korama a toecaina, Aualofa, po o taitai uma e toalua.

E faia faatalanoaga o auauunaga e:

1. Fefautuaai ai e uiga i malosiaga, manaoga, ma luitau o aiga ma tagata taitoatasi ua tofia i ai.
2. Ia fuafua po o a manaoga e ono fesoasoani i ai le korama a toecaina, Aualofa, aufono a le uarota, ma isi.
3. Aoao atu ma faamalosiua atu i uso o auauunaga.

I le va o faatalanoaga, e fesootei atu ai e uso o auauunaga faamatalaga pe a manaomia—e faafesagai pe valaau atu i le telefoni, tesi, po o imeli. E na o le peresitene o le korama a toecaina latou te faasoa atu i ai faamatalaga e le faalauaitelina pe faasoa sa'o atu i le epikopo.

O kuata taitasi, e fono ai le peresitene o le korama a toecaina ma le peresitene o le Aualofa faatasi ma le epikopo e talanoaina manaoga o tagata taitoatasi ma aiga. Pe a manaomia ai, latou te faamaopoopo-ina foi tofiga faaleauauunaga. E vave lipoti atu e le peresitene o le korama a toecaina po o le peresitene o le Aualofa manaoga faananati i le epikopo.

7.5

Uelefea

O le uelefea e totonugalemu i le galuega a le korama a toecaina.

I lalo o le taitaiga a le epikopo, e tausoa faatasi ai e le au peresitene o le korama a toecaina ma le au peresitene o le Aualofa ia tiutetauave faaleuelefea nei:

Latou te aoao atu mataupu faavae o le ola faalagolago o le tagata ia te ia lava i le faaletino ma le faaleagaga.

Latou te tausua e matitiva ma e le tagolima ma uunaia tagata ina ia auauuna atu.

Latou te fesoasoani i tagata taitoatasi ma aiga ia faalagolago le tagata ia te ia lava ma sailia ni tali mo atugaluga faaleulefea mo taimi pupuu ma taimi uumi.

Mo nisi faamatalaga e uiga i nei tiutetauave faaleulefea, tagai i le mataupu e 6.

7.6

Toeaina Faaolioli

O se toeaina faaolioli o se alii e auai i le Ekalesia ua 19 tausaga pe matua atu, na te le o umiaina le Perisitua Mekisateko. O uso ua faaipoipo e i lalo ifo o le 19 tausaga ma e le o umiaina le Perisitua Mekisateko o ni toeaina faaolioli foi.

7.6.1

Tiutetauave mo Toeaina Faaolioli

E fesoasoani le au peresitene o le korama a toeaina i toeaina faaolioli ia saunia e maua le Perisitua Mekisateko.

E tofia e nei taitai ni uso o auaunaga tuuto i toeaina faaolioli. Afai ua faauuina toeaina faaolioli i le tofi o le aoao po o le ositaulaga, e mafai e taitai ona tofia i latou e auauna atu o ni uso o auaunaga.

E valaaulia e taitai o le korama a toeaina ia toeaina faaolioli ia auai i sauniga ma gaoioiga a le korama.

7.6.2

Fesoasoani i Toeaina Faaolioli ia Saunia e Maua le Perisitua Mekisateko

O le fesoasoani i toeaina faaolioli ia maua le Perisitua Mekisateko, e tatau ona avea o se tasi o faamua-mua aupito maua a taitai aua e faamalolosia ai aiga ma saunia ai ulugalii mo le faaipoipoga i le malumalu. E tatau i toeaina faaolioli ona faauuina i le taimi lava ua latou saunia lelei ai, e aunoa ma le taufaatalitali mo ni vaitaimi e le tatau ai.

E faamautinoa e le peresitene o le korama a toeaina ua aoaoina toeaina faaolioli i mataupu faavae nei, e sauniuni ai e maua le Perisitua Mekisateko:

1. O le toefuataiga mai o le perisitua ma ki o le perisitua e ala mai i le Perofeta o Iosefa Samita
2. O le tautoga ma le feagaiga o le perisitua (tagai i le MFF 84:33–44).
3. O tiutetauave o tane ma tamā
4. O tiute o se toeaina ma faamoemoega o korama o le perisitua
5. O faamoemoega o sauniga ma faamanuiaga o le perisitua ma le auala e faatino ai na sauniga ma faamanuiaga (tagai i le mataupu e 20 ma le *Tusitaiala mo le Aiga*)

E mafai e taitai ona aoao atu nei mataupu faavae i tagata taitoatasi, pe e mafai foi ona faatulaga se vasega mo toeaina faaolioli i le uarota, i uarota tuu-faatasi, po o le siteki. E mafai ona latou tofia ni uso o auaunaga e fesoasoani e tuuina atu lenei aoaoga. E mafai foi ona latou tuuina atu aoaoga o se vaega o se semina sauniuni mo le malumalu (tagai 5.4.5). Pe a manaomia, e mafai ona tofia e le peresitene o le siteki se uso o le au fautua maua e fesoasoani i taitai o le korama a toeaina i lenei tiutetauave.

O punaoa e fesoasoani ai i toeaina faaolioli e saunia e maua le Perisitua Mekisateko e mafai ona aofia ai mea nei:

1. Mataupu Faavae ma Feagaiga vaega 20, 84, 107, ma le 121
2. O le *Tusitaiala a le Aiga*
3. O *Tiute ma Faamanuiaga o le Perisitua, Vaega A*, lesona 1–4 ma le 9
4. O *Tiute ma Faamanuiaga o le Perisitua, Vaega E*, lesona 1–6.

E fefautuaai le epikopo ma le au peresitene o le korama a toeaina faatasi ai ma le aufono a le uarota e faailoa ia toeaina faaolioli o e e tatau ona i ai le

faamuamua aupito maualuga mo le mauaina o lenei tapenaga. O e umia le Perisitua Arona ua ta'i sefuluvalu tausaga le matutua ae e lei saunia e mafai foi ona faaaofia ai.

I le fesoasoani atu i se toeaina faaolioli ia saunia mo le mauaina o le Perisitua Mekisateko, e mulimuli le epikopo i faatonuga nei o loo i le *Tusitaulima 1*, 16.7.1.

7.7

Fonotaga Faaleautaitai

7.7.1

Fonotaga a le Aufono a le Uarota

O le peresitene o le korama a toeaina e auauna atu o se sui auai o le aufono a le uarota (tagai i le mataupu e 4).

7.7.2

Fonotaga a le Au Peresitene o le Korama a Toeaina

E faia e le aunoa ia fonotaga faaleau-peresitene a le au peresitene o le korama a toeaina. O le peresitene o le korama e pulefamalumu i le fonotaga ma taitaia. O le failautusi e auai, tusia minute, ma tuliloa ia tofitofiga. O le fautua maualuga e tofia i le uarota e mafai foi ona auai mai lea taimi i lea taimi.

O le lisi o mataupu e talanoaina e mafai ona aofia ai mea nei:

1. Fuafua ni auala e faamalolosia ai uso o le korama ma o latou aiga, e aofia ai toeaina faaolioli.
2. Faitau ma talanoaina mau ma aoaoga mai taitai o le Ekalesia e faatatau i tiutetauave o taitai perisitua.
3. Talanoaina manaoga faaletino ma faaleagaga o tagata taitoatasi ma aiga ma fuafua auala e fesoasoani ai e faafetaita'ia na manaoga.

4. Iloilo faamatalaga mai faatalanoaga o auaunaga e uiga i taumafaiga e leoleo ma auauna atu i tagata taitoatasi ma aiga i le uarota. Talanoaina tofiga faaleaunaga ma taumafaiga ma fetuunai pe a manaomia. Fuafua pe faapefea ona faaleleia.

5. Fuafua fonotaga a le korama ma talanoaina auala e faaleleia ai.

6. Iloilo faamaumauga o le auai ma talanoaina auala e uunaia ai le auai i sauniga a le korama.

7. Iloilo ia fautuaga ma tofitofiga mai le epikopo, le aufono a le uarota, ma le au peresitene o le siteki. Fuafua ni auala e mulimuli ai i fautuaga ma faataunuu ia tofiga.

8. Fuafua ni auala e atiina ae ai le lotogatasi o le korama, e aofia ai le auauna atu ma isi gaioiga a le korama.

7.7.3

Fonotaga a Taitai Perisitua o le Siteki

E taloina e le au peresitene o le siteki se fonotaga a taitai perisitua o le siteki e o faatasi ma konafesi taitasi a le siteki (tagai i le 18.3.1, aitema 2). E taloina foi e le au peresitene se isi fonotaga a le au taitai perisitua o le siteki i se taimi o le tausaga, mo se aofaiga e tolu fonotaga po o sauniga faapena i le tausaga. E auai atu i ai au peresitene o korama a toeaina ma failautusi.

7.8

Fonotaga a Korama

7.8.1

Sauniga a le Au Perisitua i le Aso Sa

O sauniga a le au perisitua i Aso Sa e amata i sauniga amata mo le au Perisitua Mekisateko ma le au Perisitua Arona, e taitaia e se tasi o le au epikopo (tagai i le 18.2.4).

A uma le sauniga amata, ona o lea o le usoga i fonotaga a latou korama. O faamoemoega o fonotaga po o sauniga a korama o le faafoeina lea o pisinisi, aoao tiute o le perisitua, faamalolosia tagata taitoatasi ma aiga, suesue le talalelei a Iesu Keriso, fefautuaai faatasi, ma faatulaga ia faafetaia'ia manaoga i le lotoifale. E fuafua ma le agaga tatalo e taitai ia fonotaga e faataunuu ai nei faamoemoega.

Vagana o i ai se tasi o le au peresitene o le siteki po o le au epikopo (po o se isi pulefaamalumu), o le peresitene lava o le korama a toeaina e pulefaamalumu i fonotaga ma sauniga a le korama a toeaina. O se tasi o le au peresitene o le korama e taitai.

I Aso Sa, o uso o le korama a faitaulaga sili o le siteki e fono faatasi ma le korama a toeaina pe afai e le o tofiaina i nisi valaauga.

E mafai e le epikopo ona valaaulia se e umia le Perisitua Arona ua 18 tausaga le matua e fono faatasi ma le korama a toeaina.

O masina taitasi, e fuafua ai e taitai o le korama ia sauniga i Aso Sa e tusa ma faamatalaga o loo i le *Faatonuga mo Mataupu Aoainafaletausaga*.

7.8.2

Fonotaga a le Korama a Faitaulaga Sili o le Siteki

E taloina e le au peresitene o le siteki se fonotaga a le korama a faitaulaga sili mo faitaulaga sili uma i le korama e le itiiti ifo ma le taitasi i le tausaga. I le taimi o leni fonotaga latou te aoao atu ai uso o le korama i aoaoga faavae o le talalelei (tagai i le Alema 13:1–6), aoao i latou i o latou tiute, ma faatautaia pisinisi faalekorama. O le fonotaga faaletausaga a faitaulaga sili uma ua faauuina i le siteki o le a le toe faia.

7.9

Aoaina Atu o le Auala e Faatino ai Sauniga ma Faamanuiaga

O lomiga nei o loo maua atu ai faatonuga i le faatinoina o sauniga ma faamanuiaga:

1. Mataupu e 20 i le tusitaulima leni
2. *Tusitaiala mo le Aiga*, itulau e 18–25
3. *O Tiute ma Faamanuiaga o le Perisitua, Vaega E*, itulau e 42–47

O le faaogaina o nei lomiga, e aoao atu e taitai perisitua le usoga i le ala e faatino ai sauniga ma faamanuiaga. E faamautinoa e taitai e tofu ē umia le perisitua ma le *Tusitaiala mo le Aiga* po o le *Tiute ma Faamanuiaga o le Perisitua Vaega E*, ina ia mafai ona i ai lana lava kopi o nei faatonuga.

E le tatau i taitai perisitua ona gaosia pe faaogaina nisi lomiga o loo tuuina atu ai faatonuga mo sauniga, faamanuiaga, po o tatalo sei vagana ua faatagaina atu e le Au Peresitene Sili ia na lomiga.

7.10

Taiala Faaopoopo ma Aiaiga

7.10.1

O Uso e I Ai Manaoga Faapitoa

O uso atonu e i ai manaoga faapitoa, e aofia ai i latou o e gasegase, toeaia, o e ua oti taitoalua, ua tatala faaipoipoga, ua nofofale, pe faavauvau ma i latou o loo tausia tagata o aiga ua gasegase tumau. E tatau i uso o le korama a toeaina ona ofoina atu le fesoasoani.

O uso e i ai nei luitau ma isi luitau faapitoa e mafai ona o mai i lo latou peresitene o le korama a toeaina ma o latou atugaluga. E tatau ona faalogo o ia, ofo

atu le alofa ma le faamalosiaga, ma tausia le le faalauaitelina. Afai na te silafia ni atugaluga o i ai mo le agavaa, po o ni mataupu maaleale faaleaiga, na te faasino atu le tagata i le epikopo.

Mo faamatalaga e uiga i uso e i ai manaoga faapitoa, tagai i le 21.1.26 ma le disabilities. Lds. Org.

7.10.2

Ofoina Atu o le Lagolago i Taimi o Malii

A oo ina tulai mai se malii i le uarota, e mafai e le epikopo ona talosagaina le peresitene o le korama a toeaina e faafesootai le aiga ma tuu atu le faamafanafanaga, iloilo manaoga, ma ofo atu i ai le fesoasoani. E mafai ona ia talosagaina se fesoasoani faapena mai le peresitene o le Aualofa. E faamaopoopo e taitai o le korama a toeaina ma le Aualofa nei taumafaiga.

E mafai foi e le epikopo ona talosagaina taitai o le korama a toeaina e fesoasoani i le faiga o tapenaga mo le sauniga o le falelauasiga. Mo nisi faamatalaga e uiga i falelauasiga, tagai i le 18.6.

Afai e mafai, o tagata ua malilii o e sa maua faaeega paia, e tataua ona falelauasi i laei o le malumalu. I nisi tulaga, e mafai e le epikopo ona talosagaina le peresitene o le korama a toeaina e tofi se alii ua maua ona faaeega paia na te faaofuina pe vaaia foi le faaofuina

talafeagai o se alii ua malii a ua maua ona faaeega paia. E faamautinoa e nei taitai e tuuina atu leni tofitofiga i se tagata o le a lē inoino. O taitai mo le faaofuina o tagata o le ekalesia ua malilii o loo maua lea i *Faatonuga mo le Faaofuga o e ua Malilii ua Uma Ona Maua o Latou Faeega Paia*. E mafai e taitai ona maua nei faatonuga mai Faletusi o le Ekalesia.

Mo nisi faatonuga i le faaofuina o tagata o le ekalesia ua malilii i laei o le malumalu, e mafai e le epikopo ona tagai i le *Tusitaulima 1*, 3.4.9.

O le peresitene o le korama a toeaina, uso o auu-naga, ma isi uso e faaauau pea ona ofoina atu le lagolago, faamafanafanaga, ma le fesoasoani i e o faavauvau i le vaitau o le fetuutuunaiga pe a mavae le malii.

7.10.3

Faatonuga e uiga i Laei o le Malumalu ma Ofusa

Tagai i le 21.1.42.

7.10.4

Faatupeina o Gaoioiga

Tagai i le 13.2.8.

8.

Perisitua Arona

8.1

Faaugaga ma Faamoemoega o le Perisitua Arona

O le perisitua o le mana ma le pule a le Atua. E faaee atu i luga o tama tane agavaa uma o le Ekalesia. O i latou o e umia ki o le perisitua e faatonutonuina le faatautaiga o sauniga o le talalelei, le talaiga o le talalelei, ma le pulega o le malo o le Atua i le fogaelele.

E umia e le Perisitua Arona ia “ki o le auaunaga a agelu ma le talalelei sauniuni; o le talalelei lea o le talalelei o le salamo ma le papatisoga, ma le faamagaloga o agasala” (MFF 84:26–27; tagai foi i le MFF 13:1; 107:20). O le Perisitua Arona foi “ua i ai le mana e taulimaina ai sauniga o fafo” (MFF 107:14).

Mo nisi faamatalaga e uiga i faamoemoega o le perisitua ma ki o le perisitua, tagai i le mataupu e 2.

8.1.1

Tofi ma Tiute o le Perisitua Arona

O tofi i le Perisitua Arona o le tiakono, aoao, ositaulaga, ma le epikopo. O tofi taitasi o le perisitua e i ai aia tatau ma tiutetauave o le auauna atu, e aofia ai le pule e taulima ai sauniga o le perisitua. Mo faamatalaga e uiga i le faauuina i tofi o le tiakono, aoao, ma le ositaulaga, tagai 20.7.

Tiakono

E mafai e uso agavaa ona mauaina le Perisitua Arona ma faauuina o ni tiakono pe a le i lalo ifo o le 12 tausaga le matutua. O se tiakono e i ai tiutetauave nei:

E ola o ia i se olaga amiotonu ma tumau le agavaa e faaoga le perisitua. Na te faatuina se faatautaiga lelei mo uso o le korama ma isi tagata o le Ekalesia.

Na te tufatufaina le faamanatuga (tagai i le 20.4.3).

O ia “e tofia e leoleo i luga o le ekalesia” (MFF 84:111). E tatau foi ona ia “lapatai atu, faamalalama atu, apoapoai atu, aoao atu, ma valaau atu i tagata uma ia o mai ia Keriso” (MFF 20:59). O lea tiutetauave e aofia ai ma le faaaumeaina o tagata o le korama ma isi alii talavou, faailoa i uso o le korama sauniga Lotu, lauga i sauniga, faasoa atu le talalelei, ma le tuuina atu o molimau.

E fesoasoani o ia i le epikopo i le “faia o . . . mea faaletino” (MFF 107:68). O lea tiutetauave e mafai ona aofia ai le aoina o taulaga anapogi, tausia o e matitiva ma lē tagolima, tausia o falelotu ma lotoa, auauna atu o se avefeau mo le epikopo i sauniga Lotu.

E auai o ia i le faatinoga o aoaoga faalekorama i lona avea ai ma se tagata aoao malosi o le talalelei.

E fesoasoani o ia i le au epikopo i isi auala e tusa ai ma le tofi o se tiakono. E fesoasoani foi o ia i aoao “i [o latou] tiute uma i le ekalesia pe afai e manaomia ai i se tulaga” (MFF 20:57).

Aoao

E mafai e uso agavaa ona faauuina e avea ma aoao pe a atoa lo latou ta’i 14 tausaga le matutua. O se aoao e i ai uma tiutetauave o se tiakono. E ia te ia foi tiutetauave nei:

Na te tapenaina le faamanatuga (tagai i le 20.4.2).

E tatau ia te ia ona “leoleo lea i luga o le ekalesia e lē aunoa, ma faatasi ma faamalosi i latou” (MFF 20:53). O se tasi auala na te faia ai lenei mea e ala lea i le auauna atu o se uso o auaunaga. E tofia o ia e avea ma se soa i se e umia le Perisitua Mekisateko.

E tatau ona ia “vaai e leai se amioletonu i totonu o le ekalesia, po o se feitagai ma le tasi, po o se pepelo,

faatuaupua, po o se tautala leaga” (MFF 20:54). O leni tiutetauave e aofia ai le avefa ma se tagata e faatupuina le filemu, fai ma se faaitaiga o le faamaoni lelei ma le amiosao.

E tatau ona ia “vaai ia potopoto soo le ekalesia, ma vaai foi ia faia e le au paia uma o latou tiute” (MFF 20:55).

E fesoasoani o ia i le au epikopo i isi auala e tusa ai ma le tofi o se aoao.

Ositaulaga

O uso agavaa e mafai ona faauuina pe a ua atoa lo latou ta’i 16 tausaga le matutua. Ua i ai i le ositaulaga o tiutetauave uma o se tiakono ma se aoao. Ua ia te ia foi tiutetauave nei:

E tatau ona ia “talai atu, aoao atu, faamalamalama atu, apoapoai atu, . . . ma asiasi atu i fale o tagata taitoatasi o le ekalesia, ma apoapoai atu ia te i latou ia tatalo atu ma le leo ma i le mea lilo ma faasaga atu i tiute uma faaleaiga” (MFF 20:46–47).

A faatagaina ai e le epikopo, na te faatinoina papatisoga, faaee atu le Perisitua Arona, faauuina ia tiakono, aoao, ma ositaulaga (tagai i le MFF 20:46, 48).

E mafai ona ia faatinoina le faamanatuga e ala i le faatautaia o le laulau o le faamanatuga ma faia tatalo o le faamanatuga pe a faatagaina ai (tagai i le MFF 20:46, 77, 79; tagai foi i le 20.4.3 i le tusitaulima leni).

E fesoasoani o ia i le au epikopo i isi auala e tusa ai ma le tofi o se ositaulaga.

Epikopo

O tiutetauave o le epikopo e tusa ai ma le Perisitua Arona o loo ootoo atu i le 8.3.1.

8.1.2

O Korama o le Perisitua Arona

O se korama o le perisitua o se vaega faatulagaina o uso. O faamoemoega autu o korama o le auauna

atu lea i isi, fausia le lotogatasi i le usoga, ma aoao ia tagata o le au paia i aoaoga faavae, mataupu faavae, ma tiute.

O le epikopo e faatulagaina ia tiakono i se korama e oo atu i le 12 uso, o aoao i se korama e oo atu i le 24 uso, ma ositaulaga i se korama e oo atu i le 48 uso (tagai i le MFF 107:85–87). Afai e tele atu tagata auai i le korama nai lo nei fuainumera, e mafai e le epikopo ona vavae le korama. A o lei vavaea, e manatunatu o ia i le tele o le a i’u i ai le korama, au taitai e maua, ma le aafiaga i uso o le korama.

I se uarota po o se paranesi e toalaiti ia alii talavou, e mafai ona faatasitasi ia korama o le Perisitua Arona mo aoaoga ma gaioioiga.

8.1.3

O Faamoemoega o le Perisitua Arona

O alii talavou ua i ai i se taimi o tapenaga ma le tuputupu ae faaleagaga faaletagata lava ia. E tusa ai ma lena, o lea e fesoasoani ai matua ma le au epikopo ma isi taitai o le Perisitua Arona i alii talavou taitoatasi ia:

1. Liua i le talalelei a Iesu Keriso ma ola ai i ona aoaoga.
2. Auauna ma le faamaoni i valaauga o le perisitua ma faataunuu ia tiutetauave o tofi o le perisitua.
3. Tuuina atu le auaunaga ‘anoa.
4. Sauniuni e ola agavaa ia maua le Perisitua Meki-sateko ma sauniga o le malumalu.
5. Sauniuni e auauna atu i se misiona tala’i faamamaluina.
6. A’oga i le tele e mafai ai.
7. Sauniuni ia avefa ma se tane ma se tamā agavaa.
8. Tuuina atu le faaaloalo lelei i tamaitai, teine, ma tamaiti.

E fesoasoani matua ma taitai i alii talavou e faataunuu nei sini autu i afiafi faaleaiga, suesuega o tusitusiga paia faaleaiga, fonotaga po o sauniga, gaoioiga, ma faatalanoaga e ala i le fautuaina o i latou ina ia auai i le polokalama o le Tiute i le Atua (tagai i le 8.12).

E le taulotoina e alii talavou nei sini autu i a latou sauniga po o gaoioiga.

8.2

O Matafaioi a Matua ma Taitai o le Ekalesia

O matua ua i ai le uluai tiutetauave mo le uelefea faaleagaga ma le faaletino o a latou fanau (tagai i le MFF 68:25–28). E lagolago e le au epikopo ma isi taitai o le Perisitua Arona ae le suitulaga i matua i leni tiutetauave. Latou te ofoina atu le lagolago i auala nei:

Latou te lagolago atu i matua i le fesoasoani atu lea i a latou fanau tama e sauniuni mo faauuga i le perisitua, o faaeega paia i le malumalu, galuega faafai-feautalai faamisiona, faaipoipoga i le malumalu, ma le tulaga faatamā.

Latou te fautuaina fesootaiga i le va o alii talavou ma o latou matua.

Latou te faamautinoaina o gaoioiga a le korama ma isi mea e fai a le autalavou e le tuuina atu ai ni avega mamafa lē talafeagai i aiga pe faatautavā ai foi ma gaoioiga faaleaiga.

Ia faapitoa lava le nofouta o taitai i alii talavou o ē o mai mai aiga e le malolosi se lagolago mo le ola ai i le talalelei.

8.3

Taitaiga o le Perisitua Arona i le Uarota

E tulai atu leni mataupu i le faatautaia o korama a le Perisitua Arona i se ala o le a faamalolosia ai

alii talavou taitoatasi ma o latou aiga. E iloilo soo e taitai o le Perisitua Arona le mataupu 3, lea e oto-oto mai ai mataupu faavae aoao o le taitaiga. O nei mataupu faavae e aofia ai le saunia faaleagaga, auai i aufono, auaina atu i isi, ma le aoao atu o le talalelei a Iesu Keriso.

I le mataupu leni, o le faaupuga *taitai o korama* e faasino i le au peresitene o le korama a tiakono, au peresitene o aoao, ma le epikopo ma ona fesoasoani i le korama a ositaulaga. O uso o le au peresitene o Alii Talavou o faufautua i le korama, ae le o ni taitai o le korama.

8.3.1

Au Epikopo

O le epikopo e vaaia ia korama a le Perisitua Arona i le uarota. O ia ma ona fesoasoani e aofia i le au epikopo ma le au peresitene o le Perisitua Arona i le uarota (tagai i le MFF 107:13--15). Latou te vaavaaia ma faamalolosia alii talavou taitoatasi, ma galulue vavalalata ma matua ma isi taitai.

Epikopo

O le epikopo o le faitaulaga sili pulefaamalumalu i le uarota. O ia foi o le peresitene o le korama a ositaulaga (tagai i le MFF 107:87–88). I se paranesi, o le peresitene o le paranesi e galue o se peresitene o le korama a ositaulaga.

I le taitaiga o le korama a ositaulaga, o le epikopo e galulue ma fesoasoani e toalua, o ni ositaulaga uma foi. E ui ina faamatuu atu e le epikopo le tele o tiutetauave i fesoasoani, ae e galue lava ia ma le mataalia o le peresitene o le korama. Na te faalauiloaina se agaga o le alofa ma le lotogatasi i le korama. E auai e le aunoa ma pulefaamalumalu i fonotaga a le au peresitene o le korama ma sauniga a le korama i Aso Sa. E auai o ia i auaunaga ma gaoioiga a le korama. A leai o ia, na te faamatuu atu i se tasi o ona fesoasoani e tauaveina tiutetauave faaleautaitai i le korama. A faamalolo se epikopo, e faamalolo foi ma ona fesoasoani [i le korama].

E faatalanoaina e le epikopo ia alii talavou o ē o loo sauniuni ina ia faauuina i le tofi o le ositaulaga. Na te faatalanoaina foi alii fou liliu mai ta'i 12 tausaga ma matutua atu ia maua le Perisitua Arona (tagai i le 5.2.2, ma le *Tusitaulima 1*, 16.7.2) ma ia maua se pepa faataga o le malumalu e tapulaa le faaaogaina (tagai i le *Tusitaulima 1*, 3.3.3 ma le 3.3.5). Na te vave faatautaia leni faatalanoaga mo tagata fou liliu mai i le maea ai o le faamauga [o o latou papatisoga], e masani lava i totonu o le vaiaso.

Epikopo ma Ona Fesoasoani

E tofi e le epikopo se tasi o ona fesoasoani e vaaia le korama a tiakono ma le isi fesoasoani e vaaia le korama a aoao. E faalauiloa e nei fesoasoani se agaga o le alofa ma le lotogatasi i korama. La te auai i fonotaga a le au peresitene o le korama ma sauniga a le korama i Aso Sa i le tele e mafai ai. La te auai foi i auunaga ma gaoioiga a le korama.

Faatasi ai ma le lagolago mai i faufautua a korama, e aoao atu ai e le epikopo ma ona fesoasoani ia tomai faaleautaitai i taitai o korama ma fesoasoani ia i latou e faataunuu o latou tiutetauave.

E tofia e le epikopo se tasi o ona fesoasoani e vaaia le faalapopotoga a Alii Talavou i le uarota i lalo o lana taitaiga. O le fesoasoani lea e talanoaina e le aunoa mataupu a Alii Talavou faatasi ma le au peresitene o Alii Talavou a le uarota. Na te lipotia nei talanoaga i fonotaga a le au epikopo.

E faatalanoa e le epikopo ia alii talavou taitasi ia le itiiti ifo i le tasi i le tausaga. Afai e mafai, na te faatalanoaina taitoatasi le au ta'i 16- ma le ta'i 17-tausaga faalua i le tausaga. Afai e le mafai, na te tofia se fesoasoani e faia nisi o nei faatalanoaga. O le ono masina pe a uma ona faia le faatalanoaga faaletausaga a alii talavou taitasi i le va o tausaga e 12 ma le 15 ma le epikopo, e faia ai sona faatalanoaga ma le fesoasoani i le au epikopo o le e vaaia lana korama. Mo taiala mo faatalanoaga o le autalavou, e mafai e epikopo ma o latou fesoasoani ona tagai i le *Tusitaulima 1*, 7.1.7.

O le epikopo po o se fesoasoani e tofia, na te faatalanoaina alii talavou o e o loo sauniuni e faauuina i tofi o le tiakono ma le aoao.

O le epikopo po o se fesoasoani ua tofia e faatalanoaina e le aunoa le peresitene o le korama a tiakono, peresitene o le korama a aoao, ma fesoasoani o le korama a ositaulaga. I nei faatalanoaga, e talanoaina ai e le sui o le au epikopo ma le taitai o le korama ia tiute o le perisitua, le alualu i luma o tagata taitoatasi o le korama, ma le alualu i luma o le korama atoa.

O le epikopo ma ona fesoasoani e aloaia alii talavou taitasi i le sauniga faamanatuga pe a sii mai le Perimeri i le Perisitua Arona, pe a ua tataua ona faauu i se tofi i le perisitua, ma pe a ua mae'a lana polokalama o le Tiute i le Atua.

O le epikopo ma ona fesoasoani e vaaia le Sikauti i nofoaga ua faatagaina ai e le Ekalesia (tagai i le 8.13.4).

O le epikopo e valaau ma vaetofia le peresitene o Alii Talavou. E mafai ona ia tofia ona fesoasoani e valaau ma vaetofia ia fesoasoani i le au peresitene o Alii Talavou, o le failautusi i Alii Talavou, faufautua fesoasoani i korama, ma isi e galulue faatasi ma alii talavou.

O le epikopo e valaauina ona fesoasoani i le korama a ositaulaga. O ia po o se fesoasoani e tofia e valaauina au peresitene o korama a tiakono ma aoao ma failautusi o korama. E fefautuaai faatasi ma le agaga tatalo ia uso o le au epikopo e fuafua ai po o ai e valaau i nei tofiga. Latou te le filifilia ia taitai ona o le matua po o le leva i le korama. E mafai e le epikopo ma ona fesoasoani ona soalupule ma uso o le au peresitene o Alii Talavou o le uarota a o latou sailia musumusuga e uiga i le tagata e valaau.

A valaauina e se tasi o le au epikopo se alii talavou e avea ma peresitene o le korama a tiakono po o le aoao, e fesili atu o ia i lena alii talavou e fautua mai po o ai e valaau e avea ma ni fesoasoani ma se failautusi. O le uso o le au epikopo e fautuaina le

peresitene o le korama e sagai atu i leni tiutetauave ma le agaga tatalo, saili le taiala mai le Alii pe o ai e fautuaina mai. Peitai, e fesoasoani foi le uso o le au epikopo i le peresitene o le korama ia malamalama, o le tiutetauave faaiu ia maua musumusuga pe o ai e valaau ua i luga lea o le au epikopo.

E sailia e se tasi o le au epikopo le faatagaga mai matua o se alii talavou a o le'i fesili atu ia te ia e galue i se tasi o nei valaauga.

A uma ona tuuina atu nei valaauga, o se uso o le au epikopo na te tuuina atu ia taitai o korama mo se palota lagolago i fonotaga a a latou korama. Ona vaetofia lea o alii talavou e le epikopo po o le fesoasoani e tofia. E vaetofia e le epikopo ona fesoasoani i le korama a le au ositaulaga. Na te vaetofiaina foi peresitene o le korama a tiakono ma le peresitene o le korama a aoao aua e na o ia e mafai ona tuuina atu ia te i la'ua ia ki o la'ua valaauga. E mafai ona ia tofia ona fesoasoani e vaetofia ia fesoasoani i au peresitene o korama a tiakono ma aoao ma failautusi a korama.

O se tasi o le au epikopo e fofogaina atu nei valaauga i le sauniga faamanatuga peitai, na te le talosaina se palota lagolago.

8.3.2

Au Peresitene o Korama ma Fesoasoani i le Epikopo i le Korama a Ositaulaga

O taitai o korama a le Perisitua Arona e “fono faatasi” ma uso o le korama, “ma aoao atu ia te i latou tiute o lo latou tofi” (tagai MFF 107:85--86). Latou te sailia musumusuga e faataunuu ai o latou tiutetauave. Latou te mauaina foi faatonuga ma taiala mai le au epikopo ma faufautua o le korama. O peresitene o korama o le Perisitua Arona e umia ki o le perisitua e taitai ai le galuega a korama o loo latou pulefaamalmalu ai. O fesoasoani i au peresitene o korama a tiakono ma aoao ma fesoasoani i le epikopo i le korama a ositaulaga e le umiaina ki o le perisitua.

O au peresitene o korama o le Perisitua Arona ma fesoasoani i le epikopo i le korama a le au ositaulaga

e vaavaaia ma faaaumeaina uso o korama ma isi alii talavou o vaitausaga o korama. Latou te nofouta faapitoa mo i latou o uso fou pe ua le toaaga mai ma i latou e i ai ni tulaga faaletonu po o isi manaoga faapitoa. E taumafai taitai o korama e atia'e le alofa ma le usoga i uso o korama.

E tuuina atu e taitai o korama a le Perisitua Arona i sui auai o korama ni avanoa mo tofitofiga a le au perisitua, o aafiaga faaletaitaiga, ma le tuputupu ae faaleagaga.

Latou te faia e le aunoa fonotaga a le au peresitene o le korama.

Latou te taitaia sauniga a le korama i le Aso Sa.

Latou te fesoasoani e fuafua ia gaoioiga a le korama, e aofia ai le Mutuale.

Latou te fesoasoani i sui auai o le korama e faatutu ma faataunuu ia sini i le polokalama o le Tiute i le Atua.

E i ai taimi, e mafai ai ona latou tuuina atu aoaoga faaletalalelei i sauniga a korama i Aso Sa, faatasi ai ma le fesoasoani a faufautua o le korama.

O le peresitene o le korama a tiakono, o le peresitene o le korama a aoao, ma se tasi o fesoasoani o le korama a ositaulaga e i ai i le komiti talavou a le au epikopo (tagai i le 18.2.9).

8.3.3

Failautusi o Korama

O tiutetauave nei o failautusi a korama:

Latou te tuufaatasia ma iloilo ia faamatalaga o le auai mai ma auina atu i le failautusi o Alii Talavou.

Latou te feutagai ma taitai o korama e saunia lisi o mataupu mo fonotaga a le au peresitene. Latou te auai i nei fonotaga, tusia minute, ma siaki ia tofitofiga.

E mafai ona latou fesoasoani i taitai o korama ma faufautua e fuafuaina ia gaoioiga.

8.3.4**Au Perisitene o Alii Talavou a le Uarota (Faufautua i le Korama o le Perisitua Arona)**

O le au perisitene o Alii Talavou o le uarota e aofia ai se perisitene ma fesoasoani e toalua. Latou te galulue o ni faufautua i korama o le Perisitua Arona. Latou te galulue i lalo o le taitaiga a le au epikopo. Latou te mauaina foi aoaoga faamasani ma le lagolago faifaipea mai le au perisitene o Alii Talavou a le siteki.

Perisitene o Alii Talavou a le Uarota

O tiutetauave nei o le perisitene o Alii Talavou:

E galue o ia o se tasi o le aufono a le uarota. I le avea ai o se sui o lenei aufono, e auai o ia i taumafaiga e fausia ai le fauatua ma faamalolosa tagata taitasi ma aiga (tagai mataupu 4). O ia foi o se sui o le komiti talavou a le au epikopo (tagai 18.2.9).

Na te aoao atu i isi taitai o Alii Talavou o latou tiute, e faaoga ai le tusitaulima lenei e avea ma punaao.

Na te vaaia ia faamaumauga, lipoti, paketi, ma tupe a le faalapotopotoga a Alii Talavou o le uarota. O le failautusi a Alii Talavou e fesoasoani i lenei tiutetauave.

Perisitene o Alii Talavou o le Uarota ma Ona Fesoasoani

O le perisitene o Alii Talavou ma ona fesoasoani e galulue o ni faufautua i korama o le Perisitua Arona. O le perisitene o le faufautua i le korama a le au ositaulaga, o le fesoasoani muamua o le faufautua i le korama a aoao, ma le fesoasoani lua o le faufautua i le korama a tiakono. O o latou tiutetauave nei:

Latou te taialaina korama o le Perisitua Arona i le faataunuaina o o latou tiute o le perisitua.

Latou te aoao ia iloa alii talavou taitasi ma masani i ana taleni, o mea e fiafia i ai, ma luitau. Latou te vaavaai mo auala e faamalolosa ai alii talavou

taitasi, fesoasoani ia tuputupu ae ia latou molimau, ma faamalolosa i latou e auai ia latou korama. Latou te nofouta faapitoa i alii talavou o uso fou ma alii talavou ua le toaaga mai.

Latou te lagolagoina alii talavou taitoatasi i lona aiga.

Latou te fesoasoani i alii talavou e galulue i faamoe-moega o loo lisi atu i le 8.1.3. E aofia ai le fesoasoani ia i latou e faatutu ma ia ausia ia sini i le polokalama o le Tiute i le Atua.

I le tali atu i tofitofiga e tuuina mai i fonotaga a le aufono a le uarota, e mafai ona latou galulue ma au perisitene o korama e faatulaga ni komiti o auaunaga.

E mafai ona latou soalaupule ma matua ma taitai perisitua e uiga i mea e manaomia e alii talavou.

Latou te aoao atu e le aunoa ia lesona i sauniga a korama i Aso Sa, e ui atonu latou te faasoaina lenei tiutetauave ma faufautua fesoasoani. Latou te vaavaia taumafaiga e faaleleia atili le aoao mai ma le aoao atu o le talalelei i korama. I nei taumafaiga, latou te mulimuli i mataupu faavae o i le 5.5.3 ma le 5.5.4.

Latou te auai i fonotaga a le au perisitene o le korama o le Perisitua Arona ma tuuina atu fautuaga pe a manaomia. Latou te fesoasoani i le au epikopo e aoao atu tomai faaleautaitai ma uiga auaumama i au perisitene o korama ma fesoasoani o le korama a le au ositaulaga (tagai 8.14).

Latou te galulue ma taitai o korama e fuafua ma faatino ia gaoioiga a korama, e aofia ai ma gaoioiga i le Mutuale.

Latou te fesoasoani i le au epikopo ma taitai o korama e fausia le lotogatasi o le korama.

Latou te faia fonotaga o le au perisitene o Alii Talavou. Latou te fono e le aunoa ma le fesoasoani o le au epikopo o loo vaaia le faalapotopotoga a Alii Talavou.

O nofoaga ua faatagaina e le Ekalesia e fai ai le Sikauti, e masani lava ona valaauina sui auai o le au perisitene o Alii Talavou e avea ma taitai Sikauti,

peitai e mafai ona valaauiina i latou e avea ma taitai fesoasoani i le Sikauti (tagai i le 8.13.4).

8.3.5

Failautusi a Alii Talavou o le Uarota

O tiutetauave nei o le failautusi o Alii Talavou:

E feutagai o ia ma le au peresitene o Alii Talavou e saunia ia lisi o mataupu mo fonotaga a le au peresitene. E auai o ia i nei fonotaga, tusinga minute, ma siaki ia tofitofiga.

Na te aoaoina failautusi o korama ma vaavaaia a latou galuega i le tausiga o faamaumauga o le auai a korama. A laitiiti o le ta'i kuata, na te tuufaatasia ai faamatalaga o le auai, iloiloia faatasi ma le peresitene o Alii Talavou, ma auina atu i le failautusi a le uarota.

Na te faamautinoaina ua silafia e le au epikopo ma le au peresitene o Alii Talavou ia alii talavou e le o auai mai i taimi uma i sauniga ma alii talavou e le o toe mamao ona agavaa lea mo le faauuina i se isi tofi i le perisitua.

E mafai ona tofia o ia e faamaumau le tulaga alualu i luma o alii talavou taitoatasi a o latou auai ai i le polokalama o le Tiute i le Atua.

E fesoasoani o ia i le au peresitene o Alii Talavou e saunia se paketi faaletausaga ma le tala mo tupe faaalu.

8.3.6

Faufautua Fesoasoani i le Korama a le Perisitua Arona

O le au epikopo e mafai ona valaauiina ia faufautua fesoasoani o le korama e fesoasoani i le au peresitene o Alii Talavou i o latou tiutetauave. O faufautua fesoasoani i korama e mafai ona faiaoga i nisi o lesonea i sauniga a korama i Aso Sa. E mafai foi ona latou fesoasoani i gaoioiga, e aofia ai le Mutuale.

O nofoaga ua faataga ai e le Ekalesia le Sikauti, o faufautua fesoasoani i korama e masani ona valaauiina e avea ma taitai Sikauti fesoasoani, peitai e mafai ona valaauiina e avea ma taitai Sikauti (tagai i le 8.13.4).

8.3.7

Faiaoga o Taaloga

O le au epikopo e mafai ona valaauiina alii e fai ma faiaoga o au taaalo a Alii Talavou. E galulue ia faiaoga o taaloga i lalo o le taitaiga a le au peresitene o Alii Talavou. Mo faamatalaga e uiga i polokalama tau taaloga, (tagai i le 13.6.21).

8.4

Auauna Atu o ni Uso o Auaunaga

O le auauna atu o ni uso o auaunaga o se tiutetauave faaleperisitua o aoao, ositaulaga, ma i latou e umia le Perisitua Mekisateko. Mo faamatalaga auiliili e uiga i leni auaunaga, e aofia ai faatonuga e uiga i le tuuina atu o tofitofiga i e umia le Perisitua Arona, (tagai i le 7.4).

O le taiala ia toalua ni tagata matutua ia i ai faatasi ma se talavou e le faaaogaina i le tofitofiga o soa o auaunaga. Peitai, i lalo o le taitaiga a lo latou epikopo, e tatau i taitai ona faaaoga le atamai ma saili atu i musumusuga pe a tofia talavou e fai ma soa i tagata matutua (tagai i le 7.4.3).

E tatau i soa matutua ona aloese mai tulaga e ono malamalama sese i ai. E tatau ona latou faaaoga le faaeteetega e faatatau i tulaga taumamao o le tasi-i-le-tasi ina ia maua e alii talavou se aafiaga saogalemua ma tauia i le auaunaga. E le gata i lea, e tatau i taitai ona faaaoga le atamai ia aua ne'i tofia alii talavou i ni aiga faigata po o ni faaaitaui faaleaiga.

A tofia le autalavou i se soa e le o se matua, e tatau i taitai ona faamaonia e le o tetee i ai matua i lea tofitofiga.

8.5**Aoina o Taulaga Anapogi**

I nofoaga e laitiiti le faataatiaga faafaafanua o se uarota ma mafai ona saogalemu, e mafai e le epikopo ona faatonu i latou e umia le Perisitua Arona, aemaise lava o tiakono, e faafesootai tagata o aiga i masina taitasi e tuu atu ai i tagata le avanoa e foai ai i taulaga anapogi.

E tatau ona o ta'itoalua le au perisitua pe a aoina ia taulaga anapogi. E mafai e le au Perisitua Mekisateko ona o faatasi ma le au Perisitua Arona pe a tatau ai.

E le tatau i tagata ona tuuina atu isi foai, e pei o le sefuluai, ia i latou o loo aoina taulaga anapogi.

O i latou o ē aoina taulaga anapogi, latou te aveina sa'o loa lava i se tasi o le au epikopo.

8.6**Fesoasoani i Tama ua Ta'i 10- ma le 11-Tausaga le Matutua e Sauniuni mo le Mauaina o le Perisitua****8.6.1****O Matua ma Uso o Auaunaga**

O matua o se tamaitiiti ua 10- pe 11-tausaga, ua i ai le tiutetauave autu o le fesoasoani atu lea ia te ia e sauniuni mo le mauaina o le Perisitua Arona. E fesoasoani isi tagata o le aiga ma uso o auaunaga. O le lagolago a uso o auaunaga atonu e faapitoa le taua i totonu o aiga ia e le o i ai se tamā pe e le o se tagata malosī o le Ekalesia.

8.6.2**Taitai ma Fiaoga o le Peraimeri**

O taitai ma fiaoga o le Peraimeri e lagolagoina ia aiga i le fesoasoani atu lea i tamaiti ua ta'i 10- ma ta'i

11-tausaga le matutua e sauniuni mo le mauaina o le Perisitua Arona.

O tausaga taitasi, e saunia ai e le au peresitene o le Peraimeri se sauniga ua ta'ua o le Sauniuniga mo le Malumalu ma le Perisitua i lalo o le taitaiga a le au epikopo (tagai i le 11.5.5). E mafai ona valaaulia le au peresitene o le korama a tiakono ma le au peresitene o Alii Talavou e auai.

8.7**Fesoasoani i Tagata o le Korama e Sauniuni mo Misiona Tala'i**

Ua faamoemoe le Alii i alii talavou gafatia taitasi ia saunia i la le agaga, o le tino, mafaufau, lagona, ma tupe mo le auaunaga faafaifeautalai. O le vave ona tonu i se alii talavou e auauna atu i se misiona, e le taumate foi o le ia auauna atu.

E ao i alii talavou taitoatasi ona sauniuni e ala i le atina ae o lana lava molimau ma lana lava sootaga ma le Alii. E ao ona ia sauniuni e ala i le suesue i tusitusiga paia, aemaise lava o le Tusi a Mamona. O le tele o sini ma gaoioiga o loo fautuaina mai i le polokalama o le Tiute i le Atua e mafai ona fesoasoani i se alii talavou e saunia ai mo le galuega faamisiona.

Ua i ai i matua le tiutetauave muamua e fesoasoani i o latou atalii e sauniuni e auauna atu i misiona tala'i. O isi tagata o le aiga, sui o le au epikopo, au peresitene o korama o le Perisitua Arona ma faufautua, uso o auaunaga, ma isi e lagolagoina matua i leni taumafaiga.

O le fesoasoani atu i sui auai o korama e sauniuni mo le galuega faamisiona o se faamuamua maualuga lea mo le au epikopo ma faufautua o korama. O leni sauniuniga e amata i le korama a tiakono ma faaaau ai lava i tausaga uma o se alii talavou i le Perisitua Arona. E vaavaai ia taitai mo ni auala e faaafia ai le sauniuniga o faifeautalai i fonotaga a

korama, fonotaga a le au peresitene, gaoioiga a le korama, ma isi faatulagaga.

E fesoasoani sui auai o le au epikopo ma faufautua o korama i alii talavou e sauniuni mo misiona talai i auala nei:

Latou te tuuina atu avanoa i fonotaga a korama ma gaoioiga mo sui auai o korama ia lagonaina ma iloa le tosinaga a le Agaga Paia.

Latou te aoaoina ia alii talavou i aoaoga faavae autu ia e aoao atu e faifeautalai, e pei o le Togiola a Iesu Keriso, o le toefuataiga o le talalelei e ala mai i le Perofeta o Iosefa Samita, o le ata o le faolataga, papatisoga, ma le meaalofa o le Agaga Paia. E mafai ona latou faaoga le *Tala'i La'u Talalelei* e fai ma punaoa mo le aoaoina atu o nei aoaoga faavae.

Latou te fautuaina alii talavou e suesue i tusitusiga paia, aemaise o le Tusi a Mamona, e i latou lava i aso uma. Latou te fautuaina foi alii talavou e suesue le *Tala'i La'u Talalelei*.

Latou te aoaoina alii talavou ma o latou matua e uiga i faamoemoega mo faifeautalai faamisiona. O nei faamoemoega e aofia ai le malamalama i le talalelei ma molimau, agavaa o le tagata lava ia, malosi faaletino, faautautaga faagafesootai ma faalelagona, ma tapenapenaga tau tupe. O taitai matutua e taiialaina ia alii talavou i le faatutuina o sini ia ausia ai nei faamoemoega.

Latou te faamalosiaina alii talavou ia auai i le seminare.

Latou te saunia avanoa mo auaunaga, e aofia ai tofitofiga mo aoao ma ositaulaga e auauna atu o ni uso o auaunaga.

Latou te tuuina atu i alii talavou ia avanoa e aoao atu ai le talalelei i fonotaga a korama ma isi faatulagaga.

Latou te fautuaina alii talavou e faasoia atu le talalelei i uo ma tagata o aiga.

Latou te tuuina atu avanoa mo alii talavou e aoao mai ai ma fegalegaleai ma faifeautalai lelei ua maea mai misiona, i faatulagaga aloaia ma faasamasamanoa foi.

E avea ma vaega o leni tapenapenaga, e fautuaina e le au epikopo ma faufautua o korama ia alii talavou o le vaitausaga o ositaulaga e auai i se vasega sauniuni a faifeautalai. E faalagolago i le aofai o nei alii talavou, e mafai ona faatulagaina leni vasega e le au epikopo i le tulaga faaleuarota po o le au peresitene o le siteki i le tulaga faalesiteki. O punaoa autu mo leni vasega o tusitusiga paia, o le *Tusitaulima a le Faifeautalai*, ma le *Tala'i La'u Talalelei*.

O faatonuga faaopoopo mo epikopo o loo tuuina atu i le *Tusitaulima 1*, 4.2.

8.8

Faateeina atu o le Perisitua Mekisateko i Alii Talavou ua Tai 18 Tausaga le Matutua

E mafai e uso agavaa ona mauaina le Perisitua Mekisateko ma faauuina o ni toeaia pe a 18 tausaga pe matutua atu foi. E faavae i luga o tulaga faaletagata lava ia, e pei o le molimau ma le matua o se alii talavou, faauu i le aoga, manao e faaauau pea ma ana aumea, ma le auai i le kolisi, e fuafua ai e le epikopo pe ua tataua ona faauu se alii talavou e avea ma toeaia pe a aulia lona aso fanau e 18, pe tumau teisi ai pea i le korama a ositaulaga. I le faiga o leni faaiuga, e feutagai muamua lava le epikopo ma le alii talavou ma ona matua. O le 19 o tausaga, po o le taimi foi a o lei tuua le aiga mo le iunivesite, tautua i le militeli, po o le taliaina o se galuega tumau, o uso agavaa uma lava e tataua ona faauuina o ni toeaia.

E galulue faatasi taitai o Alii Talavou ma taitai o le korama a toeaia e fai le suiga agai i le korama a toeaia ia sologa lelei mo alii talavou taitasi.

8.9**Fonotaga Faaleautaitai****8.9.1****Fonotaga a le Aufono a le Uarota**

O le peresitene o Alii Talavou e auuuna atu o se sui o le aufono a le uarota (tagai i le mataupu e 4).

8.9.2**Fonotaga a le Komiti Talavou a le Au Epikopo**

O le epikopo e pulefaamalumu i le komiti talavou a le au epikopo. O leni komiti e aofia ai le au epikopo, o se tasi o fesoasoani o le epikopo i le korama a ositaulaga, o peresitene o korama a aoa ma tiakono, o peresitene o vasega a Tamaitai Talavou, ma peresitene o Alii Talavou ma Tamaitai Talavou. Mo nisi faamatalaga, tagai 18.2.9.

8.9.3**Fonotaga a le Au Peresitene o le Korama**

E faia e le auonoa e le au peresitene o korama taitasi se fonotaga a le au peresitene. E auai e le auonoa le epikopo ma pulefaamalumu i le fonotaga a le au peresitene o le korama a le au ositaulaga, ma e taitaia e se tasi o ona fesoasoani. O le peresitene o le korama a tiakono ma le peresitene o le korama a aoa e taitaia a latou fonotaga a le au peresitene, ma latou te pulefaamalumu sei vagana ua auai atu se sui o le au epikopo. E auai atu foi i nei fonotaga ia faufautua o korama ma failautusi. E tusitusi e failautusi ia minute ma siaki ia tofitofiga.

O le lisi o mataupu e talanoaina e mafai ona aofia ai mea nei:

1. Fuafua ni auuala e faamalolosia ai tagata o le korama, e aofia ai tagata fou ma tagata ua toaaga mai. Ia fuafua foi ni auuala e faaumea mai ai alii talavou o isi faauatuaga.

2. Faitau ma talanoaina mau ma aoaoga mai taitai o le Ekalesia e faatatau i tiutetauave o taitai perisitua.

3. Fuafua e asiasi i uso o le korama pe a manomia ai.

4. Talanoaina ni auuala e fesoasoani ai i alii talavou taitasi ia faamanuina i le polokalama o le Tiute i le Atua.

5. Fuafua ia fonotaga ma gaoioiga a le korama.

6. Iloilo mea e talanoaina i le fonotaga a le komiti talavou a le au epikopo (tagai i le 18.2.9).

7. Ia maua se aoaoga faaleautaitai mai uso o le au epikopo po o faufautua o korama.

O nofoaga ua faatagaina ai e le Ekalesia le Sikauti, e mafai ona faaoga le fonotaga a le au peresitene o le korama e faia ai ni fuafuaga mo le iunite o le Sikauti a le korama pe a uma ona talanoaina mea e pei ona ta'ua i luga. Afai e le'i i ai taitai Sikauti talavou ma le au matutua i le fonotaga, e mafai ona valaaulia i latou i le fonotaga mo le talanoaga leni. E mafai foi ona aofia ai alii talavou o isi faauatuaga o e o loo umia tulaga faaleautaitai i le iunite o le Sikauti. E faaauau pea ona pulefaamalumu le peresitene o le korama i le vaega leni o le fonotaga. E mafai ona ia valaaulia se taitai Sikauti talavaou e taitaia. E faamautinoa e faufautua o korama ia ogatasi ia gaoioiga taitasi o le Sikauti ma faamoemoega o loo lisi atu i le 8.1.3.

8.9.4**Fonotaga a le Au Peresitene o Alii Talavou a le Uarota**

E faia e le auonoa fonotaga faaleau-peresitene a le au peresitene o Alii Talavou. O le peresitene e pulefaamalumu i le fonotaga ma taitaia. O le failautusi e auai, tusia minute, ma siaki ia tofitofiga.

O le lisi o mataupu e talanoaina e mafai ona aofia ai mea nei:

1. Iloilo pe o faapefea ona ausia e alii talavou i korama taitasi ia faamoemoega o loo lisiina i le 8.1.3. Fuafua ni auala e fesoasoani ai i alii talavou taitasi ia ausia atoatoa na faamoemoega.
2. Faitau ma talanoaina mau ma aoaoga mai taitai o le Ekalesia e faatatau i tiutetauave o taitai perisitua.
3. Fai ni fuafuaga e aoao ai taitai o korama i o latou tiute.
4. Talanoaina le aoga o gaoioiga a korama. Talanoaina ni auala e faaofia ai alii talavou i le fuafuaina o ni gaoioiga 'anoa.
5. Talanoaina aoaoga o le talalelei i fonotaga a korama i Aso Sa ma fuafua ni auala e faaleleia ai.
6. Iloilo faamaumauga o le auai. Fuafua ni auala e fesoasoani ai i uso fou ma alii talavou e le o toaaga ina ia auai ai.
7. Iloilo le paketi ma tupe faaalu a Alii Talavou.

O le fesoasoani i le au epikopo o loo vaaia le faalapotopotoga a Alii Talavou e mafai ona auai atu i nisi taimi i le fonotaga a le au peresiene o Alii Talavou ia maua ai lipoti ma tuuina atu fautuaga. E mafai foi e le au peresitene o Alii Talavou ona valaaulia ia taitai ma faufautua o korama e auai atu pe a manaomia.

8.9.5

Fonotaga a le Au Taitai Perisitua o le Siteki

E taloina e le au peresitene o le siteki se fonotaga a le au taitai perisitua o le siteki e o faatasi ma konafesi taitasi a le siteki (tagai 18.3.1, aitema 2). E taloina foi e le au peresitene se isi fonotaga a le au taitai perisitua o le siteki i se taimi o le tausaga, mo se aofaiga e tolu fonotaga po o sauniga faapena i le tausaga.

E auai atu i ai au peresitene o Alii Talavou o le Uarota ma failautusi i nei fonotaga. E mafai ona valaaulia i nisi taimi ia au peresitene o korama a tia-kono ma aoao, ma fesoasoani o korama a ositaulaga,

i taimi pe a faapea e aofia ai i le fono ia mataupu o le a faapitoa ona aoga mo i latou i o latou valaauga.

8.10

Tulaga Faatonuina

O tulaga faatonuina e maua mai ai le taitaiga mautinoa e faamalolosia ma taiala ai tagata o le Ekalesia. A tausia e alii talavou ia tulaga faatonuina o le talalelei, o le a tele lo latou aoga i le Ekalesia ma le lalolagi. O le a agavaa foi i latou e maua sauniga o le malumalu.

I le tamaitusi *Mo Le Malosi o le Autalavou*, o loo otooto mai ai e le Au Peresitene Sili ia tulaga faatonuina o le talalelei ma aoao mai ai le autalavou i le auala e faaoga ai. E tatau i alii talavou uma ona i ai se kopi o le *Mo Le Malosi o le Autalavou*. E tatau ona ia iloilo ina soo tulaga faatonuina ma mafaufau po o le a le lelei o loo ia tausia ai.

E tatau i faufautua o korama ma faufautua fesoasoani ona latou suesue i tulaga faatonuina o i le tamaitusi ma avea ma faataitaiga o le ola ai. E tatau ona latou sailia ni auala e aoao atu ai ma faamamafaina soo nei tulaga faatonuina i lesone ma gaoioiga a le Mutuale, tolauapiga, konafesi a le autalavou, ma isi gaoioiga.

E mafai e uso o le au epikopo ma faufautua o korama ona fautuaina matua e suesue i tulaga faatonuina o le talalelei ma avea ma faataitaiga o le ola ai, ma talanoaina lea ma o latou atalii. E mafai foi ona latou fautuaina alii talavou e faaoga le *Mo Le Malosi o le Autalavou* e fai ma punaoa mo lesone o afiafi faaleaiga ma lauga.

8.11

Sauniga a Korama i le Aso Sa

O sauniga a le au perisitua i Aso Sa e amata i sauniga amata mo le au Perisitua Mekisateko ma le au Perisitua Arona, e taitaia e se tasi o le au epikopo (tagai i le 18.2.4).

A maea sauniga amata, ona o lea o le au perisitua i sauniga a a latou korama. E masani lava ona eseese

mea e potopoto ai korama o le Perisitua Arona. Peitai, i se uarota po o se paranesi e toalaiti ia alii talavou, e mafai ona faatasitasi ia korama o le Perisitua Arona mo aoaoga. Tusa lava pe potopoto faatasi ia korama, e tatau ona faatulaga ia korama eseese, ma ia valaauina taitai ma lagolagoina mo korama taitasi. A mafai, e tatau ona amata tuu eseese ia korama taitasi ma e tatau ona atoa le au peresitene ma se failautusi.

O faamoemoega o fonotaga po o sauniga a korama o le faafoeina lea o pisinisi a le korama, aoao tiute o le perisitua, ma suesue le talalelei a Iesu Keriso. E fuafuaina ma le agaga tatalo e taitai ma faufautua o le korama ia fonotaga po o sauniga ia ausia ai nei faamoemoega. Latou te fautuaina sui auai o korama e aumai a latou kopi o tusitusiga paia pe a mafai. Pe a manaomia ai mo lesona taitasi, e mafai e taitai ona fai atu i alii talavou e aumai isi punaoa ua faamaonia a le Ekalesia.

O peresitene o korama e pulefaamalumalu i fonotaga a korama sei vagana ua auai se isi pulefaamalumalu e maua luga atu. O se tasi o le au peresitene o le korama po o se fesoasoani o le korama a le au ositaulaga e taitai. Afai e tuufaatasi ia korama, o fesoasoani i le korama a ositaulaga, peresitene o le korama a aoao, ma le peresitene o le korama a tikonono e feauauai e taitai.

O lesona i sauniga a korama e masani ona faiaoga ai faufautua o korama po o faufautua fesoasoani. E mafai e nei uso ona vaevae leni tiutetauave pe a manaomia. E mafai ona fesoasoani uso o le au epikopo, taitai o korama, ma isi uso o korama e faiaoga mai lea taimi i lea taimi. A tuu atu e taitai o korama po o sui auai o korama ia aoaoga, e fesoasoani le faufautua ia i latou ina ia saunia. O i latou e faiaoga e tatau ona mulimuli i mataupu faavae o i le 5.5.4.

O tagata matutua o loo umia se tofi o le Perisitua Arona o sui o lena korama. Peitai, latou te faatasi ma le au toeaina mo aoaoga o le Aoga Sa. E mafai foi e le epikopo ona valaaulia le au Perisitua Arona ua ta'i 18 tausaga le matutua e o i le korama a toeaina.

I le taimi o sauniga po o fonotaga a korama, e mafai e tamaitai talavou ma alii talavou ona potopoto faatasi i nisi taimi, pe a faatonuina ai e le au epikopo.

8.12

Polokalama o le Tiute i le Atua

E fautuaina le au Perisitua Arona uma e auai i le polokalama o le Tiute i le Atua. O leni polokalama e maua ai e i latou e umiaina le Perisitua Arona ia avanoa e atiae ai le malosia faaleagaga, aoao ma faa-taunuu o latou tiute o le perisitua, sauniuni e maua le Perisitua Mekisateko ma auaina atu i misiona tala'i, tausia le soifua maloloina, ma faaleleia a latou sootaga ma isi.

E fautuaina e matua ma taitai ia alii talavou e auai i le polokalama i le taimi lava e uma ai ona faauu i lo latou tofi muamua o le perisitua. E faaauau e alii talavou ona faatutuina sini i o latou tausaga uma latou te i ai i le Perisitua Arona.

8.13

Gaoioiga

O taitai o korama ma faufautua o korama e fuafuaina gaoioiga e faavae i manaoga ma mea e fiafia i ai sui auai o korama. Latou te faia se taumafaiga faapitoa e aapa atu ai i alii talavou uma e aofia ai i latou faatoa auai mai i le Ekalesia ma i latou ua le toaaga mai. O gaoioiga e mafai ona fesoasoani i alii talavou ia ausia a latou sini i le polokalama o le Tiute i le Atua. E tatau i taitai o korama ona auai i le tele e mafai ai i le fuafuaina ma le faatinoina o gaoioiga.

O fuafuaga mo gaoioiga a korama e tatau ona faamaonia mai e se tasi o le au epikopo ma e tatau ona mulimuli i taiala o i le mataupu e 13.

8.13.1**Mutuale**

O le tele lava o gaoioiga a korama e fai i le taimi ua faaigoaina o le Mutuale. O le upu *Mutuale* e fautua mai ai ni aafiaga fetufaai lea e i ai le fefaaaloaloai ma le felagolagomai o le tasi i le isi ma avanoa e aoao faatasi ai. O gaoioiga a le Mutuale e tatau ona tuuina atu ai i le autalavou ni avanoa eseese e auauna atu ai i isi ma atiina ae ai faaleagaga, agafesootai, faaletino, ma le faaleatamai.

O le Mutuale e masani ona faia faalevaiaso. Afai e le mafai ona faia leni mea ona o feoaiga ma isi faatapulaa, e mafai ona le faia faalausosoo le Mutuale, ae e tatau lava ona faia ia le itiitii ifo ma le ta'i masina. O le Mutuale e tatau ona 1 i le 1½ itula le umi ma e tatau ona fai i se aso po o se afiati e ese mai le Aso Sa po o le Aso Gafua.

O le au peresitene o Alii Talavou, i lalo o le taitaiga a le au epikopo, e vaai le Mutuale mo alii talavou.

E mafai e au peresitene o Alii Talavou ma Tamaitai Talavou ona faaoga ia gaoioiga o le Mutuale e sauniuni ai mo gaoioiga a le siteki po o siteki tuufaatasi (tagai i le 13.3).

Autu Faaletausaga mo le Mutuale

O tausaga taitasi, e fofoga mai ai e le Au Peresitene Sili se autu mo le Mutuale. E faamamafaina e taitai leni autu i sauniga amata o le Mutuale ma isi gaoioiga a le autalavou.

Sauniga Amata

E masani ona amata le Mutuale i se sauniga amata puupuu e pulefaamalumu ai se tasi o le au epikopo. O fesoasoani o le epikopo i le korama a ositaulaga ma sui o le au peresitene o le vasega a le Lora e feauaua'i e taitai. O taitai matutua latou te saunia ia taitai talavou mo leni tiutetauave.

O sauniga amata e aofia ai se viiga ma se tatalo ma e mafai foi ona aofia ai ni pesepesega ma avanoa mo le autalavou e faasoa mai ai a latou taleni ma molimau.

Gaoioiga a Korama ma Vasega po o Gaoioiga Tuufaatasi

A maea sauniga amata, e masani ona fai eseese ia gaoioiga a korama o le Perisitua Arona ma vasega a Tamatai Talavou. I se uarota po o se paranesi e toalaiti ia alii talavou, e mafai ona faatasitasi ia alii talavou uma mo gaoioiga. E mafai foi ona fua-fua ia gaoioiga mo soo se tuufaatasiga o korama ma vasega.

O gaoioiga tuufaatasi mo alii talavou uma ma tamaitai talavou e masani ona faia ta'itasi i le masina. O sui auai o le komiti talavou a le au epikopo e faatulaga, fuafua, ma iloilo nei gaoioiga i a latou fonotaga. E faatino ia gaoioiga i lalo o le taitaiga a le au epikopo.

O nisi o faataitaiga o gaoioiga talafeagai o galuega auauna atu, musika, siva, tala faatino, gaoioiga faaleaganuu, taaloga po o afeleti, sailiiliga o matata, ma gaoioiga e fai i fafo.

8.13.2**Talanoaga a le Au Epikopo ma le Autalavou**

O talanoaga a le au epikopo ma le autalavou e fuafua ma faatinoina e le au epikopo. O nei talanoaga, ia e faia i nisi o taimi, e maua ai e le au epikopo ia avanoa e talanoa atu ai i mataupu e fiafia i ai le autalavou ma e faamalolosia ai faaleagaga le autalavou. O autu o lo o i le *Mo Le Malosi o le Autalavou* ma le *Faamaoni i le Faatuatua* e sili ona talafeagai. O nisi taimi e mafai e le au epikopo ona valaaulia ni malo e auai mai. O malo e masani o ni tagata lava o le uarota po o le siteki.

O talanoaga a le au epikopo ma le autalavou e mafai ona faia ma le autalavou ua tuufaatasi uma po o le autalavou foi o se vaitausaga patino. E mafai ona faia i le taimi o le Mutuale, po o le Aso Sa i le taimi o fonotaga a korama ma vasega a Tamaitai Talavou, po o se isi taimi e le avea ma avega mamafa i aiga. O le au epikopo e fuafuaina pe faafia ona fai.

E faatulagaina ia talanoaga i fonotaga a le komiti talavou a le au epikopo.

8.13.3

O Mea e Fai mo Tulaga Faatonuina

O mea e faia mo tulaga faatonuina o ni polokalama faapitoa e faamamafaina ai tulaga faatauina o amioga ma sini e faavavau. Latou te faamalosiaina alii talavou e ola i tulaga faatonuina o i le *Mo Le Malosi o le Autalavou*, lea o le a aumai faalatalata ai i latou i le Faaola.

E faia faaletausaga nei mea, pe tele atu foi pe a manaomia, e masani lava ona fai i le taimi o le Mutuale. E mafai ona faia i se tulaga faalekorama, uarota, faaleuarota tuufaatasi, pe faalesiteki. E faalagolago lava i le auala e tuuina atu ai se mataupu, e mafai ona aofia i nei gaoioiga soo se faiga e tuufaatasia ai korama o le Perisitua Arona. E mafai foi ona faaafua ai tina, tama, tina ma tama faatasi, ma tamaitai talavou.

8.13.4

Sikauti

O nofoaga ua faatagaina ai e le Ekalesia le Sikauti, e mafai e korama ona auai i gaoioiga a le Sikauti i le taimi o le Mutuale. E tatau ona fesoasoani le Sikauti i alii talavou e faatino ia mataupu faavae o le talalelei latou te aoaoina i Aso Sa.

O uso taitasi o le au epikopo e vaavaaia le polokalama o le Sikauti mo le korama o le Perisitua Arona o loo ia vaai. O sui auai o le au peresitene o Alii Talavou o le uarota e masani ona avea ma taitai o le Sikauti. A le o lea e mafai foi e le au epikopo ona valaauina ia faufautua fesoasoani o korama e avea ma taitai Sikauti, ae valaau ia uso o le au peresitene o Alii Talavou e avea ma taitai fesoasoani o le Sikauti.

I korama taitasi, e masani ona tofia e le epikopo le peresitene o le korama po o se tasi o ona fesoasoani i le korama a ositaulaga e avea ma taitai talavou o le

polokalama o le Sikauti. Peitai, e mafai ona ia tofia isi alii talavou e avea ma taitai talavou o le Sikauti.

O nofoaga ua faatagaina ai e le Ekalesia le Sikauti, e tatau ona lesitala alii talavou ua ta'i 12 i le ta'i 15 le matutua. O alii talavou ua ta'i 16 ma ta'i 17 le matutua e tatau ona lesitala pe afai o loo tulimatai ia siitia tulaga pe ua filifili foi le peresitene o le siteki po o le epikopo e lagolago le polokalama a le sikauti mo alii talavou o leni vaitausaga.

O taitai Sikauti matutua uma e tatau ona lesitala a o lei amataina la latou auunaga ma e tatau ona latou maua ia aoaoga e tatau ai mo o latou tiutetauave. I le Iunaite Setete, o taitai matutua ua lesitala e maua inisia o le puipuiga mai Tama Sikauti a Amerika.

E totogi e le Ekalesia tupe uma po o se vaega o le totogi mo le lesitalaina o alii talavou ma taitai matutua i le Sikauti. E totogi foi e le Ekalesia le faavaeina o se iunite [o le Sikauti]. O tupe faaalu mo le lesitala ma le faavaeina o se iunite e totogi mai le teugatupe masani faasiaki a le siteki. E tuuina atu e le Ekalesia nei tupe e faaopopo atu i le paketi faatagaina.

E faatulagaina e le au epikopo se komiti o le Sikauti a le uarota e faamautinoa ai o lo o faagaoioia lelei le Sikauti e avea o se gaoioiga lagolago mo korama a le Perisitua Arona.

O nofoaga e toalaiti alii talavou, e mafai ona faatutaga se vaega a le Sikauti e tautuaina ai ni uarota ma paranesi, po o se siteki atoa po o se itu, i nisi tulaga.

Mo faamatalaga e uiga i le faatupeina o le Sikauti, tagai 8.13.7. Mo nisi faamatalaga e uiga i le Sikauti, tagai i le *Tusitaulima o le Sikautia* le Ekalesia.

8.13.5

Gaoioiga a le Siteki ma [Gaoioiga a] Siteki Tuufaatasi

Tagai i le 13.3.

8.13.6**Konafesi a le Autalavou**

Tagai i le 13.4.

8.13.7**Faatupeina o Gaoioiga**

O le faatupeina o gaoioiga a le Perisitua Arona, e aofia ai ma le Sikauti i nofoaga ua faatagaina ai e le Ekalesia, e tatau ona aumai i le paketi a le uarota (tagai i le 13.2.8).

Faatupeina o se Tolauapiga Faaletausaga po o se Gaoioiga Faapena

Afai e le o lava tupe o le paketi a le uarota e totogi ai se tolauapiga faaumiumi faaletausaga a le Sikauti po o se gaoioiga faapena mo alii talavou, e mafai e taitai ona talosaga atu i e auai i ia gaoioiga e totogi se vaega po o le tau atoa. Afai e le lava tupe mai i tagata auai, e mafai e le epikopo ona faatagaina se gaoioiga faasu'etupe se tasi faaletausaga e faia faatasi, ma ia ogatusa ma taiala o loo i le 13.6.8.

E leai se tulaga e tatau ai ona soona tele ni tupe faaalu po o ni feoaiga mo se tolauapiga faaletausaga po o se gaoioiga faapena. E le tatau foi i le lava o tupe faaletagata ona taofia se tagata mai le auai.

Faatupeina o Masini ma Sapolai

Afai e mafai, o masini ma sapolai e manaomia e le uarota mo tolauapiga faaletausaga a le autalavou e faatau mai lava i tupe o le paketi a le uarota. Afai e le lava nei tupe, e mafai e le epikopo ona faatagaina se gaoioiga faasu'etupe se tasi faaletausaga e faia faatasi, ma ia ogatusa ma taiala o loo i le 13.6.8.

O masini ma sapolai e faatau mai i tupe a le Ekalesia, pe na aumai i le paketi a le uarota po o se gaoioiga faasu'etupe, e mo na o le faaaogaina lava i le Ekalesia. E le mo le faaaogaina e tagata taitoatasi po o aiga.

E le mafai ona faaaogaina tupe a le Ekalesia e faatau ai ni toniga mo tagata taitoatasi.

8.14**Aoaina Atu o Tomai ma Uiga Auau Mama mo le Au Taitai**

O faufautua o korama ma faufautua fesoasoani latou te aoaina atu tomai ma uiga auau mama faaleautaitai a o latou galulue ai ma au peresitene o korama ma le komiti talavou a le au epikopo, a o latou fesoasoani i alii talavou e fuafua ma faatino ia gaoioiga, ma a o latou fesoasoani i alii talavou e tuuina atu faatasi le auaunaga. I leni taumafaiga, e mafai e faufautua ma faufautua fesoasoani ona tagatagai i le mataupu 3 i le tusitaulima leni.

8.15**Taitaiga o le Perisitua Arona i le Siteki****8.15.1****Au Peresitene o le Siteki**

O uso o le au peresitene o le siteki e vaaia le au Perisitua Arona i le siteki. E avea o se vaega o leni tiutetauave, latou te aoaina ia epikopo i lo latou tiute e pulefaamalumu i le Perisitua Arona ia latou uarota.

E tofia e le peresitene o le siteki se tasi o ona fesoasoani e vaaia le faalapotopotoga a Alii Talavou ma le Sikauti i le siteki (poo isi gaoioiga a le siteki mo alii talavou i eria e le o faatagaina ai e le Ekalesia le Sikauti). O nofoaga ua faatagaina ai e le Ekalesia le Sikauti, e tatau i leni fesoasoani ona maua ia aoaoga faamasani e tatau ai mo ona tiutetauave i le Sikauti.

Mo nisi faamatalaga e uiga i tiutetauave o le au peresitene o le siteki, tagai 15.1. Mo nisi faamatalaga

e uiga i le Sikauti, tagai i le *Tusitaulima o le Sikautia* le Ekalesia.

8.15.2

Fautua Maualuga e Tofia i Alii Talavou a le Siteki

E tofia e le peresitene o le siteki se tasi o fautua maualuga e galulue ma le au peresitene o Alii Talavou a le siteki. O tiutetauave o le fautua maualuga leni o lo o ootoo atu i le 15.3.

8.15.3

Au Peresitene o Alii Talavou o le Siteki

O tiutetauave o le au peresitene o Alii Talavou a le Siteki o lo o ootoo atu i le 15.4.1.

8.15.4

Failautusi o Alii Talavou a le Siteki

O tiutetauave o le failautusi o Alii Talavou a le Siteki o lo o ootoo atu i le 15.4.2.

8.15.5

Komiti o le Perisitua Arona –Tamaitai Talavou a le Siteki

E tofia e le peresitene o le siteki se fesoasoani e pulefaamalumu i le komiti o le Perisitua Arona--Tamaitai Talavou a le siteki. O isi sui auai o le komiti o fautua maualuga e tofia i faalapotopotoga a Alii Talavou ma Tamaitai Talavou a le siteki, o le au peresitene a Alii Talavou o le siteki ma le failautusi, ma le au peresitene o Tamaitai Talavou a le siteki ma le failautusi.

E mafai e le au peresitene o le siteki ona valaaulia le autalavou e auai i fonotaga a le komiti pe a manaomia ai. E tatau lava ona faaafia ai le autalavou i le tele e mafai ai i le fuafuaina ma le faatinoina o gaoioiga e pei o konafesi a le autalavou, siva, faigalotu, ma gaoioiga e fai a siteki tuufaatasi. E mafai foi ona

auai ia le autalavou i talanoaga e uiga i luitau o loo feagai ma le autalavou i le siteki.

8.16

Fetuunaiga o le Faalapotopotoga a Alii Talavou i Manaoga Faalelotoifale

I se uarota po o se paranesi e toalaiti ia alii talavou, e mafai ona faatasitasi ia korama o le Perisitua Arona mo aoaoga (tagai 8.11). E mafai foi ona potopoto faatasi mo gaoioiga.

Afai e le lava le au taitai matutua i se uarota po o se paranesi, e mafai e le au peresitene o Alii Talavou ona faiaoga i lesona o le Aso Sa ma faautaitaia le polokalama o le gaoioiga e aunoa ma ni faufautua fesoasoani. I se iunite e laitiiti tele, atonu o le peresitene o Alii Talavou ua na o ia le taitai matua i le faalapotopotoga a Alii Talavou. I le tulaga lea, e faiaoga o ia i lesona o le Aso Sa ma vaaia gaoioiga mo alii talavou uma. A oo ina mafai, e tatau ona valaauina ia fesoasoani ma se failautusi.

Ona e tele ina manuia le autalavou mai fegalegaleaiga i ni vaega e toatele atu, e mafai e alii talavou ma tamaitai talavou o ni uarota po o paranesi se lua pe sili atu foi ona potopoto i nisi taimi mo ni gaoioiga tuufaatasi. Afai e toalaiti alii talavou o ni uarota ma paranesi e felataa'i, e mafai e epikopo ma peresitene o paranesi ona faataga ia alii talavou e faatasitasi mo gaoioiga faalevaiaso. A oo ina mafafauina nei vaega e filifili ai, ia tagai epikopo ma peresitene o paranesi i itu taua e pei o le mamao ma le tau o feoaiga.

I se siteki po o se itu laitiiti, e mafai e le peresitene o Alii Talavou ona na o ia le taitai o Alii Talavou i le siteki po o le itu. A oo ina mafai, e tatau ona valaauina ia fesoasoani ma se failautusi.

Mo faamatalaga lautele e uiga i le fetuunai i manaoga faalelotoifale, tagai i le mataupu e 17.

8.17**Taiala ma Aiaiga Faaopoopo****8.17.1****Autalavou i lalo ifo o le 14 Tausaga i Konafesi a le Autalavou ma Siva**

O talavou e i lalo ifo o le 14 tausaga e le masani ona auai i konafesi a le autalavou po o siva e faia i taimi e ese mai i le po faatulagaina masani o le Mutuale (tagai i le 13.6.14). O tolauapiga e moea ma tolauapiga faaumiumi a le Sikauti e tuusaunoa mai leni taiala.

8.17.2***Faamaoni i le Faatuatua: O Se Tusitaiala o le Talalelei***

Ua lolomi ma faasalalau e le Ekalesia le *Faamaoni i le Faatuatua: O Se Tusitaiala o le Talalelei* e fai ma soa i le suesucina o tusitusiga paia ma aoaoga a perofeta o aso e gata ai. E faamautinoa e uso o le au epikopo po o faufautua o korama ia tofi le alii talavou ma se kopi o le tusi. E mafai e alii talavou ona faaaogaina le tusi e fai ma punaoa a o latou suesue ma faaaoga mataupu faavae o le talalelei, saunia lauga, faiaoga i vasega, ma tali fesili e uiga i le Ekalesia.

8.17.3**Alii Talavou o Isi Faatuatuaga**

O alii talavou o isi faatuatuaga ua malilie e usitai i tulaga faatonuina o le Ekalesia e tatau ona talia lelei ma faamalosiaina e auai i gaioiga a le autalavou.

O tupe e totogi mo lo latou auai e tatau ona taulima tutusa e pei foi o alii talavou o le Ekalesia. A auai mai nei alii talavou i le Sikauti, e mafai e o latou matua ona tuuina mai ni foai e fesoasoani ai i le faatupeina o gaioiga.

8.17.4**Alii Talavou E I Ai Manaoga Faapitoa**

O alii talavou e i ai manaoga faapitoa e masani lava ona faaaofia ai ia latou korama masani. E mafai ona faia ni faatagaga faapitoa pe a i ai le faamaoniga mai matua ma le au epikopo.

Mo faamatalaga e uiga i le malamalamaaga, faaaofiaina ai, ma le aoaoina o alii talavou e i ai manaoga faapitoa, tagai i le 21.1.26 ma le disabilities.lds.org.

8.17.5**Tagata Matutua Lelei e Toalua**

A aoaoina e ni tagata matutua ia tamaiti po o le autalavou i tulaga faale-Ekalesia, ia le itiiti ifo ma le toalua tagata matutua lelei e tatau ona i ai. O tagata matutua e toalua e mafai [ona tofi i ai] ni alii se toalua, tamaitai se toalua, po o se ulugalii faaipoipo. I tulaga e ono le mafai ai ona i ai ni tagata matutua se toalua i se potuaoga, e tatau i taitai ona filifili e tuufaatasi ia vasega.

O le taiala ia toalua ni tagata matutua lelei ia i ai faatasi ma se talavou e le faaaogaina i le tofitofiga o soa o auunaga. Peitai, e tatau i taitai ona faaaoga le atamai ma saili atu i musumusuga pe a tofia talavou e fai ma soa i tagata matutua (tagai i le 7.4.3).

9.

Aualofa

O le Aualofa o se ausilali i le perisitua. O faalapotopotoga uma lava a ausilali ua i ai e fesoasoani i tagata o le Ekalesia ia ola ia latou molimau i le Tama Faalelagi, Iesu Keriso, ma le talalelei toefuataiina. O galuega a ausilali e maua ai e tagata ia aoaoga, faamalosiuga, ma le lagolagosua a o latou taumafai e ola e tusa ai ma mataupu faavae o le talalelei.

9.1

Vaaiga Aoao i le Aualofa

9.1.1

Faamoemoega

O le Aualofa e fesoasoani e saunia tamaitai mo faamanuiaga o le ola e faavavau a o latou faateleina le faatuatua i le Tama Faalelagi ma Iesu Keriso ma Lana Togiola; faamalosiaga o tagata taitoatasi, aiga, ma auai e ala i sauniga ma feagaiga; ma galulue i le lotogatasi e fesoasoani ia i latou e manaomia le fesoasoani. E ausia e le Aualofa nei faamoemoega e ala i sauniga o le Aso Sa, o isi fonotaga a le Aualofa, o auai o ni tuafafine o auai, ma le ueluefa ma auai alofa.

9.1.2

Talafaasolopito

Na faatulagaina e le Perofeta o Iosefa Samita le Aualofa i le aso 17 o Mati, 1842. Sa ia aoao mai e faapea na faavaeina le Aualofa mo “le fesoasoani i e matitiva, o e le tagolima, o le fafine ua oti lana tane ma le tamaitiiti ua matuaoti, ma mo le faatinoina o fuafuaga agalelei uma” (*Aoaoga a Peresitene o le Ekalesia: Iosefa Samita* [2007], 452). E le gata i lea, sa ia aoao mai e faapea, o le Aualofa “sa le gata ina laveaiina e matitiva, ae faaolaina ai foi agaga” (*Aoaoga: Iosefa Samita*, 453). O le vaega e tele atu o le galuega a le Aualofa i le taimi nei o le “vaavaaia lea

o le manuia faalecagaga ma le faaolataga . . . o tamaitai uma o le Ekalesia” (Iosefa F. Samita, i *Aoaoga a Peresitene o le Ekalesia: Iosefa F. Samita* [1998], 185).

O le Aualofa na “faia e le Atua, faatagaina e le Atua, faatuina e le Atua, ma faauuina i le paia o le Atua” (Iosefa F. Samita, i le *Aoaoga: Iosefa F. Samita*, 188). E faagaioia i lalo o le taitaiga a taitai perisitua.

9.1.3

Mau Tauave ma le Faailoga

O le mau tauave a le Aualofa o le “E le uma le alofa” (1 Korinoto 13:8). O loo atagia mai leni mataupu faavae i lona faailoga.



9.1.4

Tagata Auai

O tamaitai matutua uma i le Ekalesia o sui auai ia o le Aualofa.

E masani ona sii se tamaitai talavou i luga i le Aualofa i lona aso fanau lona 18 po o le tausaga foi e sosoo ai. A oo ina ta'i 19 tausaga, ua tataua loa i tamaitai talavou taitoatasi ona auai atoatoa i le Aualofa. Ona o tulaga lava o tagata, e pei o molimau faaletagata lava ia ma le tulaga matua, faauuga i le aoga, naunau pea e o faatasi ma a latou uo, ma le auai i le kolisi, e mafai e se tamaitai talavou ona vave sii i le Aualofa, a o lei aulia lona aso fanau lona 18, pe toe faaumiumi pea ona i ai i Tamaitai Talavou. E talanoa tamaitai talavou taitasi i ona matua ma le epikopo e fai ai le tonu po o le a le mea e sili ona fesoasoani ia te ia e tumau ai le avefa ma se tagata auai e toaga i le Lotu.

E galulue faatasi taitai o Tamaitai Talavou ma le Aualofa e faia se suiga sologa lelei o tamaitai talavou taitoatasi i le Aualofa.

O tuafafine matutua o loo auauna i le Peraimeri, Tamaitai Talavou po o isi valaauga ia ua le mafai ai ona latou auai i sauniga a le Aualofa i Aso Sa, e faaaauau pea ona avea ma sui auai o le Aualofa. E tofia tuafafine o auaunaga mo i latou, ma e tofia foi i latou e auauna atu i isi o ni tuafafine o auaunaga. E mafai foi ona tuu atu ia i latou tofitofiga e tuuina atu auaunaga alofa ma faiaoga i vasega o isi sauniga a le Aualofa, pe a le avea na tofitofiga ma avega mamafa ia i latou.

O tamaitai e i lalo ifo o le 18 a ua faaipoipo, o ni sui auai foi o le Aualofa. Mo nisi faatagaga faapitoa, tagai 10.12.4.

O tamaitai o isi faatuatuaga e o mai i le Aualofa, e talia lelei ma faamalosiaina e auai mai.

9.2

Au Taitai o le Aualofa i le Uarota

O loo taulai atu lenei mataupu i le taitaiga o le Aualofa i se ala e faamalosiaina ai tagata taitoatasi, auaiga, ma aiga. E iloilo soo e taitai o le Aualofa le mataupu 3, lea o loo ootoo atu ai mataupu faavae aoao faaletaitai. O nei mataupu faavae o loo aofia ai le saunia faaleagaga, auai i aufono, auauna atu i isi, ma le aoaoina atu o le talalelei a Iesu Keriso.

9.2.1

Au Epikopo

O le epikopo ma ona fesoasoani e tuuina atu le taitaiga faaleperisitua mo le Aualofa.

O le epikopo e valaauina ma vaetofia se tuafafine e avea ma peresitene o le Aualofa. Na te vaaia le valaauina ma le vaetofiaina o fesoasoani i le au peresitene o le Aualofa, o le failautusi o le Aualofa a le uarota, ma isi tuafafine e galulue i valaauga i le Aualofa. E mafai ona ia tofia isi fesoasoani e valaau ma vaetofia nei tuafafine.

E fono e le aunoa le epikopo ma le peresitene o le Aualofa e talanoaina mataupu tau i le Aualofa ma le uelefea.

9.2.2

Au Peresitene o le Aualofa i le Uarota

O le au peresitene o le Aualofa e aofia ai se peresitene ma fesoasoani e toalua. O i latou o taitai faaleagaga i taumafaiga e faamalolosiaina tuafafine ma o latou aiga. Latou te galulue i lalo o le taitaiga a le au epikopo. Latou te maua foi aoaoga faamasani ma le lagolago faifai pea mai le au peresitene o le Aualofa a le siteki.

Peresitene o le Aualofa a le Uarota

O tiutetauave nei o le peresitene o le Aualofa:

E avea o ia ma se sui auai o le aufono a le uarota. I le avea ai o ia ma se sui auai o lenei aufono, e auai o ia i taumafaiga e fausia ai le faatuatua ma faamalolosiaina tagata taitoatasi ma aiga (tagai i le mataupu e 4).

E fono pea i la'ua ma le epikopo e lipoti atu i ai ma talanoaina le Aualofa ma mataupu tau i le uelefea.

Pe a talosagaina ai e le epikopo, e asiasi o ia i fale o aiga o le au paia e iloilo ia manaoga faaleuelefea ma fautuaina mai ni auala e tali atu ai ia te i latou (tagai 9.6.1). Pe a toesea le peresitene o le Aualofa, e mafai e le epikopo ona tofi se fesoasoani i le au peresitene o le Aualofa e tali atu i se manaoga faanatinati.

Na te auina atu fautuaga i le au epikopo mo tuafafine ina ia valaauina e auauna atu o ni taitai o le Aualofa. Na te tuuina atu foi fautuaga mo tuafafine ina ia valaauina o ni faiaoga ma faataunuu isi valaauga i le Aualofa, pe a manaomia ai. I le faia o nei fautuaga, e mulimuli o ia i taiala o i le 19.1.1 ma le 19.1.2.

Na te faamaopoopoina taumafaiga tau i le uelefea a le Aualofa o le uarota i le taimi o faalavelave faafuasei.

Na te aoaoina isi taitai o le Aualofa ma faiaoga i o latou tiute, e faaoga ai le tusitaulima leni e avea ma punaoa.

Na te vaaia faamaumauga, lipoti, paketi, ma tupe a le Aualofa o le uarota. E fesoasoani le failautusi a le Aualofa i le tiutetauave leni.

Peresitene ma Fesoasoani o le Aualofa a le Uarota.

E galulue faatasi le peresitene o le Aualofa ma ona fesoasoani e faataunuu ia tiutetauave nei. E tofia e le peresitene o le Aualofa ona fesoasoani e vaaia nisi o nei tiutetauave. E le sili atu ma le toalua fesoasoani e mafai ona valaauina.

Latou te faamaopoopoina taumafaiga faaleauaunaga faatasi ma le au peresitene o le korama a toeaia, faatulaga ma vaavaai le auunaga a tuafafine o auunaga, ma faia faatalanoaga mo auunaga.

Latou te vaaia taumafaiga e faaleleia ai le aoa mai ma le aoa atu o le talalelei i le Aualofa. I nei taumafaiga, latou te mulimuli i mataupu faavae o loo i le 5.5.3 ma le 5.5.4.

I lalo o le taitaiga a le epikopo ma le galulue faatasi ai ma le au peresitene o le korama a toeaia, latou te fuafuaina auala e taulima ai manaoga faaleulele ma tuu atu auunaga alofa (tagai i le 9.6 ma le mataupu 6).

Latou te fuafuaina ma taitai fonotaga po o sauniga a le Aualofa.

E fai a latou fonotaga faaleauperesitene o le Aualofa.

Latou te asiasi atu pe fono ma tuafafine taitasi o le Aualofa ia le itiiti ifo ma le faatasi i le tausaga. Latou te talanoaina le tulaga manuia o le tuafafine ma lona aiga. O nei talanoaga e le tataua ona tuufaatasia ma se faatalanoaga o auunaga lea e i ai foi ma le soa.

E tofia e le peresitene o le Aualofa se tasi o ona fesoasoani e faamaopoopoina ia taumafaiga a le Aualofa e fesoasoani i tuafafine talavou nofofua matutua i le uarota. Afai e i ai se komiti o talavou nofofua

matutua a le uarota, e avea le fesoasoani lea ma sui auai o le komiti. (Tagai i le 16.3.3 ma le 16.3.4.)

9.2.3

Failautusi o le Aualofa i le Uarota

O tiutetauave nei o le failautusi a le Aualofa:

E feutagai o ia ma le peresitene o le Aualofa e sauniuni ia lisi o mataupu mo fonotaga a le au peresitene. E auai o ia i nei fonotaga, tusia minute, ma tuliloaina ia tofitofiga.

E mafai ona ia faatulagaina faatalanoaga o auunaga mo le peresitene o le Aualofa ma ona fesoasoani.

O kuata taitasi, na te tuufaatasia ai se lipoti o le auai i sauniga o le Aso Sa atoa ai ma faatalanoaga o auunaga. Na te iloiloaina leni lipoti faatasi ma le peresitene o le Aualofa ma auina atu i le failautusi a le uarota.

Na te faamautinoaina ua silafia e le au peresitene o le Aualofa ia tamaitai talavou o le a ulufale mai i le Aualofa.

E fesoasoani o ia i le au peresitene o le Aualofa i le sauniaina o se paketi faaletausaga ma le tala mo tupe faaalu.

9.2.4

Faiaoga o le Aualofa

E aoa atu e faiaoga o le Aualofa aoaoga faavae ma taitai ia talanoaga pe a tofia ai e le au peresitene o le Aualofa. Latou te mulimuli i mataupu faavae o loo ootoo atu i le 5.5.4.

9.2.5

O Isi Valaauga o le Aualofa i le Uarota

O valaauga o loo lisi atu i le vaega leni e tuu i le faitalia. E mafai e le epikopo ma le peresitene o le Aualofa ona filifili e le faatumuina tofiga uma, pe la te fuafua foi faapea e manaomia nisi valaauga

faaopoopo. O le au peresitene o le Aualofa e fautua ina atu ni tuafafine e auauna atu i nei valaauga.

Failautusi Fesoasoani ma Failautusi o Auaunaga

E mafai e le au peresitene o le Aualofa ona fautua atu le valaauina o se failautusi fesoasoani se toatasi pe sili atu e fesoasoani i tiutetauave o le failautusi (tagai i le 9.2.3).

Afai e manaomia e le au peresitene se fesoasoani faaopoopo i le faatulagaina o faatalanoaga o auaunaga ma le sauniaina o le lipoti faalekuata (tagai i le 9.5), e mafai ona latou fautua atu i le epikopo ia valaauina se failautusi se tasi pe sili atu mo auaunaga. E le faatautaia e failautusi o auaunaga ni faatalanoaga o auaunaga.

Taitai Faamaopoopo ma Fesoasoani o le Auaunaga Alofa

E mafai ona valaauina se tuafafine e fesoasoani i le au peresitene o le Aualofa e faailoa mai tulaga o loo manaomia ma faamaopoopo le auaunaga alofa. E mafai foi ona valaau ni fesoasoani.

Taitai Faamaopoopo ma le Komiti o Sauniga a le Aualofa

E mafai ona tofia se tuafafine e fesoasoani i le au peresitene o le Aualofa e faamaopoopo le fuafuaina o sauniga a le Aualofa ia e le o faia i Aso Sa. O nei sauniga e mafai ona aofia ai auaunaga, vasega, galuega faatino, konafesi, ma aoaoga faatino. E mafai e le au peresitene o le Aualofa ona talosagaina e valaau ni sui auai o le komiti e fesoasoani i le taitai faamaopoopo. E mafai ona tuuina atu i sui o le komiti ni tiutetauave i ni vaega patino.

Taitai Musika ma Ta Piano

E mafai ona valaauina tuafafine e avea ma taitai musika ma ta piano mo sauniga a le Aualofa. O musika talafeagai e fesoasoani e valaaulia ai le Agaga i sauniga a le Aualofa.

O Isi Valaauga ma Tofiga o le Ekalesia

Pe a manaomia, e mafai e le au peresitene o le Aualofa ona tofia pe fautua atu le valaauina o ni tuafafine e fesoasoani e faataunuu le galuega o le faaolagata. Mo se faataitaiga, e mafai ona latou fefautuaai faatasi ma le epikopo e uiga i le valaauina o tuafafine e fesoasoani atu i le faamalolosia o talavou nofofua matutua, faiga o galuega o le malumalu ma talafaa-solopito o aiga, ma le faasoaina atu o le talalelei. E le manaomia ona valaauina ma vaetofiaina ia tuafafine i ni tofiga mo se taimi puupuu. O tuafafine e taitai pe auauna atu i ni tofiga mo se taimi umi e valaauina ma vaetofiaina e se uso o le au epikopo.

9.3

Fonotaga Faaleautaitai

9.3.1

Fonotaga a le Aufono a le Uarota

O le peresitene o le Aualofa e avea o se sui auai o le aufono a le uarota (tagai i le mataupu e 4).

9.3.2

Fonotaga a le Au Peresitene o le Aualofa i le Uarota

E faia e le aunoa ia fonotaga faaleauperesitene o le au peresitene o le Aualofa. O le peresitene e pulefaa-malumalu i le fonotaga ma taitaia. O le failautusi e auai, tusia minute, ma tuliloa ia tofitofiga.

O le lisi o mataupu e talanoaina e mafai ona aofia ai mea nei:

1. Fuafua ni auala e faatulaga ai, aoao atu, ma uunaia tuafafine i le galuega a le Aualofa.
2. Iloilo ia fautuaga ma tofitofiga mai le epikopo, e aofia ai tofitofiga mai fonotaga a le aufono a le uarota. Fuafua ni auala e mulimulitaia ai fautuaga ma faataunuu ia tofitofiga.

3. Fuafua ni auala e fesoasoani ai i tuafafine o le Aualofa ma o latou aiga e faafetaia'ia ai manaoga faaleuelefea. E mafai ona aofia i leni talanoaga le fuafuaina o auunaga alofa.
4. Iloilo ia faamatalaga mai faatalanoaga o auunaga e uiga i taumafaiga e leoleo ma auauna atu i tuafafine o le Aualofa ma o latou aiga. Gauai patino atu i manaoga o tagata fou i le Aualofa ma tuafafine talavou nofofua matutua.
5. Fuafua ia sauniga a le Aualofa i Aso Sa ma isi fonotaga a le Aualofa ma talanoaina ni auala e faaleleia ai.
6. Mafaufau i tuafafine e valaau e galulue i le Aualofa, ma sauniuni ia igoa e fautua atu e le peresitene o le Aualofa e tuu atu i le au epikopo. Ia mafaufau foi i tuafafine e talosagaina e fesoasoani i tofitofiga mo taimi pupuu.

9.3.3

Fonotaga Faaleutaitai o le Aualofa i le Siteki

O fonotaga a le autaitai o le Aualofa a le siteki e masani ona faia ta'itasi i se tausaga, e pei ona faamalamalama mai i le 18.3.11. E auai atu i ai au peresitene o le Aualofa o uarota ma failautusi. O isi e i ai valaauga i le Aualofa e mafai foi ona valaaulia e auai atu pe a manaomia ai.

9.4

Fonotaga a le Aualofa i le Uarota

9.4.1

Sauniga a le Aualofa i Aso Sa

O le Aualofa e fesoasoani e saunia tamaitai mo faamanuiaga o le ola e faavavau a o latou faateleina le faatuatua i le Tama Faalelagi ma Iesu Keriso ma Lana Togiola; faamalositia o tagata taitoatasi, auai, ma aiga e ala i sauniga ma feagaiga; ma galulue i le lotogatasi e fesoasoani ia i latou e manaomia le

fesoasoani. E fuafua ma le agaga tatalo e taitai ia sauniga o le Aso Sa ina ia ausia ai nei faamoemoega.

O se tasi o le au peresitene o le Aualofa e taitaia sauniga i Aso Sa. E amata sauniga taitasi i se viiga ma se tatalo; o faasilasilaga; ma le faailoaina o tagata fou, tagata sailiili, ma tagata asiasi atu. I le taimi o le sauniga, e faatautaia ai e tuafafine pisinisi, suesue le talalelei a Iesu Keriso, fefautuaai faatasi, ma faatulaga ia faafetaia'ia ai manaoga i le lotofale. E tapunia le sauniga i se viiga ma se tatalo.

O masina taitasi, e fuafua ai e le au peresitene o le Aualofa ia sauniga o Aso Sa e tusa ma le faamatalaga o loo i le *Faatonuga mo Mataupu Aoaoinafaaletausaga*.

9.4.2

Sauniga Faaopoopo a le Aualofa

Ina ia faaopoopo atu i sauniga i Aso Sa, e mafai e tuafafine o le Aualofa ona auai i sauniga faaopoopo. O nei sauniga e mafai ona aofia ai ni auunaga, o ni vasega, galuega faatino, konafesi, ma mafutaga faaleaoaoga. O nei sauniga, e aoao ai ma faataunuu e tuafafine ia tiutetauave faatino ma le alofa a le Aualofa. Latou te aoaoina ai ma faaa'oa'o ia tomai o le a fesoasoani e faateleina ai lo latou faatuatua ma le amiotonu o le tagata lava ia, faamalolositia o latou aiga ma faia o latou aiga ma totonugalemu o le malosiaga faaleagaga, ma fesoasoani ai i e e manaomia le fesoasoani. Latou te aoao ma faaoga mataupu faavae o le ola faautauta ma le ola faalagolago o le tagata ia te ia lava i le faaleagaga ma le faaletino. Latou te faateleina ai foi le usoga faaletuafafine ma le lotogatasi a o latou fea'oa'oa'i ma feauaunaa'i faatasi.

O tuafafine uma o le Aualofa, e aofia ai i latou o loo galulue i Tamaitai Talavou ma le Peraimeri ma i latou e le toaaga mai i le Lotu, e valaaulia ia auai mai. E mafai foi e tuafafine ona valaaulia a latou uo o isi lotu.

E le tatau ona faia ina ia manatu ai tuafafine faapea e tatau lava ona auai i nei sauniga.

O le peresitene o le Aualofa na te vaaia sauniga uma a le Aualofa. O se vaega o lenei tiutetauave, la te talanoa ai pea e le aunoa ma le epikopo e uiga i auala e mafai ai e nei sauniga ona fesoasoani e taulima ai manaoga o tagata taitoatasi ma aiga i le uarota.

E ui o le peresitene o le Aualofa e vaaia ia sauniga, e le faapea e tatau ona i ai o ia i na sauniga uma. Peitai, e tatau lava ona i ai se tasi o le au peresitene o le Aualofa i sauniga uma.

Taimi ma Nofoga e Fai ai Sauniga

E fuafuaina ma le agaga tatalo e le au peresitene o le Aualofa pe faafia ona latou faia ai sauniga faaopopo a le Aualofa ma pe o fea foi e tatau ona faia ai. A uma ona fai sa latou tonu, ona sailia lea e le peresitene o le Aualofa se faamaoniga mai le epikopo.

O nei sauniga [po o fonotaga] e masani lava ona faia i se taimi e ese mai le Aso Sa po o le afiafi o le Aso Gafua. E masani ona faia ta'i masina, ae e mafai e le au peresitene o le Aualofa ona fautuaina atu ina ia faia soo pe le faia sooa foi. E ao ona faia taumafaiga ina ia faia ai a laitiiti ia faalekuata.

I le fuafuaina o taimi, nofoaga, ma le uumi o sauniga faaopopo, ia manatunatu le epikopo ma le au peresitene o le Aualofa i taimi faatulagaina faaletagata o tuafafine, o tulaga faaleaiga, o le mamao ma le tofogi o feoaiga, tupe a le uarota e alu ai, saogalemua, ma isi tulaga faalelotoifale.

Fuafuaina o Sauniga

E soalaupule faatasi ma le agaga tatalo ia taitai o le Aualofa e uiga i autu o le a faamalolosia ai tuafafine ma o latou aiga, ma auala aupito sili e aoao atu ai na autu.

E faamautinoa e le peresitene o le Aualofa o fuafuaga mo sauniga uma a le Aualofa e faamaonia e le epikopo. Na te faamautinoaina foi o fuafuaga uma e ogatusa ma taiala o i le mataupu 13.

E ui o le peresitene o le Aualofa e vaaia nei sauniga, ae e mafai ona ia talosagaina se tasi o ona fesoasoani

na te tauaveina le tiutetauave mo le fuafuaina ma le faataunuuina. E mafai foi ona ia fautuaina atu se isi tuafafine e valaau e fai ma taitai faamaopopo o sauniga a le Aualofa na te faataunuuina lenei tiutetauave (tagai i le 9.2.5).

E mafai ona taulai atu ia sauniga i se autu se tasi pe vaevae foi i ni vasega po o se gaoioga e sili atu ma le tasi. E masani, o faiaoga e tatau lava o ni tagata o le uarota po o le siteki. O tausaga taitasi, e tasi le sauniga e mafai ona faamanatu ai le faavaega o le Aualofa ma taulai atu ai i lona talafaasolopito ma faamoemoega.

I le fuafuaina o nei sauniga, e gauai faapitoa atu ai taitai o le Aualofa i autu na faatonuina ai i latou e le epikopo e taulai i ai ina ia fesoasoani ai i le taulima ina o manaoga faalelotoifale. E tuu atu foi e taitai le faamuamua i autu nei:

Faaiipoipoga ma le aiga: sauniuni mo le faaiipoipoga ma le aiga, faamalolosia o faaiipoipoga po o ulugalii, tulaga faatina, a'otauina o fanau laiti, sauniaina o le autalavou mo tiutetauave i le lumanai, faamalosiuga ma sauniuniga mo afiafi faaleaiga, ma le faamalolosia o sootaga ma aiga lautele.

Faatausiaiga: aoaoina ma le faaleleia atili o tomai mo le tausiga o le fale ma le aiga, e pei o le faamama ma le faatulagaina, faamatagofieina o le fale, kuka, ma le su'isu'i.

Ola faalagolago o le tagata ia te ia lava ma le ola faautauta: tupe (paketiina, saoloto mai le aitalafu, ma agavaa mo galuega); aoaoga ma le iloa tusitusi ma faitautusi (suesue i tusitusiga paia ma aoao le talalelei, aoao atu o isi ia faitau, faiaoga fesoasoani i fanau ma le autalavou, filifilia o tusi mo le fanau, faaaogaina o komepiuta ma isi tekinolosi, ma le atiina ae o le iloa faaleaganuu); soifua maloloina (soifua maloloina faaletino, malosi, puipuiga ma le toefaatulai mai mea ua fai ma vaisu, soifua maloloina i agafesootai ma lagona, ma le puipua mai faama'i); togalaau; gaosiga ma le teuina o meaai; ma tapenapenaga mo faalavelave faafuasei.

Auaunaga alofa: tausiga o e mama'i, le au matutua, o e ua nofofale, o e e i ai manaoga faapitoa, ma e matitiva ma lē tagolima; lagolagosua mo tina failele fou ma pepe; ma fesoasoaniga mo tagata ma nuu.

Malumalu ma talafaasolopito o aiga: aoina mai ma le teuina o faamatalaga o talafaasolopito o aiga, tusia o talafaasolopito o aiga, saunia mo le malumalu, ma le faia o galuega i le malumalu.

Faasoa atu le talalelei: taumafaiga faamisiona a tagata o le au paia, faaumeaina mai o tagata ua le toaaga mai, aapa atu i tuaoi, faatoaagaina mai ma le faatumauina, faafeiloaia o tuafafine fou i le Aualofa, ma le saunia mo misiona tala'i.

Vasega a le Fanau

E mafai ona faia se vasega a le fanau ia mafai ai e tina e i ai fanau laiti ona auai i sauniga e faia i aso e ese mai le Aso Sa. Faatasi ai ma le faamaoniga a le au epikopo, e talosagaina e le au peresitene o le Aualofa ia tuafafine po o isi tagata o le uarota e vaavaai ma faiaoga i le vasega lea. Afai e faiaoga tuafafine o le Aualofa i le vasega, e feauauai ia le au peresitene o le Aualofa i le tiutetauave lea ina ia mafai ai e tuafafine uma ona maua le avanoa e auai ai i sauniga. Afai e faiaoga alii i le vasega, e mulimulita'ia e le au peresitene taiala o i le 11.8.1.

O faiaoga mo le vasega a le fanau e fuafuaina gaioiga e talafeagai ma le matutua e aoao ai le fanau e uiga i le Tama Faalelagi ma Iesu Keriso, E mafai ona latou faaogaina tusi lesona a le Peraimeri ma isi anomea a le Peraimeri e aoao ai tamaiti.

Afai e saunia se meaai mo le vasega a le fanau, ia muamua ona feutagai ia taitai ma matua o tamaiti taitasi e uiga i ni meaai e faasa ona o tulaga e pei o le ma'i suka pe afaina gofie ai foi.

9.5

Auaunaga

Sa faaali mai e le Faaola e ala i faataitaiga le uiga o le auauna atu a o Ia auauna atu ona o le alofa mo Lona Tama, ma mo fanau a Lona Tama (tagai i le Ioane 15:9–10). Sa Ia alofa atu, aoao atu, tatalo mo [isi], faamafanafana atu, ma faamanuia i latou sa siomiaina o Ia, ma valaaulia tagata uma ia mulimuli ia te Ia (tagai i le Mareko 8:34). O tuafafine o auunaga e saili atu ma le agaga tatalo e auauna atu e pei o loo Ia faia. Ina ia tuuina atu se tausiga faapena, ua tofu ai tuafafine matutua taitasi ma ni tuafafine o auaunaga ua tofia i ai e leoleo ia te ia.

E aoao atu e le au peresitene o le Aualofa ia tuafafine o auaunaga i auala e fetausia'i ai, feleoleoa'i ai, femanatuua'i ai, ma fefaamalosia'i ai e le tasi le isi. E mafai e uso o le au peresitene ona tuuina atu leni faatonuga i se faatalanoaga o auaunaga, i se sauniga o le Aso Sa, po o se isi fonotaga a le Aualofa.

O tuafafine o auaunaga e le lagolagoina pe vaetofiaina.

9.5.1

O Tiutetauave o Tuafafine o Auaunaga

O tuafafine o auaunaga e fai ma sui o le Alii, le epikopo, ma taitai o le Aualofa. I le aveai ai ma tuafafine o auaunaga, latou te saili atu ma le agaga tatalo e auauna atu e pei o loo faia e le Alii, "faamafanafana atu ia te i latou o e e manaomia le faamafanafanaga" ma fesoasoani i tamaiti taitaitasi ia aveai ma se soo moni o Iesu Keriso (Mosaea 18:9; tagai foi i le Ioane 13:35).

E saili atu tuafafine o auaunaga ina ia taitaiina e le Agaga a o latou tuuina atu le tausiga FaaKeriso. Latou te fefautuaai faatasi ma i latou ua tofia i ai i latou ma saili atu i musumusuga e uiga i le auala

sili e faafetaia'ia ai o latou manaoga, e faaoga ai le taimi ma punaoa o loo maua.

O tuafafine o auaunaga e fetuutuunai i le auala latou te auauna atu ai. Latou te fetuuna'ia a latou fesootaiga ma auaunaga, ma soo se savali, e faafetaia'ia ai manaoga o tuafafine. E taua asiasiga patino pe a mafai ona faia. E mafai foi e tuafafine o auaunaga ona aapa atu e ala i valaau i telefoni, tesi, imeli, tusi, fesootaiga i le lotu, auai i polokalama faaleaiga, ma auaunaga.

O le faafetaia'ia o manaoga taitoatasi e amata i iloiloga ma le agaga tatalo atoa ai ma le faia o se talanoaga ma tuafafine ua tofia. E faalogo tuafafine o auaunaga ina ia mafai ona latou malamalama i le auala sili e auauna atu ai. Latou te talanoaina pe faafia ona fai, ma le ituaiga o fesootaiga e mananao i ai tuafafine. Latou te talanoaina foi le ituaiga o savali o le a mananao i ai tuafafine.

E mafai ona avefa tuafafine o auaunaga ma se punavai taua o le fesoasoaniga i ē latou te auauna atu i ai. O loo lisi atu i lalo nisi o auala:

1. Latou te fesoasoani i tuafafine e faamalosi lo latou faatuatua i le Tama Faalelagi ma Iesu Keriso.
2. Latou te fesoasoani i tuafafine ma o latou aiga e saunia mo o latou sauniga e sosoo ai. E mafai ona latou fesoasoani i matua e faamautinoa ua faamanuia a latou fanau, papatiso, ma faamaui. E mafai foi ona latou fesoasoani i matua e faamautinoa ua faaee i o latou atalii le Perisitua Arona ma le Perisitua Mekisateko ma ua faauuina i tofi o le perisitua i tausaga talafeagai.
3. Latou te masani i manaoga ma mea e fiafia i ai tuafafine, ma latou te aloaia mea taua e tutupu i o latou olaga.
4. Latou te ofo atu le fesoasoani pe a leai ni galuega a tuafafine ma o latou aiga, [pe] mama'i, tuuatoatasi, siitia i isi nofoaga, po o isi manaoga.
5. Latou te fesoasoani i tuafafine ma o latou aiga ia ola-tutoatasi.

9.5.2

Auaunaga Tuufaatasi

O le auaunaga o se taumafaiga tuufaatasi i le va o le korama a toeaina ma le Aualofa. I le galulue ai i lalo o le taitaiga a le epikopo, e faamaopoopo ai ma le agaga tatalo e au peresitene o le korama a toeaina ma le Aualofa le auaunaga i tulaga nei:

1. E fautua atu e le au peresitene o le korama a toeaina i le epikopo ia soa o auaunaga ma tofiga faaleauaunaga mo tagata taitoatasi ma aiga o le uarota. E fautua atu e le au peresitene o le Aualofa ia soa o auaunaga ma tofiga faaleauaunaga mo tuafafine o le Aualofa. E talanoaina e au peresitene o le korama a toeaina ma le Aualofa ia tofiga patino a o le'i fautuaina atu i latou i le epikopo.
2. Pe a talafeagai ai, o uso ma tuafafine o auaunaga mo se tagata po o se aiga e mafai ona talanoaina faatasi a latou taumafaiga e faafetaia'ia ni manaoga. Pe a manaomia, e mafai ona latou faafesootaia o latou au peresitene o le korama po o le Aualofa mo se fesoasoani ma punaoa faaopoopo.
3. E faia e uso o le au peresitene o le Aualofa ia faatalanoaga faatasi ma tuafafine o auaunaga e le itiiti ifo ma le faakuata (tagai i le 9.5.4).
4. E fono i kuata taitasi au peresitene o le korama a toeaina ma le Aualofa e talanoaina ia malosiaga ma manaoga o tagata taitoatasi ma aiga na iloaina e ala i faatalanoaga o auaunaga. Pe a manaomia ai, latou te faamaopoopoina foi ia tofiga faaleauaunaga.
5. E sosoo ai ma lena fonotaga, e fono faatasi le peresitene o le korama a toeaina ma le peresitene o le Aualofa i kuata taitasi faatasi ma le epikopo e talanoaina manaoga o tagata taitoatasi ma aiga. E mafai foi ona latou faamaopoopoina tofiga faaleauaunaga ma maua mai le faamaoniga a le epikopo mo a latou fautuaga.
6. Pe a manaomia, e talanoaina e le peresitene o le korama a toeaina ma le peresitene o le Aualofa faatasi ma le aufono a le uarota ia malosiaga

ma manaoga na faailoaina mai i faatalanoaga o auaunaga. E fai e tagata o le aufono a le uarota ia fuafuaga e auauna atu ai ma faamanuia ia tagata o le uarota.

9.5.3

Faatulagaina o le Auaunaga e Faafetaia'ia ai Manaoga i le Lotoifale

E fautua atu ma le agaga tatalo e le au peresitene o le Aualofa i le epikopo ia tofiga mo tuafafine o auaunaga e tausi ai tuafafine i totonu o le uarota. E talanoaina e uso o le au peresitene ia malosiaga ma manaoga o tuafafine ma o latou aiga. Latou te fautua atu tuafafine tuuto o auaunaga mo tagata fou, o tagata ua le toaaga mai o e atonu e sili ona taliaina, ma isi e pei o tina nofo toatasi ma fafine ua oti a latou tane.

A uma ona tuu atu e le epikopo le faamaoniga, o se uso o le au peresitene o le Aualofa e fono faatasi ma tuafafine o auaunaga e tuu atu i ai ia i latou o latou tofiga ma ia fefautuaai e uiga i malosiaga, manaoga, ma luitau o i latou o loo auauna atu i ai tuafafine. O leni talanoaga e mafai ona faia i se faatalanoaga o auaunaga pe i soo se taimi e manaomia ai.

E masani ona tofia e le au peresitene o le Aualofa ia tuafafine i ni soa ta'itoalua. E mafai ona tofia se ulugalii faaipoipo e auauna atu faatasi, pe afai o lena faiga e sili ona aoga e faafetaia'ia ai manaoga o se tuafafine ma lona aiga.

E mafai ona auauna atu Maea Meite ma Lora o ni soa i tuafafine o le Aualofa. E fefautuaai faatasi matua ma taitai faatasi ma Maea Meite ma Lora taitasi, ma e mafai ona tofia o ia o se tuafafine o auaunaga pe a loto i ai o ia ma mafai ona auauna atu. O se uso o le au peresitene o le Aualofa e tuuina atu tofiga faaleaunaga i Maea Meite ma Lora.

O se Maea Meite po o se Lora e auauna atu o se soa i se tuafafine matua, e le tofia patino i ai ni tuafafine o auaunaga ia te ia. O loo auauna atu ia te ia i latou

o ē o loo auauna atu i lona aiga ma o loo tausia foi e ona taitai o Tamaitai Talavou.

O le taiala faapea e toalua tagata matutua lelei ia auai faatasi ma se talavou e le faaaogaina i le tofi-tofiga o soa o auaunaga. Peitai, i lalo o le taitaiga a lo latou epikopo, e tatau ai i taitai ona faaoga le atamai ma saili atu i musumusuga pe a tofia ni talavou e ave ma soa i tagata matutua.

E tatau i soa matutua ona aloese mai tulaga ia e ono ave sese ma le malamalama ai. E tatau ona latou mataalia e faatatau i le tulaga taumamao o le tasi-i-le-tasi ina ia maua e le talavou se aafiaga saogalemu ma tauia i le auaunaga. E le gata i lea, e tatau ona faaoga e taitai le atamai i le le tofiaina o talavou i ni aiga faigata po o ni faafitauli faaleaiga.

Pe a tofia le autalavou i se soa e le o se matua, e tatau i taitai ona faamautinoa e le o tete matua i ia tofiga.

Faatasi ai ma le faamaoniga mai le peresitene o le misiona, e mafai ai e taitai ona iloilo e talosagaina faifeautalai faamisiona e fesoasoani i le auaunaga i se tulaga faatapulaaina E ta'u atu e le peresitene o le misiona leni faamaoniga i le peresitene o le siteki, o lē na te faailoa atu i epikopo. A tuuina atu lena faamaoniga, ona tofia muamua lea o faifeautalai faamisiona e auauna atu i tagata fou, aiga e le auai tagata uma i le lotu, ma tagata ua le toaaga mai.

9.5.4

Faatalanoaga o Auaunaga

E faia e uso o le au peresitene o le Aualofa ia faatalanoaga faatasi ma tuafafine o auaunaga (e aofia ai Maea Meite ma Lora) e le itiiti ifo ma le faatasi i kuata taitasi. E mafai ona faia faatalanoaga i le gasologa o le kuata ma e le manaomia ona faauumi ina ia lelei ai.

E sili atu lava ona faia nei faatalanoaga faafesagai ma le tagata ma faatasi ma sui o le soa. O se ulugalii faaipoipo e tofia e auauna atu faatasi e mafai ona fono ma taitai o le korama a toeaina, taitai o le Aualofa, po o taitai uma e toalua.

O faatalanoaga o auaunaga e faia ina ia:

1. Fefautuaai ai e uiga i malosiaga, manaoga, ma luitau o tuafafine ua tofia ma o latou aiga.
2. Fuafua ai po o a manaoga e mafai ona fesoasoani i ai le korama a toeaina, Aualofa, po o le aufono a le uarota.
3. Aoao ma uunaia tuafafine o auaunaga.

I le va o faatalanoaga, e fesootea atu e tuafafine o auaunaga faamatalaga pe a manaomia—e faafesagai pe valaau atu i le telefoni, tesi, pe imeli. E na o le peresitene o le Aualofa latou te faasoa atu i ai faamatalaga e le faalauaitelina pe faasoa sa’o atu i le epikopo.

O kuata taitasi, e fono faatasi ai le peresitene o le korama a toeaina ma le peresitene o le Aualofa faatasi ma le epikopo e talanoaina manaoga o tagata taitoatasi ma aiga. Pe a manaomia ai, latou te faamaopoopoina foi ia tofiga faaleauaunaga. E lipoti vave atu e le peresitene o le korama a toeaina po o le peresitene o le Aualofa ia manaoga faananati i le epikopo.

9.6

Uelefea ma Auaunaga Alofa

O le uelefea ma auaunaga alofa o le totonugalemu lea o le galuega a le Aualofa.

I lalo o le taitaiga a le epikopo, e tausoa faatasi ai e le au peresitene o le Aualofa ma le au peresitene o le korama a toeaina ia tiutetauave faaleuelefea nei:

Latou te aoao atu mataupu faavae o le ola faalagolago o le tagata ia te ia lava i le faaletino ma le faaleagaga.

Latou te tausua e matitiva ma e le tagolima ma uunaia tagata ina ia auauna atu.

Latou te fesoasoani i tagata taitoatasi ma aiga ia faalagolago le tagata ia te ia lava ma sailia ni tali mo atugaluga faaleuelefea mo taimi pupuu ma taimi uumi.

Mo nisi faamatalaga e uiga i nei tiutetauave faaleuelefea, tagai i le mataupu e 6.

O vaega o loo sosoo ai o loo otooto atu ai tiutetauave e faatatau tonu lava i le peresitene o le Aualofa ma ona fesoasoani.

9.6.1

Asiasiga o Mea e Manaomia e Aiga

E masani ona tofia e le epikopo le peresitene o le Aualofa e asiasi i tagata o e manaomia le fesoasoani o le uelefea ina ia mafai ai ona ia iloiloaina o latou manaoga ma fautuaina mai ni auala e tali atu ai i ai. Afai e leai se tamaitai i le fale na te asiasi atu i ai, ona ia aveina lea o se tasi o ona fesoasoani, le failautusi o le Aualofa, po o le taitai faamaopoopo o auuanga alofa latou te o.

Ina ia sauniuni mo asiasiga i aiga e manaomia le fesoasoani, e manatunatu le peresitene o le Aualofa i faamatalaga na tuuina atu e le epikopo e uiga i le aiga, ma sailia le taitaiga mai le Alii.

E iloilo e le peresitene o le Aualofa ia punaoa a le aiga ma saunia se lisi auiliili o meaai masani a le aiga ma lavalava e manaomia. Na te tuuina atu leni lisi i le epikopo. E mafai foi ona ia sauniaina le fomu o le Oka a le Epikopo mo Oloa e iloilo e le epikopo ma faamaonia. Na te faia leni auaunaga ma le alofa ma le malamalama, e fesoasoani ai ia i latou o loo tuuina atu i ai le fesoasoani ina ia tausia ai lo latou tulaga faaloaloga ma le mamalu.

E lipoti atu e le peresitene o le Aualofa i le epikopo le tulaga aoao o le aiga. Na te lipoti atu soo se manaoga i le itu tau i meaai (mo manaoga masani ae le o ni meaai e teu), lavalava, faafoega o le aiga, soifua maloloina, ma le tulaga manuia faaleagafesootai ma faalelagona. E mafai foi ona ia faasoa atu lana iloilo o tulaga gafatia e faigaluega ai tagata o le aiga ma avanoa e tatau ai ona faigaluega tagata o le aiga.

E fesoasoani le epikopo i le aiga e atia’e se fuafuaga ia faalagolago ai ia i latou lava. E fefautuaai o ia ma le peresitene o le Aualofa e tusa ai ma nisi avanoa

faaopoopo e fesoasoani ai i le aiga. I nisi o tulaga, o le fesoasoani e sili ona taua e mafai ona aofia ai le (1) fesoasoani i se tuafafine e pulea tupe maua ma punaoa ma le (2) aoao atu tomai faatausi aiga e pei o le faamamaina, su'isu'i, faatulaga, fuafua le faiga o meaai, faasaoina o meaai, ma le siitia o le soifua maloloina.

O le peresitene o le Aualofa ma soo se tasi e fesoasoani ia te ia, e matuai tausisia lelei le le faalauaitelina o soo se faamatalaga latou te maua mai i le taimi o asiasiga po o faamatalaga foi mai le epikopo.

9.6.2

Auaunaga Alofa

Ua i ai i tuafafine uma o le Aualofa se tiutetauave ia mataala i manaoga o isi. Latou te faaogaina o latou taimi, tomai, taleni, lagolago faaleagaga ma le faaletino, ma tatalo o le faatuatua e fesoasoani ai i isi.

E ala atu i le fesoasoani a tuafafine o auaunaga ma isi i le uarota, e faailoa mai ai e le au peresitene o le Aualofa i latou e i ai manaoga faapitoa ona ua matutua le soifua, gasegase faaletino pe faalelagona, faalavelave faafuasei, o pepe ua fananau mai, o maliu, le atoatoa o le malosi faaletino/faalemafau, tuuatoatasi, ma isi luitau. E lipoti atu e le peresitene o le Aualofa mea ua ia silafia i le epikopo. I lalo o lana taitaiga, e faamaopoopo ai e ia le fesoasoani. Na te iloiloia ia tomai ma tulaga o tuafafine uma a o ia fuafuaina pe o ai e mafai ona fesoasoani atu.

E mafai ona ia fesili atu i se fesoasoani, se taitai faamaopoopo o auaunaga alofa, po o ni tuafafine o auaunaga e fesoasoani e faamaopoopo nei taumafaiga faaleaunaga. E mafai foi ona ia faatuina se komiti e fesoasoani. E mafai e tuafafine ona fesoasoani e ala i le sauniaina o meaai, vaaia o le fanau po o le fale, fesoasoani i tuafafine taitasi e faaleleia atili tomai tusitusi ma faitautusi, saunia auala o feoaiga mo fesoasoani faafomai o loo manaomia, ma tali atu i isi manaoga.

9.6.3

Iloa Tusitusi ma Faitautusi

O le mafai ona faitau ma tusitusi e fesoasoani i tagata e sue ni galuega ma atiina ae le faalagolago ia i latou lava. E fesoasoani ai foi ia i latou e faateleina lo latou malamalama i le talalelei ma le faalagolago ia i latou lava. E faatino e uarota taitasi a latou taumafaiga ia iloa tusitusi ma faitautusi e tusa ai ma ona lava manaoga ma punaoa o i ai. A le o lava ia tomai faavae autu o le tusitusi ma le faitautusi i tagata o le au paia, e galulue le au peresitene o le Aualofa faatasi ma le epikopo ma le aufono a le uarota e faailoa ni auala aoga e fesoasoani ai i tagata e faaleleia nei tomai. E mafai e taitai ma faiaoga ua tofia ona faaoga le kosi mo le tusitusi ma le faitautusi a le Ekalesia, lea e aofia ai le tusi lesona a le tagata aoao ma le faiaoga o le *Ye Shall Have My Words* ma se DVD mo le aoaoina o faiaoga. E le gata i lea, e mafai e taitai o le Aualofa ona tuuto atu ni fonotaga po o sauniga [e aoao ai] tomai tusitusi ma le faitautusi.

9.7

Faamalolosia o Tamaitai Talavou o le Aualofa

9.7.1

Galulue faatasi ma le Au Peresitene o Tamaitai Talavou

O le suiga mai le talavou i le tulaga faatamaitai o se taimi taua tele i le olaga o se tamaitai talavou. E galulue le au peresitene o le Aualofa faatasi ma le au peresitene o Tamaitai Talavou e fuafua ai auala e lagolago ai matua i a latou taumafaiga e fesoasoani i tamaitai talavou ia manuia lo latou siitaga mai i le Aualofa.

E mafai ona fesoasoani fautuaga nei i lenei taumafaiga:

E mafai e le peresitene o le Aualofa ona asiasi i vasega a Tamaitai Talavou ma tuuina atu i ai se muai vaaiga i le Aualofa.

E mafai e tamaitai talavou ma tuafafine i le Aualofa ona fuafua i nisi taimi sa latou sauniga po o se gaioiga e fai faatasi.

A faatagaina e le peresitene o le siteki ma pe a lava le avanoa, e mafai ona tuufaatasi le sauniga amata a Tamaitai Talavou ma le Aualofa i se Aso Sa e tasi i masina taitasi. Ina ia mautinoa e lava le taimi o tamaitai talavou ma le Aualofa mo le aoao mai ma le aoao atu o le talalelei, e fuafua e le au peresitene o le Aualofa ma le au peresitene o Tamaitai Talavou ia sauniga amata e faatulagaina lelei ma pupuu. O le tiutetauave mo le taitaia e faasoa i le va o le au peresitene o le Aualofa ma le au peresitene o le vasega a le Lora.

E mafai ona talosagaina tuafafine talavou o le Aualofa e fesoasoani i tamaitai talavou laiti o e o loo manaomia le lagolago i le faatumuina o a latou tusi o le Alualu i Luma o le Tagata Lava Ia, ma ia tumau le toaga i le Lotu.

9.7.2

Tiutetauave mo Tuafafine Talavou Nofofua Matutua

O le au peresitene o le Aualofa e i ai le tiutetauave e vaaia tuafafine talavou nofofua matutua. E aoao atu e taitai o le Aualofa ia tuafafine talavou nofofua matutua i faamoemoga o le Aualofa ma avatu ia i latou avanoa e auai i le galuega a le Aualofa. Latou te tuu atu i tuafafine talavou nofofua matutua ni tofiga e avea ai o ni tuafafine o auaunaga. E mafai foi e taitai o le Aualofa ona tuu atu ia i latou isi avanoa 'anoa e auauna atu ai ma e mafai foi ona fautuaina atu i latou ia maua ni valaauga e auauna ai i totonu o le Aualofa.

E fautua atu e le au peresitene o le Aualofa i le epikopo ia tuafafine o auaunaga mo tuafafine talavou nofofua matutua taitoatasi. Afai e nofo le tuafafine talavou nofofua matua faatasi ma ona matua, e

fefautuaai faatasi le au peresitene o le Aualofa ma ia pe tatau ona i ai ni ona lava tuafafine o auaunaga pe tatau ona auauna atu foi ia te ia tuafafine o auaunaga a lona tina.

9.7.3

Vasega Tuueseese o le Aualofa mo Tuafafine Talavou Nofofua Matutua

Afai e lava le toatele o tuafafine talavou nofofua matutua e nonofo i se uarota, e mafai e le epikopo ona faatagaina le faatulagaina o se vasega e ese a le Aualofa mo nisi o talanoaga o le Aso Sa ma gaioiga i nisi o taimi. Afai o i ai se tuafafine i le uarota o avea ma se taitai o talavou nofofua matutua (tagai i le 16.3.3), e mafai ona avea o ia ma taitai o le vasega. O talanoaga (o le lesona) e taitaia e tagata o le vasega, o e feutagai ma le au peresitene o le Aualofa ma taulai atu i manaoga o tuafafine talavou. Latou te faaoga ina tusinga paia, o aoaoga a perofeta o aso e gata ai, ma isi anomea ua faamaoniaina e le Ekalesia mo le Aualofa.

9.8

Au Taitai o le Aualofa a le Siteki

9.8.1

Au Peresitene o le Siteki

O le peresitene o le siteki e vaaia le Aualofa i le siteki. E fono e le aunoa o ia (e masani lava e ta'i masina) ma le peresitene o le Aualofa a le siteki po le au peresitene. Na te tuuina atu le taitaiga faaleperisitua a o latou fefautuaai faatasi e uiga i mataupu e faataata i tuafafine o le Aualofa ma o latou aiga. O nei mataupu e aofia ai manaoga faaleuelefelea, o le alualu i luma ma manaoga o tuafafine i le siteki, ma fonotaga a le Aualofa, aoaoga, ma gaioiga.

Mo nisi faamatalaga e uiga i tiutetauave o le au peresitene o le siteki e faataata i faalapotopotoga a ausilali, tagai i le 15.1.

9.8.2**Au Peresitene o le Aualofa a le Siteki**

O tiutetauave o au peresitene o ausilali i le siteki o lo o ootoo atu i le 15.4.1. O tiutetauave o le au peresitene o le Aualofa e i ai tiutetauave nei:

I lalo o le taitaiga a le au peresitene o le siteki, e mafai ona latou fuafuaina ai ma faatino se tasi pe lua o sauniga a le Aualofa a le siteki i tausaga taitasi mo tuafafine uma o le Aualofa i le siteki. O nei sauniga e mafai ona aofia ai auunaga, vasega, galuega faatino, konafesi, ma aoaoga faatino. E le tatau ona faia faatasi ma sauniga a tamaitai o le konafesi aoao. E mafai e le au peresitene o le Aualofa a le siteki ona faatuina ni komiti e fesoasoani pe a manaomia ai. O nisi taimi e mafai ona aofia ai tamaitai talavou ma teineiti 8 tausaga ma matutua atu i nei gaoioiga. E fefautuagai faatasi au peresitene o le Aualofa, Tamaitai Talavou, ma le Peraimeri a le siteki e fautua atu gaoioiga faapena i le au peresitene o le siteki.

E faamautinoa e le au peresitene o le Aualofa a le siteki ua malamalama ia peresitene o Aualofa a uarota i mataupu faavae o le uelefea, ma ua latou malamalama foi i la latou matafaioi e fesoasoani i epikopo i mataupu tau i le uelefea.

O sui auai o le au peresitene o le Aualofa e fesoasoani i tuafafine talavou nofofua matutua i le siteki. Afai e i ai se komiti o talavou nofofua matutua a le siteki, e avea se tasi o le au peresitene ma sui auai o le komiti (tagai i le 16.3.4).

O le peresitene o le Aualofa a le siteki e vaavaaia taumafaiga faaleulefea a le Aualofa o le siteki. Na te faamaopoopoina foi taumafaiga a le Aualofa o le siteki i taimi o faalavelave faafuasei.

9.8.3**Failautusi o le Aualofa a le Siteki**

O tiutetauave o le failautusi o le Aualofa a le siteki, o loo ootoo atu i le 15.4.2.

9.9**Fetuunaiga o le Faalapotopotoga a le Aualofa i Manaoga Faalelotoifale**

O taiala nei ua saunia e fesoasoani ai i uarota ma siteki e fetuunai le faalapotopotoga a le Aualofa i manaoga faalelotoifale. Mo faamatalaga lautele e uiga i le fetuunai i manaoga faalelotoifale, tagai i le mataupu e 17.

9.9.1**Sili Atu ma le Tasi le Aualofa i se Uarota**

I ni tulaga faapitoa, e mafai e le epikopo ma le peresitene o le siteki ona faatagaina le faavaeina e sili atu ma le tasi le Aualofa i se uarota. O tulaga faapitoa e mafai ona aofia ai uarota e i ai nofoaga mo tagata matutua, uarota a talavou nofofua matutua, uarota e toatele le aofai o tina nofotoatasi ma fafine ua oti a latou tane, o uarota e toatele le aofai o tamaitai o le Aualofa e toaaga i le lotu, ma uarota e tetele eria faafaafanua. O le faamoemoe o le faavaeina o ni Aualofa e sili atu ma le tasi, o le faafaigofieina lea o le leoleoina ma le faamalolosia o tuafafine ma o latou aiga.

I se uarota e sili atu ma le tasi le Aualofa, o taitai i au peresitene o Aualofa taitasi e faatautaia le polokalama atoa a le Aualofa mo o latou sui auai. E tatau i Aualofa taitasi ona paleni lelei tuafafine i tulaga o tausaga ma potomasani. E i ai i peresitene o Aualofa taitasi se avanoa tutusa e saunoa ai i fonotaga a aufono a le uarota ma galulue faatasi ma le epikopo e faatatau i mataupu faaleulefea ma taumafaiga e faamalolosia ai tuafafine ma o latou aiga.

9.9.2**Aualofa i Iunite Laiti**

I se uarota laitiiti po o se paranesi, e mafai ona na o le au peresitene o le Aualofa e taitai ma faiaoga. I se iunite laitiiti tele, e mafai e le peresitene o le Aualofa ona na o ia le taitai o le Aualofa. O fesoasoani, se

failautusi, faiaoga, ma isi o lo o lisi atu i lenei mataupu e tatau ona valaauina pe a talafeagai.

I se paranesi e laitiiti tele e leai se peresitene o Tamaitai Talavou po o se peresitene o le Peraimeri, e mafai ona fesoasoani le peresitene o le Aualofa i matua e faatulaga ia aoaoga mo tamaitai talavou ma tamaiti seia oo ina valaau ni peresitene o Tamaitai Talavou ma le Peraimeri.

I se siteki laitiiti po o se itu, o le peresitene o le Aualofa e mafai ona na o le pau lea o le taitai o le Aualofa i le siteki po o le itu. I le taimi e mafai ai, ona tatau lea ona valaau ia fesoasoani ma se failautusi.

9.10

Taiala ma Aiaiga Faaopoopo

9.10.1

Tuafafine E I Ai Manaoga Faapitoa

O tuafafine atonu e i ai manaoga faapitoa, e aofia ai i latou o e gasegase, olomatutua, fafine ua oti a latou tane, ua tatala faaipoipoga, ua nofofale, pe faavauvau ma i latou o loo tausia tagata ua gasegase tumau o aiga. E tatau foi i isi sui auai o le Aualofa ona ofoina atu le fesoasoani.

O tuafafine e i ai nei luitau faapitoa e mafai ona o mai i le peresitene o le Aualofa ma o latou atugaluga. E tatau ona faalogo o ia, ofo atu le alofa ma le faamalosianga, ma tausisia le le faalauaiteleina talafeagai. Afai na te silafia ni atugaluga o i ai mo le agavaa, po o ni mataupu maaleale, na te faasino atu tuafafine i le epikopo.

Mo faamatalaga e uiga i le fesoasoani atu i tuafafine e i ai manaoga faapitoa, tagai i le 21.1.26 ma le disabilities.lds.org.

9.10.2

Tulaga Faatonuina o Laei

O le au peresitene o le Aualofa e aoaoina ia tuafafine ia teuteu faalelei ma ia tausaaafia i o latou laei. E

fesoasoani ia sui o le au peresitene ia malamalama tuafafine o sauniga a le Ekalesia, e ao ona faaalua i o latou foliga ma laei le migao ma le faaloalo mo le Alii. E fesoasoani foi taitai o le Aualofa i tuafafine ia malamalama a oo ina latou o atu i le malumalu, e ao ina latou laeiina laei e fetai mo le ulu atu i le maota o le Alii. I nei tulaga, e tatau ona latou aloese mai le ofuina o lavalava tafao, ofu taalo, ma maataua e tosina atu i ai le vaai a isi.

9.10.3

Ofoina Atu o le Lagolago i Taimi o Malii

A oo ina tulai mai se malii i le uarota, e mafai e le epikopo ona talosagaina le peresitene o le Aualofa e faafesootai le aiga ma tuu atu faamafanafanaga, iloilo manaoga, ma ofo atu i ai le fesoasoani. E mafai foi ona ia talosagaina le lagolago faapena mai le peresitene o le korama a tocaina. E faamaopoopo e taitai o le korama a tocaina ma taitai o le Aualofa nei taumafaiga.

I tapenapenaga mo se falelauasiga, e mafai foi e le epikopo ona talosagaina ia taitai o le Aualofa e tuuina atu le auauanga e pei o le fesoasoani i le faiga o teu, meaai, po o le tausiga o le fanau ma le saunia o se taumafataga faigofie mo tagata o le aiga pe a uma le sauniga o le falelauasiga. Mo nisi faamatalaga e uiga i falelauasiga, tagai i le 18.6.

Afai e mafai, o tagata ua maliliu o e sa maua faaeega paia, e tatau ona falelauasi i laei o le malumalu. I nisi tulaga, e mafai e le epikopo ona talosagaina le peresitene o le Aualofa e tofi se tamaitai ua maua ona faaeega paia na te faaofuina pe vaaia foi le faaofuina talafeagai o se tamaitai ua malii a ua maua ona faaeega paia. E faamautinoa e le peresitene o le Aualofa ua tuuina atu leni tofitofiga i se tagata o le a lē inoino. O taiala mo le faaofuina o tagata o le ekalesia ua maliliu o loo maua lea i *Faatonuga mo le Faaofuga o e ua Maliliu ua Uma Ona Maua o Latou Faeega Paia*. E mafai e taitai ona maua nei faatonuga mai Faletusi o le Ekalesia.

Mo nisi faatonuga i le faaofuina o tagata o le ekalesia ua maliliu i laei o le malumalu, e mafai e le epikopo ona tagai i le *Tusitaulima 1*, 3.4.9.

O le peresitene o le Aualofa, tuafafine o auunaga, ma isi tuafafine e faaauau pea ona ofoina atu le lagolago, faamafanafanaga, ma le fesoasoani i e o faavauvau i le vaitau o le fetuutuunaiga pe a mavae le maliu.

9.10.4

Tamaitai Talavou ua Maitaga ae Lei Faaipoipo po o Tina e Lei Faaipoipo

Tagai i le 10.12.4.

9.10.5

Faatonuga e uiga i Laei o le Malumalu ma Ofusa

Tagai i le 21.1.42.

9.10.6

Tupe

Tagai i le 13.2.8.

10.

Tamaitai Talavou

O le faalapotopotoga a Tamaitai Talavou o se ausilali i le perisitua. O ausilali uma lava ua i ai e fesoasoani i tagata o le Ekalesia ia ola ia latou molimau i leTama Faalelagi, Iesu Keriso, ma le talalelei toefuataiina. O le galuega a ausilali, e maua ai e tagata o le ekalesia ia aoaoga, faamalosiuga, ma le lagolago a o latou taumafai e ola e tusa ai ma mataupu faavae o le talalelei.

10.1

Vaaga Aoao i le Faalapotopotoga a Tamaitai Talavou

10.1.1

Faamoemoega ma Sini Autu o le Faalapotopotoga a Tamaitai Talavou

O le faamoemoega o le faalapotopotoga a Tamaitai Talavou o le fesoasoani lea i tamaitai talavou taitoatasi ina ia agavaa e osia ma tausia feagaiga paia ma maua sauniga o le malumalu. Ina ia ausia lenei faamoemoega, e taitai o Tamaitai Talavou ia tamaitai talavou taitasi i le faataunuuna o gaoioiga nei:

1. Faamalosi lona faatuatua ma le molimau i le Tama Faalelagi ma Iesu Keriso.
2. Malamalama i lona faasinomaga o se afafine o le Atua.
3. Ia agavaa e ala i le usiusitai i poloaiga ma ola ai i tulaga faatonuina o le talalelei.
4. Ia maua, iloa, ma faalagolago i uunaiga a le Agaga Paia.
5. Saunia mo lana matafaioi paia o se afafine, ava, tina, ma se taitai.
6. Malamalama ma tausia ana feagaiga o le papatisoga.

10.1.2

Autu a Tamaitai Talavou

Ua tuuina mai e le autu a Tamaitai Talavou se faavae e fesoasoani ai i tamaitai talavou taitoatasi e faataunuuna ia sini autu o loo lisi atu i luga.

E fai faatasi e tamaitai talavou ma o latou taitai le autu i le amataga o sauniga i Aso Sa ma isi mafutaga a Tamaitai Talavou. E faapenei le faitauina o le autu:

“O i tatou o afafine o lo tatou Tama Faalelagi, e alofa ia i tatou, ma e tatou te alolofa foi ia te Ia. O le a tatou “tutu o ni molimau a le Atua i taimi uma, ma i mea uma, ma i nofoaga uma’ (Mosaea 18:9) a o matou taumafai e ola i tulaga e faatauina e Tamaitai Talavou, o le:

Faatuatua

Amio Atua

Taua o le Tagata Lava Ia

Malamalama

O Filifiliga ma le Tali Atu mo A’u Lava

Galuega Lelei

Amio Sa’o ma le

Mama.


Matou te talitonu a matou talia ma ola i nei mataupu taua, o le a matou saunia e faamalosi i le aiga ma le auaiga, osia ma tausia feagaiga paia, maua sauniga o le malumalu, ma olioli i faamanuiaga o le faaeaga.

10.1.3

Mau Tauave ma le Tagavai a Tamaitai Talavou

O le mau tauave a Tamaitai Talavou o le “Tu mo le Upumoni ma le Amiotonu.”

O le tagavai a Tamaitai Talavou, o se sulu o loo li’o e le mau tauave a Tamaitai Talavou. O le sulu o se faailoga o le malamalama o Keriso lea e mafai ona susulu atu i tamaitai talavou taitasi. E valaaulia tamaitai talavou e “tutulai ia ma susulu atu, ina ia avea lo outou malamalama ma tagavai mo atunuu” (MF&F 115:5).



10.1.4

Tulaga Faatauaina a Tamaitai Talavou

O tulaga faatauaina o tamaitai talavou o uiga faaleatua o Keriso. O aoaoga o le talalelei i Aso Sa, Mutuale, ma isi gaioioiga e fesoasoani i tamaitai talavou taitoatasi e faaoga nei tulaga faatauaina i lona olaga.

O faamatalaga nei ma mau e mau ai le malamalamaaga i le uiga o tulaga faatauaina taitasi. E ao i taitai ona faaoga nei faamatalaga i lesona. E fautuaina e taitai ia tamaitai talavou e faaoga nei upumoni i o latou olaga ma faaogaina e fai ma punaoa mo lauga ma aoaoga.

O lanu e o faatasi ma tulaga faatauaina e fesoasoani ai i tamaitai talavou ia manatua ia tulaga faatauaina.

Faatuatua (pa’epa’e): O au o se afafine o le Tama Faalelagi, o lē e alofa ia te au. Ou te faatuatua i Lana fuafuaga faavavau, lea o loo faaautu ia Iesu Keriso, lo’u Faaola (tagai i le Alema 32:21).

Amio Atua (lanu moana): Ua fai mo’u tofi ia uiga auau mama faaleatua, ia o le a ou taumafai e atiina ae (tagai i le 2 Peteru 1:4–7).

Taua o le Tagata Lava ia (mumu): Ua i ai so’u taua e faavavau ma sa’u misiona paia o le a ou taumafai e faataunuu (tagai i le MF&F 18:10).

Poto (lanumeamata): O le a faaauau pea ona ou sailia avanoa mo le aoaoina ma le tuputupu a’e (tagai i le MF&F 88:118).

O Filifiliga ma le Tali Atu mo A’u Lava (lanu moli): O le a ou filifilia le lelei mai le leaga ma o le a ou taliaina le avea o a’u faaiuga ma o’u tiutetauave (tagai i le Iosua 24:15).

Galuega Lelei (lanu samasama): O le a ou fesoasoani i isi ma atiina ae le malo e ala i auunaga amiotonu (tagai i le 3 Nifae 12:16).

Amio Sa’o (lanu viole): O le a ou lototele e fai mea ou te faia ina ia ogatasi ma lo’u malamalama i le sa’o ma le sese (tagai i le Iopu 27:5).

Mama (auro): O le a ou sauniuni e ulu atu i le malumalu ma tumau ai i le mama atoatoa ma le agavaa. O o’u mafauauga ma faatinoga o le a faavae i luga o tulaga faatauaina e tatau ai (tagai Faataoto 31:10).

10.1.5

Vasega a Tamaitai Talavou

E vaevacina tamaitai talavou i se uarota i ni vasega se tolu e tusa ai ma o latou tausaga: Ofagapi (12–13 tausaga), Maea Meite (14–15 tausaga), ma le Lora (16–17 tausaga).

A sii se tamaitai talavou i luga i se vaitausaga fou, e faafeiloaia o ia e ona taitai fou o Tamaitai Talavou ma le au peresitene o le vasega.

Ofagapi, 12–13 Tausaga

A aulia e se tamaitai talavou le 12 tausaga, e faatalanoaina o ia e le epikopo. E sii o ia mai le Peraimeri i Tamaitai Talavou ma amata ona auai i sauniga a Tamaitai Talavou i le taimi o fetufaaiga a le Peraimeri (tagai 11.4.3). O ia o se tasi o le vasega a le Ofagapi.



Mo uluai paionia o le Ekalesia, o le ofagapi o se faatusa o le lotogatasitasi, feoeoa'i ma le galulue. Ina ua fatoa faatulagaina ia tamaitai talavou o le Ekalesia i se vaega, sa lauiloa i latou o ni ofagapi.

I le avea ai o se tasi o le vasega a le Ofagapi i le aso, e faamalosia e se tamaitai talavou lona faatuatua i le TamaFaalelagi ma Iesu Keriso, ma aoao e galulue faatasi ma isi i le lotogatasitasi ma le feoeoa'i. O se taimi leni mo ia e tu atu ai mo le upumoni ma le amiotonu ma "tulai ma susulu atu" (MF&F 115:5).

Maea Meite, 14–15 Tausaga

E avea se tamaitai talavou ma se tasi o le vasega a le Maea Meite pe a aulia le 14 o ona tausaga.



O le faaupuga *Maea* e faasino i le Mutual Improvement Association (MIA), lea sa faaigoa ai le polokalama a le autalavou i le Ekalesia O le upu *MIA* o lona uiga o le tamaitai talavou. Na faaoga e le Mutual Improvement Association le rosa e fai ma faailoga o la latou faapotopotoga, ma o loo faaauau pea ona avea e le Maea Meite lena faailoga i aso nei e fai ma faatusa o le alofa, faatuatua, ma le mama a'ia'i.

O le avea ai ma se tasi o le vasega a le Maea Meite i aso nei, e faamalosia e se tamaitai talavou lana molimau i le Tama Faalelagi ma Iesu Keriso, talia ma faatino tulaga faatauaina a Tamaitai Talavou, ma aoao e uiga i le alofa, faatuatua, ma le mama a'ia'i.

Lora 16–17 Tausaga

E avea se tamaitai talavou ma se tasi o le vasega a le Lora pe a aulia lona 16 tausaga.

Mo le tele o seneturi, ua avea pea laulaau o le lora ma faailoga o le mamalu ma le tulaga faamanuiaina, aemaise lava pe a lalagaina ai se pale.



O le avea ai ma se tasi o le vasega a le Lora i aso nei, e sauniuni ai se tamaitai talavou e osia ma tausia feagaiga paia ma mauaina sauniga o le malumalu.

Tamaitai Talavou Ua Ta'i Sefuluvalu Tausaga le Matutua

E masani ona sii se tamaitai talavou i luga i le Aualofa i lona aso fanau lona 18 po o le tausaga e sosoo ai. O le tausaga e 19, ua tatau ai i tamaitai talavou taitasi ona auai atoatoa i le Aualofa. Ona o tulaga faaletagata lava ia, e pei o molimau patino, faautautaga, faauuga i le aoga, naunautaga e faaauau ona mafuta ma lana tupulaga, ma le auai i le kolisi, e mafai e se tamaitai talavou ona sii vave atu i le Aualofa ao lei aulia lona 18 tausaga pe toe faaumi-umi le nofo ai i Tamaitai Talavou. E talanoa tamaitai talavou taitasi ma ona matua ma le epikopo e fai ai le tonu pe o le a le mea sili e fesoasoani ai ia te ia ia tumau le toaga i le Lotu.

E galulue faatasi taitai o Tamaitai Talavou ma le Aualofa e faia se suiga sologa lelei o tamaitai talavou taitoatasi i le Aualofa.

10.2

Matafaioi a Matua ma Taitai o le Ekalesia

Ua i ai i matua le uluai tiutetauave mo le uelefea faaleagaga ma le faaletino o a latou fanau (tagai MF&F 68:25–28). O le au epikopo ma taitai o Tamaitai Talavou e lagolagoina ae latou te le suitulagaina matua i leni tiutetauave. Latou te ofoina atu le lagolago i auala nei:

Latou te fesoasoani i matua i le fesoasoani atu lea i o latou afafine e saunia mo le mauaina o faamanuiaga o le malumalu e ala i le mulimuli i taiala o loo lisi atu i le 10.1.1.

Latou te faamalosia i fesoootaiga i le va o tamaitai talavou ma matua.

Latou te faamautinoaina o gaioioiga a Tamaitai Talavou ma isi mea e fai a le autalavou e le tuuina atu ai ni avega mamafa e le talafeagai i aiga pe faatautavā ai foi ma gaioioiga faaleaiga.

Ia faapitoa lava le nofouta o taitai i tamaitai talavou o ē o mai mai aiga e le malolosi se lagolago mo le ola ai i le talalelei.

10.3

Taitaiga o Tamaitai Talavou i le Uarota

O loo taulai atu lenei mataupu i le taitaiga o le faalapopotoga a Tamaitai Talavou i se ala o le faamalolosi ai tamaitai talavou taitoatasi ma o latou aiga. E iloiloaina soo e taitai o Tamaitai Talavou le mataupu 3, lea o loo ootoo atu ai mataupu aoao o le taitaiga. O nei mataupu faavae ua aofia ai le saunia faaleagaga, auai i aufono, auauna atu i isi, ma le aoao atu o le talalelei a Iesu Keriso.

10.3.1

Au Epikopo

O le epikopo ma ona fesoasoani e tuuina atu le taitaiga faaleperisitua mo le faalapopotoga a Tamaitai Talavou. Latou te vaavaia ma faamalolosi tamaitai talavou taitoatasi, galulue vavalalata ma matua ma taitai o Tamaitai Talavou i lenei taumafaiga.

Epikopo

O le epikopo e valaauina ma vaetofia se tuafafine e avea ma peresitene o Tamaitai Talavou. Na te vaaia foi valaauga ma vaetofia isi taitai o Tamaitai Talavou. E mafai ona ia tofia ona fesoasoani e valaau ma vaetofia nei taitai.

E faatalanoa e le epikopo ia tamaitai talavou taitoatasi o ē ua maea le polokalama o le Alualu i Luma o le Tagata Lava Ia (tagai i le 10.7.3).

Epikopo ma Ona Fesoasoani

O le epikopo ma ona fesoasoani e auai e le aunoa i sauniga, auaunaga, ma gaioioiga a Tamaitai Talavou. O le epikopo e galuue ma le Lora. Na te tofia lona fesoasoani o loo galulue ma tiakono e galulue foi ma le Ofagapi ma lona fesoasoani o loo galulue ma aoao e galulue foi ma le Maea Meite.

E tofia e le epikopo se tasi o ona fesoasoani e vaaia le faalapopotoga a Tamaitai Talavou i le uarota. E fonofono e le aunoa le fesoasoani lea ma le au peresitene o Tamaitai Talavou. Na te lipoti atua mataupu a Tamaitai Talavou i fonotaga a le au epikopo.

E faatalanoa e le epikopo ia tamaitai talavou taitasi ia le itiiti ifo i le tasi i le tausaga. Afai e mafai, na te faatalanoaina taitoatasi le au ta'i 16- ma le ta'i 17-tausaga e ta'i faalua i le tausaga. Afai e le mafai, na te tofia se fesoasoani e faia nisi o nei faatalanoaga. Ono masina pe a mavae lona faatalanoaga faaletausaga ma le epikopo i le va o le 12 ma le 15 o ona tausaga, e fai ai lana faatalanoaga ma le fesoasoani i le au epikopo o loo vaaia lana vasega.

I nei faatalanoaga, e mulimuli le epikopo ma ona fesoasoani i taiala o i le *Tusitaulima 1*, 7.1.7. E mafai foi ona latou tagatagai i le Siata mo Taitai e Siaki ai le Alualu i Luma o le Tagata Lava Ia, lea latou te maua mai le failautusi a Tamaitai Talavou o le uarota.

E faailoa aloaia e le epikopo ma ona fesoasoani tamaitai talavou taitasi i sauniga faamanatuga pe a sii mai le Peraimeri i Tamaitai Talavou, pe a sii o ia i se vaega o se vaitausaga fou, ma pe a maua e ia le tau i le Aloaiaina o le Tulaga Faatamaitai Talavou. A sii se tamaitai talavou i luga i se vasega o se vaitausaga fou, e tuuina atu ia te ia e se tasi o le au epikopo se tusi faamaonia.

E fefautuaai ma le agaga tatalo ia uso o le au epikopo e fuafua ai po o ai e valaau e fai ma peresitene o vasega. Latou te le filifilia ia taitai ona o latou tausaga po o le leva ona i ai i le vasega. E mafai e le au

peresitene o Tamaitai Talavou ona fautuaina atu ni tamaitai talavou e avea ma peresitene o vasega (tagai 19.1.1 ma le 19.1.2).

A valaau e se tasi o le au epikopo se tamaitai talavou e avea ma peresitene o se vasega, na te fesili atu ia te ia e fautua mai po o ai e valaau e fai ma fesoasoani ma se failautusi. Na te fautuaina o ia e sagai atu i leni tiutetauave ma le agaga tatalo, sailia le taiala mai le Alii pe o ai e fautuaina atu. Peitai, e fesoasoani foi le uso o le au epikopo i le peresitene o le vasega ia malamalama o le tiutetauave faaiu e mauaina musumusuga pe o ai e valaauina ua i ai le i le au epikopo.

E sailia e se tasi o le au epikopo le faatagaga mai matua o se tamaitai talavou a o le'i fesili atu ia te ia e galue i se tasi o nei valaauga.

A uma ona tuuina atu nei valaauga, e tuuina atu e se uso o le au epikopo ia tamaitai talavou ia latou vasega mo la latou palota lagolago. Ona tofia lea e le epikopo se fesoasoani e vaetofiaina tamaitai talavou. O se tasi o le au epikopo e fofogaina atu nei valaauga i le sauniga faamanatuga peitai, na te le talosagaina se palota lagolago.

E mafai ona fesoatai atu se taitai o Tamaitai Talavou i le au epikopo e faatatau i soo se suiga atonu e manaomia i au peresitene o vasega.

10.3.2

Au Peresitene o Tamaitai Talavou i le Uarota

O le au peresitene o Tamaitai Talavou i le uarota e aofia ai se peresitene ma fesoasoani e toalua. Latou te galulue i latou i lalo o le taitaiga a le au epikopo. Latou te mauaina foi aoaoga faamasani ma le lagolago faifai pea mai le au peresitene o Tamaitai Talavou o le siteki.

E nafa sui auai taitasi o le au peresitene o Tamaitai Talavou ma se tasi o vasega a Tamaitai Talavou, e pei ona ta'ua i lalo:

Peresitene: Lora

Fesoasoani muamua: Maca Meite

Fesoasoani lua: Ofagapi

Peresitene o Tamaitai Talavou i le Uarota

O tiutetauave nei o le peresitene o Tamaitai Talavou:

E galue o ia o se sui auai o le aufono a le uarota. I le avea ai o ia ma se sui auai o leni aufono, e auai o ia i taumafaiga e fausia ai le faatuatua ma faamalolosa tagata taitoatasi ma aiga (tagai i le mataupu e 4). O ia foi o se sui auai o le komiti talavou a le au epikopo (tagai 18.2.9).

Na te auina atu fautuaga i le au epikopo mo tuafafine e valaauina e galulue i le faalapotopotoga a Tamaitai Talavou. I le faia o nei fautuaga, e mulimuli o ia i taiala o i le 19.1.1 ma le 19.1.2.

Na te aoaoina isi taitai o Tamaitai Talavou i o latou tiute, e faaaoga ai le tusitaulima leni e avea ma punaoa.

Na te vaaia faamaumauga, lipoti, paketi, ma tupe o le faalapotopotoga a Tamaitai Talavou o le uarota. O le failautusi a Tamaitai Talavou e fesoasoani i leni tiutetauave.

Peresitene o Tamaitai Talavou i le Uarota ma Ona Fesoasoani

Ua i ai i le peresitene o Tamaitai Talavou ma ona fesoasoani tiutetauave nei:

Ia latou iloaina tamaitai talavou taitasi ma ia faamasani i ana taleni o mea e fiafia i ai, ma luitau. Latou te vaavaai mo auala e faamalolosa ai tamaitai talavou taitoatasi fesoasoani ia i latou ia tuputupu ae ia latou molimau, ma faamalosiau ia i latou e auai i le faalapotopotoga a Tamaitai Talavou. Latou te gauai faapitoa atu i tamaitai talavou e fou mai ma tamaitai talavou e le o toaaga mai.

Latou te lagolagoina tamaitai talavou taitasi i o latou aiga.

Latou te fesoasoani i tamaitai talavou e galulue ia latou tusi o le Alualu i Luma o le Tagata Lava ia. Ua fautuaina i latou ia latou galulue foi i latou lava i le Alualu i Luma o le Tagata Lava Ia.

E mafai ona latou fefautuaai ma matua ma taitai perisitua e uiga i tulaga manaomia o tamaitai talavou.

Latou te faamautinoa o loo faatulagaina lelei ma faagaoioia lelei le polokalama a Tamaitai Talavou i le uarota. E avea o se vaega o leni taumafaiga, latou te vaaia ma tuuina atu faatonuga i faufautua o Tamaitai Talavou i le uarota ma tagata tomai faapitoa.

E tele ina latou faia lesona i vasega o le Aoga Sa, e ui e mafai ona latou faasoa atu leni tiutetauave i faufautua o Tamaitai Talavou. Latou te vaavaaia ia taumafaiga e faalecia le aoao mai ma le aoao atu o le talalelei i le faalapotopotoga a Tamaitai Talavou. I nei taumafaiga, latou te mulimuli i mataupu faavae o i le 5.5.3 ma le 5.5.4.

Latou te auai i fonotaga a au peresitene o vasega ma tuuina atu le taitaiga pe a manaomia ai.

Latou te galulue ma au peresitene o vasega e fuafua ma faatino ia gaoioiga, e aofia ai ma gaoioiga i le Mutuale. Latou te fesoasoani i au peresitene o vasega e fausia le lotogatasi i tamaitai talavou.

Latou te aoao atu tomai faaleautaitai ma uiga auau mama i au peresitene o vasega ma isi taitai i le faalapotopotoga a Tamaitai Talavou (tagai i le 10.9).

E fai a latou fonotaga faale-au peresitene o Tamaitai Talavou. Latou te fono foi e le aunoa ma le fesoasoani i le au epikopo o loo vaaia le faalapotopotoga a Tamaitai Talavou.

10.3.3

Failautusi o Tamaitai Talavou i le Uarota

O tiutetauave nei o le failautusi o Tamaitai Talavou:

E feutagai o ia ma le au peresitene o Tamaitai Talavou e saunia ia lisi o mataupu mo fonotaga a le au peresitene. E auai o ia i fonotaga a au peresitene, tusia minute, ma siaki ia tofitofiga.

Na te aoaoina ia failautusi o vasega ma vaavaaia a latou galuega i le tausia o faamaumauga o le auai. A laititi o le ta'i kuata, na te tuufaatasia ai faamatalaga o le auai, iloilo ina faatasi ma le peresitene o Tamaitai Talavou, ma auina atu i le failautusi a le uarota.

Na te faamautinoaina ua silafia e le au epikopo ma le au peresitene o Tamaitai Talavou ia tamaitai talavou e le o auai mai i taimi uma i sauniga ma tamaitai talavou e le o toe mamao ona sii lea i luga i se isi vaega a Tamaitai Talavou.

Na te faaogaina le Pepa e Siaki ai le Alualu i Luma o Tamaitai Talavou mo Taitai e tusifaamaumau ai le alualu i luma o tamaitai talavou taitasi a o latou auai i le faatinoga o le Alualu i Luma ma isi gaoioiga ma a o latou faataunuuina o latou valaauga faaleautaitai. A faatulaga se tamaitai talavou e faia fai sona faatalanoaga e se tasi o le au epikopo, e mafai e le failautusi ona tuu atu ia te ia se kopi o le pepa e siaki ai le alualu i luma o tamaitai talavou.

E fesoasoani o ia i le au peresitene o Tamaitai Talavou e saunia se paketi faaletausaga ma le tala mo tupe faaalu.

10.3.4

Faufautua o Tamaitai Talavou i le Uarota

E mafai e le au epikopo ona valaau ia faufautua o Tamaitai Talavou e fesoasoani i le au peresitene o Tamaitai Talavou i o latou tiutetauave. E galue faufautua taitasi ma se vaega patino o se vaitausaga o tamaitai talavou ma e galue i lalo o le taitaiga a le sui o le au peresitene ua tofia i lena vaitausaga. O tiutetauave nei o faufautua:

Latou te fesoasoani i le au peresitene o Tamaitai Talavou ma au peresitene o vasega e fuafua ma faatino gaoioiga, e aofia ai ma le Mutuale.

E mafai ona latou faiaoga i lesona i Aso Sa. E mafai foi ona latou fesoasoani e faiaoga i tomai faaleautaitai

E mafai ona latou fesoasoani e tusi faamaumau le alualu i luma o tamaitai talavou taitoatasi i le polokalama o le Alualu i Luma o le Tagata Lava Ia.

Latou te auai i fonotaga a le au peresitene o Tamaitai Talavou o le uarota pe a valaaulia ai.

10.3.5

Au Peresitene o Vasega a Tamaitai Talavou

E masani lava ona valaau se au peresitene o se vasega mo vasega taitasi a Tamaitai Talavou. I se uarota po o se paranesi e tolaiti ni tamaitai talavou, e mafai ona valaau se au peresitene se tasi mo vaitausaga tuufaatasia uma seia oo ina mafai ona faatulagaina tamaitai talavou i a latou lava vasega.

O tiutetauave nei o au peresitene o vasega:

Latou te vaavaaia ma faaumea tagata o le vasega, aemaise i latou o tagata fou pe le toaaga mai ma i latou e i ai ni faaletonu po nisi manaoga fapitoo. Latou te tatalo mo i latou, faaalu se taimi ma i latou, ma avea ma ni uo faamaoni.

Latou te fesoasoani i tagata o le vasega e faavae ni faigauo vavalalata, aoao tomai faaleautaitai, ma ola i le talalelei.

Latou te fesoasoani i tamaitai talavou taitoatasi ia iloa e talia o ia pe a avea o se tasi o la latou vasega.

Latou te lagolagoina taumafaiga a tagata o le vasega i le polokalama o le Alualu i Luma o le Tagata Lava Ia.

E fai e le aunoa a latou fonotaga faale-au peresitene o vasega.

Latou te taitaia sauniga i Aso Sa mo a latou vasega.

Latou te fesoasoani e fuafua ia gaoioiga, e aofia ai ma le Mutuale.

O peresitene o vasega e i ai i le komiti talavou a le au epikopo (tagai i le 18.2.9).

10.3.6

Failautusi o Vasega a Tamaitai Talavou

O tiutetauave nei a failautusi o vasega:

Latou te tuufaatasia ma iloilo ia faamatalaga o le auai mai ma auina atu i le failautusi o Tamaitai Talavou.

Latou te feutagai ma le au peresitene o le vasega e saunia se lisi o mataupu o le fonotaga a le au peresitene. Latou te auai i nei fonotaga a au peresitene, tusia minute, ma siaki ia tofitofiga.

E mafai ona latou fesoasoani i au peresitene o vasega ma taitai o Tamaitai Talavou e fuafua ia gaoioiga.

10.3.7

Tagata Faapitoo mo Gaoioiga a Tamaitai Talavou i le Uarota

E mafai e le au epikopo ona valaau tagata e tomai faapitoo e galulue mo se taimi le tumau ma faatino ina gaoioiga patino. Mo se faataitaiga, e mafai ona valaau ia tagata tomai faapitoo e fesoasoani i gaoioiga e pei o toluapiga a tamaitai talavou, konafesi a le autalavou, ma taaloga. O na tagata tomai fapitoo e galulue i lalo o le taitaiga a le au peresitene o Tamaitai Talavou.

10.3.8

Taitai Musika ma le Ta Piano a Tamaitai Talavou

E mafai e le au epikopo ona valaau se faatonu ma se ta piano a Tamaitai Talavou. E mafai ona latou tuuina atu nei valaauga i tamaitai matutua po o tamaitai talavou.

E filifili e le faatonu o musika ma taitaia viiga mo sauniga amata i Aso Ss. E mafai foi ona fesoasoani o ia i tamaitai talavou e aoao ni fatuga faamusika faapitoo ma atia'e tomai tau musika.

E taina musika e le ta piano i le amataga ao le'i amataina ma pe a mae'a, ma na te taina foi viiga mo sauniga a Tamaitai Talavou.

10.4

Fonotaga Faaleautaitai

10.4.1

Fonotaga a le Aufono a le Uarota

O le peresitene o Tamaitai Talavou o se sui auai o le aufono a le uarota (tagai i le mataupu e 4).

10.4.2

Fonotaga a le Komiti Talavou a le Au Epikopo

O le epikopo e pulefaamalumalu i le komiti talavou a le au epikopo. O lenei komiti e aofia ai le au epikopo, o se tasi o fesoasoani o le epikopo i le korama a ositaulaga, o peresitene o korama a aoao ma tiakono, o peresitene o vasega a Tamaitai Talavou, ma peresitene o Alii Talavou ma Tamaitai Talavou. Mo nisi faamatalaga, tagai 18.2.9.

10.4.3

Fonotaga a le Au Peresitene o Tamaitai Talavou i le Uarota

O le au peresitene o Tamaitai Talavou e faia e le aunoa fonotaga faaleau peresitene. O le peresitene e pulefaamalumalu i le fonotaga ma taitai. E auai le failautusi, tusia minute, ma siaki ia tofitofiga.

O le lisi o mataupu e talanoaina e mafai ona aofia ai mea nei:

1. Iloilo pe faapefea e tamaitai talavou i vasega taitasi ona ausia ia faamoemoega o loo lisi atu i le 10.1.1. Fuafua ni auala e fesoasoani ai i tamaitai talavou taitasi ia ausia uma na faamoemoega.
2. Faitau ma talanoaina mau ma aoaoga mai taitai o le Ekalesia e faatatau i o latou valaauga.

3. Fai ni fuafuaga e aoao ai au peresitene o vasega i o latou tiute.

4. Talanoaina le aoga o gaoioiga a tamaitai talavou. Talanoaina ni auala e faaofia ai tamaitai talavou i le fuafuaina o gaoioiga e fesoasoani ia i latou e faaofia ai tulaga faatauaina a Tamaitai Talavou i o latou olaga.

5. Talanoaina aoaoga o le talalelei i vasega i Aso Sa ma fuafua ni auala e faaleleia ai.

6. Iloilo faamaumauga o le auai mai. Fuafua ni auala e fesoasoani ai i tagata fou ma tamaitai talavou e le o toaaga mai ina ia auai mai.

7. Iloilo le paketi ma tupe faaalu a Tamaitai Talavou.

E mafai e le au peresitene o Tamaitai Talavou ona valaaulia ia faufautua ma tagata faapitoa e auai mai i nei fonotaga pe a manaomia ai.

10.4.4

Fonotaga ma se Fesoasoani i le Au Epikopo

E fono e le aunoa le au peresitene o Tamaitai Talavou ma le fesoasoani i le au epikopo o loo vaaia le faalapotopotoga a Tamaitai Talavou. I fonotaga nei e mafai ona latou fefautuaai faatasi e uiga i le alualu i luma ma manaoga o tamaitai talavou taitasi. O sui auai o le au peresitene o Tamaitai Talavou e tuuina atu lipoti, faia fautuaga, ma iloilo fuafuaga mo sauniga po o fonotaga ma gaoioiga. A talafeagai ai, e mafai ona valaaulia ia faufautua o Tamaitai Talavou ma au peresitene o vasega e auai i lenei fonotaga e avatu ai lipoti ma maua ai faatonuga.

10.4.5

Fonotaga a le Au Peresitene o Vasega

E faia e le aunoa fonotaga faaleau peresitene a le au peresitene o vasega taitasi. O le peresitene o le vasega e taitaia le fonotaga. E auai le failautusi, tusia minute, ma siaki ia tofitofiga. E auai foi le sui o le au

peresitene o Tamaitai Talavou ma le faufautua o le vasega o loo i ai le tiutetauave mo le vasega.

O le lisi o mataupu e talanoaina e mafai ona aofia ai mea nei:

1. Fuafua ni auala e faamalolosa ai tagata o le vasega, e aofia ai tagata fou ma tagata ua le toaaga mai. Ia fuafua foi ni auala e faaumea mai ai tamaitai talavou o isi faatuatuaga.
2. Faitau ma talanoaina mau ma aoaoga mai taitai o le Ekalesia e faatatau i o latou tiutetauave.
3. Fuafua e asiasi i tagata o le vasega pe a manaomia ai.
4. Talanoaina ni auala e fesoasoani ai i tamaitai talavou taitasi ia faaiuina manuia le Alualu i Luma o le Tagata Lava Ia.
5. Fuafua sauniga ma gaoioiga a le vasega.
6. Iloilo mea e talanoaina i le fonotaga a le komiti talavou a le au epikopo (tagai i le 18.2.9).
7. Ia maua mai aoaoga faaleautaitai mai taitai o Tamaitai Talavou i le uarota.

10.4.6

Fonotaga Faaleautaitai a Tamaitai Talavou o le Siteki

O fonotaga faaleautaitai o Tamaitai Talavou a le siteki e masani ona faia taitasi i le tausaga, e pei ona faamalamalama atu i le 18.3.11. E auai atu i ai au peresitene o Tamaitai Talavou ma failautusi. E mafai ona valaaulia ia faufautua, tagata tomai faapitoa, ma le sui o le au epikopo ua tofia i Tamaitai Talavou, e auai atu pe a manaomia ai.

10.5

Tulaga faatonuina

O tulaga faatonuina e maua ai le taitaiga mautinoa e faamalolosa ai ma taiala tagata o le Ekalesia. A

o tausia e tamaitai talavou tulaga faatonuina o le talalelei, o le a tele lo latou aoga i le Ekalesia ma le lalolagi. O le a latou agavaa foi mo le mauaina o sauniga o le malumalu.

I le tamaitusi o le *Mo Le Malosi o le Autalavou*, o loo ootoo mai ai e le Au Peresitene Sili tulaga faatonuina o le talalelei ma aoao ai le autalavou i le ala e faaoga ai. E tatau i tamaitai talavou uma ona i ai se kopi o le *Mo Le Malosi o le Autalavou*. E tatau ona ia iloilo ina soo ia tulaga faatonuina ma vaai pe o le a le lelei o loo ola ai o ia.

E tatau i taitai o Tamaitai Talavou ona suesue i tulaga faatonuina o i le tamaitusi ma ola ai. E tatau ona latou sailia auala e aoao atu ai ma faamalolosa soo nei tulaga faatonuina i lesone ma i gaoioiga i le Mutuale, tolauapiga, konafesi a le autalavou, ma isi gaoioiga.

E mafai e sui o le au epikopo ma taitai o Tamaitai Talavou ona fautuaina matua e suesue ia tulaga faatonuina o le talalelei, ma ola ai, ma talanoaina faatasi ma a latou fanau teine. E mafai foi ona latou fautuaina tamaitai talavou e faaoga le *Mo Le Malosi o le Autalavou* e fai ma punaoa mo lesone i afiafi faaleaiga ma lauga.

10.6

Aoaoga o le Talalelei i Aso Sa

E potopoto tamaitai talavou i Aso Sa taitasi ina ia faateleina lo latou malamalama i le talalelei, ia iloa pe faapefea ona tali e le talalelei a latou fesili i aso taitasi, ia maua avanoa e lagonaina ai le Agaga, ma ia faamalolosa ma faasoa a latou molimau.

10.6.1

Sauniga Amata

Afai e mafai ai, ia potopoto uma faatasi ia tamaitai talavou mo ni sauniga amata pupuu a o lei faia vasega i Aso Sa. O le au peresitene o Tamaitai

Talavou i le uarota e vaia le vaega leni o le sauniga, ae taitai se sui o se au peresitene o se vasega.

I sauniga amata, e faavaeina e taitai se siosiomaga e valaaulia ai le Agaga mo lesona o le a mulimuli mai. O sauniga amata e aofia ai se faafeiloaiga, se viiga, se tatalo, taulotoina o le autu a Tamaitai Talavou ma fasilasilaga.

Pe a faatagaina ai e le peresitene o le siteki ma pe a lava le avanoa, e mafai ona tuufaatasi ia sauniga amata a Tamaitai Talavou ma le Aualofa i se Aso Sa se tasi i masina taitasi (tagai i le 9.7.1).

10.6.2

Vasega

A maea sauniga amata, e potopoto ia tamaitai talavou mo aoaoga o le talalelei. E masani ona tuu eseese Tamaitai Talavou i vasega a o latou vaitausaga. Peitai, e mafai e taitai ona mafaufau e isi faatulagaga nei pe a manaomia ai:

1. I se uarota e toatele ia tamaitai talavou, e mafai ona faatulaga ni vasega e sili atu ma le tasi i se vaitausaga, faatasi ai ma se faufautua ma se au peresitene e tofia mo vasega taitasi.
2. I se uarota po o se paranesi e toalaiti tamaitai talavou, e mafai ona tuufaatasi ia vaega o vaitausaga mo aoaoga o le talalelei i Aso Sa, ma atonu e le manaomia ni faufautua.
3. I soo se uarota lava, e mafai ona potopoto faatasi ia tamaitai talavou ta'itasi i le masina mo se lesona tuufaatasi.

O lesona e masani ona faia e sui o le au peresitene o Tamaitai Talavou pe o faufautua o Tamaitai Talavou. E mafai e sui o le au peresitene ma faufautua ona vaevae leni tiutetauave pe a manaomia ai. E mafai e tamaitai talavou ona fesoasani e faiaoga mai lea taimi i lea taimi. A tuu atu e tamaitai talavou ia faatonuga, e fesoasoani se tasi o le au peresitene o Tamaitai Talavou po o se faufautua e saunia i latou.

E mafai foi ona valaaulia tatai perisitua ma isi tagata faamaoni o le uarota e faiaoga i nisi taimi. O i latou o e faiaoga e ao ina mulimuli i mataupu faavae o i le 5.5.4.

E fautuaina e taitai tamaitai talavou taitasi e aumai a latou lava kopi o tusitusiga paia pe a mafai ai. E pei ona manaomia ai i lesona taitasi, e mafai e taitai ona fesili atu i tamaitai talavou e aumai isi punaoa ua faamaonia a le Ekalesia.

E mafai e tamaitai talavou ma alii talavou ona potopoto faatasi i nisi taimi, pe a faatonuina ai e le au epikopo.

10.7

Alualu i Luma o le Tagata Lava Ia

O le polokalama o le Alualu i Luma o le Tagata Lava Ia a Tamaitai Talavou o se polokalama o le faatau-nuuga ua mamanuina e fesoasoani ai i tamaitai talavou e faamalolosia a latou molimau ia Iesu Keriso, saunia mo o latou tiute ma matafaioi o le lumanai, ma saunia ia agavaa e osia ma tausia feagaiga paia o le malumalu.

O sini o le polokalama ua otooto atu i le tusi o le *Alualu i Luma o Tamaitai Talavou*. E galulue tamaitai talavou ma o latou matua ma taitai o Tamaitai Talavou e faatu ma ausia ia sini ia e faavae i luga o tulaga faatauaina o Tamaitai Talavou.

A maea sa iloiloga ma le toto'a, e mafai e matua ma taitai ona fetuunai le polokalama e fesoasoani ai i tamaitai talavou e iai manaoga faapitoa. Mo se faaitaiga, e mafai ona latou mafaufau i manaoga o tamaitai talavou e i ai manaoga faapitoa po o tapulaa faaleaoaoga, o tamaitai talavou ua auai mai i le Ekalesia pe ua toaaga mai foi i Tamaitai Talavou a ua mavae le ta'i 16 tausaga, ma tamaitai talavou e le o ni tagata o le Ekalesia. Pe a faia ni suiga po o ni tulaga e faese ai se tagata e toatasi, e tatau i taitai ona mafaufau i tulaga e ono aafia ai isi tamaitai talavou ona o na suiga.

10.7.1**Gaoioiga mo le Alualu i Luma o le Tagata Lava Ia i Mutuale**

E mafai e taitai o Tamaitai Talavou ma au peresitene o vasega ona fuafuaina ni gaoioiga o le Alualu i Luma o le Tagata Lava Ia mo le Mutuale (tagai 10.8.1). Mo se faataitaiga, e mafai ona fesoasoani tamaitai talavou uma lava i se galuega faatino o le tulaga faatauaina a se tasi tamaitai talavou. O nei gaoioiga faale-vaega e tataua ona fuafuaina ma le agaga tatalo ma le filifilia ina ia mautinoa o loo tumau pea le patino o le polokalama o le Alualu i Luma o le Tagata Lava Ia i tamaitai talavou taitoatasi.

10.7.2**Faailoga, Tusi Faamaonia, ma le Aloaiaina**

E mafai e taitai o le uarota ona maua mai tusi faamaonia o le Alualu i Luma ma tau mai Faletusi o le Ekalesia. Latou te faaogaina tupe o paketi e faatau mai ai nei mea.

10.7.3**Tiutetauave o Taitai mo le Alualu i Luma o le Tagata Lava Ia****Taitai o Tamaitai Talavou**

A aulia e se tamaitai talavou lona 12 tausaga, e faatulaga e le fesoasoani lua i le au peresitene o Tamaitai Talavou ma le faufautua o le Ofagapi e faafeiloai ia te ia ma ona matua. E mafai foi ona auai atu i ai se sui o le au peresitene o le vasega a le Ofagapi.

E tuuina atu e taitai i le tamaitai talavou se tusi o le *Aualu i Luma o le Tagata Lava Ia* ma faamalalama i ai le polokalama ia te ia ma ona matua. Latou te fautuaina ona matua e galulue ma ia i le filifilia ma le faamaeaina o aafiaga ma galuega faatino o le Alualu i Luma o le Tagata Lava Ia. Latou te faamalalama atu e mafai foi e lona tina ona galue i le Alualu i Luma o le Tagata Lava Ia ma maua ai se

taui. E mafai foi ona fesoasoani isi tamaitai ma auai foi i latou i le faatinoina o le polokalama.

e tuu atu e taitai o Tamaitai Talavou i tamaitai talavou ni kopi o le *Mo Le Malosi o le Autalavou* ma le *Faamaoni i le Faatuatua* (pe afai e lei tauaaoina atu ia te ia e le epikopo). Latou te tuu atu foi ia te ia se avei e i ai le tagavai a Tamaitai Talavou, lea e mafai ona oka mai Faletusi a le Ekalesia.

E tuuina atu foi e taitai o Tamaitai Talavou lenei faamalalamaga faamasani i tamaitai talavou e ulufale mai i le faalapotopotoga a ua te'a le 12 tausaga.

O faatonuga faaopoopo mo matua ma taitai o loo aofia ai i le tusi o le *Alualu i Luma o le Tagata Lava Ia*.

Epikopo

A faamaea e se tamaitai talavou le polokalama atoa o le Alualu i Luma o le Tagata Lava Ia, e faatalanoa o ia e le epikopo. E mafai ona avea leni tulaga ma vaega o lana faatalanoaga i le tausaga po o le onomasina. E mafai ona ia faaogaina tulaga faatonuina o i le *Mo Le Malosi o le Autalavou* e fai ma taiala. E mafai foi ona ia faamaonia lona auai i sauniga faamanatuga ma i le seminare (i mea e fai ai) ma lona faitauina o le Tusi a Mamona. A ua ia fuafuaina ua saunia o ia mo le Aloaiaina i le Tulaga Faatamaitai, na te sainia lana tusi o le Alualu i Luma o le Tagata Lava Ia. E mafai ona ia tauaaoina atu le tauai ia te ia i se sauniga faamanatuga.

10.8**Gaoioiga ma Mea e Fai**

O taitai o Tamaitai Talavou, e aofia ai ma au peresitene o vasega, e fuafuaina gaoioiga e fua i manaoga ma mea e fiafia i ai tamaitai talavou. Latou te faia se taumafaiga faapitoa e aapa atu ai i tamaitai talavou uma lava, e aofia ai ma i latou faatoa auai mai i le Lotu mai latou e le toaaga mai. O gaoioiga e mafai ona fesoasoani ai i tamaitai talavou e ausia a latou sini i le polokalama o le Alualu i Luma o le Tagata Lava Ia. E

ao i au peresitene o vasega ona auai i le tele e mafai ai i le fuafuaina ma le faataunuuina o gaoioiga.

O fuafuaga mo gaoioiga a Tamaitai Talavou, e tatau ona faamaonia mai e se sui auai o le au epikopo ma e tatau ona mulimuli i taiala o loo i le mataupu e 13.

10.8.1

Mutuale

O le tele o gaoioiga a Tamaitai Talavou e faia i le taimi o le Mutuale. O le upu *Mutuale* e fautua mai ai ni aafiaga fetuفاai lea e i ai le fefaaloaloai ma le felagolagomai o le tasi ma le isi ma avanoa e aoao ai faatasi. O gaoioiga a le Mutuale e tatau ona tuuina atu ai i le autalavou ni avanoa eseese e auauna atu ai i isi ma atiina ae ai faaleagaga, agafesootai, faaletino, ma le faaleatamai.

O le Mutuale e masani lava ona faia ta'i vaiaso. Afai e le mafai ona o feoaga ma isi tulaga le maalofia, e mafai ona aua le faia faalausoso le Mutuale, ae e tatau lava ona faia e le ititii ifo i le ta'i masina. O le Mutuale e tatau ona 1 i le 1½ itula le umi ma e tatau ona faia i se aso po o se afaifi e ese mai le Aso Sa po o le Aso Gafua.

O le au peresitene o Tamaitai Talavou, i lalo o le taitaiga a le au epikopo, e vaaia le Mutuale mo tamaitai talavou.

E mafai e au peresitene o Alii Talavou ma Tamaitai Talavou ona faaoga ia gaoioiga o le Mutuale e sauniuni ai mo gaoioiga a le siteki po o siteki tuufaatasi (tagai i le 13.3).

Autu Faaletausaga mo le Mutuale

O tausaga taitasi, e fofoga mai ai e le Au Peresitene Sili se autu mo le Mutuale. E faamamafa atu e taitai leni autu i sauniga amata o le Mutuale ma i isi gaoioiga a le autalavou.

Sauniga Amata

E masani ona amata le Mutuale i se sauniga amata e pulefaamlaumalu ai se tasi o le au epikopo. O fesoa-soani o le epikopo i le korama a le au ositaulaga ma le au peresitene o le vasega o le Lora e feauauai e taitai. E saunia e taitai matutua ia taitai o le autalavou mo leni tiutetauave.

O sauniga amata e aofia ai se viiga ma se tatalo ma e mafai foi ona aofia ai ni pesepesega ma avanoa mo le autalavou e faasoa mai ai a latou taleni ma molimau.

Gaoioiga a Korama ma Vasega po o Gaoioiga Tuufaatasi

E sosoo ma sauniga amata, e masani ai ona faia gaoioiga tuu eseese a korama o le Perisitua Arona ma vasega a Tamaitai Talavou. I se uarota po o se paranesi e toalaiti ia tamaitai talavou, e mafai ona potopoto faatasi ia tamaitai talavou uma mo gaoioiga. O gaoioiga e mafai foi ona fuafua mo soo se tuufaatasi o korama ma vasega.

O gaoioiga tuufaatasi mo alii talavou uma ma tamaitai talavou e masani ona faia taitasi i le masina. O sui o le komiti taitai a le au epikopo e faatulagaina, fuafua, ma iloilo nei gaoioiga ia latou fonotaga. O gaoioiga e faia ia i lalo o le taitaiga a le au epikopo.

O nisi o faataitaiga o gaoioiga talafeagai o galuega auauna atu, musika, siva, tala faatino, gaoioiga faaleaganuu, taaloga po o afeleti, sailiiliga o matata, ma gaoioiga e fai i fafo.

10.8.2

Talanoaga a le Au Epikopo ma le Autalavou

O talanoaga a le au epikopo ma le autalavou e fuafuaina ma faatinoina e le au epikopo. O nei talanoaga, ia e faia i nisi o taimi, e maua ai e le au epikopo ia avanoa e talanoaina ai mataupu e fiafia

i ai le autalavou ma e faamalolosia ai le autalavou faaleagaga. O autu i le *Mo Le Malosi o le Autalavou* ma le *Faamaoni i le Faatuatua* e sili le talafeagai. O nisi taimi e mafai ona valaaulia malo e auai. O malo e masani lava o tagata o le uarota poo le siteki.

O talanoaga a le au epikopo ma le autalavou e mafai ona faia ma le autalavou uma pe ma talavou o se vaitausaga patino. E mafai ona faia i le taimi o Mutuale, po le Aso Sa i le taimi o sauniga a korama ma vasega a Tamaitai Talavou, pe o se isi taimi e le avea ma mea mamafa i aiga. O le au epikopo e fuafuaina pe faafia ona fai. E faatulagaina e le komiti taitai a le au epikopo.

10.8.3 Amataga Fou

O Amataga Fou o se mea e faia faaletausaga mo tamaitai talavou ma o latou matua, taitai perisitua ma taitai o Tamaitai Talavou. O tamaitai talavou o le a aulia le ta'i 12 i le tausaga a sau, e valaaulia foi e auai mai ma o latou matua. E mafai ona faia i le amataga o le tausaga a'oga po o le tausaga faalekalena. E mafai ona faia i le taimi o le Mutuale.

E fesoasoani lea i tamaitai talavou ma o latou matua e aoao ai e uiga i polokalama a Tamaitai Talavou. E aofia ai se faamalalamalama o le Alualu i Luma o le Tagata Lava Ia ma se faatinoga o le autu a Tamaitai Talavou, tagava'i, mau tauave, ma faatusa ma faamatatalaga o faamoemomoega a vaitausaga (tagai 10.1). E tatau ona fesoasoani ai i tamaitai talavou ma o latou matua e fuafua mea e fai i le tausaga a sau.

O Amataga Fou e maua ai avanoa mo taitai e faaali atu ai lo latou alolofa mo tamaitai talavou, fautuaina matua e fesoasoani i o latou afafine i mea fai mo le Alualu i Luma, faailoa aloaia atu ai tamaitai talavou o le a atoa le ta'i 12 i le tausaga a sau, ma faafeiloai atu ai i tamaitai talavou ua auai mai i le Ekalesia po o e foi ua masii mai i le uarota. O se taimi e aloaia ai tamaitai talavou ma mea ua latou ausia i le Alualu i

Luma o le Tagata Lava Ia. E valaaulia e le au peresitene o Tamaitai Talavou se uso o le au epikopo e faia le saunoaga faaiu.

O au peresitene o vasega e fuafuaina le polokalama i lalo o le taitaiga a le au peresitene o Tamaitai Talavou. E mafai e le au peresitene o Tamaitai Talavou ona talosagaina tagata tomai faapitoa e fesoasoani atu (mo se faataitaiga, e taitai se aufaipese po o se vaega e taina mea faamusika, faia faataitaiga ma failauga, pe faatonutonu se tala puupuu e faatino). E mafai ona taitai se sui o le au peresitene o le vasega a le Lora.

10.8.4 Tamaitai Talavou i le Tulaga Aupito Sili

O Tamaitai Talavou i le Tulaga Aupito Sili o se gaoioiga e aloaia ai tamaitai talavou mo mea lelei o loo latou faia. O se samiga o le Alualu i Luma o le Tagata Lava Ia. E faasoa mai ai e tamaitai talavou taitasi se poto masani taua po o se galuega faatino o se tulaga faatauaina ua maea ona ia faia i le tausaga lea e faaalia ai le tulaga aupito sili. O lana aoaoga faatino e mafai ona aofia ai taleni ma tomai ua ia atina ae e ala i ana sini o le Alualu i Luma. E valaaulia e taitai o Tamaitai Talavou ia matua e auai mai.

I le amataga o le tausaga, e fautuaina e matua ia tamaitai talavou taitasi ina ia matuai mafaufau loloto i tulaga faatauaina e mafai ona ia taulai i ai mo leni faamoemoe. E mafai ona ia galue faatasi ma se tagata o le aiga, se isi tamaitai talavou, ma isi i leni galuega faatino lea atonu e alu ai ni nai masina e faamaea ai.

O leni gaoioiga e masani ona faia i le taimi o le Mutuale faaleuarota, ae e mafai foi ona faia i le tulaga faalesiteki. E faaofia e taitai matutua ia tamaitai talavou i le fuafuaina. O le aso ma fuafuaga mo le gaoioiga e tatau ona vave faasilasila i le amataga o le tausaga.

10.8.5**O Mea e Fai mo Tulaga Faatonuina**

O mea e faia mo tulaga faatonuina, o ni polokalama faapitoa e faamamafaina ai tulaga faatauina ma sini faavavau. Latou te fautuaina tamaitai talavou e ola ai i tulaga faatonuina o i le *Mo Le Malosi o le Autalavou*, lea e aumai faalatalata atili ai i latou i le Faaola.

O nei gaoioiga e faia faaletausaga, pe fai soo foi pe a manaomia ai, e masani lava i taimi o le Mutuale. E mafai ona faia i le vasega, uarota, uarota tuufaatasi, po o le siteki. E faalagolago pe faapefea ona tuuina atu le mataupu, a o nei gaoioiga e mafai ona faaafia ai soo se tuufaatasiga o vaega o vaitausaga a Tamaitai Talavou. E mafai foi ona aofia ai tina, tama, tina ma tama faatasi, ma alii talavou.

10.8.5**Tolauapiga a Tamaitai Talavou**

E fautuaina e le Ekalesia se tolauapiga e tasi faaletausaga po o se gaoioiga faapena mo tamaitai talavou. I le fuafuaina o leni gaoioiga, e faaoga e taitai o Tamaitai Talavou le *Tusi Taiala mo Tolauapiga a Tamaitai Talavou* ma le *Tolauapiga a Tamaitai Talavou: O Se Taiala mo Taitai Perisitua ma Tamaitai Talavou*.

E mafai ona faia tolauapiga i le tulaga faaleuarota pe faalesiteki. I lalo o le taitaiga a taitai perisitua, e fuafua ai e au perisitene o Tamaitai Talavou le umi o le polokalama o le tolauapiga mo tamaitai talavou.

E mafai e taitai perisitua ona valaau tagata tomali faapitoa o le siteki ma uarota e avea ma taitai o le tolauapiga. E faatulaga e taitai o le tolauapiga ma taitai le polokalama o le tolauapiga i lalo o le taitaiga a le au perisitene o Tamaitai Talavou. E mafai ona latou galulue ma taitai o le uarota ma le komiti o gaoioiga a le siteki e faia fuafuaga mo masini, ala o feoaiga, ma isi fesoasoani.

Mo faamatalaga e uiga i le faatupeina o le tolauapiga, tagai 10.8.9. Mo faamatalaga e uiga i le saogalemua i le tolauapiga, tagai 13.6.20 ma le *Tusi Taiala mo Tolauapiga a Tamaitai Talavou*.

10.8.7**Gaoioiga a le Siteki ma Gaoioiga a Siteki Tuufaatasi**

Tagai i le 13.3.

10.8.8**Konafesi a le Autalavou**

Tagai i le 13.4.

10.8.9**Faatupeina o Gaoioiga ma Mea e Fai**

O le faatupeina o gaoioiga ma mea e fai a Tamaitai Talavou e tatau ona aumai i le paketi a le uarota (tagai i le 13.2.8).

Faatupeina o se Tolauapiga Faaletausaga po o se Gaoioiga Faapena

Afai e le lava tupe a le uarota e totogi ai se tolauapiga faaletausaga a Tamaitai Talavou po o se gaoioiga faapena, e mafai ona fesili atu taitai i e auai e totogi se vaega po o mea uma: Afai e le lava tupe mai i tagata auai, e mafai e le epikopo ona faatagaina se gaoioiga faasu'etupe se tasi faaletausaga e faia faatasi, ma ia ogatusa ma taiala o loo i le 13.6.8.

E leai se avanoa e tatau ai ona taugata tele tupe faaalu po o femalagaiga mo tolauapiga faaletausaga po o gaoioiga faapena. E le tatau foi i le lava o tupe faaletagata ona taofia se tagata mai le auai.

Faatupeina o Masini ma Sapalai

Afai e mafai, o masini ma sapalai e manaomia e le uarota mo tolauapiga faaletausaga a le autalavou e faatau mai tupe o le paketi. Afai e le lava tupe, e mafai e le epikopo ona faatagaina se gaoioiga faasu'etupe se tasi faaletausaga e faia faatasi, ma ia ogatusa ma taiala o loo i le 13.6.8.

O masini ma sapalai e faatau i tupe a le Ekalesia, pe mai le paketi a le uarota po o se gaoioiga faasue

tupe, e mo na o le faaaogaina e le Ekalesia. E le faaaogaina e tagata taitoatasi po o aiga.

10.9

Aoaina Atu o Tomai ma Uiga Auau Mama Faaleautaitai

O taitai o Tamaitai Talavou e aoao atua tomai faale-au taitai ma uiga auau mama a o latou galulue faatasi ma au peresitene o vasega, taitai o tolauapiga, ma isi tamaitai talavou i tulaga faaleau taitai. O lea aoaoga e faia a o fesoasoani taitai i tamaitai talavou e fuafua ma faatino ia gaoioiga ma auai faatasi i galuega fesoasani mo le Alualu i Luma o le Tagata Lava ia. I leni taumafaiga, e mafai e taitai ona tagai i le mataupu 3 o i leni tusitaulima.

10.10

Taitaiga o Tamaitai Talavou i le Siteki

10.10.1

Au Peresitene o le Siteki

O sui o le au peresitene o le siteki e vaavaaia le faalapotopotoga a Tamaitai Talavou i le siteki. E avea o se vaega o leni tiutetauave latou te aoaina epikopo i o latou tiutetauave mo tamaitai talavou.

E tofia e le peresitene o le siteki se tasi o ona fesoasoani e vaaia le faalapotopotoga a Tamaitai Talavou.

Mo nisi faamatalaga e uiga i tiutetauave o le au peresitene o le siteki e faatatau i faalapotopotoga a ausilali, tagai i le 15.1.

10.10.2

Fautua Mauuluga e Tofia i Tamaitai Talavou a le Siteki

O le peresitene o le siteki e tofia se tasi o le au fautua mauuluga e galulue faatasi ma le au peresitene

o Tamaitai Talavou i le siteki. O tiutetauave o leni fautua mauuluga o loo ootoo atu i le 15.3.

10.10.3

Au Peresitene o Tamaitai Talavou o le Siteki

O tiutetauave o le au peresitene o Tamaitai Talavou a le siteki o loo ootoo atu i le 15.4.1.

10.10.4

Failautusi a Tamaitai Talavou o le Siteki

O tiutetauave o le failautusi a Tamaitai Talavou o le siteki o loo ootoo atu i le 15.4.2.

10.10.5

Komiti o le Perisitua Arona –Tamaitai Talavou a le Siteki

O le peresitene o le siteki e tofia se fesoasoani e pulefaamalumalu i le komiti o le Perisitua Arona--Komiti a Tamaitai Talavou o le siteki. O isi sui o le komiti o fautua mauuluga e tofia i faalapotopotoga a Alii Talavou ma Tamaitai Talavou, o le au peresitene o Alii Talavou a le siteki ma le failautusi, ma le au peresitene o Tamaitai Talavou o le siteki ma le failautusi.

E mafai e le au peresitene o le siteki ona valaaulia le autalavou e auai i fonotaga a le komiti pe a manaomia ai. E tatau ona faaaofia ai le autalavou i le tele e mafai ai i le fuafuaina ma le faatinoina o gaoioiga e pei o konafesi a le autalavou, siva, faigalotu, ma gaoioiga a siteki tuufaatasi. E mafai foi ona auai le autalavou i talatalanoaga e uiga i luitau o loo feagai ma le autalavou o le siteki.

10.10.6

Tagata Faapitoa mo Gaoioiga a Tamaitai Talavou i le Siteki

E mafai e le au peresitene o le siteki ona tofia tagata o le siteki e galulue mo ni taimi le tumau e avea ma

tagata tomai faapitoa o Tamaitai Talavou, e fesoasoani i le fuafuaina ma le faatinoina o gaoioiga po o polokalama. O tagata faapitoa e mafai ona tofia mo gaoioiga e pei o le toluapiga a Tamaitai Talavou, gaoioiga a siteki tuufaatasi, ma taaloga. Latou te galulue i lalo o le taitaiga a le au peresitene o Tamaitai Talavou.

10.11

Fetuunaiga o le Faalapotopotoga a Tamaitai Talavou i Manaoga Faalelotoifale

I se uarota po o se paranesi e toalaiti ia tamaitai talavou, e mafai ona potopoto faatasi ia tamaitai talavou mo aoaoga (tagai i le 10.3.5 ma le 10.6.2). E mafai foi ona tuufaatasi i latou mo gaoioiga.

Afai e toalaiti le autaitai matutua i se uarota po o se paranesi, e mafai e le au peresitene o Tamaitai Talavou ona faia lesona i Aso Sa ma faatautaia le polokalama o gaoioiga e aunoa ma ni faufautua. I se iunite laitiiti tele, e mafai ona na o le peresitene o Tamaitai Talavou le taitai matua i le faalapotopotoga o Tamaitai Talavou. I le tulaga lea, e fai e ia ia lesona i Aso Sa ma vaaia gaoioiga mo tamaitai talavou uma. A oo ina mafai, ona valaauina lea o fesoasani ma se failautusi.

I se paranesi e laitiiti tele e leai se peresitene o Tamaitai Talavou, e mafai ona fesoasoani le peresitene o le Aualofa i matua e faatulaga ia aoaoga mo tamaitai talavou seia valaau se peresitene o Tamaitai Talavou.

Talu ai e tele ina manuia le autalavou mai le fegalegaleai i vaega e toatele atu, e mafai e alii talavou ma tamaitai talavou o ni uarota laiti se lua pe sili atu po o paranesi ona potopoto faatasi i nisi taimi mo gaoioiga tuufaatasi. Afai e toalaiti ni tamaitai talavou a uarota ma paranesi tuaoi, e mafai e epikopo ma peresitene o paranesi ona faataga ia tamaitai talavou e potopoto faatasi mo gaoioiga faalevaiaso. Pe a mafaufau i nei filifiliga, e faitaulia e epikopo ma

peresitene o paanesi itu taua e pei o le mamao ma le tau o le feoaiga.

I se siteki laitiiti po o se itu, e mafai e le peresitene o Tamaitai Talavou ona na o ia le taitai o Tamaitai Talavou i le siteki po o le itu. A oo ina mafai, ona valaauina lea o fesoasani ma se failautusi.

Mo faamatalaga lautele e uiga i le fetuunai i manaoga faalelotoifale, tagai i le mataupu e 17.

10.12

Taiala Faaopoopo ma Aiaiga

10.12.1

Autalavou e Lei Atoa le Ta'i 14 Tausaga le Matutua i Konafesi a le Autalavou ma Siva

O talavou e i lalo o le 14 tausaga e le masani ona auai i konafesi a le autalavou po o siva e faia e ese mai po faatulagaina o le Mutuale (tagai 13.6.14). O se toluapiga faaletausaga a Tamaitai Talavou e tuusaunoa mai lenei taiala.

10.12.2

Tamaitai Talavou o Isi Faatuatuaga

O tamaitai talavou o isi faatuatuaga o e ua malilie e tausisia tulaga faatonuina o le Ekalesia e tatau ona faafeiloai lelei atu iai latou ma fautuaina e auai i gaoioiga a le autalavou. E mafai foi ona latou auai i le faatinoga o le polokalama o le Alualu i Luma o le Tagata Lava Ia ma maua ai le tulaga aloaia. O tupe faaalu i le auai e tatau ona taulimaina tutusa ma tamaitai talavou o le Ekalesia.

10.12.3

Tamaitai Talavou E I Ai Manaoga Faapitoa

O tamaitai talavou e i ai manaoga faapitoa e masani ona faaaofia ai ia latou vasega masani. E mafai ona faia ni faatagaga faapitoa pe a i ai le faamaoniga a matua ma le au epikopo.

Mo faamatalaga e uiga i le malamalamaaga, faaafia ai, ma le aoaoina o tamaitai talavou e i ai manaoga faapitoa, tagai i le 21.1.26 ma le disabilities.Lds.Org

10.12.4

Tamaitai Talavou ua Maitaga ae Lei Faaipoipo po ua Tina ae Lei Faaipoipo

Afai ua maitaga se tamaitai talavou ae lei faaipoipo, o le faaiuga e auai i vasega ma gaoioiga a Tamaitai Talavou ua tuu atu lea i le faautautaga loloto a le tamaitai talavou, o ona matua, ma le epikopo.

Afai o se tamaitai talavou e 17 tausaga po o le matua atu ua fanau ae lei faaipoipo ma ua filifili e tausi le tamaitiiti, e taliaina o ia i le Aualofa, lea o le a mafai

ai ona aoaoina o ia ma fesoasoani atu i ai i ona tiute-tauave fou. E le toe alu o ia i Tamaitai Talavou.

Afai o se tamaitai talavou e i lalo ifo o le 17 tausaga le matua ua fanau ae lei faaipoipo ma ua filifili e tausi le tamaitiiti, o le faaiuga e auai i vasega ma gaoioiga a Tamaitai Talavou ua tuu atu lea i le faautautaga loloto a le tamaitai talavou, o ona matua, ma le epikopo. Afai e auai le tamaitai talavou i nei vasega ma gaoioiga, e le tatau ona alu ma ave le tamaitiiti.

Mo faamatalaga e uiga i aiaiga a le Ekalesia e le fautuaina ai e le Ekalesia ia tamaitai talavou nofofua e tausia se tamaitiiti na te fanauina ae lei faaipoipo, tagai i le 21.4.12.

11.

Peraimeri

O le Peraimeri o se ausilali i le perisitua. O ausilali uma lava ua i ai e fesoasoani i tagata o le Ekalesia ia ola ia latou molimau i le Tama Faalelagi, Iesu Keriso, ma le talalelei toefuataiina. O le galuega a ausilali, e maua ai e tagata o le ekalesia ia aoaoga, faamalosiuga, ma le lagolagosua a o latou taumafai e ola e tusa ai ma mataupu faavae o le talalelei.

11.1

Autu ma Faamoemoega o le Peraimeri

O le Peraimeri e mo tamaiti ua tai 18 masina e oo i le ta'i 11 tausaga. O le autu o le Peraimeri o le, "Ma o le a aoaoina au fanau uma e le Alii; ma o le a tele lava le filemu o lau fanau" (3 Nifae 22:13). O faamoemoega o le Peraimeri o le fesoasoani lea i tamaiti ia:

1. Lagonaina le alofa o le Tama Faalelagi mo i latou.
2. Aoa ma malamalama i le talalelei a Iesu Keriso.
3. Lagona ma iloa le uunaiga a le Agaga Paia.
4. Sauniuni e osia ma tausia feagaiga paia.

Ua i ai i matua le uluai tiutetauave mo le uelefea faaleagaga ma le faaletino o a latou fanau (tagai i le MFF 68:25–28). O le au epikopo, taitai Peraimeri, ma faiaoga o le Peraimeri latou te lagolagoina ae latou te le suitulagaina matua i leni tiutetauave.

11.2

Taitaiga o le Peraimeri i le Uarota

O loo taulai atu leni mataupu i le taitaiga o le Peraimeri i se ala e faamalolosia ai tagata taitoatasi ma aiga. E iloilo soo e taitai o le Peraimeri le mataupu 3, lea o loo ootoo mai ai mataupu faavae aoao

o le taitaiga. O nei mataupu faavae o loo aofia ai le saunia faaleagaga, auai i fonotaga a aufono, auauna atu i isi, ma le aoao atu o le talalelei a Iesu Keriso.

11.2.1

Au Epikopo

O le epikopo ma ona fesoasoani e tuuina atu le taitaiga faaleperisitua mo le Peraimeri.

Epikopo ma Ona Fesoasoani

O le epikopo e valaauina ma vaetofia se tuafafine e avea ma peresitene o le Peraimeri. Na te vaaia le valaauga ma le vaetofiaina o isi aufaigaluega uma o le Peraimeri. E mafai ona ia tofia ona fesoasoani e valaau ma vaetofia i latou.

O le epikopo po o se fesoasoani ua tofia, e faatautaia ia faatalanoaga mo papatisoga ma faamauga o tamaiti ua ta'i 8 tausaga le matutua, o e ua i ai pepa faamaumau ma tamaiti ua ta'i 8 tausaga ae le o i ai ni pepa faamaumau ma pe e toatasi o matua po o se o tausia, e lotu. O faifeau faamisiona e aoaoina ma faatalanoa ia tamaiti ua ta'i 8 tausaga le matutua, o e le lolotu matua ma tamaiti o le a ta'i 9 tausaga pe matutua atu foi i le taimi o le papatisoga.

O le epikopo po o se fesoasoani e tofia, e faatalanoaina tamaiti a o le'i aulia lo latou ta'i 12 tausaga ma sii i luga mai le Peraimeri.

Fesoasoani e Tofia e Vaaia le Peraimeri i le Uarota

E tofia e le epikopo se tasi o ona fesoasoani e vaaia le Peraimeri a le uarota. O tiutetauave nei o le fesoasoani lea:

E fono o ia e le aunoa ma le au peresitene o le Peraimeri a le uarota. Na te lipoti atu mataupu a le Peraimeri i fonotaga a le au epikopo.

Na te taialaina taumafaiga e sauniuni ai le polokalama faaletausaga a tamaiti i le faamanatuga.

Na te faatonutonuina le fuafuaina o le sauniga o le Sauniuniga mo le Malumalu ma le Perisitua i le faamaopoopoga faatasi ma le au peresitene o le Peraimeri (tagai i le 11.5.5).

Na te faamaopoopoina ia taumafaiga ina ia susu mai sui o le au epikopo e tuuina atu ni savali pupuu i tamaiti i le taimi o fetufaaiga.

A faatagaina e le Ekalesia le Sikauti, o ia e vaaia le Sikauti mo tama ua ta'i 8 tausaga e oo i le 11.

11.2.2

Au Peresitene o le Peraimeri i le Uarota

O le au peresitene o le Peraimeri a le uarota e aofia ai se peresitene ma fesoasoani e toalua. Latou te galulue i lalo o le taitaiga a le au epikopo. Latou te mauaina aoaoga faamasani ma le lagolagosua faifai pea mai le au peresitene o le Peraimeri a le siteki.

Peresitene o le Peraimeri a le Uarota

O tiutetauave nei o le peresitene o le Peraimeri:

E avea o ia o se sui auai o le aufono a le uarota. I le avea ai o ia ma se sui auai o lenei aufono, e auai o ia i taumafaiga e fausia ai le faatuatua ma faamalolosia tagata taitoatasi ma aiga (tagai i le mataupu e 4).

Na te tuuina atu fautuaga i le au epikopo mo tagata o le uarota e valaau e avea ma taitai ma faiaoga i le Peraimeri. I le faia o nei fautuaga, e mulmulu o ia i taiala o loo i le 19.1.1 ma le 19.1.2.

Na te aoaoina isi taitai o le Peraimeri ma faiaoga i o latou tiute, e faaoga ai le tusitaulima lenei e avea ma punaao.

Na te vaaia le faaaogaina o tusitaila o le *Faatuatua i le Atua* e pei ona faamatala atu i le 11.5.1.

Na te vaaia faamaumauga, lipoti, paketi, ma tupe a le Peraimeri o le uarota. E fesoasoani le failautusi o le Peraimeri i lenei tiutetauave.

Peresitene o le Peraimeri a le Uarota ma Ona Fesoasoani

E galulue faatasi sui auai o le au peresitene o le Peraimeri e faataunuu tiutetauave nei. E mafai e le peresitene o le Peraimeri ona tofia ona fesoasoani e vaaia nisi o nei tiutetauave.

Latou te aoaoina igoa o tamaiti ma faamasani ia latou taleni, o mea e fiafia i ai, ma luitau. Latou te vaavaai mo ni auala e faamalolosi ai tamaiti taitasi ma fesoasoani ia i latou ina ia auai mai i le Peraimeri.

Latou te aoaoina faamasani ia faiaoga faatoa valaauina ma vaaia taumafaiga e faaleleia atili ai le aoao mai ma le aoao atu i le Peraimeri. I nei taumafaiga, latou te mulimuli i mataupu faavae o i le 5.5.3 ma le 5.5.4. Latou te lagolagoina foi ia faiaoga o le Peraimeri ma taitai o le vasega pepe e ala i le (1) talatalanoa ma i latou i nisi taimi e taulima a latou fesili ma atugaluga ma talanoaina ni auala e tautuaina ai tamaiti; (2) fesoasoani iai latou e faatumauina le migao i le taimi o fetufaaiga, taimi o vasega, ma malologa; ma (3) faatulaga e asiasi atu ia latou vasega.

Latou te fuafuaina taimi o fetufaaiga ma vaaia ia polokalama, gaoioiga, ma mea e fai o loo lisi atu i le 11.5.

E fai a latou fonotaga faale-au peresitene. Latou te fonofoi e le aunoa ma le fesoasoani i le au epikopo o loo vaaia le Peraimeri.

11.2.3

Failautusi o le Peraimeri i le Uarota

O tiutetauave nei o le failautusi o le Peraimeri a le uarota:

E feutagai o ia ma le au peresitene e saunia lisi o mataupu mo fonotaga a le au peresitene. E auai o ia i nei fonotaga, tusia minute, ma siaki ia tofitofiga.

A laitiiti o le ta'i kuata, na te tuufaatasia ai faamatalaga o le auai, iloiloina faatasi ma le peresitene o le Peraimeri, ma auina atu i le failautusi a le uarota.

Na te faamautinoaina ua silafia e le peresitene o le Peraimeri ma le failautusi faapitoa o le uarota ia tamaiti e le o toe mamao ona agavaa lea mo le papatisoga ma e le o toe mamao ae sii mai le Peraimeri i le Perisitua Arona ma Tamaitai Talavou.

E fesoasoani o ia i le au peresitene o le Peraimeri e saunia se paketi faaletausaga ma le tala mo tupe faaalu.

E fesoasoani o ia i tamaiti, faiaoga, ma matua pe a talosagaina ai e le au peresitene o le Peraimeri. Mo se faataitaiga, e mafai ona fesoasoani o ia e faafoe ia vasega ma tausisia le migao i taimi o fetufaaiga. E mafai foi ona ia tofia tamaiti e faia ia lauga mo taimi o fetufaaiga o loo loma ma ta'u i matua o tamaiti o latou tofiga.

11.2.4

Taitai Musika ma Ta Piano i le Peraimeri a le Uarota

I lalo o le taitaiga a le au peresitene o le Peraimeri, o tiutetauave nei o taitai musika ma ta piano a le Peraimeri.

Latou te fuafuaina, aoao, ma taitai musika mo le taimi o fetufaaiga, e aofia ai pese ia o le a avea ma vaega o le polokalama a tamaiti i le faamanatuga.

Latou te fesoasoani i musika mo le vasega pepe ma isi vasega o le Peraimeri pe a talosagaina ai.

E mafai ona latou faatulagaina ma taitai se aufaipese a tamaiti pe a talosagaina ai.

E fesoasoani sui o le au peresitene o le Peraimeri i taitai musika ma ta piano a le Peraimeri a le uarota ia malamalama i le auala e saofaga ai musika i le Peraimeri. O fati, o upu, ma savali o pese a le Peraimeri e mafai ona aoao atu ai i tamaiti ia aoaoga faavae o le talalelei ma tumau ai i o latou loto i aso uma o lo latou ola.

O musika i le Peraimeri e tataua ona valaaulia ai le migao, aoao ai le talalelei, ma fesoasoani ai i tamaiti

ia latou lagonaina le uunaiga a le Agaga Paia ma le olioli lea e oo mai i pesepesega. A o usuusuina e tamaiti ni pese, ia tuu atu e taitai musika ia i latou ni avanoa e faagaioia' i ai ma falolo i tulaga talafeagai.

O le *Tusipese a Tamaiti* ma le ootoga o i ai nei o taimi o fetufaaiga o punaoa faavae lava na mo musika i le Peraimeri. O viiga mai le tusipese ma pese mai le *Friend* ma le *Liahona* e talafeagai foi. O nisi taimi e mafai e tamaiti ona usuina pese faaleatunuu po o pese o aso malolo ia e fetau mo le Aso Sa ma mo le matutua o tamaiti. O le faaogaaga o nisi lava musika i le Peraimeri e tataua ona faamaonia e le au epikopo.

Mo faamatalaga e uiga i le aoaoina o musika i tamaiti, tagai i le *Tusipese a Tamaiti*, itulau 149--151. Tagai foi i le mataupu 14 i le tusitaulima lenei, o le ootoga mo le taimi o fetufaaiga o le taimi nei, ma "Music Callings and Resources" i le vaega o le Serving in the Church LDS.org.

11.2.5

Faiaoga o le Peraimeri ma Taitai o Vasega Pepe

E galulue faiaoga ma taitai o le vasega pepe ma vaega o tamaiti i o latou vaitausaga patino. E mulimuli nei faiaoga ma taitai i mataupu faavae o loo ootoga atu i le 5.5.4.

E nonofo faatasi lava faiaoga o le Peraimeri ma taitai o le vasega pepe ma tamaiti i le taimi atoa o le Peraimeri i le Aso Sa, e aofia ai ma taimi o fetufaaiga ma malologa. I le taimi o fetufaaiga, latou te nonofo faatasi ma a latou vasega ua tofi i ai, usu faatasi pese ma tamaiti, ma fesoasoani i tamaiti e auai ma le migao.

11.2.6

Taitai o Aso o Gaoioiga ma Taitai Sikauti

Afai e fai ni aso o gaoioiga a le Peraimeri ma gaoioiga a le Sikauti mo tamaiti ua ta'i 8 e oo i le ta'i 11 tausaga le matutua, e mafai ona fuafua ia gaoioiga ma taitaia e faiaoga o nei tamaiti po o nisi taitai e

valaauina e le au epikopo e faataunuu nei tiutetauave (tagai i le 11.5.2 ma le 11.5.3).

11.3

Fonotaga Faaleautaitai

11.3.1

Fonotaga a le Aufono a le Uarota

O le peresitene o le Peraimeri o se sui auai o le aufono a le uarota (tagai i le mataupu e 4).

11.3.2

Fonotaga Faale-Au Peresitene o le Peraimeri a le Uarota

E faia e le aunoa ia fonotaga faale-au peresitene a le au peresitene o le Peraimeri. O le peresitene e pulefaamalumalu i le fonotaga ma na taitaia. O le failautusi e auai, tusia minute, ma siaki ia tofitofiga.

O le lisi o mataupu e talanoaina e mafai ona aofia ai mea nei:

1. Fuafua ni auala e faamalolosia ai tamaiti taitoatasi ma faiaoga i le Peraimeri.
2. Faitau ma talanoaina mau ma aoaoga mai taitai o le Ekalesia e faatatau i o latou valaauga.
3. Talanoaina le aoga o le Peraimeri i le Aso Sa, e aofia ai musika. Ia talanoaina foi le aoga o gaioiga i aso o le vaiaso. Fuafua ni auala e faaleleia ai.
4. Fai ni fuafuaga e aoao ai isi tagata o loo galulue i le Peraimeri i o latou tiutetauave.
5. Iloilo faamaumauga o le auai. Fai ni fuafuaga e fesoasoani ai i tamaiti faatoa ulufale mai i le Peraimeri ma tamaiti e le o toaaga mai o latou aiga.
6. Iloilo le paketi a le Peraimeri ma tupe faaalu.

E mafai e le au peresitene o le Peraimeri ona valaaulia isi tagata o loo galulue i le Peraimeri e auai mai i nei fonotaga pe a manaomia ai.

11.3.3

Fonotaga ma se Fesoasoani i le Au Epikopo

E fono e le aunoa le au peresitene o le Peraimeri ma le fesoasoani o le au epikopo o loo vaaia le faalapotopotoga a le Peraimeri. I nei fonotaga latou te fefautuaai ai faatasi e uiga i le alualu i luma ma manaoga o tamaiti taitasi. E tuuina atu e sui auai o le au peresitene o le Peraimeri ia lipoti, faia ni fautuaga, ma iloilo fuafuaga mo fonotaga ma gaioiga. A oo ina talafeagai ai, e mafai ona valaaulia isi tagata e galulue i le Peraimeri e auai mai i lenei fonotaga e tuuina mai lipoti ma maua ia aoaoga po o faatonuga.

11.3.4

Fonotaga Faaleautaitai o le Peraimeri a le Siteki

O fonotaga faaleautaitai o le Peraimeri a le siteki e taitasi i le tausaga e fai ai, e pei ona faamalamalama mai i le 18.3.11. E auai atu i ai au peresitene o Peraimeri ma failautusi a uarota. O isi taitai o le Peraimeri ma faiaoga, faapea ma le sui ole au epikopo ua tofi i le Peraimeri e mafai ona valaaulia e auai pe a manaomia ai.

11.4

Peraimeri i le Aso Sa

11.4.1

Faatulagaga

O le Peraimeri i le Aso Sa e masani ona 1 le itula ma le 40 minute e fai ai, a o auai le au matutua ma le autalavou i sauniga a le au perisitua, sauniga a le Aualofa, vasega a Tamaitai Talavou, ma le Aoga Sa.

O tamaiti i le vasega pepe e nonofo ai lava i le vasega pepe i le taimi atoa, e pei ona otooto atu i le tusi lesone a le vasega pepe, *Vaai ia i O Outou Tamaiti*. O isi tamaiti e auai i ni tauaofiaga se lua. I le isi tauaofiaga, e potopoto faatasi tamaiti mo le 50

minute mo le taimi o le fetufaaiga. I le isi tauaofiaga, e vaevae ai i ni vasega e laiti atu mo lesona e 40 minute e fai e o latou faiaoga i le Peraimeri.

O tamaiti ma faiaoga e auai i le taimi o fetufaaiga ma vasega, e 10 minute e malolo ai i le va o tauaofiaga e lua. I le taimi o le malologa lea, latou te sauniuni ai mo le isi tauaofiaga. E mafai e tamaiti ona o e faaoga le faleleta'ua pe o foi e feinu. E vaavaaia e faiaoga ia tamaiti i le taimi atoa o le malologa.

O loo faaalua i siata nei ni filifiliga se tolu mo le faatulagaina o le Peraimeri i Aso Sa. A mafafau po o le fea faatulagaga e mulimuli ai, e faamautinoa e taitai

o le Peraimeri e auai ia tamaiti matutua i le taimi o fetufaaiga i le taimi tonu o loo faia ai sauniga a korama o le Perisitua Arona ma vasega a Tamaitai Talavou. O lenei faiga o le a mafai ai ona faia se suiga sologalelei mo tamaiti pe a aulia lo latou ta'i 12 tausaga.

Filifiliga 1: O tamaiti laiti ma tamaiti matutua e tuu i ni vaega eseese se lua i le taimi o fetufaaiga. I le 50 minute muamua, e faapotopoto ai le isi vaega mo le taimi o fetufaaiga a o vaevae le isi vaega i ni vasega mo le 40 minute, ma e 10 minute le malologa. Ona fesuia'i lea o vaega e lua, o le vaega muamua e fai se malologa 10-minute a o le'i amataina a latou vasega.

Taimi o Fetufaaiga 50 minute		Malologa 10 minute	Vasega 40 minute
Vasega 40 minute	Malologa 10 minute	Taimi o Fetufaaiga 50 minute	

Filifiliga 2: E faapotopoto muamua uma tamaiti mo le taimi o fetufaaiga. Ona fai lea o sa latou malologa ma o i a latou vasega.

Taimi o Fetufaaiga 50 minute	Malologa 10 minute	Vasega 40 minute
--	------------------------------	----------------------------

Filifiliga 3: E o muamua uma tamaiti i a latou vasega. Ona fai lea o sa latou malologa ma faapotopoto faatasi mo le taimi o fetufaaiga.

Vasega 40 minute	Malologa 10 minute	Taimi o Fetufaaiga 50 minute
----------------------------	------------------------------	--

11.4.2 Taimi o Fetufaaiga

O le taimi o fetufaaiga e maua ai avanoa mo tamaiti e aoao ai le talalelei a Iesu Keriso ma lagonaina le uunaiga a le Agaga Paia. E mulimuli le au peresitene o le Peraimeri i le oototoga mo le taimi o

fetufaaiga, lea e auina atu i uarota i tausaga taitasi. E maua isi kopi mai Faletusi o le Ekalesia ma i lalo o le "Primary" i le vaega o le Serving in the Church i le LDS.org.

E feauauai le au peresitene e taitai le taimi o fetufaaiga. O le taimi lea e masani ona aofia ai elemene nei:

1. Musika e muai tataina, o se pese faaaloalo po o se viiga e iloa e tamaiti, ma se tatalo amata e faia e se tasi o tamaiti.
2. Se tasi pe sili atu foi o mea nei: se mau e filifilia ma faitauina e se tasi o tamaiti, taulotoina o se mataupu faavae o le faatuatua, se savali puupuu mai se tasi o le au epikopo, tasi pe lua ni pese o gaioioiga, ma lauga a tamaiti e faataua i le autu o le masina.
3. Aoaoga o le talalelei e saunia e le au peresitene o le Peraimeri. O le vaega lea e tusa ma le 15 minute e alu ai. E faaoga e le au peresitene ia tusitusiga paia ma mulimuli i le oototoga mo le fetufaaiga o taimi i le taimi nei a o latou saunia e aoao atu.

4. O taimi o pesepesega e faatautaia e se taitai musika. O le vaega leni e tusa ma le 20 minute (tagai i le oototoga o loo i ai nei mo taimi o fetufaaaiga).
5. O se tatalo faaiu e faia e se tasi o tamaiti, ona sosoo ai lea ma se musika e tata pe a mae'a.

11.4.3

Vasega

E pei ona faaalua i taiala nei, e masani lava ona faatulaga tamaiti i vasega o le Peraimeri e tusa ai ma o latou tausaga.

E fautuaina e matua, taitai, ma faiaoga ia tamaiti matutua e aumai a latou lava kopi o tusitusiga paia i le lotu pe a mafai.

Mo faamatalaga e uiga i le fetuunaiga o vasega i tulaga faalelotoifale, tagai i le 11.7.

Vasega Pepe

E mafai ona amata auai mai tamaiti i le vasega pepe i le taimi lava e atoa ai le 18 masina le matua. Latou te o mai pea i le vasega pepe seia oo ina agavaa i latou e auai i le vasega o le Aveolela, e pei ona faaalua i le siata o i lalo o le ulutala o le a sosoo ai.

Vasega o le Peraimeri

E amata ona auai tamaiti i se vasega fou o le Peraimeri i le aso Sa muamua o tausaga faakalenaina taitasi. E masani ona vaevae i latou i vasega e fuafua i o latou tausaga i le aso 1 o Ianuari, e pei ona faailoa atu i le siata leni.

Tausaga i le aso 1 o Ianuari	Vasega
3	Aveolela
4	FMT 4
5	FMT 5
6	FMT 6

Tausaga i le aso 1 o Ianuari	Vasega
7	FMT 7
8	Valiana 8
9	Valiana 9
10	Valiana 10
11	Valiana 11

Tamaiti ua Ta'i 12 Tausaga

O tamaiti e sii mai le Peraimeri pe a aulia lo latou ta'i 12 tausaga. E mafai e taitai ona tuu atu ia i latou se tusi faamaonia o le siitaga.

I le taimi o fetufaaiga, o tamaiti fou ua atoa le ta'i 12 tausaga le matutua e auai i a latou sauniga o korama o le Perisitua Arona po o vaega a Tamaitai Talavou.

I le taimi o vasega a le Peraimeri, o tamaiti fou ua atoa le ta'i 12 tausaga e masani ona auai i la latou vasega o le Valiana 11 o le Peraimeri seia aulia le faaiuga o le tausaga. Peitai, e mafai ona fefautuaai le epikopo ma perisitene o le Peraimeri, Alii Talavou, Tamaitai Talavou ma le Faiaoga o le Aoga Sa e fuafua ai pe sili atu ona manuia le au ta'i 12 tausaga nei pe a o i le vasega i le Aoga Sa mo le ta'i 12 ma le ta'i 13 tausaga le matutua. A o fefautuaai faatasi nei taitai latou te manatunatu i manaoga o tamaiti ma taimi o le tausaga o le a aulia ai e tamaiti taitasi lo latou ta'i 12 tausaga. O la latou faaiuga e faatatau i alii talavou uma ma tamaitai talavou e aulia lo latou ta'i 12 i lena tausaga.

11.5

Polokalama, Gaoioiga, ma Mea e Fai a le Peraimeri

11.5.1

Polokalama o le Faatuatua i le Atua

O le polokalama o le Faatuatua i le Atua e fesoa-soani i tama ma teine ua ta'i 8 e oo i le 11 tausaga le

matutua e ola i mataupu faavae o le talalelei, atiina ae molimau, ma sauniuni e avea ma ni e amiotonu e umia le Perisitua Arona ma ni tamaitai talavou amiotonu. O lenei polokalama e faamalosiaina ai foi tamaiti e tauloto ia Mataupu Faavae o le Faatuatua.

E faamautinoa e le peresitene o le Peraimeri ua tofu tamaiti taitasi uma e aulia le 8 tausaga ma se kopi o le *Faatuatua i le Atua mo Teine* po o le *Faatuatua i le Atua mo Tama*. E fesoasoani o ia i matua ia malamalama e mafai ona latou faaogaina nei tusitaila e fai ma punaoa mo gaoioiga ma fanau taitasi ma le aiga atoa.

11.5.2

Aso o Gaoioiga

O nofoaga e mafai ai, e mafai ona faia ni aso mo gaoioiga a le Peraimeri mo tamaiti ma teineiti ua ta'i 8 tausaga e oo i le 11. E faaogaina e taitai ma faiaoga ia tusitaila o le *Faatuatua i le Atua* e fai ma punaoa mo aso o gaoioiga, e lagolagoina ai le galuega o loo faia e tamaiti ma matua i le fale, e faataunuu ai mea e manaomia mo le Faatuatua i le Atua.

E le sili atu i le faalua i le masina ona faia aso o gaoioiga. E mafai ona faia i se falelotu po se fale o se aiga. A o fuafuaina e taitai pe faafia ona fai ma le mea e fai ai aso o gaoioiga, latou te mafaufau i le taimi o aiga o tamaiti e alu ai, mamao ma le tau o feoiga, saogalemu o tamaiti, ma isi tulaga faalelotoifale. E faamautinoa e taitai e mulimuli ia aso o gaoioiga i taiala o loo i le 11.8.1 ma i le mataupu 13.

O faiaoga o tamaiti o le Peraimeri e faatautaia aso o gaoioiga sei vagana ua valaau e le au epikopo ni taitai e ese mo aso o gaoioiga.

11.5.3

Gaoioiga a le Sikauti

O nofoaga o loo faataga ai e le Ekalesia le Sikauti, o gaoioiga a le Sikauti e sui ai aso o gaoioiga mo tamaiti e ta'i 8 e oo i le ta'i 11 tausaga. Ina ia tausia se taulai atu i le talalelei i gaoioiga a le Sikauti, e

faaogaina e taitai le tusitaila o le *Faatuatua i le Atua mo Tama* e fai ma a latou punaoa. A faataunuu e tama ia tulaga manaomia o i le tusitaila, ua latou agavaa foi mo tau faalelotu i le Sikauti.

E mafai e faiaoga o tamaiti i le Peraimeri ona avea ma taitai Sikauti ae e mafai foi e le au epikopo ona valaauina isi e avea ma taitai Sikauti. E faamautinoa e taitai Sikauti o loo mulimuli gaoioiga a le Sikauti i taiala o loo i le 11.8.1 ma i le mataupu 13.

E faamautinoa e le au peresitene o le Peraimeri ua lesitala tama uma ua ta'i 8 e oo i le 11 tausaga i le polokalama a le Sikauti, ma ua lesitala uma foi taitai o le Sikauti ma maua ia aoga e tatau ai. Mo nisi faamatalaga e uiga i le Sikauti, e aofia ai taiala mo le fuafuaina o toluapiga faaletausaga i le ao, tagai i le *Tusitaila mo Sikauti* a le Ekalesia ma le *Day Camp Guide for Eleven-Year-Old Scouts*.

E le i faaogaina e le Ekalesia le polokalama a le Tiger Cub (i le Iunaite Setete) po o le polokalama a le Beaver (i Kanata) mo tamaiti o le vaitausaga o le Peraimeri.

11.5.4

Polokalama a Tamaiti i le Sauniga Faamanatuga

O le polokalama faaletausaga a tamaiti i le sauniga faamanatuga e maua ai e tamaiti se avanoa e faasoa mai ai mea sa latou aaoaina i le Peraimeri. E masani ona faatino i le kuata lona fa o le tausaga.

E saunia e le au peresitene o le Peraimeri ma taitai musika le polokalama i lalo o le taitaiga a le au epikopo. Latou te mulimuli i taiala o loo i le ootoga o i ai nei mo le taimi o fetufaiga, ma fetuunai pe a manaomia ai ina ia fetau ma tulaga o tamaiti.

I le sauniga faamanatuga, e faia le polokalama pe a uma le faatinoga o le faamanatuga ma e mafai ona faaogaina ai le taimi uma o totoe po o se vaega o le taimi. O tamaiti uma o le Peraimeri ua ta'i 3 e oo i le ta'i 11 tausaga e usuina pese sa latou aaoaina i le taimi o fetufaiga. E mafai foi ona auai tamaiti e ala

i le faitauina pe taulotoina o mau, fai ni lauga, usu ni vaega toalaiti ia pese, ma faasoa a latou molimau. E mafai foi e se taitai matua o le Peraimeri ona faasoa mai se savali puupuu.

Ina ia tausisia le paia o le sauniga faamanatuga, e le tatau ona faaaoga ni mea faitino i le polokalama, ni toniga, po o ni faiga e faaaoga ai ala o faasalalauga.

11.5.5

Sauniuniga mo le Malumalu ma le Perisitua

O tausaga taitasi, i lalo o le taitaiga a le au epikopo, e saunia ai e le au peresitene o le Peraimeri se sauniga ua ta'ua o le Sauniuniga mo le Malumalu ma le Perisitua. O le sauniga e faia mo tama ma teineiti tuufaatasi e tai 11 tausaga le matutua. E valaauliaina ai foi o latou matua. O le faamoemoega o leni sauniga ina ia fesoasoani i nei fanau ia malamalama i faamanuiaga o galuega o le malumalu, auaunaga faaleperisitua, ma le osiaina ma le tausaiaina o feagai-ga paia.

O autu talafeagai mo le sauniga e aofia ai:

- Aoa atu e uiga i faamoemoega o le perisitua, tiutetauave, sauniga, ma faamanuiaga.
- Fesoasoani i tama ia faamalosi lo latou tautinoga ia saunia e maua le perisitua.
- Fesoasoani i tama ma teine ia malamalama i o latou avanoa e auai ai i le galuega o le faaolataga.
- Unaia fanau ia saunia e maua se pepa faataga o le malumalu e tapulaa le faaogaina pe a atoa lo latou 12 ma ia auai ma le agavaa e fai ma sui i papatisoga pe a faatagaina ai e o latou tulaga.

O se tasi o le au epikopo e faautaitaia le fonotaga, ma a itiiti ia tasi se sui o le au peresitene o le Peraimeri e auai. O isi taitai e mafai ona auai, e aofia ai sui o le au peresitene o le korama a tiakono, au peresitene o le vasega Otagapi, ma le au peresitene o Alii ma Tamaitai Talavou.

Afai e toalaiti ni tamaiti e ta'i 11 tausaga le matutua i se uarota, e mafai ona faia le sauniga, i lalo o le taitaiga a le au peresitene o le siteki, faatasi ma isi uarota po o le siteki atoa foi. E tusa ai ma manaoga faalelotoifale, e mafai ona faia i se afaia o se Aso Sa, e avea o se vaega o le sauniga a le Peraimeri i le Aso Sa, po o se isi taimi.

11.6

Taitaiga o le Peraimeri i le Siteki

11.6.1

Au Peresitene o le Siteki

O tiutetauave o le au peresitene o le siteki e faatatau i faalapotopotoga a ausilali i le siteki o loo ootoo atu i le 15.1.

11.6.2

Fautua Maua e Tofi i le Peraimeri a le Siteki

E tofia e le peresitene o le siteki se uso o le au fautua maua e galulue ma le au peresitene o le Peraimeri a le siteki. O tiutetauave o lea fautua maua e galulue o loo ootoo atu i le 15.3. E le gata i na tiutetauave, e fesoasoani foi o ia e amatalia le polokalama o le sikauti mo tamaiti ua ta'i 8 e oo i le 11 tausaga i nofoaga ua faataga ai e le Ekalesia (tagai i le *Tusi-taulima o le Sikautia* le Ekalesia).

11.6.3

Au Peresitene o le Peraimeri a le Siteki

O tiutetauave o le au peresitene o le Peraimeri i le siteki o loo ootoo atu i le 15.4.1.

11.6.4

Failautusi o le Peraimeri i le Siteki

O tiutetauave o le failautusi o le Peraimeri a le siteki o loo ootoo atu i le 15.4.2.

11.6.5**Taitai Musika o le Peraimeri i le Siteki**

I lalo o le taitaiga a le au peresitene o le Peraimeri a le siteki, e mafai e le taitai musika o le Peraimeri a le siteki ona tuuina atu aoaoga i fonotaga faaleautaitai o le Peraimeri a le siteki. E mafai foi ona ia tuuina atu aoaoga i au peresitene taitasi o Peraimeri, taitai musika, ma ta piano. Pe a talosagaina ai, e faatulaga e le taitai musika o le Peraimeri a le siteki ma taitai se aufaipese a tamaiti o le siteki.

O aoaoga po o faatonuga e tatau ona aofia ai le faataitaiga o auala mataalia e aoao atu ai le tala-lelei i tamaiti e ala i musika. O punaao e aofia ai le *Tusipese a Tamaiti*, itulau e 149--151. Tagai foi i le mataupu 14 i le tusitaulima leni, o le oototoga mo le taimi o fetufaaiga o le taimi nei, ma “Music Callings and Resources” i le vaega o le Serving in the Church LDS.org.

11.7**Fetuunaiga o le Faalapotopotoga a le Peraimeri i Manaoga Faalelotoifale**

I se uarota e toatele tamaiti i se vaitausaga, e mafai e taitai o le Peraimeri ona faatulaga ni vasega se tele mo na tamaiti. O lea fetuunaiga atonu e sili ona aoga i uarota e toatele ia tamaiti o le vaitausaga o le vasega pepe.

I se uarota e toalaiti tamaiti, e mafai e taitai Peraimeri ona tuufaatasi ni vaitausaga se lua pe sili atu foi i se vasega se tasi.

I se uarota e toalaiti po o se paranesi, e mafai ona na o le au peresitene o le Peraimeri ia taitai ma faiaoga. I se iunite e laitiiti tele, atonu o le peresitene o le Peraimeri e na o le pau lena o le taitai ma le faiaoga o le Peraimeri. I le tulaga lea, na te faautaitaia le taimi o fetufaaiga ma faiaoga i se vasega mo tamaiti uma. A oo ina mafai, ona valaau lea o nisi taitai ma faiaoga i le faasologa leni:

1. Fesoasoani i le au peresitene o le Peraimeri
2. Taitai musika
3. Faiaoga o le Peraimeri ma taitai o le vasega pepe
4. Failautusi
5. Taitai o aso o gaoioiga ma taitai o le Sikauti (i nofoaga e faaoga ai)

I se paranesi e laitiiti tele e leai se peresitene o le Peraimeri, e mafai e le peresitene o le Aualofa ona fesoasoani i matua e faatulaga ia aoaoga mo le fanau seia valaauina se peresitene o le Peraimeri.

I se siteki laitiiti po o se itu, atonu o le peresitene o le Peraimeri e na o le pau lea o le taitai o le Peraimeri i le siteki po o le itu. A oo ina mafai, ona valaau lea o nisi taitai ma nisi faiaoga i le faasologa leni:

1. Fesoasoani i le au peresitene o le Peraimeri a le siteki po o le itu
2. Taitai musika
3. Failautusi

Mo faamatalaga lautele e uiga i le fetuunai i manaoga faalelotoifale, tagai i le mataupu e 17.

11.8**Taiala Faaopoopo ma Aiaiga****11.8.1****Alii e Galulue i le Peraimeri**

Pe a mafaufau i ni tagata e ono mafai ona galulue i le Peraimeri, e tatau i le au epikopo ma le au peresitene o le Peraimeri ona manatua le tosinaga lelei a alii agavaa i le uarota. O tamaiti, aemaise i latou e leai ni perisitua agavaa i o latou fale, e manaomia ona vaai i faataitaiga a le au perisitua amiotonu, ma alolofa. E mafai ona avefa alii ma faiaoga, taitai musika, ta piano, taitai o aso o gaoioiga, ma taitai Sikauti. E mafai foi ona latou fesoasoani i le vasega pepe. Tagai foi i le 11.8.8.

11.8.2**Sauniga o le Papatisoga mo Tamaiti ua Ta'i Valu Tausaga le Matutua ua i ai Pepa Faamaumau**

Tagai i le 20.3.4.

11.8.3**Tuuina Atua o Molimau i le Peraimeri**

E tuuina atu e matua, taitai o le Peraimeri, ma faiaoga ni molimau faigofie ma le tuusa'o pe a latou aoao atu, ma fesoasoani ai i tamaiti ia iloa po o le a le molimau ma pe faapefea foi ona faailoa atu se molimau.

E le fautuaina le faia o ni sauniga molimau i le Peraimeri. Peitai, e mafai e matua, taitai o le Peraimeri, ma faiaoga ona tuuina atu isi avanoa e tuuina mai ai molimau. Mo se faataitaiga, e mafai e tamaiti ona faasoa atu a latou molimau pe a latou tuuina atu lesona i afiafi faaleaiga, ma pe a faia a latou lauga i taimi o fetufaaiga. O na avanoa e fesoasoani ai i tamaiti e saunia mo le faasoaina atu o a latou molimau i sauniga anapogi ma molimau, pe a lava lo latou matutua e faia ai e aunoa ma le fesoasoani atu a matua, o o latou tei, po o se isi tagata.

11.8.4**Uunaia o le Migao**

O le migao o se faaaliga o le alofa ma le faaaloalo mo le Tama Faalelagi ma Iesu Keriso. E fesoasoani taitai ma faiaoga o le Peraimeri i tamaiti ia malamalama po o le a le migao ma pe faapefea foi ona faaalua le migao. Latou te faamalosiaina le migao e ala i faataitaiga patino. Latou te faamalosiaina foi le migao e ala i le o mai i le lotu ua saunia e aoao atu mai tusitusiga paia, ma faaoga mea faitino ma gaoioiga e aoao ai, ia e valaaulia ai le uunaiga a le Agaga Paia.

11.8.5**O Le Faia o Faatusa o le Atua i Gaoioiga Faaletino**

E tausia ma le faaeteete e taitai ma faiaoga le migao pe a latou filifili e faatautaia ia gaoioiga e faatino i taga, aemaise lava pe a faatino e tagata mea paia. O le Atua le Tama ma le Agaga Paia e lē tatau ona faafofigaina i soo se faiga. E le tatau ona faafofigaina le Faaola e tamaiti i tala faatino se'i vagana ai ni vaaiga i lona soifua mai. Mo taiala faaopoopo, tagai i le 13.1.15.

11.8.6**Tamaiti E I Ai Manaoga Faapitoa**

Afai e i ai se tamaitiiti e i ai se ma'i faaumiumi, se tulaga lē atoatoa, po o isi manaoga faapitoa, e feutagai ia taitai o le Peraimeri ma taitai perisitua ma matua o le tamaitiiti e fuafua ai ni auala e fesoasoani ai.

O tamaiti e i ai ni tulaga le atoatoa e masani ona faaafia ai ia latou vasega masani o le Peraimeri. A manaomia ai, ma i nofoaga e mafai ai, e mafai ona valaauina se faiaoga faapitoa e o faatasi ma i latou i le vasega pe aoao ese foi i latou. Afai e manaomia ona nofo i le fale se tamaitiiti ona o lona ma'i po o se tulaga le atoatoa, e mafai e faiaoga o le Peraimeri ona fesoasoani i tagata o le aiga o le tamaitiiti e aoao i ai lesona o le Peraimeri. E lesitala lava le tamaitiiti i le Peraimeri i lona vaitausaga ma e maka foi e le faiaoga le tamaitiiti o la e auai mai pe a tuu atu i ai se lesona.

O tamaiti e i ai ni lē atoatoa po o ni manaoga faapitoa, e masani lava ona sii mai le Peraimeri pe a aulia lo latou ta'i 12 tausaga.

Mo faamatalaga e uiga i le malamalama, faaafia ai, ma le aoao atu o tamaiti e i ai ni manaoga faapitoa, tagai i le 21.1.26 ma le disabilities. Lds.org.

11.8.7**Tupe**

O gaoioiga mo itu uma o le Peraimeri---e aofia ai le vasega pepe, aso o gaoioiga, ma le Sikauti---e faatupe uma lava mai le paketi a le uarota. O sapaalai e faatau mai mo gaoioiga, vasega, po o fonotaga o mea uma lava a le uarota. E le mo le faaaogaina e le aufaigaluega o le Peraimeri mo i latou lava po o tagata o o latou aiga.

Afai e le lava tupe o le paketi a le uarota e totogi ai le tolauapiga faaletausaga i le ao po o se gaoioiga faapena mo tamaiti ua ta'i 8 e oo ile 11, e mafai e taitai ona talosagaina tagata auai e totogi se vaega po o le tau atoa. E leai se avanoa e tatau ai ona taugata tele tupe faaalua po o femalagaiga mo tolauapiga faaletausaga i le ao po o gaoioiga faapena. E le tatau foi i le lava o tupe faaletagata ona taofia se tagata mai le auai.

E le mafai ona faaaogaina tupe a le Ekalesia e faatau ai ni toniga mo tagata taitoatasi.

Mo nisi faamatalaga e uiga i le faatupeina o gaoioiga, tagai i le 13.2.8.

11.8.8**Tagata Matutua Lelei e Toalua**

A aoao atu e tagata matutua ia tamaiti po o talavou i tulaga faale-Ekalesia, ia le itiiti ifo ma le toalua ni tagata matutua lelei e tatau ona auai. O tagata matutua e toalua e mafai o ni alii se toalua, ni tamaitai se toalua, po o se ulugalii ua faaipoipo. I tulaga e le mafai ai ona i ai ni tagata matutua se toalua i se potuaoga, e tatau i taitai ona filifili e tuufaatasi ia vasega.

12.

Aoga Sa

O le Aoga Sa o se ausilali i le perisitua. O faalapotopotoga uma lava a ausilali ua i ai e fesoasoani i tagata o le Ekalesia ia ola ia latou molimau i le Tama Faalelagi, ma le talalelei toefuataiina. O le galuega a ausilali e maua ai e tagata ia aoaoga, faamalosianga, ma le lagolagosua, a o latou taumafai e ola e tusa ai ma mataupu faavae o le talalelei.

12.1

Faamoemoega o le Aoga Sa

O tagata uma o le Ekalesia ua ta'i 12 tausaga ma matutua atu o tagata o le Aoga Sa. O i latou o isi faatuatuaga e talia foi e o mai ma auai i vasega o le Aoga Sa. O faamoemoega o le faalapotopotoga o le Aoga Sa o:

1. Faamalolosa lea o le faatuatua o tagata taitoatasi ma aiga i le Tama Faalelagi ma Iesu Keriso e ala i le aoao atu, aoao mai, ma le faaumeaina.
2. Fesoasoani i tagata o le Ekalesia e "aoao le tasi i le tasi i mataupu o le malo" (MFF 88:77) i le lotu ma le aiga.

12.2

Taitaiga o le Aoga Sa a le Uarota

O loo taulai atu leni mataupu i le taitaiga o le Aoga Sa i se ala e faamalolosa ai tagata taitoatasi ma aiga. E iloilo soo e taitai o le Aoga Sa le mataupu 3, lea o loo ootoo atu ai mataupu faavae aoao faaleautaitai. O nei mataupu faavae o loo aofia ai le saunia faaleagaga, auai i aufono, auauna atu i isi ma le aoao atu o le talalelei a Iesu Keriso.

12.2.1

Au Epikopo

O le epikopo ma ona fesoasoani e tuuina atu le taitaiga faaleperisitua mo le Aoga Sa.

O le epikopo ma ona fesoasoani e vaetofiaina le peresitene o le Aoga Sa. Na te vaavaaia foi le valaauina ma le vaetofiaina o isi tagata e galulue i le Aoga Sa. E mafai ona ia tofia ona fesoasoani e valaau ma vaetofia i latou.

E tofia e le epikopo se tasi o ona fesoasoani e vaaiia le Aoga Sa i le uarota, e aofia ai le potutusi o le falelotu. E fono e le aunoa le fesoasoani lea ma le au peresitene o le Aoga Sa. Na te tuuina atu lipoti o mataupu o le Aoga Sa ma le potutusi i fonotaga a le au epikopo.

12.2.2

Au Peresitene o le Aoga Sa a le Uarota

O le au peresitene o le Aoga Sa a le uarota o le au perisitua. Pe a talafeagai ai, o le peresitene e umia le Perisitua Mekisateko. Latou te galulue i lalo o le taitaiga a le au epikopo. Latou te mauaina aoaoga faamasani ma le lagolago faifaipea mai le au peresitene o le Aoga Sa a le siteki.

Peresitene o le Aoga Sa a le Uarota

O tiutetauave nei o le peresitene o le Aoga Sa:

E galue o ia o se tasi o le aufono a le uarota. I le aveai ai o se sui o leni aufono, e auai o ia i tau-mafaiga e fausia ai le faatuatua ma faamalolosa tagata taitasi ma aiga (tagai mataupu 4). E sau o ia i le fonotaga a le aufono a le uarota ua saunia e

fautuaina mai ni auala e mafai ai e tagata o le au paia ona faaleleia atili le aoao mai ma le aoao atu i le lotu faapea i o latou aiga. Pe a valaaulia ai e le epikopo, na te faatautaia aoaoga famasani i fonotaga a le aufono a le uarota e fesoasoani ai i le faaleleia atili o le aoao mai ma le aoao atu o le talalelei i le uarota.

Na te tuuina atu ia fautuaga i le au epikopo mo tagata o le uarota e valaau e avea ma fesoasoani i le au peresitene o le Aoga Sa, e avea ma faiaoga o le Aoga Sa, ma le tagata e vaaia le potutusi a le uarota ma se tasi e fesoasoani i ai. Afai e manaomia, na te fautuaina atu foi se tagata o le uarota e avea ma failautusi o le Aoga Sa. I le faia o nei fautuaga, e mulimuli o ia i taiala o loo i le 19.1.1 ma le 19.1.2.

Na te aoao isi taitai o le Aoga Sa i o latou tiute, e faaoga ai le tusitaulima leni e avea ma punaoa.

Peresitene o le Aoga Sa a le Uarota ma Ona Fesoasoani

E galulue faatasi sui auai o le au peresitene o le Aoga Sa e faataunuu tiutetauave nei:

Latou te vaavaaia ia taumafaiga e faaleleia le aoao mai ma le aoao atu i le Aoga Sa. I nei taumafaiga, latou te mulimuli i mataupu faave o loo i le 5.5.3 ma le 5.5.4. Latou te lagolagoia foi faiaoga o le Aoga Sa e ala i le (1) talatalanoa ma i latou i nisi taimi e taulima a latou fesili ma atugaluga ma talanoaina ni auala e tautuaina ai tagata o le vasega ma (2) faatutaga e asiasi atu ia latou vasega.

E avea i latou o ni tagata faapitoa i taumafaiga a le uarota e faaleleia atili le aoao mai ma le aoao atu o le talalelei (tagai i le 12.5).

Latou te vaaia le potutusi o le falelotu. E aofia ai le (1) aoao faamasani o tagata faatoa valaau e vaaia le potutusi, (2) tuuina atu le lagolago faifai pea ma aoaoga, ma (3) fautuaina atu se paketi faaletausaga mo le potutusi pe a uma ona feutagai ma lē e vaaia le potutusi a le uarota.

E fai e le aunoa a latou fonotaga faale-au peresitene o le Aoga Sa. Latou te auai foi i fonotaga ma le fesoasoani i le au epikopo o loo vaaia le Aoga Sa.

E tofia e le peresitene o le Aoga Sa ona fesoasoani e vaaia nisi vaega o tiutetauave. Mo se faaitaiga, e mafai ona ia faamatuu atu ia tiutetauave mo le faatutaga o vasega a le Aoga Sa mo vaitausaga eseese, aoao faamasani ia faiaoga, vaavaai le potutusi o le falelotu, ma fesoasoani i faiaoga o le Aoga Sa e faafesoatai mo ni faiaoga sui pe a manaomia. E lipoti soo atu ia fesoasoani ia te ia i a la'ua taumafaiga.

12.2.3

Faiaoga o le Aoga Sa

O faiaoga o le Aoga Sa e faiaoga i vasega e pei ona tofia ai e le au epikopo ma le au peresitene o le Aoga Sa. Latou te mulimuli i mataupu faavae o loo ootoo atu i le 5.5.4.

12.2.4

Failautusi o le Aoga Sa a le Uarota

Afai e manaomia ai, e mafai e le au epikopo ona valaau se uso e avea ma failautusi o le Aoga Sa. E mafai ona tuu atu i le failautusi tiutetauave nei:

E feutagai o ia ma le au peresitene e saunia ai le lisi o mataupu mo fonotaga a le au peresitene. E auai o ia i fonotaga a le au peresitene, tusia minute, ma siaki ia tofitofiga.

Na te tuufaatasia faamatalaga o le auai ma iloilo-ina ma le peresitene o le Aoga Sa e fesoasoani ai e fuafua ni auala e uunaia ai tagata e auai i le Aoga Sa. E tatau ona maua e faiaoga ni kopi o leni faamatalaga.

12.2.5

Peresitene o Vasega a le Aoga Sa

Faatasi ai ma le faamaoniga a le au epikopo, e mafai e le au peresitene o le Aoga Sa ona valaaulia tagata o le au paia e avea ma peresitene o vasega o le Aoga

Sa. E mafai ona avea se alii po o se tamaitai ma peresitene o le vasega. E mafai ona talosaga i latou e tuuina atu se faafeiloaiga puupuu i le amataga o le vasega, faasilasila tagata fou o le vasega ma tagata asiasi mai, ma tofi tagata o le vasega e faia le tatalo amata ma le tatalo faaiu. E mafai foi ona talosagaina i latou e fesoasoani atu i taumafaiga e siaki le auai ma faaumea mai tagata o le vasega e le o mai i aso uma o le vasega.

12.3

Fonotaga Faaleautaitai

12.3.1

Fonotaga a le Aufono a le Uarota

O le peresitene o le Aoga Sa o se sui auai o le aufono a le uarota (tagai i le mataupu e 4).

12.3.2

Fonotaga Faale-Au Peresitene o le Aoga Sa a le Uarota

E faia e le aunoa se fonotaga faale-au peresitene o le au peresitene o le Aoga Sa. O le peresitene e pulefamalumalu i le fonotaga ma na taitaia. E mafai e le failautusi ona auai, tusia minute, ma siaki ia tofitofiga.

O le lisi o mataupu e talanoaina e mafai ona aofia ai mea nei:

1. Faitau ma talanoaina mau ma aoaoga mai taitai o le Ekalesia e faatatau i o latou valaauga.
2. Talanoaina le aoga o vasega o le Aoga Sa ma fuafua ni auala e fesoasoani ai i faiaoga ma tagata o le vasega ia faaleleia atili.
3. Fuafua ni auala e tali atu ai i talosaga e fesoasoani mo le faaleleia o le aoao mai ma le aoao atu i isi faalapotopotoga o le perisitua po o ausilali.
4. Iloilo faamaumauga o le auai. Fuafua ni auala e uunaia ai le faateleina o le auai i le Aoga Sa.

12.3.3

Fonotaga ma se Fesoasoani i le Au Epikopo

E fono e le aunoa le au peresitene o le Aoga Sa ma le fesoasoani i le au epikopo o loo vaaia le faalapotopotoga o le Aoga Sa. I nei fonotaga latou te fefautuaai faatasi ai e uiga i le aoao mai ma le aoao atu i le Aoga Sa ma le uarota. E tuuina atu e le au peresitene o le Aoga Sa ia lipoti, faia ni fautuaga, ma iloilo ia fuafuaga mo fonotaga.

12.3.4

Fonotaga Faaleautaitai o le Aoga Sa a le Siteki

O fonotaga faaleautaitai o le Aoga Sa a le siteki e masani ona ta'iasi i le tausaga ona faia, e pei ona faamalamalama atu i le 18.3.11. E auai au peresitene o Aoga Sa a uarota ma failautusi. E mafai ona valaaulia ia faiaoga o le Aoga Sa ma le sui o le au epikopo ua tofi i le Aoga Sa, e auai pe a manaomia ai.

12.4

Vasega o le Aoga Sa

O vasega o le Aoga Sa e faia i le va o le sauniga faamanatuga ma le taimi ua atofaina mo sauniga a le au perisitua, Aualofa, ma Tamaitai Talavou. E 40 minute o le vasega. E faia le tatalo amata ma le tatalo faaiu i vasega taitasi. E le tau faia fua se viiga amata po o se viiga faaiu.

O le Aoga Sa e aofia ai vasega a tagata matutua ma vasega a le autalavou. O kosi ua faamaonia, e aofia ai nisi o kosi e filifili mai ai, o loo faailoa atu i *Faatonuga mo Matapu Aoainamo* le taimi nei.

12.4.1

Vasega mo le Autalavou

E masani ona faatulagaina e le au peresitene o le Aoga Sa le autalavou ua ta'i 12 e oo i le ta'i 18 i ni vasega e tusa ai ma o latou tausaga i le ao 1 o Ianuari. Mo se faaitaiga, e mafai e le au peresitene ona

faatulaga se vasega mo alii ma tamaitai talavou uma o e ua ta'i 14 pe 15 tausaga le matutua i le aso 1 o Ianuari. E nonofo ai lava le autalavou i le vasega seia oo i le tausaga e sosoo ai.

Mo faamatalaga e uiga i le Aoga Sa mo alii talavou ma tamaitai talavou pe a aulia lo latou ta'i 12 tausaga, tagai i le 11.4.3.

12.4.2

Vasega mo Talavou Matutua Nofofua

O uarota taitasi e lava ia talavou nofofua matutua e i ai, e mafai ona faia se vasega mo i latou i le taimi o le Aoga Sa. E faaoga e faiaoga ia tusitusiga paia ma tusi lesona faamaonia o le Aoga Sa, ma tuu atu le faamamafa faapitoa i mea o manaomia e talavou nofofua matutua.

12.4.3

Fesoasoani i Tagata o le Vasega e i ai Manaoga Faapitoa

Mo faamatalaga e uiga i le malamalama, faaafia ai, ma le faiaoga i tagata e i ai manaoga faapitoa, tagai i le 21.1.26 ma le disabilities. Lds. Org.

12.5

Faaleleia o le Aoao Mai ma le Aoao atu i le Uarota

O sui auai o le au peresitene o le Aoga Sa a le uarota, e galulue o ni tagata tomai faapitoa i tau-mafaiga a le uarota e faaleleia atili le aoao mai ma le aoao atu o le talalelei. Pe a valaaulia ai e le au epikopo po o taitai o le perisitua ma faalapotopotoga a ausilali, latou te tuuina atu fautuaga, aoaoga, ma le lagolago. Latou te fesoasani e aoao faamasani ia faiaoga faatoa valaauina ma faaleleia le aoao atu ma le aoao mai i a latou faalapotopotoga.

12.6

Potutusi o le Falelotu

E tatau ona tofua falelotu ma potutusi e i ai punaoa e fesoasoani ai i tagata o le au paia e aoao mai ma aoao atu le talalelei. O le au peresitene o le Aoga Sa a le uarota e vaaia le potutusi o le falelotu.

E eseese potutusi o falelotu e fuafua i le avanoa e maua. E mafai ona latou tuuina atu aitema uma nei pe na o nisi foi: tusitusiga paia, mekasini a le Ekalesia, ata ma mea tau otiovisio e gaosia e le Ekalesia, penisina, solo laupapa, penitala, pepa, seti televise, masini e ta ai DVD, ma se masini fai kopi.

E mafai e le au peresitene o le siteki ona faatagaina ia uarota, vasega inisitituti, ma nofoaga autu o tala-faasolopito o aiga, e tautau faaogaina ia punaoa o i ai i potutusi o falelotu.

12.6.1

Tausi Potutusi ma Sui Tausi Potutusi a le Uarota

O le tausi potutusi a le uarota e fesoasoani i taitai, faiaoga, ma isi tagata o le au paia ia iloa le auala e maua ai ma faaoga ia tusi, sapalai, ma masini o loo maua. Na te saunia se faasologa mo e faigaluega i le potutusi. O lea faasologa e tatau ona mautinoa ai e mafai e i latou uma e vaaia le potutusi ona auai i le sauniga faamanatuga i Aso Sa taitasi, ma e mafai e i latou uma e vaaia ona auai i le vasega o le Aoga Sa poo le sauniga a le au Perisitua Mekisateko poo le Aualofa i Aso Sa taitasi.

A manaomia ai, e galulue le tausi potutusi o le uarota ma isi uarota ma faalapotopotoga e faama-opoopo ai le faaogaina o le potutusi. Na te faatagaina ma vaaia tusi ma masini i totonu o le potutusi ma faaoga se faiga faigofie e faataga ai tagata e faaoga mea o i ai.

O sui tausi potutusi, e galulue i lalo o le taitaiga a le tausi potutusi a le uarota, ma faasoa atu i ai le tele o ona tiutetauave.

12.6.2

Taitaiga mo se Potutusi o Falelotu i se Fale e Tele Uarota e I Ai

I se fale e tele ni uarota e lolotu ai, e masani lava ona faaaoga faatasi e uarota uma le potutusi e tasi. Afai o le tulaga lea e i ai, o le epikopo e vaaia le fale e nafa ma le faamaopoopoina o le potutusi. E mafai ona ia tofia se komiti e faamaopoopoina le faaaogaina o le potutusi ma pulea tupe o le paketi e atofa atu i ai. O le komiti e tatau ona aofia ai se sui o le au peresitene o le Aoga Sa mai uarota taitasi ma le tausi potutusi mai uarota taitasi.

12.5.3

Aiaiga o Potutusi o Falelotu

O aiaiga e faataau i le potutusi o le falelotu o loo maua i lalo o le “Sunday School” i le vaega o le Serving in the Church o le LDS. Org.

12.7

Taitaiga o le aoga Sa a le Siteki

12.7.1

Au Peresitene o le Siteki

O tiutetauave o le au peresitene o le siteki e faataau i faalapopotoga a ausilali i le siteki o loo ootoo atu i le 15.1.

O le fesoasoani i le au peresitene o le siteki o loo vaaia le Aoga Sa, e vaaia foi ia potutusi o falelotu i le siteki.

12.7.2

Fautua Maualuga e Tofia i le Aoga Sa a le Siteki

O le peresitene o le siteki e tofia se sui o fautua maualuga e galulue ma le au peresitene o le Aoga Sa a le siteki. O tiutetauave o lea fautua maualuga o loo ootoo atu i le 15.3.

12.7.3

Au Peresitene o le Aoga Sa a le Siteki

O sui auai o le au peresitene o le Aoga Sa a le siteki o nisi e umia le perisitua. Pe a talafeagai ai, o le peresitene e umia le Perisitua Mekisateko. O o latou tiutetauave o ni taitai o ausilali o le siteki o loo ootoo atu i le 15.4.1. E le gata i lea, ua ia te i latou foi tiutetauave nei:

E avea i latou ma tagata faapitoa i taumafaiga a le siteki e faaleleia atili le aoao mai ma le aoao atu o le talalelei.

Latou te faamaopoopoina le faaaogaina o potutusi o falelotu i le siteki. E aofia ai:

1. Fesoasoani e aoao faamasani tausi potutusi faa-toa valaau a uarota, pe a valaaulia ai e au peresitene o Aoga Sa a uarota.
2. Faatautaia isi fonotaga faaleaoaoga mo tausi potutusi a uarota ma sui tausi potutusi i le siteki.
3. Faamautinoa o i ai i potutusi o falelotu ia punaoa ma masini latou te manaomia.
4. Faamautinoa o maua e taitai o le siteki ia risosi ma masini latou te manaomia mai potutusi o falelotu.

12.7.4

Failautusi o le Aoga Sa a le Siteki

Afai e manaomia, e mafai e le au peresitene o le siteki ona tofia se alii e aveia ma failautusi o le Aoga Sa a le siteki. O tiutetauave o le failautusi o le Aoga Sa a le siteki o loo ototoo atu i le 15.4.2.

12.8

**Fetuunaiga o le Faalapotopotoga
a le Aoga Sa i Manaoga
Faalelotoifale**

I se uarota laitiiti po o se paranesi, e mafai foi e sui o le au peresitene o le Aoga Sa ona aveia ma faiaoga.

E mafai ona tuufaatasi vasega a le autalavou pe a manaomia ai. I se iunite e laitiiti tele, o le peresitene o le Aoga Sa atonu e na o le pau lea o le taitai ma le faiaoga. I le tulaga lea, e faiaoga o ia i le vasega o le Aoga Sa mo tagata uma o le au paia ua ta'i 12 tausaga ma matutua atu. A mafai, e tatau ona valaau nisi taitai ma faiaoga.

I se siteki laitiiti po o se itu, e mafai e le peresitene o le Aoga Sa e na o le pau lea o le taitai o le Aoga Sa a le siteki po o le itu. A oo ina mafai, ua tatau ona tofia fesoasoani. E mafai foi ona valaau se failautusi o le Aoga Sa a le siteki.

Mo faamatalaga lautele e uiga i le fetuunai i manaoga faalelotoifale, tagai i le mataupu e 17.

13.

Gaoioiga

13.1

Faamoemoega o Gaoioiga a le Ekalesia

“O gaoioiga faaleuaroa, faalesiteki, ma ni siteki tuufaatasi, e aumai faatasi ai tagata o le Ekalesia o ni ‘nuu faatasi ma le au paia’ (Efeso 2:19). E faaopopo atu i le maua o ni taimi malie ma faafiafiaina, o gaoioiga e tatau ona fausia ai molimau, faamalolusia ai aiga, ma atiina ae ai le lotogatasi ma le tuputupu ae o le tagata lava ia.

O gaoioiga e faamalolusia ai tagata o le au paia e ala i le tuuina atu ia i latou o se lagona o i latou o nisi o le ekalesia ma maua ai le lagolago masani. O gaoioiga e tatau ona fesoasoani ai i tagata ia lagona lo latou fesootea atu i isi o la latou tupulaga, i o latou taitai, ma i o latou aiga. O gaoioiga foi e tatau ona fesoasoani i tagata o le au paia ia iloa o le ola i le talalelei e aumaia ai “le olioli o le au paia” (Enosa 1:3).

O gaoioiga a le ekalesia e tatau ona fuafua e faatau-nuu ai faamoemoega e taulai i le talalelei. E le gata i faamoemoega aoao o loo ta’ua i luga, ae e aofia ai foi ma:

1. Auai i galuega faatino ia e faamanuia ai isi ma fausia ai fegalegaleaiga faalenuu.
2. Atiina ae o taleni ma le talisapaia o faatufugaga faaleaganuu.
3. Faaleleia atili o le malosia ma le aoaoina o le taalo tausaaia.
4. Mauaina o le aotauina ma aoaoga faalematata.
5. Samiina o ni aso faapitoa ma le faamanatuina o mea na tutupu i le talafaasolopito o le Ekalesia po o le lotoifale.
6. Atiina ae o tomai faaleautaitai
7. Atiina ae o le faalagolago o le tagata ia te ia lava.

8. Auai i le galuega faamisiona, faatumauina, faatoagaina mai, galuega o le malumalu, ma le galuega o talafaasolopito o aiga.

13.2

Fuafuaina o Gaoioiga

13.2.1

Tiutetauave mo le Fuafuaina o Gaoioiga

A o le’i fuafuaina se gaoioiga, e iloiloina e taitai manaoga faaleagaga ma le faaletino o tagata o le au paia. E sailia e taitai le taitaiga a le Agaga e fuafua ai po o a ituaiga o gaoioiga o le a fesoasoani e taulima ai na manaoga. E tatau ona fuafuaina ma le faaete-ete ina ia faamautinoa ai e faataunuuna e gaoioiga ia faamoemoega e taulai i le talalelei ma taulima ai manaoga o i latou o loo auai.

I lalo o le taitaiga a le au epikopo, o le aufono a le uarota e vaaia le fuafuaina o gaoioiga a le uarota. Afai o se gaoioiga e mo se faalapotopotoga patino po o se vaega i le uarota, e fuafua i lalo o le taitaiga a taitai perisitua po o le ausilali o e nafa ma le faalapotopotoga. Afai o se gaoioiga e mo le uarota atoa, e mafai e le epikopo ona tofi ia tiutetauave mo le gaoioiga i se tasi pe sili atu faalapotopotoga o loo i ai o latou sui i le aufono a le uarota. E mafai ona ia tofia le tiutetauave mo se gaoioiga i isi tagata taitoatasi poo se komiti, e galulue i lalo o le faautauga a le aufono a le uarota. E masani lava o nei tofitofiga e mo se taimi le tumau mo se gaoioiga patino.

I lalo o le taitaiga a le au peresitene o le siteki, o le aufono a le siteki e vaaia le fuafuaina o gaoioiga a le siteki. Mo nisi faamatalaga e uiga i gaoioiga a le siteki, tagai i le 13.3.

13.2.2**Faamalolosia o Aiga**

E faamautinoa e taitai o gaoioiga e faamalosi ai le aiga a e le o le faatautava i ai. O nisi gaoioiga e mafai ona taulai i le aiga, e tuuina atu ai i aiga ia avanoa e auai ai faatasi. O gaoioiga e tatau ona lago-lago ai matua e ala i le aoaoina o a latou fanau ina ia aveia ma soo faamaoni o Keriso.

E faamautinoa foi e taitai e lē tele naua ni gaoioiga ma tuu atu ai ni avega e le talafeagai i luga o tagata o le au paia.

13.2.3**Faamalosiaina o le Auai Ai**

O i latou e fuafuaina gaoioiga, e taumafai ia faaauai atoatoa ia tagata, ona e sili atu ona aoga le auai e faatino nai lo le na ona matamata. O se tasi auala e uunaia ai le auai ai o le faaoga lea e tagata o a latou meaalofa, tomai, ma taleni i le gaoioiga.

O i latou e fuafuaina ia gaoioiga, e tatau ona faia se taumafaiga faapitoa e aapa atu ai i uso fou, o tagata ua le toaaga mai, autalavou, au matutua nofofua, tagata e i ai manaoga faapitoa, ma tagata o isi faatua-tuaga. E tatau ona nofouta taitai i soo se tulaga faapitoa o tagata e auai mai, e pei o ni tulaga le atoatoa faaletino, atugaluga faaleaiga, ma eseese o aganuu ma gagana.

13.2.4**Tulaga faatonuina**

O gaoioiga a le Ekalesia e tatau ona mulimuli ma aoao atu tulaga faatonuina o le Ekalesia. E tatau ona latou saunia se siosiomaga lelei e mafai ai e tagata auai ona atiina ae faigauo ma isi e tutusa o latou talitonuga ma tulaga faatonuina. O gaoioiga e tatau ona faagaecia ma faamamafa ai mea e “mama, mata-gofie, logoleleia, ma tauleleia” (Faatuatua o le Faatuatua 1:13). O gaoioiga e le tatau lava ona aofia ai ni mea e le mama pe faatosina pe foliga mai ai e talia mea leaga, ma o ni mea masani. E faamautinoa

e a iai soo se faafiafiaga lava e ogatusa ma aoaoga a le Faaola.

O lavalava ma teuga e tatau ona tauagafau, onomea, ma talafeagai ma le gaoioiga. O le au epikopo po o le au peresitene o le siteki e fuafuaina tulaga faatonuina o laei mo gaoioiga. O taitai e fuafuaina se gaoioiga e mafai ona fautuaina atu ia tulaga faatonuina o laei e ogatusa ma mataupu faavae o le talalelei.

O mea e feteenai ma le Upu o le Poto e le faatagaina i gaoioiga a le Ekalesia po o nofoaga ma meatotino a le Ekalesia. O tagata ua ilogofie e aafia i le avamalosi po o isi fualaau faasaina, e le tatau ona faatagaina i gaoioiga ale Ekalesia.

Mo nisi faamatalaga e uiga i tulaga faatonuina o le Ekalesia, tagai i le *Mo Le Malosi o le Autalavou*.

13.2.5**Saogalemu**

Tagai i le 13.6.20.

13.2.6**Paleni ma le Eseese**

E tatau i taitai ona fuafua se polokalama o gaoioiga paleni e aofia ai ni gaoioiga eseese. E tatau ona maua e tagata ni avanoa e auai i gaoioiga e tosina i ai lo latou fiafia. E tatau foi i tagata ona maua avanoa e lagolago ai isi mea latou te fiafia i ai. O le fuafuaina o se kalena faaletausaga e fesoasoani ai i taitai e faapaleni le auaunaga, faatufugaga faaleaganuu, ma gaoioiga faaletino e aunoa male soona manaomia ai fua o taimi o tagata.

O parakalafa nei o loo tuuina atu ai ni nai faataitiga o gaoioiga aoga.

Auauna atu

O gaoioiga e auaina atu ai e maua ai avanoa mo tagata e faailoa atu ai le alofa mo i latou e manaomia le fesoasoani, pe o i latou o ni tagata o le Ekalesia pe leai, ma lagona le olioli o le fesoasoani atu ia te

i latou. O nei gaoioiga e mafai ona aofia ai le asiasi atu i e o mama'i pe ua tuulafoaiina, faataunuu o tofi-tofiga faaleuelefea, faamatagofie o fale ma lotoa o le Ekalesia, ma le auai i galuega faatino i nuu.

Faatufugaga Faaleaganuu

O faatufugaga faaleaganuu e maua ai avanoa mo tagata e atiina ae a latou taleni ma mea e fiafia i ai. O nei gaoioiga e faafailele ai foi le fatufatu mea fou, mautinoa, fesootaiga, ma le galulue soosoo tau'au. E mafai ona latou faaaofia ai faaaliga taleni po o faatinoga o siva, musika, ma tala faatino. E mafai foi ona latou faaaofia ai le faamantuina o le talafaasolopito faalelotoifale o le Ekalesia.

Taaloga, Faafiafiaga, Soifua Maloloina, ma le Malosi

Mo faamatalaga e uiga i gaoioiga tau taaloga a le Ekalesia, tagai i le 13.6.21.

O gaoioiga faafiafia e mafai ona eseese e fuafua lava i punaoa o loo maua i le eria. O nei gaoioiga e mafai ona aofia ai tapenaga faamanatu o talaaga faasolopito, tolauapiga, savaliga sopo, po o le sailia o mea e fiafia e faatino. O gaoioiga faafiafia e mafai ona fuafuaina soo ina ia mafai ai ona auai faatasi ia aiga.

E fautuaina tagata o le au paia ina ia auai tagata taitasi, auai o ni aiga, ma ni vaega faale-Ekalesia, i gaoioiga e aoga e maua ai lo latou soifua maloloina ma le malosi. O nei gaoioiga e mafai ona aofia ai le savavali, tamomo'e, polokalama faamalositino eseese, vasega faale-soifua maloloina, ma toleniga mo le malosi (tagai 13.6.25, vaega 2).

13.2.7

Faatulagaina o Gaoioiga

E tatau ona fuafua mamao ia gaoioiga faale-Ekalesia i le mea e talafeagai. E tatau ona aofia i luga o kalena a le siteki ma uarota. E tatau i taitai ona faailoa i matua ia gaoioiga mo tamaiti ma le autalavou.

Afai o le a faia se gaoioiga i se falelotu po o se isi fale o le Ekalesia, ia vave faatonu le fale e i latou o loo fuafuaina ina ia le feteenai ma isi gaoioiga po o fonotaga. E tofu falelotu taitasi ma se epikopo ua tofia e le au peresitene o le siteki e vaaia. Na te vaaia le faatulagaina o taimi mo meatotino o le falelotu, e ui o lea e masani lava ona ia tofia se tasi tagata e faatinoina le faatulagaga o taimi.

Ua faasaosao lava po o Aso Gafua mo afiafi faaleaiga (tagai i le 13.6.10).

13.2.8

Faatupeina o Gaoioiga

E faamautinoa e taitai o tupe faaalu mo gaoioiga ua ogatusa lea ma le paketi o loo i ai i lena taimi faapea ai ma aiaiga faavae o mea tautupe a le Ekalesia. E faaoga i ai mataupu faavae nei.

O le tele o gaoioiga e tatau ona faigofie ma ia laitiiti le tupe pe leai foi se tupe e alu ai. E tatau ona faamaonia ia tupe faaalu e le au peresitene o le siteki po o le au epikopo a o le'i faaogaina.

O tupe o paketi a siteki ma uarota e tatau ona faaoga e totogi ai gaoioiga, polokalama, ma sapalai uma. E le tatau i tagata o le au paia ona totogi ni tupe ina ia auai. E le tatau foi ona latou tuuina mai ni mea e faaogaina, sapalai, tupe totogi e faaoga pe ulufale ai, po o ni feoa'iga mamao i ni a latou lava tupe. O ni gaoioiga e mafai ai e ni tagata se toatele o le au paia ona tuuina atu ni meaai, e mafai ona faia, pe afai e le o tuuina atu ai i tagata ni avega mamafatu.

O loo lisi atu i lalo ni faatagaga faapitoa e ono tatau ai mo le aiaiga o le faatupeina o loo i le parakalafa i luga atu. Afai e le lava tupe a le uarota e totogi ai gaoioiga nei, e mafai ona fesili atu taitai i e auai e totogi se vaega po o mea uma:

1. Se tolauapiga lautele faaletausaga e tasi a le Sikauti po o se gaoioiga faapena mo alii talavou.

2. Se toluapiga se tasi faaletausaga a tamaitai talavou po o se gaoioiga faapena.
3. Se toluapiga se tasi faaletausaga e tasi le aso po o se gaoioiga faapena mo tamaiti Peraimeri mai le 8 i le 11 tausaga.
4. Gaoioiga e filifili mai ai o loo ootoo atu i le 13.5.

Afai e le lava tupe mai i tagata auai, e mafai e le epikopo ona faatagaina se gaoioiga sailitupe se tasi faaletausaga e faia faatasi, ma ia ogatusa ma taiala o loo i le 13.6.8.

E leai se avanoa e tatau ai ona taugata tele tupe faaalu po o femalagaiga mo toluapiga faaletausaga po o gaoioiga faapena. E le tatau foi i le lava o tupe faaletagata ona taofia se tagata mai le auai.

Mo se faatagaga faapitoa e ono tatau ai i le faatupeina o ni mea tetele e fai a siteki tuufaatasi po o le eria mo talavou nofofua matutua, tagai i le 16.3.7.

Mo taiala e uiga i le faatupeina o feoaiga ona o nei gaoioiga, tagai i le 13.6.24.

13.2.9

Faatupeina o Masini ma Sapolai

Afai e mafai, o masini ma sapolai e manaomia e le uarota mo toluapiga faaletausaga a le autalavou e faatau mai lava i tupe o le paketi a le uarota. Afai e le lava nei tupe, e mafai e le epikopo ona faatagaina se gaoioiga sailitupe se tasi faaletausaga e faia faatasi, ma ia ogatusa ma taiala o loo i le 13.6.8.

O masini ma sapolai e faatau mai i tupe a le Ekalesia, pe na aumai i le paketi a le uarota pe o se gaoioiga sailitupe, e mo na o le faaaogaina lava i le Ekalesia. E le mo le faaaogaina e tagata taitoatasi po o aiga.

E le mafai ona faaaogaina tupe a le Ekalesia e faatau ai ni toniga mo tagata taitoatasi.

13.3

Gaoioiga a le Siteki, Siteki Tuufaatasi, ma le Eria

13.3.1

Taiala Lautele

O le tele lava o gaoioiga a le Ekalesia e faia i le tulaga faaleuarota. Peitai, ua fautuaina taitai o iunite ina ia faia ni gaoioiga faavaitaimi faalesiteki ma ni siteki tuufaatasi pe a sili atu i nei gaoioiga ona faataunuu ai faamoemoega o loo ootoo atu i le 13.1.

O gaoioiga faalesiteki ma siteki tuufaatasi e sili ona aoga mo le autalavou ma talavou nofofua matutua. O nei gaoioiga e sili ona taua i eria e toalaiti ai le autalavou o le ekalesia po o nofoaga foi e seasea mafuta ma ni vaega toatele o tagata o le au paia. O gaoioiga e fuafua lelei a le siteki ma siteki tuufaatasi e mafai ona maua ai e le autalavou le mautinoa i lo latou avea ai ma tagata o le Ekalesia, o se li'o lautele o faigauo, ma avanoa e feiloai ai ma ni a latou soa mo faaipoipoga i le malumalu i le lumanai.

O nofoaga e mafai e talavou nofofua matutua ona faapotopoto i ai i taimi talafeagai ma tupe faaalu, e tatau ona faia ni a latou gaoioiga eseese, faigofie e le soona faalausosooa foi. O gaoioiga tetele atu mo talavou nofofua matutua e mafai foi ona faia faavaitaimi.

O gaoioiga uma lava faalesiteki e tatau ona faamaonia e le au peresitene o le siteki ma ia faamaopoopoina i fonotaga a le aufono a le siteki. E logo mamao atu e taitai o le siteki ia taitai o uarota e uiga i gaoioiga faalesiteki. Latou te faamautinoaina foi o gaoioiga a le siteki e faaopoopo i gaoioiga a uarota ae le faatautava.

Afai e manatu ia peresitene o siteki e aoga se gaoioiga a siteki tuufaatasi i tagata o a latou siteki, e mafai ona latou talosagaina le faatagaga mai se tasi o le Au Peresitene o Fitugafulu po o le Au Peresitene o le Eria. O aso faapitoa e pei o aso malolo po o le faama-natuina o se mea taua na tupu i le lotoifale, e mafai ona maua ai avanoa mo na ituaiga o gaoioiga. O

konafesi a le autalavou (tagai 13.4), gaoioiga auuuna atu, gaoioiga o faatufugaga faaleaganuu, ma gaoioiga o taaloga po o faafiafiaga e mafai ona faia i se tulaga o siteki tuufaatasi. O nei taumafaiga e tele ina faamaopoopo i fonotaga a le aufono faamaopoopo.

Ao lei fautuaina se gaoioiga mo siteki tuufaatasi, e fuafua e peresitene o siteki pe o le auala sili lea e tali ai manaoga ua latou silafia. E silasila foi peresitene o siteki i le tau, i le taimi, ma le feoaiga o le a manaomia e le gaoioiga. E le gata i lea, e silasila ia peresitene o siteki i tulaga mautinoa o le saogalemu ma le maua o punaoa o loo manaomia.

E mafai e se tasi o le Au Peresitene o Fitugafulu po o le Au Peresitene o le Eria ona tofi ni Fitugafulu Eria po o ni peresitene o siteki e avea ma taitaifono o komiti e fuafuaina ma faatino ia gaoioiga a siteki tuufaatasi po o le eria. E mafai e au peresitene o siteki ona valaau tagata o a latou siteki e galulue i komiti nei. O sui auai nei e lipoti atu i o latou au peresitene o siteki.

O le faatupeina o gaoioiga a siteki tuufaatasi e aumai i tupe o paketi a siteki o loo auai. O le faatupeina o gaoioiga e tetele atu, e pei o faafiafiaga faaleaganuu mo faapaiaga o malumalu, e mafai ona aumai i paketi a le eria po o le laumua o le Ekalesia pe a faamaonia.

O gaoioiga a le siteki, siteki tuufaatasi, ma le eria e tataua ona ogatusa ma tulaga faatonuina o le Ekalesia ma aiaiga o femalagaaiga a le Ekalesia (tagai 13.2.4 ma le 13.6.24). O nei gaoioiga e manaomia ai le taitaiga mataalia, fuafuaina ma le faaeteete ma ia talafeagai punaoa.

13.3.2

Komiti o Gaoioiga a le Siteki

O gaoioiga a le siteki e fuafuaina e tusa ai ma taiala i le 13.2. E mafai e le au peresitene o le siteki ona faatulagaina se komiti o gaoioiga a le siteki e fesoasoani i le aufono a le siteki ma taitai o ausilali a le

siteki e fuafuaina ia gaoioiga a le siteki. O le komiti o gaoioiga a le siteki e aofia ai se taitaifono (o se fautua maualuga), tasi pe sili atu foi faatonu o gaoioiga a le siteki ma tagata tomai faapitoa mo gaoioiga (pe a manaomia).

E le gata i le fesoasoani e fuafua ia gaoioiga a le siteki, e mafai e sui auai o le komiti o gaoioiga a le siteki ona faufautua, lagolago, ma aoao ia taitai o le uarota ia latou taumafaiga e fuafua ia gaoioiga a le uarota.

E le pei o le komiti mo se taimi lē tumau lea e fuafuaina gaoioiga a le uarota, o le komiti o gaoioiga a le siteki e masani lava ona fuafuaina gaoioiga a le siteki e sili atu i le na o le tasi.

Taitaifono o le Komiti o Gaoioiga a le Siteki

Afai e faatulaga e le au peresitene o le siteki se komiti o gaoioiga a le siteki, latou te tofia se fautua maualuga e avea ma taitaifono o le komiti. Pe a fuafuaina ai e le au peresitene o le siteki, e mafai ona tuu atu tiutetauave nei i le taitaifono o le komiti.

Na te faamaopoopoina ma tausisia se kalena o gaoioiga a le siteki ia ua faamaonia e le au peresitene o le siteki.

Na te vaavaaia sui auai o le komiti a o fesoasoani e fuafua ia gaoioiga a le siteki.

Na te fautuaina atu se paketi auuili o gaoioiga a le siteki i e au peresitene o le siteki ao lei oo i le amataga o tausaga taitasi. O lenei paketi e le aofia ai ia gaoioiga e fuafuaina e ausilali a le siteki.

E avea o ia ma se punaoa i taitai o ausilali a le siteki pe a latou fuafuaina ia gaoioiga.

Na te tausisia se lisi o taleni ma mea e fiafia i ai tagata o le siteki i le taimi nei. I le faiga ma le faatumauina o lenei lisi, e mafai ona fesoasoani atu ia fautua maualuga ia te ia e tofitofi atu i uarota i le siteki. E mafai ona ia faaogaina le fomu o Sailiiliga o Taleni ma mea e Fiafia i ai mo lenei faamoemoe.

Faatonu ma Tagata Faapitoa mo Gaoioiga a le Siteki

O se tasi o le au peresitene o le siteki po o se fautua maua luga e tofia e mafai ona valaauina ni faatonu o gaoioiga a le siteki. Latou te galulue i le komiti o gaoioiga a le siteki i lalo o le taitaiga a le taitaifono o le komiti. O faatonu o gaoioiga a le siteki e mafai ona fesoasoani e fuafua ma faatulaga ia gaoioiga o auaunaga, gaoioiga o faatufugaga faaleaganuu, gaoioiga o taaloga ma le malosi, ma isi ituaiga o gaoioiga.

E mafai foi e se uso o le au peresitene o le siteki po o se fautua maua luga e tofia ona valaau ni tagata tomai faapitoa mo le komiti o gaoioiga a le siteki. O tagata tomai faapitoa e le tuuina atu mo le lagolago ina, pe vaetofiaina. Latou te galulue i lalo o le taitaiga a le taitaifono o le komiti o gaoioiga a le siteki.

13.4

Konafesi a le Autalavou

O alii talavou ma tamaitai talavou ua ta'i 14 e oo i le 18 tausaga le matutua, e valaaulia e auai faatasi i se gaoioiga po o se faasologa o gaoioiga e ta'ua o le konafesi a le autalavou. O konafesi a le autalavou e masani ona faia ta'itasi i le tausaga i le tulaga faaleuaroa po o le faalesiteki. E mafai foi ona faia i se tulaga o ni siteki tuufaatasi po o le eria.

O faamoemoega o konafesi a le autalavou o le fesoasoani ai lea i le autalavou e fausia le faatuatua ia Iesu Keriso, faamalolosia a latou molimau, atiina ae taleni, maua ni uo fou, ma fiafia faatasi ma le autalavou o ē e fefaasoai tutusa o latou talitonuga ma tulaga faatonuina. E mafai e le autalavou ona aoaoina tomai faaleautaitai a o latou fesoasoani i le fuafuaina o konafesi a le autalavou.

O konafesi a le autalavou a le uarota e fuafuaina ma faatino e le komiti talavou a le au epikopo, i lalo o le taitaiga a le au epikopo. E maua mai e le au epikopo le faamaoniga mai le au peresitene o le siteki mo fuafuaga o se konafesi a le autalavou.

O konafesi a le autalavou a le siteki e fuafua ma faatino e le komiti a le au Perisitua Arona--Tamaitai Talavou, i lalo o le taitaiga a le au peresitene o le siteki. E tatau ona valaaulia le autalavou e fesoasoani i le komiti i le tele e mafai ai i le fuafuaina o konafesi a le autalavou a le siteki. E mafai e le au peresitene o le siteki ona valaaulia le autalavou e auai i fonotaga a le komiti pe a manaomia ai.

O konafesi a le autalavou e tatau ona faatupeina mai le paketi a le siteki po o uarota. E le tatau ona talosagaina tagata e totogi ni tupe mo le konafesi a le autalavou.

A o fuafuaina e taitai ma le autalavou se konafesi a le autalavou, e tatau ona latou usitaia ia aiaiga o i le mataupu leni ma mulimuli i taiala nei:

1. Filifili se autu faaletalalelei, e pei o se mau, o le a musuia ai le autalavou ma fesoasoani ai ia latou malamalama i faamoemoega o le konafesi. E mafai ona faaoga le autu faaletausaga o le Mutuale e fai ma autu o le konafesi a le autalavou. E tatau ona faamaonia e le au epikopo po o le au peresitene o le siteki le autu.
2. Fuafua ni gaoioiga e pei o faigalotu, fonotaga faalevaega, aafiaga e aoao mai ai, ma galuega faatino o le auauna atu e ogatasi ma le autu.
3. Ia maua se faamaoniga mai le au epikopo po o le au peresitene o le siteki mo le au failauga uma ma gaoioiga. O failauga e tatau o ni tagata o le Ekalesia o e aoao atu i le Agaga. O failauga e tele lava ina faafiafia, ma na o sina pa'i faasamasamanoa i le talalelei, e le tatau ona filifilia. E le tatau foi ona filifilia ni failauga e tau malaga mamao mai. Tagai 21.1.20 mo isi taiala e faatatau i failauga.
4. Taumamao mai le faatulagaina o mea e fai i le Aso Sa ia e le talafeagai ma le aso Sapatu. O sauniga molimau, talanoaga a le au epikopo ma le autalavou, po o ni fonotaga faapena e faatagaina. Peitai, e le tatau ona faia ni sauniga faamanatuga--ma e le tatau foi ona faatinoina le faamanatuga--i fafo atu o tuaoi o le uarota po o le siteki o loo

pulefaamalumu ai taitai perisitua. O soo se tuusaunoaga lava e tatau ona faamaoniaina e se uso o le Au Peresitene o Fitugafulu po o le Au Peresitene o le Eria. E le tatau ona femalagaai le autalavou i le konafesi i se Aso Sa.

5. Ia mautinoa e lava le vaavaaiga a le au matutua e i ai i taimi uma (tagai i le 13.6.2).

E valaaulia sui o le au epikopo po o le au peresitene o le siteki e auai i le tele e mafai ai i le konafesi. E fautuaina au peresitene o Alii Talavou ma Tamaitai Talavou e auai i le konafesi atoa.

13.5

Gaoioiga e Tuu i le Faitalia

E mafai e iunite ona lagolagoina isi gaoioiga e tuuina mai e isi faalapotopotoga a le Ekalesia. O ia gaoioiga e aofia ai vaega faafiafia mai iunivesite a le Ekalesia, o polokalama faapitoa a le autalavou, ma faafiafiaga tetele faaleaganuu i nisi o taimi. Pe a faatagaina ai e se tasi o le au Peresitene o Fitugafulu poo le Au Peresitene o le Eria, e mafai ona tapa se tupe e le tele mai tagata o le au paia e totogi ai le tau o na mea pe afai (1) o le polokalama e tuu atoa i le faitalia, (2) o le tau e le o se avega mamafa, ma le (3) e le o se mea e su'e ai ni tupe. E mafai ona faaoga tupe o le paketi e fesoasoani ai ia i latou e mananao e auai atu ae le mafai ona latou totogiina.

13.6

Aiaiga ma Taiala

E faamautinoa e taitai o loo usitaia ia aiaiga nei ma taiala i gaoioiga uma a le Ekalesia.

13.6.1

Puipuia o Faalavelave ma le Tali Atu I Ai

Tagai i le 13.6.20.

13.6.2

Vaavaaiga a Tagata Matutua

Ia lava ma talafeagai le fuainumera o tagata matutua faatuatuaina e tuuina atu le vaavaaiga i taimi o gaoioiga mo tamaiti, autalavou, ma talavou nofofua matutua. O le aofaiga o tagata matutua e manaomia e fuafua lava i le toatele o le vaega, o le maualuga o le tomai o le vaega (mo gaoioiga e manaomia ai tomai patino), tulaga e ono i ai o le siosiomaga, ma le tulaga aoao o le luitau o le gaoioiga. E tatau ona fautuaina matua e fesoasoani atu.

13.6.3

Gaoioiga Faapisinisi pe Faapolokiki

O gaoioiga e faaoga ai fale ma meatotino a le Ekalesia mo soo se faamoemoega faapisinisi pe faapolokiki e le faatagaina. Mo aiaiga faavae e uiga i le faaogaina o fale o le Ekalesia ma isi meatotino, tagai i le 21.2.

13.6.4

O Mea ua Puletaofia

Tagai i le 21.1.12

13.6.5

Tulafono o Vavao

E tatau ona usitaia e gaoioiga ia tulafono o vavao a nuu ma afioaga.

13.6.6

Siva ma Musika

I siva uma lava, o laei, teuga, moli, ituaiga siva, upu o pese, ma musika e tatau ona saofagā i se siosiomaga e mafai ona afio ai le Agaga o le Alii (tagai i le *Mo Le malosi o le Autalavou*). O i latou e vaaia ia siva e tatau ona mulimuli ma le faateete i aiaiga o loo ootoo atu i lalo.

E faaogaga e taitai le fomu o le Feagaiga o Faafiafiaga pe a faatonu se faaili, aufaaili, po o se tagata faimusika ma fai tala malie. E fesoasoani leni feagaiga e faamautinoa ai e talafeagai ia amio ma musika mo siva a le Ekalesia. O i latou e saunia musika, e le tatau ona faaogaina ni upu e le talafeagai. E tatau i taitai ona faia ni fataitaiga ma ni maliega tusitusia mautu, ma le manino e faata'utino ai tagata o e saunia musika ia mulimuli i tulaga faatonuina o le Ekalesia pe a faafiafia i gaoioiga a le Ekalesia.

O le televave o le musika, e tusa pe na o mea faifaaili pe faaleo, e le tatau ona taomia ai le fati. O le maualuga o le leo e tatau ona lava le maualalo ia mafai ai e ni tagata se toalua e tutu felataa'i ona lagona e le tasi le isi, a o faia sa la'ua talatalanoaga masani.

E tatau ona lava le malamalama o moli ia iloa atu ai e tagata le isi itu o le potu. O moli taamilomilo ma moli feemoemoa'i e emoemo i le saosaoa o le musika, e le faatagaina. O moli i le fola, o tulimanu o le potu, po o moli sulu i puipui ma teuga i le faalo, e talafeagai.

13.6.7

Faigalotu mo Tagata Auai i Gaoioiga

E mafai ona fai se polokalama o se faigalotu puupuu e fai ma vaega o se gaoioiga. O faigalotu e masani lava ona aofia ai se tatalo, se viiga po o se musika, se saunoaga mai se taitai, ma se mafaufauga faaleagaga, molimau, po o se mau e saunia e se tasi pe sili atu foi o tagata e auai. O na ituaiga o polokalama e mafai ona fesoasoani e valaaulia ai le Agaga ma faataumatonu ai ia gaoioiga.

13.6.8

Gaoioiga Saili Tupe

O gaoioiga sailitupe e le masani ona faamaoniaina o na o tupe faaalu mo gaoioiga a le siteki ma uarota e totogi mai tupe o le paketi. E avea o se faatagaga faapitoa, e mafai e se peresitene o le siteki po o se

epikopo ona faatagaina se gaoioiga faasu'etupe faatasi se tasi i tausaga taitasi. E mafai ona faia gaoioiga saili tupe e saili ai tupe mo na o faamoemoega nei:

1. E fesoasoani ai e totogi le tau o le tolauapiga e tasi faaletausaga po o se gaoioiga faapena e pei ona otooto atu i le 13.2.8.
2. E fesoasoani ai e faatau ia masini e moomia e le iunite mo tolauapiga faaletausaga e pei ona otooto atu i le 13.2.9.

Afai e faia se gaoioiga sailitupe, e tatau ona tuuina atu ai se auaunaga taua ma le aoga. E tatau ona avea ma se aafiaga lelei e atiina ae ai le lotogatasi.

O foai i gaoioiga sailitupe e fai i le lotofuatiainifo. E tatau i taitai perisitua ona matuai faaeteete ia mautinoa e le lagonaina e tagata o le au paia faapea e tatau lava ona latou foai atu.

O siteki ma uarota e faia gaoioiga sailitupe, e le tatau ona faasalalauina pe talosagaina i fafo atu o o latou tuaoi. E le tatau foi ona latou faatauina atu ni oloa po o ni tautua i fale o aiga.

O ni faataitaiga o gaoioiga saili tupe e le o faatagaina e aofia ai:

1. O gaoioiga e totogi ai le lafoga.
2. O gaoioiga e totogi le faatinoina, tusa lava po o tagata faigaluega po o se konekarate.
3. O faafiafiaga lea e totogi ai e le siteki po o le uarota ia tagata faafiafia mo la latou auaunaga, pe a totogi foi le ulufale, ma pe a faamoemoe foi le gaoioiga e saili ai ni tupe.
4. O le faatauina atu o oloa po o auaunaga, e aofia ai aitema e teu ai meaa.
5. O taaloga faitupe, e pei o lulu, loto, ma le bingo.

O soo se tuusaunoaga lava o nei faatonuga e tatau lava ona faamaoniaina e se uso o le Au Peresitene o Fitugafulu po o le Au Peresitene o le Eria.

O taumafaiga sailitupe o le Friends of Scouting [Uo a le Sikauti i le Iunaite Setete] o le a faa-auau pea o se talosaga e ese mai ai, e faia i le lotofuatiaifo.

13.6.9

Inisiua

Inisiua o Taavale

Tagai i le 13.6.24.

Inisiua o le Soifua Maloloina o le Tagata ma Faalavelave

I le tele o vaega o le lalolagi, o loo maua inisiua o le soifua maloloina ma falavelave mo tagata o le Ekalesia e ala mai i polokalama saunia e pule o galuega, e le tagata lava ia, po o le malo. I atunuu e maua ai na inisiua, o le matafaioi a le tagata lava ia o le ekalesia le saili o penefiti uma e mafai ona maua mai ai pe afai e tulai mai se manu'a i le taimi o se gaoioiga a le Ekalesia.

Polokalama Fesoasoani Faafomai mo Gaoioiga a le Ekalesia

I le Iunaite Setete ma Kanata, o le Polokalama Fesoasoani Faafomai mo Gaoioiga a le Ekalesia e maua ai penefiti lona lua faafomai ma nifo ma penefiti patino mo le oti ma le toesea o se vaega o le tino. O lenei polokalama ua na ona mamauina lava e faaopoopo atu i se inisiua a le tagata lava ia mo le soifua maloloina ma falavelave, ae le faapea o le a suitulaga ai.

E ao i tagata o e fuafuaina, faafoea, ma vaavaaia ia gaoioiga i nei atunuu ona malamalama lelei e uiga i le Polokalama Fesoasoani Faafomai mo Gaoioiga a le Ekalesia, e aofia ai ona tulaga e faasaina ma tapulaa. O loo ootoo atu le polokalama i le *Church Activity Medical Assistance Handbook*, atonu e maua pe a faafesootai le

Deseret Mutual Benefit Administrators
P. O. Box 45530
Salt Lake City, UT 84150-0530
Telefoni: 1-801-578-5650 po o le 1-800-777-1647
I-meli: churchactivity@dmba.com
Uepi saite: www.dmba.com/churchactivity

Inisiua mo Faalavelave Faaletagata Lava Ia

O nofoaga e mafai ai, o i latou e vaavaaia ia gaoioiga e tatau ona puipuia i latou lava e ala i le tauaveina o ni inisiua o faalavelave ma ia lava. O ia inisiua e mafai ona maua mai e auala i inisiua a i latou e ona ia fale po o isi aiaiga.

13.6.10

Po o Aso Gafua

Ua faasaosao lava po o Aso Gafua mo afiafi faaleaiga i le Ekalesia atoa. E leai ni gaoioiga a le Ekalesia, fonotaga, sauniga o papatisoga, taaloga, po o ni a'ogamea e faia pe a te'a le 6:00p.m. i afiafi o Aso Gafua. E tatau ona taofia isi mea faalavelave i afiafi faaleaiga. E mafai ona faia se faatagaga faapitoo pe a pau le Po Faauma Tausaga i se Aso Gafua (tagai 13.6.11).

Ia faamautinoa e taitai e tapunia fale ma isi meotino a le Ekalesia i po o Aso Gafua. O 'aiga ma isi gaoioiga faapena e le tatau ona faia i fale o le Ekalesia i po o Aso Gafua. E le fautuaina foi tagata o le au paia i le faia o ni 'aiga i isi nofoaga i po o Aso Gafua.

O nofoaga e mafai ona faatino ai, atonu e mafai e tagata o le ekalesia ona fautuaina nuu ma taitai o aoga ina ia aua nei faatulagaina ni gaoioiga i afiafi o Aso Gafua ia e manaomia ai le fanau po o matua e o ese mai o latou aiga.

13.6.11

Pati i Po o Vaeluaga

A pa'ū le Po Faauma i le Aso Toonai, Aso Sa, po o le Aso Gafua, ma a fuafuaina ia gaoioiga a le Ekalesia, e tatau i taitai ona usitaia taiala nei.

Aso Toonai. E faatulagaina e le peresitene o le siteki se isi Aso Sa mo le anapogi. O siva ma isi gaoioiga faapena e faamutaina i le vaeluaga o le po, ae e mafai ona faia se meataumafa mama po o se taligasua pe a mae'a. E le tatau ona taofiofia tagata auai mo se taimi umi, ina ai mafai ai ona latou avanoa mo sauniga i le Aso Sa.

Aso Sa. (1) E mafai ona fuafua ia siva ma gaoioiga faapena mo le Aso Toonai, 30 Tesema, e faaoga ai taiala o loo i le parakalafa o i luga. (2) Nai lo le fuafuaina e iunite o le Ekalesia o gaoioiga, e mafai ona faamalosiaina aiga e faailoga la latou Po Faauma Tausaga i o latou fale. E tatau ona talafeagai gaoioiga mo le aso Sapatati. (3) E mafai ona faia sauniga faapitoa i se taimi talafeagai i le afiafi o le Aso Sa.

Aso Gafua. E fautuaina aiga uma ina ia faia a latou afiafi faaleaiga a o lei auai atu i ni faatasiga faitele. E le tatau ona faatulagaina ni gaoioiga a le Ekalesia mo le Po Faauma Tausaga i luma ole 9:00 i le po. E mafai e le peresitene o le siteki poo le epikopo ona faatagaina le faaogaina o fale o le Ekalesia i afiafi o Aso Gafua i le tulaga lea.

13.6.12

Gaoioiga e Faasoloatoa ma le Po

E manaomia le faatagaga a matua mo gaoioiga e faasoloatoa ma le po, ia e aofia ai le autalavou (tagai i le 13.6.13).

O gaoioiga e faasoloatoa ma le po mo vaega tuufaataasi o alii talavou ma tamaitai talavou po o vaega tuufaataasi a alii ma tamaitai matutua nofofua, e le faatagaina sei vagana ua faamaonia e le peresitene o le siteki ma le epikopo. O gaoioiga faapena e seasea ona faia, vagana mo na o se konafesi a le autalavou po o se malaga i le malumalu.

I gaoioiga e faasoloatoa ma le po, e faatulaga e taitai mea e momoe ai ina ia le momoe vavalalata alii ma tamaitai e auai. O taitai alii ma taitai tamaitai e tatau ona eseese fale e momoe ai. O ulugalii

faaipoipo e mafai ona momoe i le potu e tasi pe afai e i ai ni fale talafeagai.

Afai e nonofo i faleie, e le mafai e se talavou ona nofo i totonu o se faleie o se taitai matua se'i vagana (1) o le taitai o se tasi o ona matua po o se tasi e tausia o ia po o le (2) lē itiiti foi ma le toalua ni tagata matutua o le itupa lava e tasi ma le talavou, o loo i ai i le faleie.

Afai e faaoga faatasi e taitai matutua ma le autalavou ni fale mo le po, e pei o se tamai fale, e tatau a itiiti mai e toalua ni tagata matutua e i ai i le fale, ma e tatau foi ona itupa tutusa ma le talavou.

O gaoioiga e faasoloatoa ma le po e tatau ona aofia ai taitai matutua e le itiiti ifo i le toalua.

E tatau ona lava se aofai o taitai perisitua matutua e i ai i taimi uma o gaoioiga e faasoloatoa ma le po e tuuina atu le lagolagosua ma le puipuiga. I gaoioiga a Tamaitai Talavou, e tatau i taitai perisitua ona nonofo i ni fale e ese mai i tamaitai talavou.

E faatumu e taitai se fomu o le Fuafuaina o le Gaoioiga mo gaoioiga uma e faasoloatoa ma le po.

E le faatagaina ni gaoioiga e faasoloatoa ma le po i falelotu o le Ekalesia po o lotoa e i ai falelotu.

O gaoioiga e faasoloatoa ma le po i fale faipisinisi e pei o faleoloa tetele po o fale taalo, e le faatagaina. I le i ai o le faatagaga mai i taitai perisitua, e mafai ai ona faia ia siva po o isi gaoioiga i fale faipisinisi pe a manava galuega, pe a faapea e uma i le vaeluaga o le po ia gaoioiga.

13.6.13

Faatagaga a Matua

E tatau ona faailoa atu i matua po o i latou o tausia talavou, ma tuuina mai lo latou maliega pe a auai mai se talavou i se gaoioiga a le Ekalesia. E tatau ona i ai se maliega tusitusia pe afai o se gaoioiga e aofia ai le feoai i fafo atu o le eria o le lotoifale (pe a fuafuaina e taitai o le lotoifale) poo se gaoioiga foi e momoe. E mafai foi e taitai ona talosagaina se

maliega tusitusia mo isi gaoioiga, pe a latou manatu e talafeagai.

E tuuina mai e matua ma i latou e vaaia, lenei maliega e ala i le sainia o le fomu o le Faatagaga a Matua Po o Le o Loo Vaaia ma Faamatalaga Faafomai ua Faamatuu Mai. O le tagata o loo taitaia le gaoioiga e tatau ona i ai se fomu po o se pepa ua sainia mo tagata uma taitoatasi e auai mo gaoioiga taitasi lea e manaomia ai se maliega tusitusia.

13.6.14

Auai o Talavou e i Lalo o le 14 Tausaga le Matutua

O talavou e i lalo o le 14 tausaga e le masani ona auai i konafesi a le autalavou po o siva e faia e ese mai po faatulagaina o le Mutuale.

O le au epikopo po o le au peresitene o le siteki e fuafuaina po o le a le tele e mafai ona auai le autalavou e i lalo o le 14 tausaga i isi gaoioiga. E iloilo e taitai ia tulaga e pei o le leva o le po, o le mataupu o le talanoaga, o le natura o le gaoioiga, ma le matutua o tagata e auai ai.

13.6.15

Faafoligaina o le Atua

O le Atua le Tama ma le Agaga Paia e lē tatau ona faafoligaina i sauniga, tala faatino, po o musika.

Afai e faafoligaina le Faaola, e tatau ona faia ma le matuai migao ma le mamalu. E na o uso e matua tauagafau ma lelei le amio, e tatau ona fuafua mo le vaega lea. O le tagata e faafoliga i le Faaola, e le tatau ona pese pe siva. A tautala, e tatau ona ia faaaogaina tau lava o mau e sii sa'o mai ia na fetalai i ai le Faaola.

A maea le faatinoga, e le tatau i le tagata ona ofuina ana teuga i le faapaologa po o se isi lava mea. E tatau ona sui vave i ona lavalava masani.

E le tatau ona faafoligaina le Faaola e tamaiti i tala faatino se'i vagana ai ni vaaiga i lona soifua mai.

13.6.16

Tatalo i Gaoioiga

O gaoioiga uma lava e tatau ona tatala ma, pe a talafeagai ai, faaii i se tatalo.

13.6.17

Totogiina o Fale e Le o Ni Fale o le Ekalesia mo Gaoioiga

Afai e le lava ia fale o le Ekalesia mo gaoioiga a le siteki po o ni siteki tuufaatasi, e mafai ona totogiina ni fale pe a i ai le faamaoniga a le epikopo po o le peresitene o le siteki ma sui o fale ma fanua o le Ekalesia.

E mafai ona faatonuina ia iunite i le lotoifale e faaali atu se faamaoniga o le inisiua mo le puipuiga pe a totogiina pe faaaogaina ni fale e le o ni fale o le Ekalesia. E mafai e le epikopo po o le peresitene o le siteki ona maua mai se tusi faamaonia e faaalia mai ai le faamaoniga o le inisiua mai le Risk Management Division i le laumua o le Ekalesia pe mai le ofisa o le pulega ua tofia. O talosaga e tatau ona aofia ai le igoa ma le tuatusi o le o loo talosaga (e masani lava o le tagata e ona le fale), se faamatalaga ma le mea e tu ai le fale, o tapulaa o ni tulaga faaletonu e moomia, ma isi faamatalaga e taua. E ao i taitai ona vave fuafua lelei ia lava se taimi e sauniuni ai ma lafo atu ia tusi faamaonia.

13.6.18

Lipoti o le Sauaina po o le Faatautala

Afai e iloa e se taitai se sauaina po o le faatautala faaletino, faalefeusuai, pe faalelagona foi o se isi i le taimi o se gaoioiga a le Ekalesia, e tatau loa ia te ia ona faafesootai vave le epikopo. O faatonuga mo le epikopo o loo tuuina atu i le *Tusitaulima 1, 17.3.2.*

13.6.19**Tausiga o le Aso Sapati**

E leai ni mea tau taaloga e lagolagoina e le Ekalesia (e pei o taaloga, a’ogamea, po o femalagaaiga) po o mea faafiafia e pei o tolauapiga po o savaliga sopo) e tatau ona faatulagaina i Aso Sa. E le tatau foi i vaega o autalavou ma isi ona faimalaga atu pe faimalaga mai i tolauapiga po o konafesi a le autalavou i Aso Sa.

Afai o faafitauli matuia o le lamatia o le saogalemu, po o le tau o feoa’iga, e mafai e taitai ona faatulaga ni nai gaioioiga a le autalavou i Aso Sa. O na gaioioiga e tatau ona ese mai le faasologa o sauniga i le Aso Sa ma ia tausisia le agaga o le Sapati.

13.6.20**Lapataiga mo le Saogalemu ma le Tali Atu ma le Lipotia o Faalavelave****Lapataiga mo le Saogalemu**

O gaioioiga e tatau ona itiiti se tulaga e ono lamatia ai i ni manu’a poo ni ma’i ia tagata e auai ai. O gaioioiga foi e tatau ona itiiti se tulaga e ono lamatia ai le faaleagaina o meatotino. I le taimi o gaioioiga, e faia e taitai taumafaiga uma ia mautinoa ai le saogalemu. O le fuafuaina ma le mataalia ma mulimuli i lapataiga o le saogalemu, e mafai ai e taitai ona faaitiitia le tulaga lamatia o ni faalavelave.

O gaioioiga e tatau ona aofia ai aoaoga talafeagai ma le vaavaaiga e tatau ai. E tatau ona talafeagai gaioioiga mo tausaga ma le matutua o tagata e auai.

E tatau ona saunia taitai mo ni faalavelave faafuasei e ono tutupu. E tatau ona latou vave iloa pe faapefea ona faafesootai i latou e faamalosia le tulafono ma auunaga mo faalavelave faafuasei.

Tali Atu i Faalavelave

Afai e tulai mai se faalavelave po o se manu’a i luga o lotoa ma fale o le Ekalesia po o le taimi o

se gaioioiga e lagolagoina e le Ekalesia, ia usitaia e taitai taiala nei, e pei ona faatatau i ai:

1. Tuuina atu o le fesoasoani muamua. Afai e manao-mia e se tagata se tausiga faafomai i luga atu o le fesoasoani muamua faigofie, ia faafesootai le tautua faafomai mo faalavelave faafuasei, le epikopo po o le peresitene o le siteki, ma matua, lē o loo vaaia, po o le isi tagata aupito felataa’i o le aiga.
2. I se tulaga e misi ai se tagata po o se maliu, ia vave ona faafesootai taitai o leoleo o le malo ma galulue faatasi ma i latou.
3. Tuuina atu o le lagolago faalelagona.
4. Aua nei fautuaina pe le fautuaina foi se tagi e faasaga i le Ekalesia, ma aua ne’i faia ni tautinoga e fai ai ma sui o le Ekalesia.
5. Ia ao mai ma teu ni igoa o ni molimau ma faamatalaga, faamaumauga o le mea na tupu, ma ni atapu’e.

Lipotiina o Faalavelave

E tatau ona vave logo le epikopo ma le peresitene o le siteki pe afai:

1. E tulai mai se faalavelave, manu’a, po o se ma’i i nofoaga o le Ekalesia po o le taimi foi o se gaioioiga e lagolagoina e le Ekalesia.
2. Ua misi se tagata sa auai i se gaioioiga e lagolagoina e le Ekalesia.
3. E faaleagaina se meatotino a se tagata, meatotino faitele, po o le Ekalesia i le taimi o se gaioioiga na lagolagoina e le Ekalesia.

Afai na manu’a tuga se tagata pe ua misi foi, afai ua matua faaleagaina se meatotino, pe ua taufaamata’u mai se tagi i le tulafono pe faamoemoe foi e faia, e faia loa lava e le peresitene o le siteki (po o se epikopo i lalo o lana faatonuga) se tasi o mea nei:

1. I le Iunaite Setete po o Kanata, na te faafesootaia le Risk Management Division Vaega o le

Pulega o Faalavelave i le laumua o le Ekalesia (1-801-240-4049 po o le 1-800-453-3860, laina 2-4049; i le taimi ua manava galuega po o faaiuga o vaiaso, valaau le 1-801-240-1000 po o le 1-800-453-3860, ma o le a vave ona faafesootai e le talitelefoni se tagata).

2. I fafo atu o le Iunaite Setete ma Kanata, na te faafesootaia le ofisa o le eria.

E lipoti foi e taitai manu'aga ma fale po o meatotino a le Ekalesia ua faaleagaina, i le pulega o fale ma fanua.

Inisiua ma Fesili

E tatau i taitai ona iloilo le faaaogaga o le Polokalama Inisiua o Gaoioiga a le Ekalesia pe afai na tupu mai le manu'aga i le taimi o se gaoioiga, o se mea na fai, po o se tofiga e lagolagoina e le Ekalesia. Mo faamatalaga e uiga i le inisiua, tagai i le 13.6.9.

O le peresitene o le siteki (po o se epikopo i lalo o lana faatonuga) e auina atu fesili e uiga i faafitauli o le saogalemu po o ni tagi e faasaga i le Ekalesia, i le Risk Management Division Vaega o le Pulega o Faalavelave po o le ofisa o le eria.

13.6.21

Taaloga

O gaoioiga o taaloga a le Ekalesia e maua ai avanoa mo gaoioiga faaletino lelei, faaaumea, ma le taalo tusaafia. O le mea e faamamafa i taaloga a le Ekalesia o le auai, taalo faatausala, ma le atiina ae o tomai, ae le o tauvaga. E tatau ona maua e tagata uma o 'au ia avanoa i taimi uma e taaalo ai.

O le au peresitene o le siteki e faamaonia ia tulafono mo gaoioiga o taaloga e faia i totonu o la latou siteki. Afai e fai ni gaoioiga o taaloga a le eria po o ni siteki tuufaatasi, o se tasi o le au Peresitene o Fitugafulu po o le Au Peresitene o le Eria e faamaonia ia tulafono mo iunite uma e auai. E mafai ona

tagatagai i tulafono e faaoga i taaloga a aoga ma nuu i le lotoifale.

Afai e fai ni gaoioiga o taaloga a siteki tuufaatasi, e faautaitaia e tagata faapitoa mo taaloga o ē tofia e peresitene o siteki taiulu ia na tofia e se tasi o le Au Peresitene o Fitugafulu po o le Au Peresitene o le Eria. E le faatagaina ni taamilosaga o taaloga a le Eria.

O tagata e auai i taaloga e lagolagoina e le Ekalesia e le faapea e tatau ona avea ma tagata o le Ekalesia. Peitai, e tatau ona nonofo i latou i totonu o tuaoi o le Siteki ma ia malilie e mulimuli i tulaga faatonuina ma aiaiga o le Ekalesia.

O le au peresitene o le siteki e faatuina ia taiala e faama'oti atu ai tausaga e mafai ai e le au taaalo ona auai i taaloga a le Ekalesia. O nei taiala e tatau ona faitaulia ai aganuu faalelotoifale, faataatiaga faafaafanua, tulaga o a'oga, ma tulafono o loo faafoe ai faalapotopotoga o taaloga. O ia faaiuga e tatau ona faia a'o lei amataina se vaitau o taaloga ina ia malamalama ai tagata uma e aofia ai i tulafono o tausaga ma tulaga e agavaa ai.

O faalapotopotoga o taaloga a a'oga, setete, itumalo, ma atunuu e tele lava ina faia a latou tulafono e uiga i le taaalo ai i 'au a a'oga ma 'au a Ekalesia i le vaitau e tasi o taaloga. E tatau ona mautinoa e taitai o le Ekalesia ma tagata e auai i taaloga a le Ekalesia ua latou mulimulita'ia nei tulafono. O le le tausisia o nei tulafono e mafai ona taunuu i le le agavaa o 'au a a'oga ma tagata taitoatasi.

I le Iunaite Setete ma Kanata, o se tagata e i ai i se 'au taalo a se a'oga e masani lava ona le agavaa e auai i lena lava taaloga i lena foi vaitau i le polokalama o taaloga a le Ekalesia. O 'au a a'oga e aofia ai i latou e i ai i a'oga faaitumalo po o a'oga faatulagalu, a'oga maualuga ma kolisi ma iunivesite, e aofia ai a'oga a matata eseese. O nei taiala e le faaagaina mo i latou o e auai i taaloga i totonu lava o lotoa a a'oga. Afai o taaloga e lua e sosoo pe fai faatasi, e faitaulia lava o le vaitau e tasi. E fautuaina e taitai le autalavou o e taaalo i 'au a a'oga ina ia lagolago i

polokalama o taaloga a le Ekalesia i isi ala e ese mai lo le avefa ma ni tagata taaalo.

O toniga a 'au e tatau ona faigofie, taugofie, tulaga lelei, ma talafeagai mo le gaoioiga. O mitiafu lanu po o mitiafu lima pupuu e mafai ona feliiua lava lea. O toniga e tatau ona totogi i tupe o paketi a le siteki po o le uarota.

O le tauaoina atu o tau i po o ipu i 'au po o tagata taitoatasi, e le fautuaina le faia.

13.6.22

Gaoioiga e Totogi ai Lafoga

Ia faamautinoa e taitai o gaoioiga e le lamatia ai le tulaga tuusaoloto o le Ekalesia mai le totogiina o lafoga. Mo taiala, tagai i le 21.2.

13.6.23

Asiasiga i le Malumalu

O asiasiga i le malumalu e faatulagaina i le tulaga faaleuarota po o le faalesiteki i totonu mo itulagi ua atofa i ai le malumalu. E le fautuaina ni malaga faatulagaina faaleuarota i malumalu i fafo atu o le itulagi ua atofa i ai le malumalu. O ni malaga faapena e manaomia ai le faamaoniga a le au peresitene o le siteki. O ni malaga i le malumalu e momoe, e manaomia ai le faamaoniga a le au peresitene o le siteki.

O malaga i le malumalu e tatau ona ogatusa ma aiaiga mo femalagaaiga o loo i le 13.6.24. O malaga i le malumalu e momoe e tatau foi ona ogatusa ma faiga o loo i le 13.6.12.

13.6.24

Malaga

O tagata e malaga i vaega e lagolagoina e le Ekalesia, e tatau ona i ai le faamaoniga a le epikopo po o le peresitene o le siteki. O femalagaaiga mo gaoioiga e le tatau ona tuu ai se avega e le talafeagai i tagata o le au paia.

E le fautuaina ni femalagaaiga mamao mo gaoioiga. Afai e manatu le peresitene o le siteki po o le epikopo e alagataua lena faigamalaga, e manatunatu ma le agaga tatalo o ia i le aoga faaleagaga o le gaoioiga, o le tau o le femalagaaiga, ma le aafiaga i aiga ae na te lei faamaoniaina.

Afai e faamaonia se malaga i se mea mamao mo se gaoioiga, e le tatau i tagata ona faia i a latou lava tupe. O le vaega tele foi o alauni paketi a le siteki po o le uarota e le tatau ona teuina mai le tasi tausaga i le isi tausaga e totogi ai ni feoa'iga.

O faiga masani o femalagaaiga ma le faaaogaina o taiala i le vaega lena, e tatau ona laugatasia uma ai iunite i le fonofaamaopoopo lava e tasi. E mafai ona talanoaina e peresitene o siteki ma malilie ai i le laugatasia lautele o femalagaaiga i le taimi o fonotaga faamaopoopo a aufono.

E faatutumu e taitai se fomua o le Fuafuaina o le Gaoioiga mo gaoioiga e aofia ai feoa'iga i fafo atu o le eria i le lotoifale.

A i ai se gaoioiga a le Ekalesia mo le autalavou e aofia ai i feoa'iga i fafo atu o lo latou iunite, pe momoe ai foi i le po, e tatau i matua ona tuuina mai la latou faatagaga tusitusia mo a latou fanau e auai (tagai i le 13.6.13). E tatau ona i ai le vaavaaiga faatuatuaaina a tagata matutua (tagai i le 13.6.2).

A mafai, e tatau i vaega a le Ekalesia ona faaoga taavale la'u pasese ua laiseneina ma ua puipuia i se inisiua mo faalavelave.

A feoa'i vaega o le Ekalesia i taavale la'u pasese a tagata taitoatasi, e tatau ona saogalemu le tulaga o taavale taitasi, ma e tatau i tagata taitasi ona faaoga ia fusipa'u o nofoa. O avetaavale taitasi e tatau o se tagata matua faautauta, ma ua i ai se laisene. O taavale uma faapea ma avetaavale e tatau ona lava se aofaiga o le inisiua mo faalavelave tautavaale mo le puipuiga.

O faalapotopotoga a le Ekalesia, e le mafai ona latou umiaina pe faatau ni taavale po o ni pasi mo feoaiga a ni aumalaga.

E le tatau ona malaga faatasi se alii ma se tamaitai na o i la'ua i gaoioiga Faale-Ekalesia, fonotaga, po o tofiga sei vagana ua faaipoipo le tasi i le isi pe tautai nofofua foi i la'ua.

13.6.25

Gaoioiga E Le Faamaonia

E mafai e iunite o le Ekalesia ona le lagolagoina gaoioiga nei. E tatau ona silafia e taitai, matua, ma isi o loo fuafuaina pe auai i gaoioiga a le Ekalesia mea nei e faasa.

1. O gaoioiga e maualuga le tulaga lamatia o ni manu'aga po o ma'i, po o le manaomia ai foi o se tupe faaalua po o se malaga e le masani ai (tagai i le 13.6.20 ma le 13.6.24).
2. Polokalama faamalositino e i ai musika, fatuga, ofu, po o isi elemene e le ogatusa ma tulaga faatonuina o le Ekalesia.
3. Gaoioiga e aofia ai le faaaogaina o matapulepule, sei vagana ai i faatinoga o tala.
4. Siva aloaia e faailoa atu ai tamaitai talavou i le lautele, o pati e tosina mai ai se talavou i le lautele, po o gaoioiga e aofia ai le filifilia o tupu ma masiofo.
5. Soo se isi lava gaoioiga e le ogatusa ma taiala o i le mataupu leni.

Afai e i ai se epikopo e i ai se fesili e uiga i le tala-feagai o se gaoioiga pe leai, na te tuuina sa'o atu i le peresitene o le siteki. Ona lipoti atu lea e le au peresitene o le siteki i se uso o le Au Peresitene o Fitugafulu po o le Au Peresitene o le Eria.

14.

Musika

14.1

Faamoemoega o Musika i le Ekalesia

I se faaaliga i le Perofeta o Iosefa Samita, na fetalai atu ai le Alii e faapea, “Aua e olioli lo’u agaga i le pese a le lotu; ioe, o le pese a e amiotonu o le tatalo lea ia te au, ma o le a tali i se faamanuiaga i o latou luga” (MF&F 25:12).

Na saunoa le Au Peresitene Sili e faapea:

“O musika musuia o se vaega taua o a tatou sauniga faalelotu. E aumai e viiga le Agaga o le Alii, faautupuina le lagona o le migao, faalotogatasi i tatou o tagata o le ekalesia, ma tuuina mai ai ia i tatou se ala tatou te vivii atu ai i le Alii.

“O nisi o lauga aupito sili e tuuina mai i le lagiina o viiga. E uunaia i tatou e viiga ia tatou salamo ma faia galuega lelei, atiina ae le molimau ma le faautuata, faamafanafana i e vaivai, faamafanafana i e faanoanoa, ma uunaia i tatou ia tumau se’i oo i le iuga” (*Viiga*, ix).

14.2

Taitaiga o Musika a le Uarota

14.2.1

Au Epikopo

O le epikopo ma ona fesoasoani e vaaia musika a le uarota. O o latou tiutetauave nei:

Latou te valaauina ma vaetofia tagata o le uarota e galulue i valaauga o musika e pei ona otooto atu i le vaega lenci.

Latou te feutagai e le aunoa ma le taitaifono o musika a le uarota, e faamautinoa o musika ma mea faimusika e faaaoga i sauniga Lotu e talafeagai (tagai i taiala o loo i le 14.4.2).

Latou te lagolagoina se aufaipese a le uarota e ala i le faamalosiaina o tagata o le au paia e auai ma faaavanoa se taimi e le feteenai ma isi mea a le uarota e fai ai faataitaiga.

Latou te fautuaina tagata o le au paia e auai i le usuina o pese a le faapotopotoga.

Latou te fautuaina tagata e faaaoga ia musika faagaecetia lotu i o latou aiga (tagai i le 14.8).

14.2.2

Fautua o Musika a le Uarota

O se sui o le au epikopo e avea ma faufautua o musika a le uarota. Na te vaavaaia le polokalama o musika a le uarota, e fautuaina le taitaifono o musika a le uarota, ma e fai ma sui o le polokalama o musika i fonotaga faaleautaitai.

14.2.3

Taitaifono o Musika a le Uarota

E mafai ona avea se alii po o se tamaitai ma taitaifono o musika a le uarota. I lalo o le taitaiga a le faufautua o musika a le uarota, o tiutetauave nei o le taitaifono o musika a le uarota:

E avea o se punaoa i le au epikopo mo mataupu tau musika.

Faatulagaina musika aoga, talafeagai mo sauniga faamanatuga ma isi sauniga faaleuarota.

E avea o se punaoa i taitai o ausilali a le uarota i le saunia lea o aoga tau musika ma le taulimaina o isi tulaga manaomia o musika pe a talosagaina ai.

Fautuaina atu ma vaavaaia ia polokalama o aoaoga tau musika i le uarota (tagai i le 14.7).

Fautuaina atu ma faatino ia gaoioiga tau musika i le uarota pe a talosagaina ai.

E fautuaina atu tagata o le au paia e faatumuina valaauga mo musika a le uarota e pei ona talosagaina ai e le faufatua o musika a le uarota. E vaavaaia i latou o e galulue i valaauga i musika a le uarota.

E maua mai e le taitaifono o musika a le uarota ia aoaoga ma le lagolago mai le taitaifono o musika a le siteki pe a manaomia ai.

14.2.4

Faatonu o Musika a le Uarota

I lalo o le taitaiga a le taitaifono o musika a le uarota, e fautuaina atu e le taitai musika ma taitaia ia viiga a le potopotoga mo sauniga faamanatuga ma mo isi sauniga a le uarota e pei ona talosagaina. E tasi le tagata e mafai ona galue o le taitaifono o musika a le uarota ma le faatonu o musika a le uarota.

14.2.5

Ta Okeni po o le Ta Piano a le Uarota

O le ta okeni po o le ta piano a le uarota e saunia musika e muai tata i le amataga ma pe a uma foi le sauniga, ma e taina foi le laau mo viiga i le sauniga faamanatuga ma isi sauniga faaleuarota pe a talosagaina ai.

14.2.6

Taitai o le Aufaipese a le Uarota ma le Ta Laau

O le taitai o le aufaipese a le uarota e fautuaina atu musika e lagiina e le aufaipese, taitai ia faataitaiga a le aufaipese, ma taitaia ia faatinoga a le aufaipese (tagai i le 14.4.5).

O le ta laau a le aufaipese a le uarota e taina le laau mo faataitaiga a le aufaipese ma a latou faatinoga.

14.2.7

Taitai Musika a le Au Perisitua o le Uarota ma le Ta Piano po o le Ta Okeni

O le taitai musika a le au perisitua e fautuaina atu ma taitaia ia viiga mo sauniga amata i sauniga a le au perisitua.

O le ta okeni po o le ta piano e saunia musika e muai tata i le amataga ma pe a uma foi le sauniga, ma e taina foi le laau mo viiga.

14.3

Fetuunaia o Musika a le Uarota i Tulaga Faalelotoifale ma Punaoa

O taiala i le mataupu leni e mafai ona fetuunai e tusa ai ma manaoga faalelotoifale. Mo se faataitaiga, i se paranesi laitiiti, e mafai foi e le taitaifono o musika ona taitai le aufaipese ma taimia musika i le sauniga faamanatuga ma sauniga o le perisitua po o ausilali. E mafai e le ta piano ona tata i sauniga faamanatuga, aufaipese, ma sauniga perisitua ma ausilali.

A leai se tasi e taina le piano, e mafai ona faaoga punaoa nei:

1. O CD o viiga ma pese a tamaiti o loo lisi atu i le *Church Materials Catalog* ma o loo maua i Faletusi o le Ekalesia.
2. O viiga ma pese a tamaiti e mafai ona sii mai le MP3 mai le Uepi saite mo musika a le Ekalesia (music. Lds. Org).
3. O nisi falelotu ua faatotogaina i piano e i ai ki faapitoa ua i ai viiga ua uma ona faapolokalama i ai.

E mafai ona maua aoaoga tau musika ma piano feaveai mo i latou e galulue i valaauga tau musika, po o e foi atonu e galulue ai i le lumanai (tagai i le 14.7).

14.4**Musika i le Uarota**

O musika talafeagai o se vaega taua o saniga a le Ekalesia, aemaise lava i sauniga faamanatuga. O musika e filifilia ma le faaeteete ma lagiina faalelei, e mafaiona matua faateleina ai le agaga o le tapuaiga. E tatau ona tumu musika i le agaga tapuai ma ia fetau ma le agaga o sauniga. E fuafua e taitai perisitua po o le a le mea e fetau.

14.4.1**Fuafuaina o Musika mo Sauniga Tapuai i le Lotu**

O tagata o e galuue i valaauga tau musika i le uarota, e galulue faatasi e filifili ia musika talafeagai mo sauniga tapuai. A mafai, ia vave ona filifili e le epikopo ma ona fesoasoani ia autu o sauniga. O le a mafai ai e le taitaifono o musika, taitai musika, ma le taitai o le aufaipese ona fuafua ia viiga, o viiga faapitoa, ma faatinoga a le aufaipese e fetau i ai ma lagolagoina ai ia autu o sauniga. E lava ai foi le taimi mo le au epikopo e vave faamaonia ai musika e filifilia.

14.4.2**Taiala mo le Filifilia o Musika Talafeagai mo Sauniga Tapuai i le Lotu**

O musika uma a le Ekalesia e tatau ona ogatusa ma taiala nei.

O viiga o musika faavae autu ia mo sauniga tapuai ma e laugatasia mo viiviiga uma faalefaapotopotoga. E le gata i lea, e mafai ona faaoga isi musika filifilia mo musika e muai tata ma pe a mae'a sauniga, musika a aufaipese, ma lagiga faapitoa faamusika. Afai e faaoga ni lagiga faamusika faapitoa nai lo viiga, e tatau ona ogatusa ma le agaga o viiga. E tatau ona sa'o aoga faavae o 'anopese. (Tagai "Viiga mo Faapotopotoga," *Viiga*, 274--75.)

E le tatau ona suitulaga musika faalelalolagi i musika paia i sauniga i Aso Sa. O nisi o musika ua

fatuina faalelotu ma usuina i se faiga e fiafia i ai le lalolagi, e le talafeagai mo sauniga faamanatuga. E le gata i lea, o le tele o musika paia e fetau lelei mo konaseti ma faaaliga e le talafeagai mo sauniga tapuai a le Au Paia o Aso e Gata Ai.

O musika i sauniga a le Ekalesia, e le tatau ona gauai atu ai manatu i musika lava ia pe faia foi mo se faaaliga. O leni musika e mo le tapuaiga, ae le o se faaaliga.

O okeni ma piano, po o ituaiga faaeletonika, o mea faimusika laugatasia ia e faaoga i sauniga a le Ekalesia. Afai e faaoga nisi mea faimusika, e tatau ona ogatusa lo latou faaogaaga ma le agaga o le sauniga. O mea faifaaili e tulaga ese pe le fetau foi lona leo mo tapuaiga, e pei o pu ma tigipalau, e le talafeagai mo le sauniga faamanatuga.

O le taina o se piano po o se okeni, e masani ona faa-aogaina i le faamanatuga ma isi sauniga a le uarota. Afai e le o avanoa se ta piano po o se ta okeni, e mafai ona faaogaina ia lipine pu'e talafeagai (tagai 14.3).

O musika i sauniga a le Ekalesia e tatau lava ona usuina i le gagana a le faapotopotoga.

14.4.3**Elemene Faamusika Faatonuina i Sauniga Tapuai i le Lotu****Musika e Mua'i ma Mulia'i Tataina**

O musika malu e mua'i ma mulia'i tataina e faatupuina ai se lagona o le tapuaiga e valaaulia ai le Agaga i totonu o sauniga a le Ekalesia. O le ta okeni po o le ta piano e masani ona taina viiga poo isi musika talafeagai mo le lima i le sefulu minute ao le'i amatina ma pe a mae'a foi se sauniga. O le taina o viiga e mafai ona fesoasoai ai i tagata e toe iloilo ia aoga o le talalelei i o latou mafaufau.

Pesega a le Faapotopotoga

O le tele o sauniga a le Ekalesia e faaleleia atili i le usuina o viiga. O musika e maua ai le auala autu e

faaafia ai tagata i sauniga tapuai a le Ekalesia. O pesega a le faapotopotoga e iai le mana tulaga ese ae e tele ina le lava lona faaaogaina mo le fusia faatasi o tagata o le au paia a o latou tapuai faatasi. O le tele o sauniga a le Ekalesia e faaleleia atili ile usuina o viiga.

Pe a talafeagai, e mafai e se taitai perisitua ona talosagaina se faapotopotoga e tutulai mo se viiga vailauga po o se vii o se atunuu (tagai “Viiga mo Faapotopotoga,” *Viiga*, 380–81).

Musika Filifilia Faapitoa

O musika filifilia e mafai ona faatinoina e aufaipese, solo e usu toatasi ma mea fai musika taitasi, ma vaega toalaiti. E mafai ona faaoga viiga ma isi musika talafeagai (tagai 14.4.2).

14.4.4

Sauniga Faamanatuga

O le au epikopo e faamaonia ia musika mo sauniga faamanatuga. O fati maupu o musika e tatau ona paia, mamalu, ma ia talafeagai mo le sauniga faamanatuga. O musika i sauniga faamanatuga e mo tapuaiga, ae le mo ni faaaliga lea e taulai atu ai manatu i le musika lava ia.

O viiga amata ma viiga faaii, e masani lava ona usuina e le faapotopotoga (tagai “Flifiliga o Viiga Sa’o,” *Viiga*, 380). E le gata i le faaaogaina o viiga ua uma ona iloa ma fiafia i ai, ae faamalosiaina foi ia tagata ina ia faamasani i viiga fou po o viiga e tau le masani ai. E tatau i taitai musika ona taumafai ia paleni lelei viiga ua masani ma fiafia i ai ma viiga e tau le iloa (tagai “Viiga mo Faapotopotoga,” *Viiga*, 380–81).

O le viiga faamanatuga e usuina lava e le faapotopotoga. E tatau lava ona faasino i le faamantuga lava ia poo le taulaga a le Faaola. E le mafai ona suitulaga ia pese taitoatasi po o ni mea faaili e tataina i lenei viiga. E le tatau ona tataina se musika i le taimi o le tatalo, i le taimi a o tufa le faamanatuga, po o se musika foi e tata pe a maea ona tufa le faamanatuga.

E mafai ona faatulaga ni musika faapitoa po o se viiga a le faapotopotoga pe a uma le faamanatuga pe tova ai foi failauga (tagai i le Musika e Filifilia Faapitoa”i le 14.4.3).

Afai e faia se polokalama faamusika, e tatau ona faigofie, migao, ma ia lava le puupuu ina ia mafai ai ona tuuina atu se savali e fofogaina. O sauniga faamanatuga e le tatau ona tuuina atu e faia ai ni vaega fai musika mai fafo. O solo, konaseti, ma faaaliga maoae, e le talafeagai sauniga faamanatuga.

14.4.5

Aufaipese

E tatau i uarota uma ona faia se taumafaiga ia i ai se aufaipese malosia a le uarota e pepese i sauniga faamanatuga a itiiti ia taitasi i le masina. E mafai ona auai tagata o le uarota i lo latou lava lotofuatiaifo i le aufaipese, ae e mafai foi e le au epikopo ona valaaulia pe tofia i latou e auai ai.

I se paranesie laitiiti tele, atonu o se aufaipese e aofia ai le potopotoga atoa. I se uarota tele e tele ona punaoa, e mafai e le au epikopo ona valaau ni ofisa o le aufaipese, e pei o se peresitene, se failautusi, se tausi potutusi, ma taitai i vaega o le aufaipese.

E fautuaina ia aufaipese a le Ekalesia e faaoga le tusi o viiga e fai ma a latou punaoa faavae autu aua e aoao atu e viiga ia upumoni o le talalelei toefuataina. O isi faatulagaga o viiga ma isi fatuga talafeagai e mafai foi ona faaoga (tagai 14.4.2).

O faamatalaga e uiga i le faaaogaina o viiga mo aufaipese o loo maua lea i le *Viiga*, itulau 381–83). O faamatalaga faaopoopo e uiga i le taitaia o le aufaipese o loo maua i le tusi lesona o le *Conducting Course* itulau, 73–83.

E le faia ni faataitaiga leo pe a faatulaga ia aufaipese a le uarota ma le siteki. O faataitaiga e masani ona le sili atu ma le tasi le itula.

E le gata i le aufaipese a le uarota, e mafai foi ona valaaulia ia aufaipese a le Aualofa, au perisitua,

autalavou, tamaiti, ma aiga e lagiina viiga ma isi musika talafeagai i sauniga Lotu.

14.4.6

Faaogaina o Musika i le Potuaoga

O le lagiina o viiga e mafai ona avea ma auala aoga e folasia atu ai ma faamalosia ia aoga faavae o le talalelei e aogaina i le potuaoga. E tatau i taitai ona fautuaina faiaoga e faaoga viiga e faalutete ai aoga i tootnu o le potuaoga.

14.5

Taitaiga o Musika a le Siteki

14.5.1

Au Peresitene o le Siteki

O le peresitene o le siteki ma ona fesoasoani e vaai musika a le siteki. Latou te valaauina ma vaetofia tagata o le siteki e galulue i valaauga o musika e pei ona ootoo atu i le vaega lena.

14.5.2

Faufautua o Musika a le Siteki

O le au peresitene o le siteki e tofia se fautua maualuga e fai ma faufautua o musika. I lalo o le taitaiga a le au peresitene, na te vaavaaia ai le polokalama o musika i le siteki, faufautua i le taitaifono o musika i le siteki, ma fai ma sui o le polokalama o musika i fonotaga a le aufono a le siteki.

I le i ai o le faamaoniga a le au peresitene o le siteki, e mafai ona valaauina le faufautua o musika a le siteki ma vaetofia ia tagata e galulue i tofiga tau musika i le siteki.

14.5.3

Taitaifono o Musika a le Siteki

E mafai ona avea se alii po o se tamaitai ma taitaifono o musika a le siteki. I lalo o le taitaiga a le au

peresitene o le siteki, o tiutetauave nei o le taitaifono o musika a le siteki.

E avea ma punaoa i le au peresitene o le siteki i mataupu tau musika.

Faatulagaina musika ma i latou e faatinoina musika mo sauniga o konafesi faalesiteki ma isi sauniga faalesiteki ma gaoioiga e fai pe a talosagaina ai.

Pe a manaomia, na te tuuina atu aoga ma le lagoonago mo taitaifono o musika a uarota ma avea o se punaoa i taitai o ausilali a le siteki.

Fautuaina atu ma vaavaaia polokalama faaleaoga o musika i le siteki (tagai i le 14.7).

Fautuaina atu ma faatino gaoioiga tau musika pe a talosagaina ai.

14.5.4

Tagata Faapitoa mo Musika a le Siteki

E mafai ona valaau pe a manaomia ni tagata tomai faapitoa mo musika a le siteki, e aofia ai se ta okeni a le siteki. E mafai ona tofia nei tagata tomai faapitoa e saunia ni musika mo se sauniga faapitoa faalesiteki i taimi uma e fai ai lena sauniga. E mafai foi ona tofia i latou e saunia ni aoga tau musika (tagai 14.7) pe fesoasoani foi i musika mo gaoioiga faalesiteki.

14.6

Musika i le Siteki

14.6.1

Konafesi a le Siteki

O musika mo konafesi faalesiteki e tatau ona fuafuaina ma se faamoemoe e faamalolosia ai le fautuaina ma molimau. O le taitai pulefaamalumu i se konafesi na te vave iloiloina musika uma e fuafuaina mo le konafesi, i le taimi faatoa fuafuaina ai.

O musika mo le sauniga aoga o le konafesi faalesiteki e masani ona aofia ai ni viiga filifilia se fa. E

lagiina e le faapotopotoga le viiga amata ma le viiga vailauga. E mafai ona lagiina e se aufaipese isi viiga e lua, atonu e muamua i le failauga muamua male faaiuga o le sauniga. Ia le itiiti ifo i le tasi o viiga a le aufaipese o se viiga a le Au Paia o Aso e Gata Ai po o se toe faatulagaga o se viiga. O aufaipese e mafai ona aofia ai aufaipese a uarota, po o ni aufaipese faapitoa a tamaiti, autalavou, au perisitua, tuafafine o le Aualofa, po o aiga.

Mo taiala i le filifiliga o musika talafeagai, tagai i le 14.4.2.

14.6.2

Aufaipese a le Siteki ma Siteki Tuufaatasi

I le i ai o le faamaoniga a taitai perisitua, e mafai ona faatulaga ia aufaipese a siteki po o siteki tuufaatasi mo konafesi faalesiteki, konafesi faarisona, ma isi sauniga, e pei o gaioiga e fai i nuu. A maea le faatinoga, ona faataape lea o le aufaipese seia tulai mai foi nisi mea e fai. O nei aufaipese e le tatau ona faalavelave i le auai o tagata o le au paia i aufaipese a uarota.

O aufaipese tumau a nuu e taitaia ma auai ai le toatele o tagata o le Ekalesia, e le lagolagoina e le Ekalesia. E le tatau i nei aufaipese ona faaaogaina ni faaupuga e faasino i le Ekalesia e pei o le “LDS,” “Au Paia o Aso e Gata Ai,” po o “Mamona” i o latou igoa. Afai e faamaonia e taitai perisitua, e mafai e aufaipese a nuu ona faaoga ia fale o le Ekalesia mo a latou faataitai-iga ma faatinoga, pe afai latou te mulimuli i tulaga faatonuina ma aiaiga a le Ekalesia e faatatau i gaioiga ma tupe.

14.7

Aoaoga o Musika

O le aoaoina o tomaki faavae autu o musika e mafai ai e tagata o le au paia ona faaoga a latou taleni e auaua ai i le Ekalesia. I le i ai o le faamaoniga a taitai perisitua, e mafai e taitaifono o musika a siteki ma uarota ona faatulagaina ni vasega e aoao ai musika, semina, ma mafutaga faaleaoaoga. E mafai ona saunia

ni polokalama o aoaoga tau musika mo i latou o loo galulue nei i tofiga tau musika ma i latou atonu e galulue ai i le lumanai. O tagata e auai e mafai ona aofia ai taitai musika o siteki ma uarota, taitai o aufaipese, ta piano, ma ta okeni. E mafai foi ona auai tagata matutua ma talavou e fiafia i ai, e aofia ai i latou ua faamoemoe e ave ma faifeautalai. E leai se tupe e totogi mo aoaoga e lagolagoina e le Ekalesia.

O se mamanu faaletausaga mo aoaoga tau musika, e mafai ona aofia ai kosi mo le taitaia o musika, aoaoga mo taitai o aufaipese, kosi e aoao ai ki o le piano, ma kosi mo le taina o okeni i le siteki ma uarota. E mafai e taitaifono o musika ona feutagai ma taitai perisitua ma fautuaina atu ni faaoga agavaa e mafai ona tuuina atu lenei aoaoga. Afai e lei valaauina se tagata faapitoa mo musika a le siteki, e mafai ona fono faatasi ia taitai o aufaipese a uarota e fefaasoai ai manatu, e mafai foi e le au perisitene o le siteki ona talosagaina se fesoasoani mai fafo atu o le siteki.

O le Conducting Course Kit ma le Keyboard Course Kit e maua ai faatonuga i tomaki faavae autu o musika. O le tusi lesona o le *Conducting Course* o loo maua atu ai foi faatonuga mo le faatulagaina male taitaia o aufaipese. O loo lisi atu nei punaoa i le *Church Materials Catalog* ma o loo maua mai Faletusi o le Ekalesia.

Afai ua leai lava se isi auala talafeagai, e mafai e taitai o le perisitua ona faatagaina le faaaogaina o piano ma okeni o le falelotu mo faataitaiiga, mo aoaoga tuma’oti e totogiina, ma faaaliga e aofia ai tagata o le iunite o loo faaaogaina le falelotu. E leai se tupe e tatau ona totogiina e ulufale ai mo ia faaaliga.

O taitaifono o musika a uarota e fesoasoani e sailia ni avanoa e atiina ae ai musika e faaoga ai a latou taleni ma uunaia i latou ina ia faaaauu pea ona atiina ae a latou taleni.

14.8

Musika i le Aiga

E faamalosiaina e taitai perisitua ma taitai musika ia tagata o le Ekalesia e faaoga ia musika faagaetia

loto i o latou aiga, ia i ai se kopi o le tusi o viiga ma le *Tusipese a Tamaiti*, ma usuina faatasi e aiga nei musika. E faatatau i musika i le aiga, na saunoa ai le Au Peresitene Sili:

“E mafai e viiga ona aumai i aiga se agaga o le matagofie ma le filemu ma e mafai ona uunaia le alofa ma le lotogatasi i tagata o le aiga.

“Aoa lau fanau ia fiafia i viiga. Pepese ai i le Sapati, i afiafi faaleaiga, i le taimi o suesuega o tusitusiga paia, i le taimi o talosaga. Pepese ai a o outou galulue, a o outou taaalo, ma a o outou malaga faatasi. Usu viiga o ni pese faamoemoe pepe e atiina ae le faatuatua ma molimau i a outou fanau iti” (*Viiga*, x).

E mafai e tagata o le au paia ona faaoga lipine pu’e a le Ekalesia e tata ma pepese faatasi ai, ma fesoasoani ai ia i latou e aoa ia viiga ma pese a le Peraimeri. O loo lisi atu nei lipine i le *Church Materials Catalog*. E mafai foi e tagata o le au paia ona faaoga le Uepi saite a le Ekalesia (music.lds.org) e aoa ma faalogo ai i musika a le Ekalesia, aoa tomai faavae atu o musika, ma saili ai isi punaoa aoga mo musika.

E tata i matua ona fautuaina a latou fanau ina ia maua aoga o tomai faamusika, ia mafai ai e i latou ona faaoga a latou taleni e auauna ai i le Ekalesia.

E mafai e le au epikopo i nisi taimi ona tofi ia failauga o sauniga faamanatuga e lauga e uiga i le faaogaina o musika i le fale. O nisi taimi e mafai e le aiga ona usuina se viiga e fiafia i ai po o se pese o le Peraimeri e ave a o se musika fiifiliga i le sauniga faamanatuga.

14.9

Aiaiga ma Taiala Faaopoopo mo Musika

14.9.1

O Isi Musika i le Falesa

E i ai ni musika faaleaganuu ma faafiafia e ono usuina i falesa i aso aunoa. Peitai, o le fale tele mo tulaga

faaleaganuu o se vaega talafeagai lea mo na ituaiga o musika. O taitai perisitua i le lotoifale e taliina fesili po o a muska e talafeagai i le falesa. E le talafeagai ona patipati i totonu o le falesa.

14.9.2

Mauaina Mai ma le Faaogaina o Musika

E tuuina atu se uluai sapolai o tusipese mo falelotu fou. O tusipese faaopoopo, pese a aufaipese, ma isi musika e tata ona faatauina i tupe o le paketi a le siteki po o le uarota. E mafai e taitai perisitua ona valaaulia taitaifono o musika a le siteki ma uarota e tuuina atu ni paketi faaletausaga mo lenei musika. O musika e faatauina i tupe o le paketi e masani lava ona teuina i le potutusi o le falelotu ma e aia uma i ai le iunite o loo faaogaina le potutusi. E mafai e le taitaifono o musika a le siteki po o le uarota ona fesoasoani i tagata e vaaia potutusi e saunia se faasino pese e tuufaavasega ai nei musika.

14.9.3

Piano, Okeni, ma Piano Feaveai

Afai e maua se okeni, e masani lava ona faaogaina mo musika e mua’i tataina ma musika e mulia’i ona tata, ma le taina o viiga. E mafai ona faaoga se piano mo nei faamoemoeaga pe a leai se okeni po o se ta okeni.

O le faaogaina o le piano ma le okeni i le taimi e tasi e le o se tulaga faatonuina lea mo sauniga a le Ekalesia. Ae peitai, e mafai ona faaoga faatasi nei mea faimusika i nisi taimi.

E mafai ona faaoga se piano eletonika feaveai, pe a leai se piano po o se okeni.

Mauaina o Mea Faimusika

O fale o le Ekalesia e masani ona tuuina iai se okeni, o piano, po o piano eletonika feaveai. E mafai e taitai perisitua ona feutagai male Vaega e Faia Faatauga i le ofisa faauluulu o le Ekalesia po o le ofisa o le pulega ua tofia mo faamatalaga e uiga

i le mauaina mai o ni piano po o ni okeni fou po o le suia foi.

Tausia o Mea Faimusika

O le epikopo e vaaia falelotu taitasi ma le sui o le siteki mo fale ma fanua (o se fautua maualuga) e tatau ona mautinoa o loo lelei leo o piano ma okeni, tausia lelei, ma faalelei ni mea o faaletonu pe a manaomia.

14.9.4

Taiala o le Puletaofia

Tagai i le 21.1.12.

14.9.5

Musika mo Faaipoipoga

O se sauniga o le faaipoipoga e faia i le fale po o se fale o le Ekalesia atonu e aofia ai se musika e muai tataina, viiga, musika e filifilia faapitoa, ma musika e mulia'i ona tata. O sauniga o faaipoipoga faalemalo e tatau ona faigofie, faautauta, ma ia aunoa ma ni

faiga maoae faaneenee i taualumaga. Afai e faia se sauniga o le faaipoipoga i totonu o se fale o le Lotu, e le talafeagai le faia o se solo o le faaipoipoga.

14.9.6

Musika mo Maliu

Tagai i le 18.6.5.

14.9.7

Musika mo Sauniga o le Papatisoga

Tagai Elemene o se Sauniga o le Papatisoga” i le 20.3.4.

14.10

Punaoa mo Musika i le Initoneti

Mo punaoa faaopoopo, tagai i le Uepi saite a le Ekalesia mo musika (music.lds.org) ma le “Music Callings and Resources” i le vaega o le Auaunaga i le Ekalesia o le LDS. Org

15.

Faatulagaga o le Siteki

O le au peresitene o le siteki ma isi taitai o le siteki e galulue faatasi e aoao ma lagolago ia taitai o uarota. O loo otooto atu i leni mataupu le faatulagaga aoao o le siteki ma faamalamalama atu ai le sootaga i le va o ausilali a le siteki ma ausilali a uarota. O loo maua faatonuga auiliili mo le peresitene o le siteki i le *Tusitaulima 1*.

15.1

Au Peresitene o le Siteki

15.1.1

Valaau ma Vaetofia ia Taitai o le Siteki

O le peresitene o le siteki ma ona fesoasoani e valaauina ma vaetofia ia taitai e pei ona otooto atu i le Siata o Valaauga i le mataupu e 19.

15.1.2

Vaايا le Galuega a Ausilali ma Polokalama a le Siteki

O le peresitene o le siteki e vaaia lava e ia le Aualofa a le siteki. Na te tofia ona fesoasoani e vaaia isi faalapotopotoga a ausilali i le siteki: O Alii Talavou (e aofia ai le Sikauti i mea ua faataga ai), Tamaitai Talavou, Peraimeri, ma le Aoga Sa. E faamautinoa e nei fesoasoani ua aoaoina ia au peresitene o ausilali a le siteki o latou tiute.

E tofia foi e le peresitene o le siteki ona fesoasoani e vaaia taumafaiga mo gaoioiga a le siteki, talavou nofofua matutua, au matutua nofofua (pe a manaomia ai), mekasini a le Ekalesia, va i fafo (pe a manaomia ai), musika, seminare ma le inisitituti, ma fale ma fanua.

E fono foi e le aunoa ia sui auai o le au peresitene o le siteki faatasi ma au peresitene o faalapotopotoga a ausilali ua tofia i ai i latou. I nei fonotaga, e

fefautuaai faatasi ai i latou e auai e uiga i le alualu i luma ma manaoga o tagata o faalapotopotoga.

E fono foi e le aunoa ia sui auai o le au peresitene o le siteki faatasi ma komiti ma tagata faapitoa i isi polokalama, ua tofia i ai i latou.

15.1.3

Pulefaamalumalu i Aufono ma Komiti a le Siteki

O le peresitene o le siteki e pulefaamalumalu i le komiti taitai o le perisitua a le siteki ma le aufono a le siteki. E pulefaamalumalu foi o ia i fono a'oa'i. Na te tofia ona fesoasoani e pulefaamalumalu i le komiti o le Perisitua Arona–Tamaitai Talavou a le siteki, o le komiti a le autalavou matutua nofofua a le siteki, ma le komiti a le au matutua nofofua a le siteki (i nofoaga o loo faatulagaina ai).

15.2

Failautusi a le Siteki, Failautusi Fesoasoani a le Siteki, ma le Failautusi Faapitoa a le Siteki

O tiutetauave o le failautusi a le siteki, failautusi fesoasoani a le siteki, ma le failautusi faapitoa a le siteki, o loo otooto atu i le *Tusitaulima 1*, 13.3.2 e oo i le 13.3.4.

15.3

Fautua MauaLuga

E valaauina e le au peresitene o le siteki ia faitaulaga sili e 12 e faatulaga ai le aufono a fautua mauaLuga a le siteki (tagai MF&F 102:1). Afai e valaauina se tocaina e galue i le au fautua mauaLuga, e tatau ona faauuina muamua o ia e aveva ma faitaulaga sili a o lei vaetofiaina.

I lalo o le taitaiga a le au peresitene o le siteki, e fesoasoani ai fautua maualuga e vaavaaia le galuega a le Ekalesia i totonu o le siteki. E i ai o latou tiute-tauave e faufautua ma taitai ai e pei ona faamatala atu i parakalafa nei.

15.3.1

Sui i le Au Peresitene o le Siteki

O fautua maualuga e faufautua atu ma lagolagoina ia faaiuga a le au peresitene o le siteki e faauuina uso i tofi o le toeaina ma faitaulaga sili. E mafai e le peresitene o le siteki ona faatagaina fautua maualuga e fai ma ona sui pe a faauuina alii i tofi o le toeaina ma le faitaulaga sili.

E faufautua atu foi fautua maualuga ma lagolagoina ia faaiuga a le au peresitene o le siteki e tuuina atu valaauga i tagata. Mo nisi valaauga, e mafai e le au peresitene o le siteki ona faatagaina ia fautua maualuga e sui i latou i le tuuina atu o valaauga, tuuina atu tagata mo le lagolagoina, ma vaetofia ia tagata e pei ona ta'ua i le mataupu 19.

Ina ia fesoasoani ia i latou i le vaaia o le Perisitua Mekisateko, e tofia e le au peresitene o le siteki se fautua maualuga e suia i latou i korama taitasi a toeaina, vaega o faitaulaga sili, uarota, ma paranesi i le siteki. I lenei matafaioi, e aoao faamasani e fautua maualuga ia au taitai vaega faatoa valaau o faitaulaga sili ma au peresitene o korama a toeaina. Latou te tuuina atu foi le faamalosiuga faifai pea, lagolago, ma aoaoga po o faatonuga mo nei taitai e aofia ai aoaoga faavae e faavae i mataupu 1--7 o leni tusitaulima. Latou te fono e le aunoa ma nei taitai e aoao ai mea latou te manaomia, aoao i latou i o latou tiute, ma talanoaina mataupu mai le au peresitene o le siteki. Latou te auai mai lea taimi i lea taimi i fonotaga a korama a toeaina ma vaega o faitaulaga sili, e aofia ai fonotaga a le au peresitene o le korama a toeaina ma fonotaga faaleautaitai o vaega o faitaulaga sili. Latou te auai atu foi i fonotaga a au epikopo, komiti taitai o le perisitua, ma aufono a uarota pe afai e valaaulia pe tofia i ai.

E tofia e le au peresitene o le siteki ia fautua maualuga e galulue faatasi ma ausilali ma polokalama o loo lisi atu i le 5.1.2 (vagana ai ia mekasini a le Ekalesia pe afai ua tofia le failautusi faapitoa a le siteki po o se isi i leni tiutetauave). A fono se tasi o le au peresitene o le siteki ma se au peresitene o se ausilali a le siteki, e auai foi le fautua maualuga ua tofi i ai, i le fonotaga lea. E auai foi ia fautua maualuga i fonotaga faaleautaitai a ausilali o le siteki mo ausilali ua tofia i ai i latou.

E tofia e le au peresitene o le siteki ia fautua maualuga e fesoasoani i le vaauga o le galuega faamisiona ma le galuega o malumalu ma talafaasolopito o aiga i totonu o le siteki (tagai i le 5.1.9 ma le 5.4.6).

E mafai e le au peresitene o le siteki ona tofia ia fautua maualuga e sui i latou i felaugaiga i sauniga faamanatuga ma isi faatulagaga. O le au peresitene o le siteki e fuafuaina pe faafia ona fai nei felaugaiga. E le o se mea e manaomia le lauga o fautua maualuga i sauniga faamanatuga i masina uma.

15.3.2

Galue i Aufono ma Komiti a le Siteki

O fautua maualuga uma lava e i ai i le komiti taitai o le perisitua ma le aufono a le siteki.

E pei ona faatonuina ai e le au peresitene o le siteki, e auai ia fautua maualuga i fono aoai a le siteki (tagai i le *Tusitaulima 1*, mataupu e 6).

E mafai e le au peresitene o le siteki ona tofi ia fautua maualuga e galulue i isi komiti pe a manaomia ai. Mo se faataitaiga, o fautua maualuga e tofia e galulue ma korama a toeaina ma vaega o faitaulaga sili, e mafai ona fono o se komiti o le Perisitua Mekisateko. O fautua maualuga e i ai tofiga e faatatau i le Perisitua Arona e mafai ona fono o se komiti o le Perisitua Arona.

E le fono le au fautua maualuga seiloga e i ai se tasi o le au peresitene o le siteki.

15.4**Ausilali a le Siteki**

O faalapopotoga a Alii Talavou, Aualofa, Tamaitai Talavou, Peraimeri, ma le Aoga Sa o ausilali i le perisitua. E tofu le ausilali ma se au peresitene e galulue i lalo o le taitaiga a le au peresitene o le siteki. O sui auai o le au peresitene o Alii Talavou i le siteki e umia le Perisitua Mekisateko. O sui auai o le au peresitene o Alii Talavou i le siteki e umia le perisitua; a mafai, e tatau ona latou umia le Perisitua Mekisateko. O sui auai o le au peresitene o Aualofa, Tamaitai Talavou, ma le Peraimeri o ni tamaitai.

O loo otooto atu i le mataupu leni ia tiutetauave e laugatasia ai taitai o ausilali a le siteki. E le gata i lea, ae o le au peresitene o le Aualofa ma le Aoga Sa a le siteki e i ai nisi o tiutetauave e faapitoa i a latou faalapopotoga. O na tiutetauave o lo o otooto atu i le 9.8.2 ma le 12.7.3, i le faasologa lena.

15.4.1**Au Peresitene o Ausilali a le Siteki**

O tiutetauave autu o le au peresitene o ausilali a le siteki o le fesoasoani lea i le au peresitene o le siteki ma aoao atu ma lagolago au peresitene o ausilali a uarota. Latou te le faataunuuna tofitofiga ia e tatau ona faataunuui i tulaga faaleuarota po o le faaleaiga.

O tiutetauave nei o le au peresitene o ausilali a le siteki:

Latou te aoaoina faamasani ia au peresitene faatoa valaau o ausilali a uarota. Latou te tuuina atu foi le faamalosiuga faifai pea, lagolago, ma aoaoga mo le au peresitene ma faiaoga o ausilali a uarota. E tatau ona faavae nisi o a latou aoaoga i mataupu e 1--6 o i leni tusitaulima ma le mataupu mo le faalapopotoga o la latou ausilali. Latou te fonofono e le aunoa ma taitai nei ia iloa ai o latou manaoga, talanoaina manaoga o tagata o loo latou tautuaina, ma faasoia atu faamatalaga mai le au peresitene o le siteki. O nisi taimi latou te asiasi i sauniga ma vasega a uarota pe a faatulagaina ai ma taitai o uarota.

Latou te aoaoina taitai o ausilali a uarota i fonotaga faaleautaitai a ausilali a le siteki, lea e masani ona faia ta'itasi i le tausaga. Afai e le o se avega mamafa i taitai ia tulaga faalelotoifale ma taimi e femalagaai ai, e mafai e le au peresitene o le siteki ona faatagaina se fonotaga lona lua faaleautaitai i tausaga taitasi. (Tagai 18.3.11.) E mafai e epikopo ona talosagaina se aoaoga faapoopoo mo le au peresitene o ausilali a uarota.

E fefautuaai e le aunoa ia sui auai o le au peresitene o ausilali i a latou lava fonotaga faale-au peresitene. Latou te fonofono e le aunoa ma le sui o le au peresitene o le siteki o loo vaaia la latou galuega ma le fautua maualuga ua tofia i la latou faalapopotoga.

O peresitene o ausilali e i ai i le aufono a le siteki. O le avega ai o i latou ma sui auai o leni aufono, latou te auai ai i taumafaiga e fausia le faatuatua ma faamalolosiaga tagata taitaitasi ma aiga i totonu o le siteki.

I lalo o le taitaiga a le au peresitene o le siteki, o le au peresitene o le Aualofa a le siteki, Tamaitai Talavou, ma le Peraimeri i lo latou fefautuaai faatasi, e mafai ai ona latou fuafuaina se tauaofiaga se tasi pe lua a tamaitai o le siteki i tausaga taitasi mo teineiti ma tamaitai ta'i 8 tausaga ma luga atu, i le taimi o le sauniga aoao a tamaitai.

E auina atu e peresitene o ausilali ia fautuaga i le au peresitene o le siteki e uiga i tagata e mafai ona valaau e galulue i a latou faalapopotoga. I le faia o nei fautuaga, latou te mulimuli i taiala o i le 19.1.1 ma le 19.1.2.

15.4.2**Failautusi o Ausilali a le Siteki**

I lalo o le taitaiga a peresitene o ausilali a le siteki, o tiutetauave nei o failautusi o ausilali a le siteki:

Latou te saunia lisi o mataupu mo fonotaga a le au peresitene.

Latou te auai i fonotaga a le au peresitene, tusia minute, ma siaki ia tofitofiga.

Latou te tausia isi faamaumauga ma saunia lipoti pe a talosagaina e le au peresitene.

Latou te fesoasoani e saunia le paketi faaletausaga mo la latou ausilali ma le tala mo tupe faaalu.

Latou te tuuina atu aoaoga mo failautusi o ausilali a uarota e pei ona tofia ai. O leni aoaoga e mafai ona aofia ai faatonuga i le faamamauina ma le lipotia o le auai.

15.5

Tagata Faapitoa a le Siteki

E mafai e le au peresitene o le siteki ona valaau ma vaetofia ni tagata tomiai faapitoa e fesoasoani i gaioioiga (tagai i le 13.3.2), musika (tagai i le 14.5.4), uelefea (tagai i le 6.3.3), ma isi polokalama e fesoasoani ai i tagata o le siteki.

E mafai foi e le au peresitene o le siteki ona valaau ma vaetofia ia tagata tomiai faapitoa mo le va i fafo e fesoasoani e faateleina le silafia lelei o le Ekalesia ma

fausia sootaga o faigauo ma le malamalama i le nuu. O faamatalaga mo tagata faapitoa mo le va i fafo o loo maua i le vaega o le Auaunaga i le Ekalesia LDS .org. O nei tagata tomiai faapitoa e galulue i lalo o le taitaiga a le faatonu o le va fealoai a le siteki.

15.6

Fetuunaiga i Manaoga Faalelotoifale

Afai o le mamao, tologi o feoa'iga, auala o fesootaiga, po o punaoa faaleautaitai ua faigata ai le faatautaiga o polokalama a le siteki, e mafai e le au peresitene o le siteki ona fetuunai ia taiala i le mataupu leni. O le faia o lena mea, latou te faamautinoa ua maua e taitai o le uarota le aoaoga latou te manaomia.

O faamatalaga lautele e uiga i le fetuunai o valaauga ma faalapotopotoga o loo maua i le mataupu 17. O faatonuga e patino i korama o le perisitua ma faalapotopotoga a ausilali o loo maua i le 8.16, 9.9, 10.11, 11.7, ma le 12.8.

Tagata Nofofua

O se vaega toatele naua o le faitau aofai o le Ekalesia, o alii ma tamaitai e le'i faaipoipo po ua tatala foi ia faaipoipoga pe ua maliliu taitoalua. Ia aapa atu taitai perisitua ma ausilali i tagata nei o le ekalesia ma faaaofia mai i latou i le galuega a le Ekalesia. O tagata nofofua agavaa e tatau ona tuu atu i ai avanoa e umia ai tulaga faaleautaitai ma faiaoga, e aofia ai tulaga o au peresitene i korama a toeaina, au taitai vaega o faitaulaga sili, ma au peresitene o ausilali.

E lagolago atu taitai i tagata nofofua o le ekalesia e ala i le fesoasoani atu ia te i latou e faalatalata atili i le Alii, faamalolosa a latou molimau, ma tauaveina le tiutetauave mo o latou lava soifua manuia faaleagaga, agafesootai, ma le faaletino.

I le auauna atu i tagata nofofua o le ekalesia, e saili atu taitai e faamalolosa le olaga faaleaiga, ae le o le faatauva i ai po o le aveesea mai. Latou te aoao atu ma molimau atu i le taua o le faaipoipoga ma le perisitua. Tusa lava foi pe le o nonofo talavou nofofua matutua ma o latou matua, e fautuaina lava e taitai o le Ekalesia i latou ia ava ma atiina ae a latou sootaga ma o latou matua. E lagolagoina foi e taitai matua nonofo taitoatasi ia latou taumafaiga e aoao atu ma faafailele a latou fanau.

Ua vaevaeina tagata nofofua i ni vaega se lua: au matutua nofofua (ta'i 31 tausaga ma luga atu) ma talavou matutua (ta'i 18 tausaga–30).

16.1

Auauna Atu i le Au Matutua Nofofua o le Ekalesia (Ta'i 31 Tausaga ma Luga Atu)

E fautuaina e taitai le au matutua nofofua o le ekalesia ua ta'i 31 tausaga ma matutua atu e auai i

gaoioiga masani ma polokalama faifai pea a a latou siteki ma uarota faavae. E mafai ona maua mai i nei siteki ma uarota se anoanoai o aafiaga faale-Ekalesia ma e mafai foi ona maua ai avanoa e auauna atu ai, faiaoga, taitai, ma mafuta ma tagata o soo se matutua. O uarota faavae masani e mafai foi ona faamalolosa le taua o le matafaioi a le aiga ma le auaiga i le fuafuaga o le talalelei. I se faatagaga faapitoa, e mafai e le peresitene o le siteki ona fautuaina le fatuina o se uarota a le au nofofua mo le au matutua nofofua ua ta'i 31 i le 45 e tusa ai ma taiala o i le *Tusitaulima 1*, 9.1.9.

E tatau i taitai ona faia ni taumafaiga faapitoa ia malamalama ai ma taulima manaoga o le au matutua nofofua. E tatau i taitai ona silafia e eseese tulaga ma mea e fiafia i ai le au matutua nofofua. E tatau foi i taitai ona nofouta e iai taimi e ese ai lagona o le au matutua nofofua pe a o i gaoioiga ma vasega e taulai i aiga.

16.1.1

Taitaiga o le Au Matutua Nofofua a le Siteki

E saili le au peresitene o le sieki ia malamalama i manaoga o le au matutua nofofua ma saunia ni auala e taulima ai na manaoga. E mafai e le au peresitene o le siteki ona fuafua faapea e manaomia e le au matutua nofofua i le siteki ni avanoa e potopoto faatasi ai mo se auaunaga, aoaoina o le talalelei, ma agafesootai i luga atu o le mea o loo faia i a latou uarota.

E mafai ona tofia e le peresitene o le siteki se tasi o ona fesoasoani e vaaia le galuega ma le au matutua nofofua. E mafai e le peresitene o le siteki ona tofi se fautua maualuga e fesoasoani i lenei galuega. E mafai foi ona tofia le sui lava lea o le au peresitene o le siteki ma le fautua maualuga foi lava lea e galulue ma le au matutua nofofua.

16.1.2**Komiti o le Au Matutua Nofofua a le Siteki**

E mafai e le au peresitene o le siteki ona faatulaga se komiti a le au matutua nofofua i le siteki. O se fesoasoani i le au peresitene o le siteki e pulefaamalumu i lenei komiti. O le komiti e aofia ai foi ma se fautua maualuga, se tasi o le au peresitene o le Aualofa a le siteki, ma nisi o le au matutua nofofua. E masani lava o lenei komiti e faatulaga ese mai le komiti a talavou nofofua matutua a le siteki.

E fono le komiti pe a manaomia ai. E mafai e sui auai o le komiti ona fuafua ni auala e maua ai e le au matutua nofofua ia avanoa e potopoto faatasi ai mo auunaga, aoaoina le talalelei, ma agafesootai i luga atu o mea o loo faia e a latou uarota.

16.1.3**Gaoioiga a Siteki Tuufaatasi**

A mafai e gaoioiga a siteki tuufaatasi ona maua ai e le au matutua nofofua ia avanoa manaomia mo le auunaga, avanoa faaleautaitai, ma fegalegaleaiga faaagafesootai, ona galulue lea o Fitugafulu Eria ma peresitene o siteki e faavae ni komiti e fuafuaina ma faatulagaina na gaoioiga.

16.1.4**Auai i Gaoioiga a le Au Matutua Nofofua**

O le auai i gaoioiga a le au matutua nofofua, e na o le au matutua lava, o taitai o le Ekalesia e tofia i ai, ma le au matutua nofofua e le auai i le ekalesia ae ua naunau e tausia tulaga faatonuina o le Ekalesia. O se tagata ua nonofo valavala ma sona toalua pe o faagasolo foi le tatalaina o se faaiipoipoga, e le tatau ona auai seia mae'a lelei ona tatala le faaiipoipoga e tusa ai ma le tulafono.

16.1.5**Afiafi Faaleaiga Fai Faavaega**

E mafai e le au epikopo ona faatulaga se afiafi faaleaiga fai faavaega se tasi pe sili atu foi mo tagata nofofua e leai ni fanau i le fale, ma e le o nonofo foi ma o latou matua. O nei vaega e le ta'ua faapea o ni auai.

16.2**Auauna Atu i Talavou Nofofua Matutua o le Ekalesia (Ta'i 18 Tausaga i le 30)**

E galulue pea lava pea ia taitai o siteki ma uarota ia iloa, saili, ma leoleo talavou nofofua matutua i auala nei:

Latou te fesoasoani i talavou nofofua matutua e saili ma faaumea i latou o a latou tupulaga, o e ua le toaaga mai i le Lotu.

Latou te faia ni avanoa mo talavou nofofua matutua e fegalegaleai ai faatasi i auunaga 'anoa, aoaoina o le talalelei, ma gaoioiga faaagafesootai. O se faamoemoga autu o nei gaoioiga o le fesoasoani lea i talavou nofofua matutua e saili ni paaga faaiipoipo ma sauniuni e faaiipoipo i le malumu ma tausia ni aiga amiotonu.

Latou te lagolagoina talavou nofofua matutua i le faataunuina o a latou sini aoga faaletagata lava ia, ma le faia o faaiuga e uiga i faaiipoipoga, a'oga, matata, ma tupe.

Latou te faamautinoaina ua tofu ia talavou nofofua matutua uma ma se kopi o le *Faamaoni i le Faatua-tua: O Se Tusitaiala o le Talalelei*. E faamalosiaina talavou nofofua matutua e faaoga le tusi e fai ma punaoa a o latou suesue i mataupu faavae o le talalelei, saunia lauga, faiaoga i vasega, ma tali i fesili e uiga i le Ekalesia.

16.3**Talavou Nofofua Matutua i Siteki ma Uarota Faavae Masani****16.3.1****Taitaiga i le Siteki**

O le taitaiga a le au peresitene o le siteki e matu'ai taua lava i le taumafaiga e auaina atu i talavou nofofua matutua. O talavou nofofua matutua e tele lava ina feoa'i. Atonu e le tutusa le toatele o latou i uarota i le siteki, ma atonu e faigata ona maua i latou. Ona o nei luitau, o avanoa mo fegalegaleaiga faaagafesootai, aoaoina o le talalelei, ma le auu-naga e tele taimi e sili ai ona aoga i le tulaga faalesiteki po o siteki tuufaatasi.

O lana faatalatalanoaga masani ma epikopo taitasi, e fesili atu ai le peresitene o le siteki mo se lipoti i le alualu i luma o talavou nofofua matutua i le uarota a le epikopo.

E tofia e le peresitene o le siteki se tasi o ona fesoasoani e vaaia le galuega ma talavou nofofua matutua i le siteki. E tofia e le peresitene o le siteki se fautua maualuga e fesoasoani i leni galuega.

E mafafauina ma le agaga tatalo e taitai o le siteki po o a polokalama ma gaoioiga o le a sili ona taulima ai manaoga o talavou nofofua matutua i le siteki. E i ai vaega e filifili ai o loo lisi atu i le 16.3.5.

E ui o le toatele o talavou nofofua matutua e nonofo i a latou uarota faavae masani (e toatele e faatasi ai ma o latou matua), e mafai e taitai perisitua ona fautuaina le faatulagaina o se uarota a talavou nofofua matutua, pe a tulai mai le manaomia o leni mea ona o tulaga o i ai (tagai i le 16.4).

16.3.2**Komiti a Talavou Nofofua Matutua a le Siteki**

O se fesoasoani i le au peresitene o le siteki e pulefaamalumu i le komiti a talavou nofofua matutua

a le siteki. O le komiti leni e aofia ai foi le fautua maualuga ua tofia i talavou nofofua matutua, o se sui auai o le au peresitene o le Aualofa a le siteki, o se ulugalii na valaau e avea ma faufautua o talavou nofofua matutua, ma taitai o talavou matutua mai uarota taitasi. Afai e leai ni taitai o talavou nofofua matutua a uarota, e valaauina isi talavou nofofua matutua agavaa e galulue ai i le komiti. E masani lava e faatulaga ese le komiti lea mai le komiti a le au matutua nofofua a le siteki.

E fono le komiti pe a manaomia ai. E mafai e sui auai o le komiti ona fuafua ni auala e maua ai e le autalavou matutua nofofua ia avanoa e potopoto faatasi ai mo auu-naga, aoaoina o le talalelei, (tagai *Tusitaulima 1*, 11.2.2), ma fegalegaleaiga faaagafesootai i luga atu o mea o loo faia e a latou uarota (tagai 16.3.5). A o latou fuafuaina ia gaoioiga a talavou nofofua matutua, latou te tausia le taulai atu i le tuputupu ae faaleagaga ma le auu-naga, ae le na o aafiaga faaagafesootai. I eria e le o i ai se nofoaga mo polokalama faainisitituti, o le komiti lea e taulimaina manaoga ia e masani ona faia e le aufono faufautua a le inisitituti.

E fesoasoani le komiti e faamautinoa o loo lelei ona faagaoioia ia komiti a talavou nofofua matutua a uarota i nofoaga ua faatulagaina ai.

16.3.3**Au Taitai o le Uarota****Au Epikopo**

Ina ia malamalama ma taulima ia manaoga o talavou nofofua matutua i le uarota, e faatalanoa e se tasi o le au epikopo ia talavou nofofua matutua taitoatasi ia le itiiti ifo i le ta'i tausia. E galulue le au epikopo ma le aufono a le uarota e sailia ni valaauga 'anoa mo talavou nofofua matutua uma. E mafai foi e le au epikopo ona faatulaga se komiti talavou nofofua matutua a le uarota.

O se fesoasoani i le au epikopo na te vaaia ia talavou nofofua matutua i le uarota. Na te mauaina mai ia

lipoti masani mai fesoasoani i le korama a toeaina ma le au peresitene o le Aualofa o e ua tofia e galulue ma talavou nofofua matutua i le uarota. E mafai ona ia tuuina atu se lipoti e uiga i ni talavou nofofua matutua patino.

Fesoasoani o le Korama a Toeaina ma le Aualofa ua Tofia i Talavou Nofofua Matutua

E tofia e le peresitene o le korama a toeaina ma le peresitene o le Aualofa se fesoasoani e taimua i tau-mafaiga a latou faapotopotoga e vaavaaia ia talavou nofofua matutua. E talatalanoa nei fesoasoani ma talavou nofofua matutua i nisi taimi e tuu atu ai le faamalosiuga ma le fesoasoani. Latou te tuuina atu i le fesoasoani o le au epikopo ua tofia, ia faamatalaga e uiga i talavou nofofua matutua e faavae ia latou fesoootaiga ma faiaoga o aiga ma faiaoga asiasi ma a latou lava asiasiga. Latou te tuuina atu foi le lipoti i le peresitene o le korama a toeaina po o le peresitene o le Aualofa. E mafai e le peresitene o le korama a toeaina ma le peresitene o le Aualofa ona lipoti atu nei taumafaiga i le fonotaga a le aufono a le uarota.

Taitai o Talavou Nofofua Matutua

I se uarota e lava le aofai o talavou nofofua matutua, e mafai e le au epikopo ona valaau se alii talavou nofofua matua ma se tamaitai talavou nofofua matua e avea ma taitai o talavou nofofua matutua. E lipoti atu nei taitai i se fesoasoani o le au epikopo. E i ai foi i la'ua i le komiti a talavou nofofua matutua a le uarota pe afai ua faatulaga se komiti. Latou te fono ma le au peresitene o le Aualofa, e faamautinoa o loo fesoasoani tofitofiga o faiaoga o aiga ma faiaoga asiasi e taulima ai manaoga o talavou nofofua matutua. E mafai ona tofia i la'ua e galulue i le komiti a talavou nofofua matutua a le siteki.

Faufautua o Talavou Nofofua Matutua

E mafai e le au epikopo ona valaau se ulugalii agavaa ua faaipopo e fai ma faufautua i talavou nofofua

matutua a le uarota. O nei faufautua e lipoti atu i se fesoasoani i le au epikopo. E galulue i la'ua i le komiti a talavou nofofua matutua a le uarota pe afai ua faatulaga se komiti. E mafai foi ona tofia i la'ua e galulue i le komiti a talavou nofofua matutua a le siteki. E fesoasoani i la'ua ia maua avanoa e talavou nofofua matutua e faapotopoto ai mo fefaaauo'iga, auaunaga, ma le aoaoina o le talalelei.

16.3.4

Komiti a Talavou Nofofua Matutua a le Uarota

I se uarota e toatele se aofai o talavou nofofua matutua, e ono lagona e le peresitene o le siteki ma le epikopo ua manaomia se komiti a talavou nofofua matutua a le uarota. O se fesoasoani i le au epikopo e pulefaamalumalu i le komiti. O isi sui auai o le komiti e aofia ai fesoasoani o le korama a toeaina ma le Aualofa ua tofia i talavou nofofua matutua, o taitai o talavou nofofua matutua, ma le ulugalii na valaau e avea ma faufautua o talavou nofofua matutua.

E fono lenei komiti pe a manaomia. E talanoaina e sui auai o le komiti ia auala e fesoasoani alii talavou nofofua matutua ia auai i auaunaga, taitaiga, aoaoina o le talalelei, ma gaoioiga faaagafesootai. Latou te sailia foi ma faaumea mai talavou nofofua matutua ua le toaaga mai.

16.3.5

Sauniga, Vasega, ma Gaoioiga (Siteki ma le Uarota)

E tatau lava ona ofoina atu i talavou nofofua matutua ni gaoioiga eeseese o le aoaoina o le talalelei, auaunaga, faaleaganuu ma agafesootai ia e mafai ona faia i le tulaga faaleuarota, siteki, po o siteki tuufaatasi. O nei gaoioiga e mafai ona aofia ai ni malaga i le malumalu, semina sauniuni mo le perisitua po o le malumalu, galuega faamisiona, auaunaga i nuu, aufaipese, mea faaleaganuu, siva, ma taaloga.

I le lagolagoina ai e le komiti a talavou nofofua matutua a le siteki ma taitai o uarota, e faavae ai e le au peresitene o le siteki ni fonotaga, vasega, ma gaoioiga o le a sili ona taulima ai manaoga o sui auai o talavou nofofua matutua. Latou te fuafuaina foi pe tatau ona faia i le tulaga faleuarota ia gaoioiga, tulaga faalesiteki, po o sina su'ifefiloi o mea ia e lua.

O gaoioiga a talavou nofofua matutua e tatau ona ogatasi ma aiaiga ma taiala o loo i le mataupu 13. O le auai i nei gaoioiga e na o talavou nofofua matutua lava, o taitai o le Ekalesia ua tofia, ma talavou nofofua matutua e le auai i le ekalesia, ae ua naunau e tausisia tulaga faatonuina o le Ekalesia. O se tagata ua nonofo valavala ma sona toalua pe o faagasolo foi le tatalaina o se faaipoipoga, e le tatau ona auai seia mae'a lelei ona tatala le faaipoipoga e tusa ai ma le tulafono.

I le fuafuaina o gaoioiga a talavou nofofua matutua, e mafai e taitai o uarota ma le siteki ona mafaufau i vaega nei.

Sailia ma le Valaaulia

Talu ai e toatele talavou nofofua matutua e sui soo mea e nonofo ai, e mafai e le siteki ona faatulaga i nisi taimi ni gaoioiga e fuafuaina e sailia ai ma faaumea mai talavou nofofua matutua o le siteki. E mafai ona faia nei gaoioiga e o faatasi ma taumafaiga a siteki tuaoi. O talavou nofofua matutua e toaaga mai, o punaoa aupito taua ia i taumafaiga faapena, e taialaina e komiti a talavou nofofua matutua a uarota ma le siteki. E mafai foi ona fesoasoani atu i nisi taimi ia taitai o le inisitituti.

Komiti o Talavou Nofofua Matutua mo Auaunaga

E tatau ona valaaulia soo ia talavou nofofua matutua e galulue faatasi i komiti mo auaunaga. E lipoti atu komiti nei i se taitai o le uarota po o le siteki e tofia e le au epikopo po o le komiti a talavou nofofua matutua o le uarota poo le siteki. E fuafua e taitai i le lotoifale le natura o le auaunaga a le komiti. O le

auaunaga e masani ona taulai atu i polokalama a le Ekalesia e pei o le uelefea, talafaasolopito o aiga, va i fafo, galuega faamisiona, taumafaiga e toe faatoaga mai talavou nofofua matutua, po o le lagolago mo fale ma fanua o le Ekalesia po o ni galuega faatino. E mafai foi ona taulai atu leni auaunaga e maua ai avanoa e atiina ae ai fefaauoa'iga ma feiloai ai foi ma paaga e ono faaipoipo i ai. O komiti o auaunaga e maua ai avanoa e atiina ae ai fefaauoa'iga ma feiloai ai foi ma paaga e ono faaipoipo i ai. Latou te aoao atu foi tomai faaleautaitai ma agafesootai.

Afiati Faaleaiga Fai Faavaega

E mafai e taitai perisitua ona faatulaga se afiati faaleaiga fai faavaega se tasi pe sili atu foi mo talavou nofofua matutua e le o nonofo ma o latou matua, ma e leai ni a latou fanau i o latou aiga. Afai e mafai, e tofia e taitai perisitua se perisitua talavou nofofua matua e taitai i vaega taitasi. I siteki e toalaiti talavou nofofua matutua, e mafai e taitai o le siteki ona faatulaga ni afiati faaleaiga fai faavaega e fesopoa'i ai tuaoi o uarota. O taitai o afiati faaleaiga fai faavaega e tali atu i taitai perisitua ua tofia. O nei vaega e le ta'ua faapea o ni auaiga.

Vasega o le Aoga Sa

O uarota e lava ia talavou nofofua matutua e i ai, e mafai ona fai sa latou lava vasega o le Aoga Sa mo talavou nofofua matutua (tagai i le 12.4.2).

Vasega e Suesue ai le Talalelei i Aso o le Vaiaso

E fautuaina talavou nofofua matutua e lesitala i vasega o le inisitituti (tagai *Tusitaulima 1*, 11.2.2).

Afai e le o i ai ni vasega inisitituti, e mafai e taitai i le lotoifale ona faafesootai le ofisa o Seminare ma Inisitituti o Aoaoga Faalelotu i le eria mo se fesoasoani. Afai e manaomia, e mafai e taitai perisitua ona faatulaga nisi avanoa faivaega mo le suesueina o le talalelei i aso o le vaiaso.

16.3.6**Gaoioiga a Siteki Tuufaatasi ma le Eria**

O gaoioiga a siteki tuufaatasi ma le eria e mafai ona mau ai e talavou nofofua matutua ia avanoa mo fegalegaleaiga faaagafesootai, faaleautaitai, ma auaunaga e aunoa ma le tuua ai o le tausiga faalelotu a o latou epikopo.

E galulue faatasi ia Fitugafulu Eria ma peresitene o siteki e faavae ni komiti a siteki tuufaatasi e faatula-gaina na ituaiga o gaoioiga. E galulue ia Fitugafulu Eria i lalo o le taitaiga a se tasi o le Au Peresitene o Fitugafulu po o le Au Peresitene o le Eria. O komiti o siteki tuufaatasi e tatau ona aofia ai taitai o talavou nofofua matutua.

E tatau i komiti a siteki tuufaatasi ona fuafuaina gaoioiga eseese, faigofie, ma taugofie ma mafai ona lava le taimi mo fegalegaleaiga faaagafesootai. E galulue faatasi nei komiti ma uarota a talavou nofofua matutua ma inisitituti o aoaoga faalelotu, ina ia ausia ai le paleni talafeagai o gaoioiga, ma taumamao ai mai le faia faafia ma le feteenai o taimi faatulagaina.

Mo taiala faaopoopo e uiga i le faatulagaina o nei gaoioiga, tagai i le 13.3.1.

16.3.7**Faatupeina o Gaoioiga**

E masani lava, o gaoioiga a talavou nofofua matutua e faatupeina mai le paketi a le siteki po o le uarota. A oo ina fai ia gaoioiga a siteki tuufaatasi po o le eria, e faamautinoa e le taitai perisitua o loo vaaia, ia tutusa lelei ia vaegatupe mai siteki.

O le faatupeina o gaoioiga, e tatau ona ogatusa ma aiaiga o loo i le 13.2.8. E ave a se faatagaga faapi-toa, pe afai e faia se gaoioiga tele a ni siteki tuufaatasi po o le eria, e mafai i nisi taimi ona fesili atu i le autalavou matutua nofofua e totogi nisi o tau e i latou lava. Ae ui i lea, e tatau i taitai ona mautinoa ua maua uma e le autalavou matutua nofofua

le avanoa e auai e aunoa ma se avega le talafeagai faaletagata e totogi.

16.4**Uarota a Talavou
Nofofua Matutua**

O nofoaga e manaomia ai ona o tulaga faalelotofale ma le aofai o talavou nofofua matutua e i ai, e mafai e taitai perisitua ona fautuaina le fautuina o se uarota a talavou nofofua matutua, e tusa ai ma taiala o loo i le *Tusitaulima 1*, 9.1.6.

E mafai e tagata ua agavaa e auai, pe a feutagai ma o latou matua, ona filifili e ave a tagata auai o le uarota a talavou nofofua matutua pe tumau ai pea foi i a latou uarota faavae masani. E mafai e le peresitene o le siteki ona faataga le uarota a talavou nofofua matutua e saili ma faaumea mai isi talavou nofofua matutua o le siteki ua le toaaga mai. Ona mafai lea e i latou e toe toaaga mai ona filifili e auai i le uarota a talavou nofofua matutua po o a latou lava uarota faavae masani.

Pe a iai le faamaoniga mai le peresitene o le siteki, e mafai e le epikopo o se uarota a talavou nofofua matutua ona faatulaga se Aualofa mo tamaitai talavou nofofua matutua ma se korama lona lua a toeaia mo alii talavou nofofua matutua e tuu atu ai avanoa faaopoopo mo talavou nofofua matutua e auauna ai ma fegalegaleai ai le tasi ma le isi.

O pepa faamaumau i se iunite a le autalavou nofofua matutua e mo se taimi lē tumau. E fesoasoani taitai i talavou nofofua matutua e sauniuni e toe foi atu i se uarota faavae masani pe a faaiipoipo pe ua aulia foi le 31 tausaga. O lena suiga e tatau ona lava le taimi ma fesoataiga e maua e fesoasoani ai i le epikopo o le uarota faavae masani e fuafua mo se valaauga e fesoasoani ai i talavou nofofua matutua taitasi i le taimi o le fesuiaiga ia maua le lagona talileleia ma le manaomia.

16.5**Siteki a Talavou Nofofua Matutua**

E mafai e taitai perisitua ona fautuaina atu le fautuina o se siteki a talavou nofofua matutua e tusa ai ma taiala o loo i le *Tusitaulima 1*, 9.1.7. O le vaega foi lena o loo avatu ai foi taiala mo tagata auai ma le taitaiga i nei siteki.

16.6**Taiala ma Aiaiga mo Uarota ma Siteki a Talavou Nofofua Matutua****16.6.1****Polokalama a le Ekalesia**

E faaoga e uarota a talavou nofofua matutua le polokalama masani a le Ekalesia i le mea sili e mafai ai. E mulimuli ia peresitene o siteki ma epikopo o uarota a talavou nofofua matutua i mataupu faavae ma faatonuga o loo i ai i lenei tusitaulima ma i le *Tusitaulima 1*. E aofia ai faatonuga mo fesoasoani tau i le uelefea, tupe, ma paketi.

16.6.2**Galulue Feoeoea'i Pe a Valaauina Tagata o le Ekalesia e Galulue i Iunite a Talavou Nofofua Matutua**

E tatau i taitai o siteki ma uarota faavae masani ona galulue feoeoea'i atoatoa pe a talosagaina o latou tagata e taitai perisitua ua faatagaina e avea ma taitai i siteki ma uarota a talavou nofofua matutua. Peitai, o nei taitai o siteki ma uarota e tatau ona feutagai ma taitai perisitua ua faatagaina mai, pe afai latou te lagona o tiutetauave o le tagata i le Ekalesia i le taimi nei ma tulaga faaleaiga o le a le potu ai pe le talafeagai lea valaauga.

16.6.3**Afiafi Faaleaiga Fai Faavaega**

E mafai e se au epikopo o se uarota a talavou nofofua matutua ona faatulaga se afiafi faaleaiga fai faavaega e pei ona otootoo atu i le 16.3.5.

16.6.4**Faiaoga o Aiga ma Faiaoga Asiasi**

O sui auai taitoatasi o se uarota po o se siteki a talavou nofofua matutua, e faitaulia o se aiga mo le faamoemoega o faiaoga o aiga ma faiaoga asiasi.

16.6.5**Pepa Faamaumau o Taitai**

O pepa faamaumau o sui auai o au epikopo o uarota a talavou nofofua matutua ma o latou aiga, e masani lava ona tuu ai i a latou uarota masani. E faapena foi mo i latou e galulue i le au peresitene o le siteki, o fautua maualuga, po o le au peresitene o le Aualofa a le siteki o se siteki a talavou nofofua matutua. O taitai nei ma o latou aiga e totagi a latou sefuluai ma taulaga i a latou uarota masani. Latou te o foi i o latou taitai o uarota ma siteki masani e faatalanoa ai mo ni pepa faataga o le malumalu.

16.6.6**Pepa Faamaumau o Talavou Nofofua Matutua**

O pepa faamaumau a talavou nofofua matutua e tatau ona i ai i uarota o loo avea ai i latou ma tagata auai. E faia e taitai ma failautusi se tausiga faapitoa e faatumauiina ai le fou o faamaumauga. Ina ia aloese mai le faatuai ma aloese mai le leiloa o faamaumauga o tagata, e mafai e failautusi ona tausia foi se faamaumauga le aloaia mo talavou nofofua matutua e malaga soo.

16.6.7**Fautuaina Atu o Faifeau Faamisiona**

Mo faamatalaga e uiga i le fautuaina atu o faifeau faamisiona, e mafai e peresitene o siteki ma epikopo ona tagatagai i le *Tusitaulima* 1,4.3, 4.4, 4.5, ma le 4.7.

16.6.8**O Faauuga i le Perisitua**

Tagai i le 20.7.

16.6.9**Tuuaga o Aoga**

Afai e mafai, e tatau lava ona faagaoioia pea ia uarota a talavou nofofua matutua i le taimi o tuuaga a aoga. O se uarota a talavou nofofua matutua e toa-laiti ni ona tagata i le taimi o tuuaga a aoga, e mafai ona lolotu faatasi ma se uarota lata ane a talavou nofofua matutua. I se tulaga faapena, e tausi eseese ia faamaumauga, lipoti o le auai, ma tupe a uarota.

16.6.10**Pepa Faataga o le Malumalu**

I le tele o tulaga, o le peresitene o le siteki lava ia e faatalanoaina tagata o le ekalesia o e mauaina o latou lava faaeege paia, ma tagata o le ekalesia o loo fuafua e faaipoipo pe faamauiina i totonu o se malumalu. E avea o se faatagaga faapitoa, i se siteki a talavou nofofua matutua, e mafai e le peresitene o le siteki ona faataga ona fesoasoani e faatalanoa i latou mo le mauaina o o latou lava faaeege paia pe faaipoipo foi i se malumalu.

16.6.11**O Le Umi o le Taimi e Auauna Atu Ai**

E masani lava, o uso e valaau e galulue i le au peresitene o le siteki, i fautua maualuga, po o le au

epikopo o se siteki po o se uarota a talavou nofofua matutua, e le sili atu ma le tolu i le lima tausaga e galulue ai i valaauga ia e aveesea ai i latou mai a latou uarota masani. O lenei taimi faatua'oa, e aofia ai uma le taimi e auauna atu ai i ni tofiga eseese.

16.6.12**Matua o Talavou Nofotoatasi**

O matua nofotoatasi e i ai fanau i le fale e masani lava ona tumau pea i a latou uarota faavae masani ina ia maua e le fanau faamanuiaga o polokalama a le Peraimeri ma le autalavou. Ae peitai, e mafai e matua ona auai i gaoioiga a le uarota a le autalavou nofofua matutua.

16.7**Faaagaina o Ulugalii
Matutua Faamisiona i
Talavou Nofofua Matutua**

Pe a manaomia ai, e mafai ona valaauina ulugalii (faamisiona o le auaunaga faamisiona a le Ekalesia i le lotoifale po o faifeautalai faamisiona) e fesoasoani i taumafaiga e faatumauiina ma laveaiina. Latou te fautuaina le auauna atu, fausia le lesitala i inisitituti, fesoasoani i gaoioiga faaagafesootai, ma faufautua i talavou nofofua matutua i lenei vaega taua o o latou olaga.

O faamatalaga e uiga i avanoa faamisiona mo ulugalii e mafai ona maua i le Initoneti i le LDS.org. Mo faamatalaga e uiga i avanoa o auaunaga faamisiona a le Ekalesia, tagai lds.org/csm. (Tagai *Tusitaulima* 1, 4.11.1 ma le 4.12.1.)

17.

Laugatasia ma Fetuunaiga

E eseese tulaga faaupufai, faaagafesootai, ma tamao-aiga e soifua ai tagata o le Ekalesia. E eseese foi ia uarota ma paranesi i le aofai ma punaoa faaletaitai. O nei tulaga e ono manaomia ai taitai i le lotoifale e fetuunaia nisi o polokalama a le Ekalesia. O na fetuunaiga e tele lava ina aafia ai ausilali, fonotaga faaleautaitai, ma polokalama o gaioioiga. O taiala o i leneimataupu ua faamoemoe e fesoasoani ai i taitai perisitua e fuafua po o a fetuunaiga e ono talafeagai ae po o a foi e le talafeagai.

O uarota uma lava ma paranesi, tusa lava po o le a le tele po o tulaga e i ai, e mafai lava ona tutusa le malosi o le Agaga o le Alii. Na aoao mai le Alii, “Aua o le mea ua faapotopoto ai se toalua po o se toatolu i lo’u igoa, ou te i ai faatasi ma i latou” (Mataio 18:20).

17.1

Vaega e Manaomia ai le Laugatasia

Ina ia iloa po o a fetuunaiga e ono talafeagai, e tatau i taitai ona malamalama muamua i aoaoga faavae, sauniga, ma faiga ua faavae mai e tusitusiga paia, ma aoaoga a perofeta ma aposetolo o aso e gata ai. E tatau lava ona laugatasia nei mea i le Ekalesia atoa.

Ua i ai i peresitene o siteki, epikopo, ma isi taitai i le lotoifale se matafaioi paia e faatumauiina le laugatasia ma le mama a’ia’i o le Ekalesia i faavasegaga uma o loo otooto atu i lalo. O lenei tulaga manaomia o le laugatasia e faavae i le mataupu faavae faatusi paia o le “tasi le Alii, tasi le faatuatuaga, tasi le papatisoga” (Efeso 4:5; tagai foi Mosaea 18:21).

17.1.1

Tusitusiga Paia

O tusitusiga paia a le Ekalesia o le Tusi Paia, o le Tusi a Mamona, o le Mataupu Faavae ma Feagaiga,

ma le Penina Tau Tele. I le tele o gagana, ua faamaonia e le ekalesia se lomiga e tasi o le Tusi Paia e faaoga i sauniga po o fonotaga ma vasega a le Ekalesia. E faapena foi, o le lomiga aupito lata mai ua faamaonia i isi tusi e tolu o tusitusiga paia a le Au Paia o Aso e Gata Ai, e tatau ona faaoga. E le tatau ona faalauiloa pe faaogaina nisi lava tusitusiga i le Ekalesia faapea o ni tusitusiga paia.

17.1.2

Poloaiga ma Tulaga Faatonuina

O poloaiga a le Alii ma tulaga faatonuina o le agavaa o le Ekalesia, o loo tuuina mai i tusitusiga paia faapea foi i tusi aloaia mai le Au Peresitene Sili. E le tatau i taitai i le lotoifale ona fesuia’ia nei poloaiga ma tulaga faatonuina. E le tatau foi i taitai i le lotoifale ona aoao atu a latou lava tulafono po o faaliliuga e faatatau i poloaiga.

O tulaga faatonuina o le agavaa mo le auai atu i le malumalu, o loo auiliili atu i fesili mo faatalanoaga o loo maua i le tusi o pepa faataga o le malumalu. E le tatau i taitai i le lotoifale ona fesuia’ia nei mea

17.1.3

Mama A’ia’i o Aoaoga Faavae

O aoaoga faavae o le Ekalesia o loo maua i tusitusiga paia ma aoaoga a perofeta ma aposetolo o aso e gata ai. Ua aoao mai le Alii, “E aoao atu e toeaina, ositaulaga ma aoao o lenei ekalesia, mataupu autu o la’u talalelei, ua i ai i totonu o le Tusi Paia ma le Tusi a Mamona, lea ua i ai le atoatoaga o le talalelei” (MF&F 42:12; tagai foi MF&F 52:9, 36).

E tatau i taitai uma ona faamautinoa o loo aoao atu ia aoaoga faavae moni i le Ekalesia. Afai e aoao atu e se tagata ni aoaoga faavae sese pe taumatemate, e tatau i taitai ona faasa’oina i le taimi lava lea ma ia faia ma le faautauta. E masani lava ona mafai ona

faasa’o ni mea sese i se tulaga e le faalauaitelina, peitai, o mea sese matuia pe ua fai soo, atonu e manaomia ai se faasaoga faalauaitetele.

Afai e le o mautinoa e taitai i le lotoifale po o a aoaoga faavae po o aoaoga e sa’o e uiga i se mata-upu patino, e mafai ona latou sailia se taitaiga mai lo latou taitai pulefaamalumalu.

17.1.4

Sauniga Faamanatuga ma le Faasologa o Sauniga i le Aso Sa

O le faia o sauniga faamanatuga o se poloaiga o loo i tusitusiga paia (tagai MF&F 59:9). O faatonuga mo sauniga faamanatuga o loo tuuina atu i le 18.2.2. O le faasologa o sauniga i Aso Sa o loo fatulaga atu i le itulau e 153. Na faavaeina e le Au Peresitene Sili ma le Korama a le Toasefululua lenei faasologa o taimi. E le tatau i taitai i le lotoifale ona latou suia.

I ni tulaga ogaoga, e mafai e taitai i le lotoifale ona le faia sauniga i le Aso Sa. Peitai, o le faia o lena mea o se mea e seasea ona tupu. O faataitaiga o tulaga e ono ta’uamiotonuina ai le le faia o sauniga, e aofia ai popolega mo le saogalemu mai faalavelave faafuasei ma le mata’utia o le tau. Afai e mafai, e tatau i se epikopo ona talanoa ma le peresitene o le siteki a o le’i taofia le faia o sauniga.

O nisi taimi e i ai se tulaga e le masani ai i le lotoifale e ono tatau ai ona suia le faasologa o taimi i le Aso Sa mo se taimi umi. Mo se faataitaiga, e ono tatau ona faia se suiga pe afai na faatamaia le falelotu i se malaia, lologa, po o se afa. I tulaga faapena, e sailia e le peresitene o le siteki se taitaiga mai le Au Peresitene o le Eria po o le Fitugafulu Eria o loo pulefaamalumalu i le aufono faamaopoopo.

O taitai o paranesi laiti tele, e mafai ona fetuunaia le faasologa o taimi i le Aso Sa pe a faatonuina ai e o latou taitai, e faaoga ai le *Tusitaiala o Polokalama a Iunite Faavae*.

17.1.5

Konafesi

O siteki taitasi e faalua i le tausaga ona faia ia konafesi faalesiteki e pei ona faatulagaina mai e le Peresitene o le Korama a le Toasefululua (tagai i le 18.3.1).

O le au peresitene o le siteki e fuafuaina taimi, faatulaga, ma pulefaamalumalu i se tasi o konafesi faaletausaga a paranesi po o uarota taitasi i le siteki (tagai 18.2.5). E fai foi e le peresitene o le itu le mea lava lea e tasi mo paranesi taitasi i se itu.

17.1.6

Galuega o le Malumalu

O le galuega paia o malumalu e i lalo o le pule tuusa’o a le Peresitene o le Ekalesia. O mataupu uma e faatatau i le galuega o malumalu, e tatau ona taulimaina e tusa ai ma faatonuga o loo i le *Tusi-taulima 1*, mataupu 3. O faataitaiga o na mataupu e aofia ai pepa faataga o le malumalu, faamauga, faatagaga o faamauga, ma le faaleaogaina o faamauga. Afai e fetaiai se peresitene o le sieki ma se fesili e le mafai ona ia foia, na te tuuina atu i le Ofisa o le Au Peresitene Sili.

E faamautinoa e taitai i le lotoifale e le talanoaina i ni faaupuga ma’oti i fonotaga po o sauniga a le Ekalesia ia le vaogagana ma sauniga ma feagaiga paia o le malumalu.

17.1.7

Fono Aoai

O faatonuga mo fono aoai o loo maua i le *Tusi-taulima 1*, mataupu 6. E le tatau i taitai ona o ese mai nei faatonuga, e aofia ai tulaga manaomia mo le auina atu o lipoti. Afai e fetaiai se peresitene o le siteki ma se fesili e le mafai ona ia foia, na te tuuina atu i le Ofisa o le Au Peresitene Sili.

17.1.8**Faamaumauga ma Lipoti**

O le tausia o faamaumauga a le Ekalesia o se polo-aiga o loo i tusitusiga paia (tagai MF&F 20:81–83). O faamaumauga ma lipoti e manaomia o loo otooto atu i le *Tusitaulima 1*, mataupu 13. E mafai e le Au Peresitene Sili ona faia ni fesuiaiga o nei mea mai lea taimi i lea taimi.

O faamaumauga ma lipoti a le Ekalesia ua saunia e faaoga ai polokalama faakomepiuta a le Ekalesia po o ni lipoti lolomi, e faalagolago lava i le eria. E faamautinoa e taitai e sa’o lelei ia faamaumauga ma lipoti ma ia auina atu i taimi atofaina.

17.1.9**Sauniga**

O faatonuga mo le faatinoina o sauniga o le perisitua, o loo otooto atu i le mataupu 20. E le tatau ona fesuia’ia nei faatonuga. O le tapulaa o le matua mo le mauaina o sauniga e pei o le papatisoga ma le faaauuga i le tofi o le Perisitua Arona, e le mafai ona fesuia’ia mo soo se mafuaaga.

17.1.10**Mataupu Aooina**

O punaoa ua faamaonia mo mataupu aooina a le Ekalesia, e tatau ona faaoga i vasega e faia i taimi faatulagaina o sauniga o le Aso Sa. O nei anomea e aofia ai tusi lesona e gaosia e le Ekalesia, mekasini, ma punaoa faaopoopo faafaiaoga. E le tatau ona toe faia nisi tusi lesona fou ma ni kosi i le lotofale lava ia.

E mafai e epikopo ma peresitene o paranesi ona aoao atu pe faatagaina se lesona faapitoa o le perisitua po o se ausilali pe a latou lagona e i ai se tulaga e manaomia ai.

17.2**O Tulaga E Ono Faatagaina ai le Fetuunaiga Faalelotoifale**

Ua i ai i peresitene o siteki, epikopo, ma peresitene o paranesi le faautautaga e faia ai ni fetuunaiga faigofie i polokalama patino a le Ekalesia. I nofoaga e manaomia ai, e mafai ona faia na fetuunaiga faapenei:

1. I tagata e galulue ma polokalama a ausilali
2. I le faatulagaga ma taimi o fonotaga faaleautaitai
3. I le faatulagaga ma pe faafia ona faia gaoioiga

Pe a mafaufau pe o a fetuunaiga e ono talafeagai, o le au peresitene o le siteki, au epikopo, po o le peresitene o le paranesi e fefautuaai lava latou ma e fefautuaai foi ma le aufono a le siteki, uarota, po o le paranesi. Latou te fefautuaai foi ma o latou taitai pulefaamalumu patino, pe afai e ono tatau ona faia se fetuunaiga tele pe le masani ai foi tulaga o i ai. E ao i taitai ona sailia le taitaiga a le Agaga i le faia o fetuunaiga.

E mafai e taitai ona silasila i tulaga taua nei pe a fuafua po o a fetuunaiga e ono talafeagai.

17.2.1**Tulaga Faaleaiga**

A tuuina atu valaauga, faatulagaina ia fonotaga faaleautaitai, ma fuafuaina gaoioiga, e tatau i taitai ona manatunatu i tulaga faaleaiga o tagata o le au paia. O le auaunaga ma le auai i le Ekalesia e manaomia ai lava se fuataga o le ositaulaga. Peitai, e taua tele ia aiga malolosi i le Ekalesia, ma e le tatau ona talosagaina ia tagata ina ia faia ni osigataulaga faaleaiga soona fai, e auauna ai pe lagolagoina ia polokalama po o ni gaoioiga.

O se tasi o tulaga faaleaiga e mafaufau i ai o le valaauga po o valaauga faale-Ekalesia o loo umia e se tane po o se ava. E le tatau ona mamafatu ni tiute-tauave faale-Ekalesia o aiga taitasi. O se isi tulaga e

tatau ona mafaufau i ai, o le taimi atoa e manaomia e tagata e lagolago ai o latou aiga ma taulima isi mataupu faaletagata lava ia. I nisi o eria i le lalolagi, e tailua pe taitolu galuega e faigaluega ai tagata ona o mea e manaomia. O ni iloiloga talafeagai nei mo taitai e tatau ona manatunatu loloto i ai i le tuuina atu o valaauga, faatulagaina o fonotaga faaleautaitai, ma le fuafuaina o gaoioiga.

17.2.2

Femalagaaiga ma Fesootaiga

O nisi siteki po o uarota e aofia ai ni eria tetele i le faataatiaga faafaafanua, e manaomia ai ona malaga le au paia i mea mamao mo fonotaga po o sauniga ma gaoioiga. A oo ina iloiloia manaoga mo fonotaga ma gaoioiga, e faitaulia foi e taitai le taimi ma tupe e faaalu e tagata e malaga ai.

I le tele o eria i le lalolagi, e tau leai ni taavale, ma a femalagaaiga e savavali, tietie i uila, o i le pasi, ma taavale la'u pasese. Afai e vavamamao tele, o lona uiga o tulaga nei e tatau ai i taitai ona fetuunai ia polokalama a le Ekalesia ma fonotaga faaleautaitai, ina ia faafaigofie ai i tagata ona auai.

Tusa lava foi pe tele taavale e i ai, e tatau lava i taitai ona nofouta i le tau o feoa'iga i mea mamao. I nisi tulaga, e pei o le faatautaia o pisinisi faafautua maualuga, e mafai e taitai ona faia ni telefoni faakonafesi, i-meli, ma le Initoneti ina ia faaititia ai femalagaaiga taugata. A faaoga nei punaoa, e tatau i taitai ona matua faaeteete ina ia mautinoa e le faalauaitelina.

O tagata i tulaga eseese o le olaga, e tele taimi e matua eseese ai lava lo latou maua o ala o femalagaaiga. Mo se faataitaiga, o talavou nofofua matutua e tele lava ina faigofie ona feoi nai lo aiga e i ai tamaiti, ma o nisi foi taimi latou te maua tupe po o auala e feoi ai i mea e mamao atu. O nofoaga e mafai e talavou nofofua matutua ona faapotopoto i taimi e tatau ai ma tupe e faaalu, e mafai ona fai a latou gaoioiga i siteki tuufaatasi i le tele talafeagai tagai 13.3.1).

I nisi vaega o le lalolagi, e taugata telefoni, ma e toatele tagata e leai ni telefoni. E faapena foi ona tau le maua le i-meli ma le Initoneti i nisi o eria. Afai e taugata nei punaoa, pe le taatele foi, e tatau i taitai ona faia ia fetuunaiga e tatau ai.

O nofoaga e faigata ai ona femalagaaiga pe taugata foi ma le lava ia fesootaiga, e tele foi ina faigata ai faiaoga o aiga ma faiaoga asi. I ia tulaga, e mafai e taitai ona faia ni fetuunaiga e pei ona ootooto atu i le 7.4.3 ma le 9.5.3.

17.2.3

Korama Toalaiti po o le Aofai o se Vasega

Toeaina ma Faitaulaga Sili

Afai e toalaiti tele ia toeaina po o faitaulaga sili o se uarota e mafai ona auai mai i sauniga perisitua i Aso Sa, e mafai ona latou potopoto faatasi. Peitai, e leai se mea e tatau ai ona faavae se korama se tasi a le Perisitua Mekisateko. Pau lava le mea ia iai ni toeaina ma ni faitaulaga sili ua faauuina i se uarota, e tatau lava ona faatulagaina se korama a toeaina ma se vaega o faitaulaga sili.

Talu ai e leai ni korama o faitaulaga sili i itu, o lea e leai ai ni vaega o faitaulaga sili i paranesi. O faitaulaga sili o paranesi nei e potopoto faatasi ma le korama a toeaina.

Alii Talavou ma Tamaitai Talavou

I se uarota po o se paranesi e toalaiti ia alii talavou, e mafai ona faatasitasi ia korama o le Perisitua Arona mo aoga ma gaoioiga (tagai 8.11 ma le 8.13.1). Peitai, e tatau lava ona faatulagaina ia korama taitasi, ma valaauina taitai ma lagolagoina i korama taitasi.

I se uarota po o se paranesi e toalaiti ni tamaitai talavou, e mafai ona latou potopoto faatasi mo aoga ma gaoioiga (tagai 10.6.2 ma le 10.8.1). E mafai ona valaau se au peresitene o le vasega mo vaitausaga taitasi, pe e mafai foi ona valaau se au

peresitene se toatasi mo vaitausaga ua tuufaatasi seia oo ina mafai ona faatulaga ia latou vasega e tatau ai.

Afai e le lava le au taitai matutua, e mafai e le au peresitene o Alii Talavou ona faiaoga i lesona i Aso Sa ma faatautaia le polokalama o gaoioiga e aunoa ma ni faufautua fesoasoani. E mafai foi e le au peresitene o Tamaitai Talavou ona faia le mea lava lena e tasi mo tamaitai talavou. i se iunite laitiiti tele, atonu o peresitene o Alii Talavou ma Tamaitai Talavou e na o le pau ia o taitai matutua ia latou faalapotopotoga. I le tulaga lea, latou te faiaoga i lesona o le Aso Sa ma vaaia gaoioiga uma a alii talavou ma tamaitai talavou. A oo ina mafai, e tatau ona valaau ia fesoasoani ma se failautusi mo faalapotopotoga taitasi

Ona e tele ina manuia le autalavou mai fegalegaleaiga i ni vaega toatele atu, e mafai e alii talavou ma tamaitai talavou o ni uarota laiti po o paranesi se lua pe sili atu foi ona feiloai i nisi taimi mo gaoioiga tuufaatasi. Afai e toalaiti alii talavou po o tamaitai talavou o ni uarota ma paranesi e felataa'i, e mafai e epikopo ma peresitene o paranesi ona faataga le autalavou e faatasitasi mo gaoioiga faalevaiaso A oo ina mafaufauina nei vaega e filifili ai, ia faitaulia e taitai ia itu taua e pei o le mamao ma le tau o le feoa'iga.

O gaoioiga a siteki ma siteki tuufaatasi mai i nisi taimi, e sili ona taua mo uarota po o paranesi e toalaiti le aofai o talavou e i ai (tagai i le 13.3 ma le 13.4).

I se siteki laitiiti po o se itu, e mafai e le peresitene o Alii Talavou ona na o ia le taitai o Alii Talavou i le siteki po o le itu. E ono sa'o foi lea mo le peresitene o Tamaitai Talavou o le siteki po o le itu. A oo ina mafai, e tatau ona valaau ia fesoasoani ma se failautusi mo faalapotopotoga taitasi

Peraimeri

I se uarota po o se paranesi e toalaiti tamaiti, atonu e manao le au peresitene o le Peraimeri e faatulaga ni nai vasega laiti, e tuufaatasi ai ni vaitausaga.

I se uarota laitiiti poo se paranesi, atonu o le au peresitene o le Peraimeri e na o le pau lea o taitai ma

faiaoga o le Peraimeri I se iunite laitiiti tele, atonu o le peresitene o le Peraimeri e na o le pau lea o le taitai o le Peraimeri. I lea tulaga, na te taitaia ai le taimi o fetufaaiga ma faiaoga foi i se vasega mo tamaiti uma. A oo ina mafai, e tatau ona valaauina nisi taitai ma faiaoga e pei ona otooto atu i le 11.7.

I se siteki laitiiti po o se itu, atonu o le peresitene o le Peraimeri e na o le pau lea o le taitai o le Peraimeri i le siteki po o le itu. A oo ina mafai, e tatau ona valaauina nisi taitai ma faiaoga e pei ona otooto atu i le 11.7.

17.2.4

Punaoa Faaletaitaiga

A le lava ni tagata agavaa o le au paia e faatumu ai tofiga uma faaleautaitai, e mafai lava e taitai pulefaamalumu ona faatumu na o tofiga e sili atu ona manaomia. E le gata i le tofia o tagata malolosi, ua iai le poto masani i tulaga faaleautaitai, e ao i taitai pulefaamalumu ona sailia ia musumusuga e saili ai isi taitai agavaa mai tagata faatoa papatiso, tagata e leai se poto masani ma tagata e le o toaga mai e mafai ona toefaatoaga mai. O tagata o le Ekalesia e le tau manaomia ona i ai le poto masani pe maua-luga le agavaa e tuuina atu ai i ai se valaauga. O le i ai o se valaauga o se auala taua lea mo i latou e auauna atu ai ma tuputupu ae ai faaleagaga.

Afai e le lava tagata e galulue i tulaga faaleautaitai, e mafai e taitai pulefaamalumu ona faatulaga a latou siteki, uarota, poo paranesi i se faatulagaga e laitiiti ifo. O faataitaiga e ono aofia ai le tofia na o se peresitene ma se fesoasani se toatasi i nisi o faalapotopotoga, ia galue foi se fesoasoani e avefa ma failautusi, ma faafaigofie nisi o polokalama.

I se paranesi laitiiti tele e leai se peresitene o Tamaitai Talavou po o le Peraimeri, e mafai e le peresitene o le Aualofa ona fesoasoani i matua e faatulaga ia aoaoga mo tamaitai talavou ma tamaiti seia oo ina valaau ni peresitene o Tamaitai Talavou ma le Peraimeri.

O taitai o paranesi e laiti tele, ia mulimuli i le *Tusitai-ala o Polokalama o Iunite Faavae*.

17.2.5

Saogalemu

I nisi vaega o le lalolagi, e matua maualuga tele le tulaga o solitulafono pe fuaao foi e feinauaiga faapolokiki. Afai e talitonu taitai o nei eria e lamatia le soifua o tagata pe a feoa'i i le po, e mafai ona le faia

ni gaoioiga i afafi. O lona uiga, ia faaitiitia gaoioiga faale-Ekalesia, faapea foi le faatulagaina o nisi o gaoioiga i faaiuga o vaiaso.

A oo ina lamatia le saogalemu pe avea foi totogi o femalagaaiga ma faafitauli matuia, e mafai e taitai ona faatulaga nisi o gaoioiga a le autalavou i Aso Sa. O ia gaoioiga e tataua ona ese lava mai le faasologa o sauniga i le Aso Sa ma ia ogatusa ma le agaga o le Sapati.

18.

Sauniga i le Ekalesia

O loo ootoo atu i leni mataupu ia faamatalaga e uiga i sauniga [po o fonotaga] a le Ekalesia. O fonotaga [po o sauniga] e patino lava i se faalapotopotoga, e pei o le korama, Aualofa, Alii Talavou, Tamaitai Talavou, Peraimeri, ma le Aoga Sa, o loo faamatalaina atu i le vaega a lena faalapotopotoga i le tusitaulima leni.

E faaopoopo atu i fonotaga [po o sauniga] o loo ootoo atu i tusitaulima, e mafai e taitai pulefaamalumu i nisi o taimi ona taloina isi fonotaga [po o sauniga] ma faamanino po o ai e auai atu i ai, faapea foi ma le faamoemoega.

18.1

O Taiala mo le Fuafuaina ma le Taitaia o Sauniga

O taitai latou te fuafua ma taitaia ia fonotaga “e pei ona taitaia ai i latou e le Agaga Paia, e tusa ai ma poloaiga ma faaaliga a le Atua” (MFF 20:45; tagai foi i le Moronae 6:9; MFF 46:2).

E saunia e taitai se lisi o mataupu mo fonotaga taitasi pe tofi se tasi na te saunia i lalo o la latou taitaiga. O se lisi o mataupu e fesoasoani i tagata auai e taulai atu i faamoemoega o se fonotaga ma faaoga tatau ai le taimi. E tatau ona fai i se faasologa o mea e faamuamua ina ia mautinoa ai ua talanoaina muamua mea e aupito sili ona taua.

O fonotaga faaleautaitai e tatau ona taulai atu i le faamalolosia o tagata taitoatasi ma aiga. E tatau ona faaitiitia le taimi e faalau i le talanoaina o le kalena, fuafuaina o polokalama, ma isi mataupu faaletaitaiga.

Mo taiala e uiga i le fefautuaai faatasi i fonotaga, tagai i le 4.6.1.

E mafai e le taitai pulefaamalumu ona taitaia se fonotaga pe talosagaina se tasi o ona fesoasoani po o se isi tagata e taitai i lalo o lana taitaiga.

E le tatau ona uumi atu fonotaga nai lo le mea e manaomia.

E ao i taitai ona mautinoa e le tele naua ni fonotaga i le Aso Sa, ne’i laitiiti ai le taimi mo matua ma fanau e mafuta ai i lena aso. Afai e talafeagai ai, e tatau i taitai ona aloese mai le faatulagaina o fonotaga i Aso Sa, e ese mai i saungia faatulagaina masani mo le tolu itula, fonotaga faaleautaitai i taeao po, ma sauniga i nisi taimi i le afiafi.

18.2

Fonotaga [po o Sauniga] a le Uarota

O le epikopo e vaaia sauniga a le uarota. E pulefaamalumu o ia i nei sauniga [po ofonotaga] sei vagana ua faatasi ai se sui auai o le au peresitene o le siteki, se Fitugafulu Eria, po o se Pulega Aoao. E mafai e ona fesoasoani ona taitaia ia sauniga a le uarota ma e mafai ona pulefaamalumu pe afai e toesea o ia. E tatau ona valaaulia ia taitai pulefaamalumu ma fautua maualuga e asiasi atu, e alaala i luga o le tulaga. E le pulefaamalumu ia fautua maualuga pe a auai i sauniga a le uarota.

Afai e toesea uma le epikopo ma ona fesoasoani, e tofi e le peresitene o le siteki se tasi e pulefaamalumu i le sauniga faamanatuga. E masani lava na te tofiaina le peresitene o le korama a toeaina, ae e mafai foi ona ia faatagaina se isi taitai perisitua e ese mai ai.

18.2.1**Faasologa o Sauniga o le Aso Sa**

O sauniga o le Aso Sa e maua ai se taimi taua mo tagata o le ekalesia e taumamafa ai i le faamanatuga, tapuai ai, aoao ai le talalelei, aoao ai i o latou tiute, ma tuu atu ai le auaunaga. E mafai foi ona auai i nei sauniga ia tagata e le auai i le ekalesia.

E ao i uarota ona faia ia sauniga nei i le Aso Sa mo le umi e tolu itula (mo le faasologa o sauniga e filifili mai ai, tagai i le siata o “Fonotaga po o Sauniga i le Aso Sa” i le itulau 153):

1. Sauniga faamanatuga
2. Sauniga a le au perisitua (mo i latou uma e umia le perisitua, o toecaina ua faamoemoe mo le tofi toecaina, ma alii talavou o le vaitausaga o le Perisitua Arona ae lei faauuina i le perisitua; tagai i le 18.2.4)
3. Aualofa (mo tamaitai uma ua 18 tausaga ma matutua atu ma tamaitai laiti ifo o e ua faaiipoipo)
4. Tamaitai Talavou (mo tamaitai talavou e 12 i le 18 tausaga)
5. Peraimeri (mo tamaiti e 3 i le 11 tausaga; e faapea foi i fanau laiti e 18 masina e oo i le 2 tausaga pe afai ua faatulagaina se vasega pepe ma e mananao matua e auai atu i ai a latou fanau)
6. Aoga Sa (mo i latou e ta’i 12 tausaga ma matutua atu; mo faamatalaga e uiga i le ta’i 12 tausaga le matutua o alii talavou ma tamaitai talavou e auai atu i le Aoga Sa, tagai i le 11.4.3)

18.2.2**Sauniga Faamanatuga****Faamoemoega o le Sauniga Faamanatuga**

O sauniga faamanatuga taitasi e tataua ona avea ma se aafiaga faaleagaga lea e faafouina ai e tagata o le Ekalesia a latou feagaiga e ala i le taumamafa i le faamanatuga. O isi faamoemoega o le faamanatuga

o le tapuai, saunia ma tuu atu aoaoga o le talalelei, faatino ia sauniga, faatautaia pisinisi faaleuarota, ma faamalolosia le faatuatua ma molimau.

Fuafuaina ma le Taitaia o le Sauniga Faamanatuga

O uso o le au epikopo e fuafuaina ia sauniga faamanatuga ma taitaia i se tulaga migao ma le mamalu. Latou te vaaia le faafoeina o le faamanatuga, filifilia autu mo lauga ma musika, filifilia ma fautuaina i latou e mautofiga, ma valaaulia tagata o le au paia e tuuina atu tatalo amata ma tatalo faaii. E le o se mea manaomia le faia o se fono tatalo a o lei amataina le sauniga faamanatuga.

E faamautinoa e le au epikopo e amata ma faaii le sauniga faamanatuga i le taimi atofaina. E le tataua ona ova le faapolokalamaina o sauniga. O se faasologa faataitai lea:

1. Musika e mua’i tataina (tagai i le 14.4.3 mo se taiala)
2. Faafeiloaiga
3. Faailoa atu le taitai pulefaamalumalu po o fautua maualuga asiasi o loo auai mai
4. Faasilasilaga (pe afai e mafai, o le tele lava o faasilasilaga e tataua ona lolomiina ina ia aua nei alu ai le taimi o le sauniga faamanatuga; e mafai e le au epikopo ona tuuina atu faapuupuu ia faasilasilaga taua a o lei usuina le viiga amata)
5. Viiga ma le tatalo amata
6. Mataupu faaleuarota ma le siteki, e pei o le:
 - a. Lagolagoina ma le faamaloloina o taitai ma faiaoga (tagai i le 19.3 ma le 19.5)
 - b. Faailoa atu o tamaiti ta’i 8 tausaga ua papatiso ma ua faamauiina (tagai i le “Faailoaina o Tagata Fou” i le itulau e 140)
 - c. Tuuina atu igoa o uso mo le mauaina pe siitia le Perisitua Arona (tagai i le *Tusi-taulima 1*, 16.7.2)

- d. Aloaiaina o tamaitai talavou a o sii atu i luga i a latou vasega
 - e. Tuuina atu o igoa o tagata fou o le uarota (tagai i le “Faailoaina o Tagata Fou” o loo i le itulau e 140)
7. Faaigoaina ma le faamanuiaina o tamaiti (e masani lava ona faia i sauniga anapogi ma molimau) ma le faamauiina ma tuuina atu le meaalofa o le Agaga Paia i tagata fou o le ekalesia.
 8. Viiga o le faamanatuga ma le faafoeina o le faamanatuga
 9. Savali o le talalelei, pese a le faapotopotoga, ma musika faapitoa e filifilia
 10. Viiga ma le tatalo faaii
 11. Musika e tata pe a maea le sauniga

E i ai nisi taimi e i ai se mea e lei fuafuaina e tulai mai i le taimi o le sauniga e lagonaina e le taitai pulefaa-malumu e tataua ona faamanino. Afai e tupu leni mea, e tataua ona ia faia se faamaninoga o loo moomia, ae ia faaeteete ia aua nei faalumaina ai se isi.

Taimi a o le i amataina le Sauniga Faamanatuga

E ao i taitai ona faia se faataitaiga o le migao i le taimi a o lei amataina le sauniga faamanatuga. E tataua ona alaala le au epikopo ma failauga i o latou nofoaga ia le itiiti ifo ma le lima minute a o le'i amataina le sauniga. E le o se taimi lea mo ni talatalanoaga po o le feaveiina o ni feau. O le faia o se faataitaiga o le migao e faamalosiaina ai le faapotopotoga ina ia saunia faaleagaga mo se aafiaga tapuai.

E tataua ona aoa ia tagata o le au paia ina ia avea le taimi a o le'i amataina le sauniga faamanatuga o se taimi e mafafau loloto ai a o latou sauniuni atu faaleagaga mo le faamanatuga.

E faamalosiaina e le au epikopo ia aiga ina ia tau-nuu vave mai ma nonofo faatasi.

Faamanuiaina ma le Tufaina o le Faamanatuga

Ia mautinoa e le au epikopo ua faamanuia ma tufatufaina atu le faamanatuga i se auala migao ma le faatulagaina lelei. E tataua ona tapena le laulau faamanatuga a o lei amataina le sauniga. Mo faatonuga e uiga i le sauniaina, faamanuiaina, ma le tufatufaina o le faamanatuga, tagai 20.4.

Filifilia o Autu mo Lauga ma Musika

O le au epikopo e filifilia ia autu mo lauga ma musika o sauniga faamanatuga. O lauga ma musika e tataua ona tulaia atu i mataupu o le talalelei, ia e fesoasoani e fausia ai le faatuatua ma molimau a tagata.

Filifilia ma le Muai Aoaia o Tagata e Mautofiga

Filifilia o Tagata e Mautofiga. O le au epikopo e filifilia tagata e mautofiga i sauniga faamanatuga. O le tele o avanoa e mautofiga ai e tuuina atu lea i tagata o le uarota. Afai e valaaulia e le au epikopo ni tagata mai fafo atu o le uarota e lauga, e tataua ona mulumulitaia ia taiala o loo i le 21.1.20 .

E valaaulia e le aunoa e uso o le au epikopo ia talavou e 12 e oo i le 18 tausaga le matutua e lauga i sauniga faamanatuga. E tataua i talavou ona lauga puupuu (pe tusa ma le tai lima minute a le tagata) i mataupu o le talalelei e atofa atu i ai. E tataua ona latou saunia a latou lava lauga, e ui lava e mafai e le au epikopo ona fautuaina ia matua e fesoasoani i ai.

E masani ona valaaulia e le au epikopo ia faifeautalai e lauga i sauniga faamanatuga ae lei malaga ese atu ma pe a toe foi mai (tagai i le *Tusitaulima 1*, 4.8.1 ma le 4.10.3). E faamanino atu e le au epikopo, o se sauniga faamanatuga masani lea, ae le o se faamavaega po o se faafeiloaiga o le faifeautalai faamisiona. O le au epikopo e fuafuaina ma taitai i nei sauniga. O tagata o le aiga ma uo a le faifeautalai e le valaaulia-ina e lauga. Peitai, e mafai ona valaaulia e lauga ia isi faifeau faamisiona o le a malaga po o faifeau faamisi-ona ua toe talii mai po o isi tagata o le au paia.

E faatulagaina e le au epikopo ia fautua maualuga e lauga e pei ona tofi mai ai e le peresitene o le siteki. O le peresitene o le siteki e fuafuaina pe faafia ona fai na ituaiga o tofitofiga. E le o se mea e manaomia le lauga o fautua maualuga i sauniga faamanatuga i masina uma.

E faatulaga e le au epikopo se sauniga faamanatuga e tasi i tausaga taitasi mo tamaiti o le Peraimeri e auai i le faatinoina o se polokalama a le Peraimeri (tagai i le 11.5.4).

E mafai e le au epikopo ona valaaulia mai lea taimi i lea taimi ia faifeautalai faamisiona o e o loo galulue ai i le eria, e lauga.

E le tuuina atu e le au epikopo ia sauniga faamanatuga i ausilali po o ni vaega faimusika mai fafo. Peitai, e mafai ona valaaulia ia ausilali e maufioga i le sauniga i lalo o le taitaiga a le au epikopo

E ao i uso o le au epikopo ona vave tuuina atu ia valaaulia e lauga i le sauniga faamanatuga a o lei taitai oo i le sauniga.

Fautuaina i Latou e Maufioga. E muai fautuaina e le au epikopo ia tagata e maufioga i le sauniga faamanatuga. Latou te toe tagatagai i faamoemoega o le sauniga faamanatuga ma faamatala atu i ai, o lauga ma musika uma e tatau ona ogatasi ma le natura paia o le faamanatuga.

A valaaulia tagata o le au paia e lauga, e faamatala manino atu i ai e se tasi o le au epikopo le mataupu autu ma le umi o le taimi e tatau ona lauga ai le tagata. Na te fautuaina ia failauga ina ia aoao atu aoaga faavae o le talalelei, faamatala atu ni mea na tutupu e siitia ai le faatuatua, ia molimau atu i le paia o upumoni ua faaalia, ma faaoga ia tusitusiga paia (tagai i le MFF 42:12; 52:9). E tatau i failauga ona aoao atu i se agaga o le alofa ina ua mavae ni sauniuniga sa faia ma le agaga tatalo. E le tatau ona latou lauga atu i ni mataupu e taumatemate, e fetee-nai, pe le ogatasi foi ma aoaga faavae o le Ekalesia.

Ina ia tausia se siosiomaga o le tapuai faaloalo i a tatou sauniga faamanatuga, a faaoga e failauga ia

tusitusiga paia e avea o se vaega o a latou lauga, e le tatau ia i latou ona talosagaina le faapotopotoga e susue a latou tusitusiga paia i mau.

O tagata e maufioga i le sauniga faamanatuga e tatau ona nonofo ai pea seia mae'a le sauniga.

Musika

Tagai i le 14.4.3 ma le 14.4.4.

Faailoaina o Tagata Fou

Pe a mauaina e se uarota ia pepa faamaumau ma pe a papatiso ma faamauina tagata liliu mai, e faailoa atu ma faafeiloai e se sui o le au epikopo ia tagata i le sauniga faamanatuga e sosoo ai. E na te faitauina igoa taitasi o tagata, valaaulia le tagata ina ia tulai, ma talosaga atu i tagata o le potopotoga e faaali mai i le sii o o latou lima ua latou taliaina ia tagata i le faaaumea atoatoa i totonu o le uarota. E faalau faatasi pepa faamaumau o tagata o le aiga. Afai e iloa e se tagata o le au paia se mafuaaga e le tatau ai ona maua e se tagata le faaaumeaga atoa, e tatau ona talanoa atu na o ia i le epikopo.

A maea ona papatisoina ma faamauina tamaiti ua i ai faamaumauga, e faasilasila atu e se tasi o le au epikopo ia papatisoga ma faamauga o tamaiti taitasi i le sauniga faamanatuga. O nei fanau e le tuuina atu mo le taliaina i totonu o le uarota aua ua uma ona avea i latou ma ni tagata o le au paia.

Fesoasoani Vaaia ma Punaao Tau Otiovisio

Tagai i le 18.4 ma le 21.1.5.

Sauniga Faamanatuga i ni Tulaga e Le Masani Ai

E moomia e tagata uma o le ekalesia ia faamanuiga faalecagaga e maua mai i le taumamafa i le faamanatuga. Afai e le mafai e tagata o le au paia ona auai mai i le sauniga faamanatuga ona ua nofofale, ua nofo i se fale mo tagata matutua, po o le falemai, e mafai e le epikopo ona tofia nisi e umia le perisitua e

saunia, faamanuia, ma tufatufa atu le faamanatuga i nei tagata.

E i ai taimi e le mafai ai ona auai atu tagata o le au paia i le sauniga faamanatuga ona o le mamao ma le falelotu. I ni tulaga e le masani ai, e mafai ai e le epikopo ona tuuina atu le faatagaga mo se sauniga faamanatuga ina ia faia e ese mai le falelotu. E mafai ona ia faatagaina se sauniga faapena na o totonu lava o tuaoi o lana uarota. O le tagata e faatagaina e le epikopo ona faatautaia le sauniga, e tatau ona umia le Perisitua Mekisateko pe o se ositaulaga foi i le Perisitua Arona. E tatau foi ona agavaa o ia e faamanuia ma tufa le faamanatuga. O le perisitua e taitai le sauniga e lipoti atu i le epikopo pe a uma ona faia le sauniga.

Afai e malaga ese tagata o le uarota pe nonofo ese mai a latou uarota tumau mo se taimi e le tumau, e tatau ona latou faia se taumafaiga faamaoni ina ia auai atu i le sauniga faamanatuga ma isi sauniga o le Aso Sa i se uarota po o se paranesi a le Ekalesia.

E le tatau ona faia ia sauniga faamanatuga e fuafua i faatasiga a aiga po o nisi mafutaga.

18.2.3

Sauniga Anapogi ma Molimau

E masani lava o le Aso Sa muamua o masina taitasi, e avea ai le sauniga faamanatuga o se sauniga anapogi ma molimau. Ona o le konafesi aoao ma le konafesi a le siteki, o lea e alagata ai ona faia le sauniga anapogi ma molimau i se isi Aso Sa e ese ai.

I lalo o le taitaiga a le epikopo, e mafai ai ona faaigoa ma faamanuia tamaiti, ma e mafai ona faatino faamauga i le sauniga leni a o le'i faia le faamanatuga.

A maea le faamanatuga, ona tuuina atu lea e se sui o le au epikopo o loo taitai se molimau puupuu. Ona ia valaaulia lea o tagata o le au paia ina ia tuuina atu ni molimau mai le loto, ma faamatala ni aafiaga e siitia ai le faatuatua. E fautuaina e le au epikopo ia tagata ina ia faapupuu a latou molimau ina ia toatele tagata e mafai ona maua le avanoa e molimau ai.

Atonu e sili atu ona aoao tamaiti laiti e faasoa a latou molimau i faatulagaga e pei o afiafi faaleaiga, po o taimi e fai ai ni lauga i le Peraimeri, seia oo ina lava lo latou matutua e faia ai i se sauniga anapogi ma molimau e aunoa ma se fesoasoani mai se matua, o ona tei, po o se isi tagata.

18.2.4

Sauniga a le Au Perisitua

O i latou uma e umia le perisitua e potopoto faatasi mo se sauniga amata puupuu a o le'i tuueseese i sauniga a a latou korama. E mafai foi ona auai ai alii ua faamoemoe mo le tofi toeaina ma alii talavou e lei faauuina i le Perisitua Arona. O se tasi o le au epikopo e taitai.

O sauniga amata e tatau ona aofia ai se viiga amata ma le tatalo. E mafai foi ona faaafua ai pisinisi faaleperisitua; faatonuga; faasilasilaga pupuu; ma le faailoaina o uso fou, tagata sailiili, ma tagata asiasi mai. E le tatau ona faaogaina sauniga amata e tuu atu ai ni faasilasilaga po o ni lipoti uumi. O le tele o le taimi e tatau ona faasao mo sauniga a korama.

E mafai e le epikopo ona valaaulia le peresitene o le korama a toeaina, fesoasoani i le korama a ositaulaga, peresitene o le korama a aoao, ma le peresitene o le korama a tiakono e nonofo faatasi ma le au epikopo i le taimi o sauniga amata.

A maea sauniga amata, ona taape lea o le au perisitua i sauniga a a latou korama. I nei sauniga, latou te faatautaia ai pisinisi, aoao ai tiute faaleperisitua, faamalolosia ai tagata taitoatasi ma aiga, suesueina o le talalelei a Iesu Keriso, fefautuaa'i faatasi, ma faatulaga lelei ina ia faafetaia'ia manaoga i le lotofale. O uso o le au epikopo e masani ona auai atu i sauniga a korama o le Perisitua Arona, e ui o lea latou te auai atu foi i nisi taimi i vasega a Tamaitai Talavou. O nisi taimi e mafai e le au epikopo ona faatonu korama a le Perisitua Arona po o i latou uma e umia le perisitua ia fai se sauniga tuufaatasi.

E le tatau ona faatulagaina nisi sauniga [po o fonotaga] i le taimi o le sauniga a le au perisitua.

Mo nisi faamatalaga e uiga i sauniga a korama o le perisitua, tagai i le 7.8 ma le 8.11.

18.2.5

Konafesi a le Uarota

E fuafua ma taitai e le au peresitene o le siteki se konafesi faaleuarota e taitasi i le tausaga i uarota taitasi. O uso o le au peresitene o le siteki, fautua maualuga, ma ausilali a le siteki e faia ni a latou vaega i sauniga o le konafesi a le uarota pei ona faatonuina ai e le peresitene o le siteki. O faamoemoega o le konafesi a le uarota o le faamalolosia lea o faatuatua ma molimau, saunia ma tuuina atu aoaoga o le talalelei, faatautaia pisinisi, ma iloilo le tulaga o le malolosi.

O le sauniga autu o le konafesi a le uarota e faia i le taimi o le sauniga faamanatuga. E masani lava ona foliga tutusa le faasologa i isi sauniga o le faamanatuga. E pulefaamalumalu le peresitene o le siteki ma o le au peresitene o le siteki e masani ona fuafuaina le sauniga. O se tasi o le au epikopo e masani ona taitai. A o lei faia le faamanatuga, e faaoga e se tasi o le au peresitene o le siteki po o se fautua maualuga le fomu o le Lagolaoina o Taitai (e saunia e le failautusi o le uarota) e tuu atu ai suafa o taitai aoaoga o le Ekalesia, taitai o le siteki ma le uarota i tagata o le uarota mo la latou palota lagolago. A maea le faamanatuga, o failauga, e masani ona aofia ai le epikopo ma le peresitene o le siteki.

E masani ona faia e le uarota ia sauniga e masani ai a le perisitua ma ausilali e avea o se vaega o le konafesi a le uarota. E mafai e taitai o le siteki ona tuuina atu aoaoga ma fesoasoaniga i le taimi o nei sauniga.

E avea o se vaega o le konafesi a le uarota, e fono ai le au peresitene o le siteki ma le au epikopo e iloilo le alualu i luma o tagata taitoatasi ma faalapotopotoga i le uarota. E mafai ona faia leni fonotaga i le Aso Sa o le konafesi a le uarota po o se isi taimi.

18.2.6

Fonotaga a le Au Epikopo

E masani ona fono i vaiaso taitasi le au epikopo. E auai atu i ai le failautusi a le uarota ma le failautusi faapitoa a le uarota; e tausia e le failautusi se faamaumauga o tofitofiga ma faaiuga. E mafai e le epikopo ona valaaulia isi e auai atu pe a manaomia ai. Mo se faataitaiga, o se mataupu maaleale e mafai ona talanoaina i se fonotaga faaopoopo a le au epikopo lea e aofia ai le peresitene o le korama a toeaina, le peresitene o le Aualofa, po o la'ua uma.

I le fonotaga a le au epikopo, e fefautuaai faatasi ai sui o le au epikopo e uiga i mataupu a le uarota. Latou te fuafuaina ala e faamalolosia ai tagata taitoatasi ma aiga. Latou te iloiloaina korama, ausilali, polokalama, ma gaoioiga. Latou te faia ai foi fuafuaga e faatino ai aoaoga mai tusitusiga paia, taitai o le Ekalesia, ma tusitaulima.

I le fonotaga leni, e faailoa ai e uso o le au epikopo ia tagata o le au paia e valaauina e galulue i totonu o le uarota. Latou te faailoa ai foi po o ai tagata o le au paia ua oo i le matua e agavaa ai mo sauniga, e aofia ai faauuga i le perisitua, ma po o ai foi uso e fautuaina atu i le peresitene o le siteki ina ia faauuina o ni toeaina ma faitaulaga sili ma ia avea ma faifeautalali.

O isi mataupu e talanoaina mo leni fonotaga e mafai ona aofia ai ia lipoti i tofiga, fuafuaina o sauniga po o fonotaga, iloiloaina o le kalena a le uarota, ma iloiloaina le paketi a le uarota.

18.2.7

Fonotaga a le Komiti Taitai Perisitua a le Uarota

Ua faamutaina le komiti taitai perisitua a le uarota (KTP). O mataupu talanoaina mo fonotaga a le KTP ua aofia nei i fonotaga a le aufono a le uarota. O se mataupu maaleale e mafai foi ona talanoaina i se fonotaga faaopoopo a le au epikopo lea e aofia ai

le peresitene o le korama a toeaina, le peresitene o le Aualofa, po o la'ua uma.

18.2.8

Fonotaga a le Aufono a le Uarota

Tagai i le 4.6.

18.2.9

Fonotaga a le Komiti Talavou a le Au Epikopo

O le epikopo e pulefaamalumalu i le komiti talavou a le au epikopo. O lenei komiti e aofia ai le au epikopo, o se tasi o fesoasoani o le epikopo i le korama a ositaulaga, o peresitene o korama a aoa ma tiakono, o peresitene o vasega a Tamaitai Talavou, ma peresitene o Alii Talavou ma Tamaitai Talavou.

E mafai e le au epikopo ona valaaulia isi e auai i le fonotaga a le komiti pe a manaomia ai. E mafai ona aofia ai le isi fesoasoani o le korama a ositaulaga, fesoasoani i au peresitene o korama ma vasega, failautusi a korama ma vasega, fesoasoani i au peresitene a Alii Talavou ma Tamaitai Talavou, ma failautusi a Alii Talavou ma Tamaitai Talavou.

E masani ona fono le komiti i masina taitasi. E mafai ona taitai e le epikopo lenei fonotaga, pe na te tofia foi se tasi o ona fesoasoani, se tasi o ona fesoasoani i le korama, po o le peresitene o le Lora e taitai. A o lei faia ia fonotaga taitasi e iloilo ma faamaonia le lisi o mataupu e le epikopo ma le tagata o le a taitai. O le lisi o mataupu e talanoaina e mafai ona aofia ai mea nei:

1. Faailoa manaoga ma mea e fiafia i ai talavou taitasi o le uarota. Fuafua ni auala e fesoasoani ai i le faatinoina o na manaoga. Fuafua ni auala e fesoasoani ai i le autalavou e ola ma faalauiloa tulaga faatonuina o le Ekalesia.
2. Fuafua ni auala e faamalosiaina ai talavou taitasi ina ia auai i sauniga ma gaoioiga a le

Ekalesia, e aofia ai le seminare. Fuafua ma lipoti atu ia taumafaiga mo le faaumeaina o talavou e le o toaaga mai, talavou e lei leva ona papatiso, ma talavou o loo sailiili e uiga i le Ekalesia.

3. Faatulaga ma fuafua ni gaoioiga a le autalavou e ogatusa ma manaoga ia ua faailoa mai. O nei gaoioiga e aofia ai gaoioiga tuufaatasi a le Perisitua Arona--Tamaitai Talavou ma konafesi a le autalavou. E tatau i taitai matutua ona faaofia ai le autalavou i le tele e mafai ai i le fuafuaina ma le faatinoina o nei gaoioiga.

4. Iloilo gaoioiga ua mavae, e iloa ai pe na faatau-nuina ia faamoemoega sa tuupoina.

O nei fonotaga a komiti e tatau ona maua ai avanoa faaleautaitai ma aoaoga mo le autalavou.

18.2.10

Fonotaga a le Komiti a Talavou Nofofua Matutua a le Uarota

Tagai i le 16.3.4.

18.2.11

Fonotaga Faamaopopo a Faifeautalai

Tagai i le 5.1.5.

18.3

Fonotaga [po o Sauniga] a le Siteki

O le peresitene o le siteki e vaaia fonotaga [po o sauniga] a le siteki. E pulefaamalumalu o ia i nei fonotaga [po o sauniga] sei vagana ua auai se Fitugafulu Eria po o se Pulega Aoao. E mafai e ona fesoasoani ona taitaia ia sauniga [po o fonotaga] a le siteki ma e mafai ona pulefaamalumalu pe afai e toesea o ia. E le tatau ona feteenai sauniga [po o fonotaga] a le siteki ma sauniga a uarota i le Aso Sa.

18.3.1**Konafesi a le Siteki**

O siteki taitasi e faalua i le tausaga ona faia ia konafesi faalesiteki e pei ona faatulagaina mai e le Peresitene o le Korama a le Toasefululua. I le tele o vaega o le lalolagi, e pulefaamalumalu ai le peresitene o le siteki i se tasi o konafesi a le siteki ae o se Pulega Aoao po o se Fitugafulu Eria tofia e pulefaamalumalu i le isi.

I nisi o konafesi, e mafai ona aofia ai se faasalalauga i le satellite i le sauniga aoao o le Aso Sa. O lenei faasalalauga o le a aofia ai aoaoga mai le Au Pulega Aoao. A oo ina faaoga se faasalalauga i le satellite, e suitulaga le konafesi lena i le konafesi a le siteki lea semanu e pulefaamalumalu ai se Fitugafulu Eria po o se Pulega Aoao.

Afai e tatau ona valaauina se peresitene fou o le siteki ao le'i oo i le konafesi faatulagaina masani a le siteki, e mafai ona faia se konafesi faalesiteki faapitoa.

O le faamoemoe autu lava o le konafesi faalesiteki o le faamalolosia lea o le faatuatua ma molimau. O lauga ma musika uma, e tatau ona fuafuaina ma le mafaufau i le faamoemoega leni.

O le isi faamoemoega o le faatautaia ai lea o mataupu a le siteki. I le tasi o konafesi a le siteki i tausaga taitasi, e tuuina atu ai e se uso o le au peresitene o le siteki ia taitai aoao, taitai o le eria, ma taitai o le siteki ina ia lagolagoina, e faaoga ai le fomu o le Lagolagoina o Taitai. Na te tuuina atu foi ia igoa o taitai o le siteki ua faamalolo ina ia mafai e le faapotopotoga ona faailoa atu le faafetai mo la latou auaunaga. E masani ona faia lenei pisinisi i le konafesi muamua a le siteki i tausaga taitasi sei vagana ua tuu i ai se faasalalauga faasatelite i lena konafesi. I le tulaga lena, e faia ai le pisinisi lea i le konafesi lona lua a le siteki.

Afai e tofia ia taitai o le siteki pe faamalolo i le va o konafesi faalesiteki, e tatau ona tuuina atu mo se palota lagolago, pe faaalua le agaga faafetai i le isi

konafesi faalesiteki, sei vagana ua fai i se sauniga aoao a le au perisitua a le siteki (mo valaauga o loo ta'ua i le Siata o Valaauga i itulau e 159–60) po o le sauniga faamanatuga (e pei ona otooto atu i le 19.3).

O uso e fautuaina atu mo le faauuga i tofi o le toea-ina ma faitaulaga sili e masani lava ona tuuina atu mo se palota lagolago i se konafesi faalesiteki po o se sauniga aoao a le au perisitua a le siteki. O faatonuga o loo tuuina atu i le *Tusitaulima 1*, 16.7.1.

O konafesi taitasi a le siteki e masani ona aofia ai fonotaga [po o sauniga] nei:

1. O se fonotaga a le Fitugafulu Eria po o le Pulega Aoao (pe a tofia mai), au peresitene o le siteki, failautusi a le siteki, ma le failautusi faapitoa a le siteki.
2. O se sauniga faaleautaitai perisitua e auai le Fitugafulu Eria po o se Pulega Aoao (pe a tofia mai) ma uso o loo lisi atu i le 18.3.3. E mafai ona faia lea sauniga i le Aso Toonai po o le Aso Sa e pei ona fuafuaina ai e le pulefaamalumalu.
3. O se sauniga i le afiafi o le Aso Toonai mo tagata uma o le siteki o e ua ta'i 18 tausaga ma luga atu. O peresitene o le malumalu, peteriaka o le siteki, ma peresitene o misiona po o ni o latou sui o e auai atu, e tatau ona alaala i luga o le tulaga. E faalagolago i tulaga i le lotoifale, a o lenei sauniga e mafai ona faia i le Aso Sa pe afai e faamaonia ai e le pulefaamalumalu.
4. O se sauniga aoao e faia i le Aso Sa mo tagata uma ma tagata e le auai i le Ekalesia e fia auai. O peresitene o le malumalu, peteriaka o le siteki, ma peresitene o misiona po o ni o latou sui o e auai atu, e tatau ona alaala i luga o le tulaga. E mafai ona sili atu ma le tasi le sauniga aoao e faia i le Aso Sa pe afai e le lava ia fale e nonofo uma ai tagata i le sauniga e tasi. E auai atu tamaiti o le Peraimeri i leni sauniga faatasi ma o latou aiga, ae le o se isi sauniga e ese ai.

O faatonuga o sauniga uma o le konafesi faalesiteki, e i lalo o le taitaiga a le pulefaamalumalu. Afai o le a

pulefaamalumalu se Fitugafulu Eria po o se Pulega aoao, e mafai ona ia valaaulia le peresitene o le siteki e fautuaina atu ni mataupu atu. Afai o le peresitene o le siteki e pulefaamalumalu, e filifili e ia ma ona fesoasoani ia mataupu mo aoaoga.

Afai e tatau ai, e mafai ona faasalalau ia sauniga o le konafesi i isi nofoga i totonu lava o le siteki.

Fuafuaina ma le Taitaiina o le Konafesi a le Siteki

O le taitai pulefaamalumalu e taitaia le fuafuaina atoa o le konafesi. Na te faamaonia tagata e mau-tofiga i le konafesi, faapea musika e usuina, a o lei taitai oo i le konafesi.

O le peresitene o le siteki e taitaia le sauniga aoao o le Aso Sa. E mafai e ona fesoasoani ona taitaia isi sauniga o le konafesi.

E saunoa le peresitene o le siteki i le sauniga aoao o le konafesi i le Aso Sa. E saunoa ona fesoasoani i sauniga o le konafesi e pei ona fuafuaina ai e le taitai pulefaamalumalu.

O le fuafuaina e aofia ai le faia o fuafuaga ia lava nofoa, faasinoina o nofoa ma taavale, ma le paka mo taavale. E mafai e taitai o le siteki ona tofi ia korama o le perisitua, e aofia ai tocaina faaolioli, e tuuina atu nei auaunaga.

Musika mo Konafesi a le Siteki

Tagai i le 14.6.1.

18.3.2

Sauniga Aofai a le Au Perisitua o le Siteki

E taloina e le au peresitene o le siteki se sauniga aofai a le au perisitua o le siteki i tausaga taitasi. O i latou uma o e umia le Perisitua Arona ma le Mekisateko i totonu o le siteki e tatau ona auai atu i ai.

E faaoga e le au peresitene o le siteki ia nei sauniga e aoao ma musuia ai i latou e umia le perisitua. E

filifilia ma le agaga tatalo e le au peresitene ia mataupu atu ma failauga mo nei sauniga.

O sauniga nei e faautaitaia ai foi e le au peresitene o le siteki ia pisinisi faaleperisitua a le siteki e pei o le:

1. Tuuina atu o igoa o uso o e ua fautuaina mai mo le faauuina i tofi o le tocaina ma le faitaulaga sili ma talosagaina se palota lagolago (tagai i le *Tusitaulima 1*, 16.7.1).
2. Tuuina atu igoa o taitai fou o le siteki na faatoa valaauina ma talosagaina se palota lagolago (tagai i le Siata o Valaauga i le mataupu e 19 mo taiala po o ai e tuuina atu mo lenei palota lagolago).

18.3.3

Fonotaga a le Au Taitai Perisitua o le Siteki

E taloina e le au peresitene o le siteki se fonotaga a le au taitai perisitua o le siteki e o faatasi ma konafesi taitasi a le siteki (tagai 18.3.1, aitema 2). E taloina foi e le au peresitene se isi fonotaga a le au taitai perisitua o le siteki i se taimi o le tausaga, mo se aofaiga e tolu fonotaga [po o sauniga] faapena i le tausaga. O faamoemoega o nei fonotaga [po o sauniga] o le aoaoina lea o taitai perisitua i o latou tiute, faateleina o latou tomai, ma faamalolosia lo latou faatuatua.

O uso e auai i lenei fonotaga [po o lenei sauniga] e aofia ai le au peresitene o le siteki; fautua mauauluga; failautusi a le siteki (ma failautusi fesoasoani pe a manaomia); failautusi faapitoa a le siteki; au peresitene o Alii Talavou (ma le failautusi pe a manaomia); au epikopo; failautusi a uarota (ma failautusi fesoasoani pe a manaomia); failautusi faapitoa a le uarota; au peresitene o korama a tocaina ma failautusi; taitai misiona a uarota; ma au peresitene o Alii Talavou a uarota (ma failautusi ma faufautua fesoasoani pe a manaomia). E mafai ona valaaulia e le au peresitene o le siteki ia isi e auai atu pe a manaomia.

O le faatulagaga o nei fonotaga e mafai ona fetuutuunai ina ia maua ai aoaoga e aupito sili ona aoga. E mafai ona tuufaatasi alii uma mo le sauniga

atoa. A le o lena, a uma ona latou faatasi mo pisinisi faalesiteki ma faatonuga lautele, e mafai e le au peresitene o le siteki ona tuueseese i vaega e fefautuaai faatasi ai, ma tuuina atu faatonuga po o aoaoga patino i o latou tofitofiga. Mo se faaitaiga:

E mafai ona mafuta faatasi ia au epikopo ma isi taitai o le Perisitua Arona.

E mafai ona fono faatasi ia taitai o korama a toecaina.

O le fautua maualuga ua tofia i le galuega faamisi-ona po o se tasi o le au peresitene o le siteki, e mafai ona faatasi ma taitai misiona a uarota.

O le failautusi faapitoa o le siteki e masani ona fono ma failautusi faapitoa a uarota.

O le failautusi o le siteki e masani ona fono ma failautusi a uarota.

I nei vaega, e mafai e le au peresitene o le siteki ona tuuina atu aoaoga pe valaaulia foi ni fautua maualuga, le au peresitene o Alii Talavou a le siteki, ma isi e fesoasoani atu i ai.

18.3.4

Fonotaga a le Korama a Faitaulaga Sili o le Siteki

E taloina e le au peresitene o le siteki se fonotaga a le korama a faitaulaga sili mo uso uma o le korama a faitaulaga sili i le siteki e le itiiti ifo ma le taitasi i le tausaga. I le taimi o lena fonotaga, latou te aoa atu ai uso o le korama i le aoaoga faavae o le talalelei (tagai i le Alema 13:1–6), faatonu i latou i o latou tiute, ma faatautaia pisinisi a le korama. O le fonotaga faaletausaga a faitaulaga sili uma ua faauuina i le siteki ua le toe faia.

18.3.5

Fonotaga a le Au Peresitene o le Siteki

E fono e le aunoa le au peresitene o le siteki. E auai atu i ai le failautusi o le siteki ma le failautusi faapitoa a le siteki; e tausaga e le failautusi se

faamaumauga o tofitofiga ma faaiuga. E mafai ona valaaulia e le peresitene o le siteki ia isi e auai atu pe a manaomia.

I le fonotaga lena, e fefautuaai faatasi ai uso o le au peresitene o le siteki e uiga i mataupu tau i le siteki. Latou te fuafuaina ala e faamalolosia ai tagata taitoatasi ma aiga. Latou te iloiloaina uarota, korama a toecaina, ausilali, polokalama, ma gaoioiga. Latou te faia ai foi fuafuaga e faatino ai aoaoga mai tusitusiga paia, taitai o le Ekalesia, ma tusitaulima.

I le fonotaga lena, e faailoa ai e uso o le au peresitene o le siteki ia tagata e valaauina i tofiga o le Ekalesia. Latou te iloiloaina foi ia fautuaga a epikopo i tagata e auuina atu i misiona ma uso e faauuina o ni toecaina po o faitaulaga sili.

O isi mataupu e talanoaina mo lena fonotaga e mafai ona aofia ai ia lipoti i tofitofiga, fuafuaina o sauniga po o fonotaga, iloiloaina o le kalena a le siteki, ma le iloiloaina o le paketi a le siteki.

18.3.6

Fonotaga a Fautua Maualuga

O le peresitene o le siteki e pulefaamalumu i le fonotaga a fautua maualuga, lea e auai ai le au peresitene o le siteki, fautua maualuga, failautusi a le siteki, ma le failautusi faapitoa a le siteki. E mafai ona valaaulia e le au peresitene o le siteki ia isi e auai atu pe a manaomia.

E ta'i faalua i le masina ona fono fautua maualuga, i tulaga e mafai ai. O le lisi o mataupu e talanoaina e mafai ona aofia ai mea nei:

1. Maua ia faatonuga mai le au peresitene o le siteki e uiga i aoaoga faavae ma tiute o le perisitua.
2. Maua mai faatonuga e faatatau i tofitofiga i le Perisitua Mekisateko, Perisitua Arona, ma uarota.
3. Lipoti e uiga i tofitofiga i uarota ma korama a toecaina. Lipoti e uiga i ausilali pe a manaomia ai.

4. Talosagaina fautua maualuga e lagolago ia faaiuga a le au peresitene o le siteki e faauu ia uso i tofi o le tocaina ma faitaulaga sili ma tuuina atu ia valaauga.
5. Fefautuaai faatasi e uiga i auala e faamalolosa ai tagata taitoatasi ma aiga, foia faaifitauli i le siteki, ma faaleleia ia vaega e pei o le taitaiga, auaunaga, galuega faamisiona a tagata o le au paia, faatumauina, faatoaagaina, galuega o le malumalu ma talafaasolopito o aiga, uelefea, ma aoaoga o le talalelei.
6. Lipoti e uiga i isi tofitofiga.
7. Faafofoga i lipoti mai faifeautalai ua mae'ai mai misiona.
8. Fuafua ia fonotaga faaleautaitai perisitua o le siteki.

18.3.7

Fonotaga a le Aufono a le Siteki

O le peresitene o le siteki e pulefaamalumalu i le aufono a le siteki. O leni aufono e aofia ai le au peresitene o le siteki, fautua maualuga, failautusi a le siteki, failautusi faapitoa a le siteki, ma peresitene o le Aualofa a le siteki, Alii Talavou, Tamaitai Talavou, Peraimeri, ma le Aoga Sa. E mafai ona valaaulia e le au peresitene o le siteki ia isi e auai atu pe a manaomia.

E faalua i le faafa i le tausaga ona fono le aufono a le siteki pe a manaomia ai. O le lisi o mataupu e talanoaina e mafai ona aofia ai mea nei:

1. Maua ia aoaoga mai le au peresitene o le siteki e uiga i aoaoga faavae ma tiute.
2. Fefautuaai faatasi pe faapefea ona faamalolosa tagata taitoatasi ma aiga, foia faaifitauli i le siteki, ma faaleleia vaega e pei o le taitaiga, faatumauina, faatoaagaina mai, ma aoaoga o le talalelei.

3. Fuafua ma lipoti atu e uiga i taumafaiga faamisiona ma taumafaiga mo le malumalu ma talafaasolopito o aiga i le siteki.
4. Fefautuaai faatasi e uiga i mataupu tau i le uelefea. Fuafua pe faapefea ona faamalolosa tagata ina ia ola faalagolago ia i latou lava. Ia faamautinoa ua maua e uarota ia punaoa faaleuelefea o i totonu o le siteki pe a manaomia ai. Latou te amatalia ma tausia se fuafuaga tusitusia faigofie mo le siteki e tali atu ai i faalavelave faafuasei. O loo maua faamatalaga faaopoopo i le "Pulefaamalumalu i le Galuega o le Uelefea a le Aufono a le Siteki" i le *Tusitaulima 1*, 5.1.1.
5. Lipoti e uiga i ausilali a le siteki ma gaoioiga ma polokalama a le siteki pe a manaomia ai.
6. Faamaopoopo le fuafuaina o polokalama ma gaoioiga a le siteki.
7. Iloilo le alualu i luma o le polokalama o le Tupe Faaagaga mo A'oga i nofoaga ua faamaonia ai.

18.3.8

Fonotaga ma Au Epikopo

E fono le au peresitene o le siteki ma au epikopo e aoaoina i latou i o latou tiute, iloilo aiaiga a le Ekalesia, ma fefautuaai faatasi. E tasi i le faafa i le tausaga ona faia nei fonotaga pe a manaomia ai.

O le au peresitene o le siteki, o au epikopo uma, failautusi o le siteki, ma le failautusi faapitoa o le siteki e auai i leni fonotaga. Afai e finagalo ai, e mafai e le peresitene o le siteki ona faatapulaa le fonotaga mo na o epikopo.

18.3.9

Fonotaga a le Komiti o le Perisitua Arona—Tamaitai Talavou a le Siteki

E tofia e le peresitene o le siteki se tasi o ona fesoaosani e pulefaamalumalu i le komiti o le Perisitua

Arona--Tamaitai Talavou a le siteki. O isi sui auai o le komiti o fautua maualuga e tofia i faalapotopotoga a Alii Talavou ma Tamaitai Talavou a le siteki ma le failautusi, ma le au peresitene o Tamaitai Talavou a le siteki ma le failautusi. E mafai e le au peresitene o le siteki ona valaaulia le autalavou e auai atu i le fonotaga a le komiti pe a manaomia ai. O le fautua maualuga o loo taitaifono i le komiti o gaoioiga a le siteki ma isi, e mafai foi ona valaaulia e auai.

E fono le komiti lea pe a manaomia e fuafua ni gaoioiga tuufaatasi a le siteki mo alii talavou ma tamaitai talavou. E tatau ona faaafia ai le autalavou i le tele e mafai ai i le fuafuaina ma le faatinoina o gaoioiga e pei o konafesi a le autalavou, siva, faigalotu, ma mea e fai a siteki tuufaatasi. E mafai foi ona auai le autalavou i le talanoaina o luitau o loo feagai ma le autalavou i le siteki.

O gaoioiga a le siteki e tatau ona faaopoopo atu i gaoioiga a le uarota, ae le faatautava i ai. E faamaopoopoina i fonotaga a aufono a le siteki. E tatau ona vave faasilasila atu i taitai o uarota ia mea e fai.

18.3.10

Fonotaga a le Aufono o le Uelefea a Epikopo o le Siteki

O faamatalaga e uiga i le aufono o le uelefea a epikopo o le siteki, o loo maua i le *Tusitaulima 1, 5.3*.

18.3.11

Fonotaga Faaleautaitai o Ausilali a le Siteki

E taufai fuafua e au peresitene taitasi o le siteki, Aualofa, Tamaitai Talavou, Peraimeri, ma le Aoga Sa ma ta'ita'i se fonotaga faaleautaitai se tasi faalesiteki i tausaga taitasi. Afai e le avea ma avega mamafa i taitai ia tulaga faalelotoifale ma le taimi o feoa'iga, e mafai e le au peresitene o le siteki ona faataga se fonotaga lona lua i tausaga taitasi. E faatulaga e faalapotopotoga taitasi lana lava fonotaga sei vagana ua tonu i le au peresitene o le siteki e tuufaatasi uma fonotaga i le taimi ma le nofoaga e tasi.

O le fautua maualuga ua tofia i le faalapotopotoga e pulefaamalumalu i le fonotaga sei vagana ua auai se tasi o le au peresitene o le siteki. E valaaulia au peresitene uma o ausilali o uarota ma failautusi e auai. E mafai foi ona valaaulia isi taitai o ausilali o uarota, faiaoga, ma faufautua, faapea foi sui auai o le au epikopo ua tofia i ausilali, e auai pe a manaomia.

O faamoemoega o nei fonotaga ia aoao ai taitai o ausilali i o latou tiute, aoao i latou i tomai faafai-aoga ma faaleautaitai, ma faamalolosia ai o latou faatuatua. O nei fonotaga e mafai foi ona faaoga e faamaopoopo ai gaoioiga, tuuina atu ai lipoti, ma fefaasoai ai manatu.

O le faatulagaga o nei fonotaga e mafai ona fetuutuunai ina ia maua ai aoaoga e aupito sili ona aoga. E mafai e taitai mai ausilali ona potopoto faatasi mo faatonuga po o aoaoga ma fefaasoai ai, pe mafai foi ona latou potopoto i ni vaega tolaiti e iloilo ai ni gaoioiga faapitoa i totonu o la latou faapotopotoga. Afai e potopoto i le taimi e tasi ia faalapotopotoga uma a ausilali, e mafai ona mafuta faatasi mo faatonuga lautele ona mafuta ai lea i vaega eseese e maua ai o latou faatonuga mai taitai o a latou faalapotopotoga.

E le faia e le au peresitene o Alii Talavou a le siteki se fonotaga faaleautaitai a ausilali a le siteki. (Ae, o au peresitene o Alii Talavou o le siteki ma uarota, e o i fonotaga faaleautaitai perisitua o le siteki (tagai 18.3.3).

18.3.12

Fonotaga a le Komiti a Talavou Nofofua Matutua a le Siteki

Tagai i le 16.3.2.

18.3.13

Fonotaga a le Komiti a le Au Matutua Nofofua a le Siteki

Tagai i le 16.1.2.

18.4Fesoasoani Vaaia ma Mea Tau
Otiovisio i Sauniga a le Ekalesia

E le tatau i tagata o le au paia ona faaoga ni fesoasoani vaaia po o mea faitino ia latou lauga i sauniga faamanatuga po o konafesi faalesiteki. O na metotia faafaiaoga e sili atu ona talafeagai i totonu o potuaoga ma fonotaga faaleautaitai.

Mo taiala e uiga i le faaogaina o mea tau otiovisio i sauniga a le Ekalesia, tagai i le 21.1.5.

18.5

Tatalo i Sauniga a le Ekalesia

E mafai e alii ma tamaitai ona faia tatalo amata ma tatalo faaiu i sauniga a le Ekalesia.

O tatalo e tatau ona pupuu, faigofie, ma faaleo mai e pei ona taitaiina ai e le Agaga. Ua fautuaina tagata uma o le au paia ina ia tali atu i se *amene* e lagona atu i le faaiuga o se tatalo.

E tatau i tagata o le au paia ona faailoa atu le faaloalo mo le Tama Faalelagi e ala lea i le faaogaina o le gagana faapitoa o le tatalo lea e talafeagai mo le gagana e tautatala ai. O le gagana o le tatalo e eseese lava le faaogaina i gagana eseese. O nisi gagana e iai ia upu e patino pe masani ai lea e na o le aiga lava ma uso pele e tautalagia ai. O isi gagana e i ai upu e faailoa ai le faaloalo tele. Ae peitai, o le mataupu faavae e tutusa uma lava: e tatau i tagata o le ekalesia ona tatalo i upu e masani ai tagata o le gagana i le alofa, faaloalo, migao, ma le valalata. I le gagana Peretania, mo se faaitaiga, e tatau i tagata o le ekalesia ona faaoga ia suinauna o le *Thee, Thy, Thine*, ma le *Thou* pe a talanoa i le Tama Faalelagi.

E tatau i le au epikopo ona aloese mai le faiga o le faatatalo o le tane ma le ava i le sauniga e tasi. O lena ituaiga o faiga e ono avatu ai se feau e le mafafauina e le faitaulia ai i latou e nofofua. O tagata o le

ekalesia e le masani ona valaauina, e tatau ona faa-aofia ai i e tofia e tatalo. Pe a manaomia ai, e mafai e se tasi o le au epikopo ona lapataia i latou e tatalo ina ia aua ne'i pei e lauga atu pe tatalo umi tele foi.

O le tagata e faia se tatalo e le tatau ona talosagaina e faitau leotele muamua se mau ona tatalo ai lea.

18.6Falelauasiga ma Isi Sauniga
i le Taimi o se Maliu

E taumafai taitai ma tagata o le Ekalesia e faia ia sauniga o se maliu o se tagata o se aafiaga e mamalu, paia, ma faaleagaga mo tagata uma e auai. O nei sauniga e masani lava ona faia i lalo o le taitaiga a le epikopo.

O sauniga mo tagata e maliliu, e matua eseese lava i le lalolagi atoa e tusa ma tulaga manaomia i lotu, aganuu, tu ma agaifanua, ma faaletulafono. E oo foi i sauniga mo tagata o le Ekalesia e eseese lava i vaega eseese o le lalolagi. O le vaega leni o loo avatu ai mataupu faavae aoao e tatau i taitai ona mulimuli ai i falelauasiga po o isi sauniga mo tagata o le ekalesia e maliliu, tusa lava po o a tu ma agaifanua po o aganuu. O loo tuuina atu ai foi ia taiala mo le fuafuaina po o a tu ma agaifanua faalelotoifala e faatatau i maliu ma faanoanoaga e talafeagai ona auai ae po o a foi mea e le talafeagai.

18.6.1

Maliu ma Faanoanoaga

O le maliu o se vaega taua o le fuafuaga a le Tama Faalelagi mo le faaolataga (tagai i le 2 Nifae 9:6). E tatau ona oti tagata uma ina ia mafai ai ona maua se tino atoatoa, toetu. O le aoao atu ma molimau atu e uiga i le ata o le faaolataga, aemaise lava le Togiola a le Faola ma le Toetu, o se faamoemoega taua o sauniga o maliu o tagata o le Ekalesia.

O le oti e aumaia ai se manaoga e faamafanafana i e o ola. I le avefa ai ma soo o Iesu Keriso, o taitai

ma tagata o le Ekalesia e “faanoanoa faatasi ma e e faanoanoa . . . ma faamafanafana atu ia te i latou o e e manaomia le faamafanafanaga” (Mosaea 18:9).

I le tele o aganuu, o sauniga i falemalii, o le maimoaina o le tino malii, ma falelauasiga o ni aga masani ia e fesoasoani ai e faamafanafana i e o soifua, ma saafi atu ai i le ua malii. O nofoaga e sili ona talafeagai faaleaganuu, o le tele lava o nei faamoemoega e mafai ona faataunuaina i se faapopotoga faaleaiga, se sauniga i le tuugamau, po o isi faatulagaga mamalu ma le paia.

O le tele o lotu ma aganuu e i ai a latou faiga faavae aloaia, sauniga, ma aga masani e faia i malii ma faanoanoaga mo le malii. O le talalelei toefuataiina a Iesu Keriso e leai ni faiga faavae aloaia po o ni sauniga faapena. E le tatau i taitai o le Ekalesia ona faaopoopoina ni faiga masani a isi tapuaiga po o vaega, i sauniga a le Ekalesia mo tagata o le ekalesia e malilii.

E tatau i tagata o le Ekalesia ona faaalua lo latou faaaloalo mo sauniga masani a isi tapuaiga. Peitai, e fautuaina tagata o le ekalesia ia aua nei auai i ni sauniga masani faalelotu, faiga, po o tu ma agaifanua e fetuutuunai ai lo latou mafai ona tausia poloaiga pe ola ai i mataupu faavae o le talalelei toefuataiina.

E tusa ai ma faanoanoaga ma sauniga mo tagata e malilii, ua fautuaina tagata o le ekalesia e aloese mai faiga po o tu ma aga masani ua matua taugata tele pe faaumiumi ai ona faamalumu mai se faigata i luma i o latou olaga. O na ituaiga o faiga e aofia ai le faamoemoe mo ni feoa'iga soona fai, ofuina o ni ofu faapitoa mo le faanoanoa, faia o faasilasilaga lavelave faalauaitele, tofogiina o tupe i le aiga, faia o taumafataga tetele ma faaumiumi i falelauasiga, ma le faia o ni sauniga faamanatu soona fai pe a maca le falelauasiga.

O le tele lava o faigamalo e i ai tulaga faaletulafono e manaomia e pulea ai mea e fai pe a malii se tagata. E ao i taitai o le Ekalesia ma ona tagata ona silafia nei tulaga manaomia ma ia mulimuli ai.

18.6.2

Fuafuaina ma le Fesoasoani Atu

A malii se tagata o le Ekalesia, e asiasi atu le epikopo i le aiga e faamafanafana ia i latou ma ofoina atu le fesoasoani mai le uarota. E mafai ona ia fesili atu i ona fesoasoani latou te o. E ofo atu e le epikopo le fesoasoani i le logoina o aiga, uo, ma e masani o le ua malii. Pe a talafeagai ai, na te ofo atu foi lana fesoasoani i le fuafuaina o le sauniga o le malii, sauniaina o se faasilasilaga talafeagai, ma le logoina o nusipepa e uiga i le malii. Afai e maimoaina le tino malii ao lei faia le sauniga falelauasi, e tatau ona aofia ai le faasilasilaga o le malii ma le taimi e amata ma uma ai.

E mafai e le epikopo ona ia ofo atu e faia ia feutaiga i le falemalii ma le fanuatanu e tusa ai ma tulafofono i le lotoifale ma agaifanua. Afai e manaomia ai, e mafai ona ia ofoina atu le fesoasoani mai le uarota i le sauniaina o auala i le lotoifale e feoa'i ai le aiga.

E logo e le epikopo le peresitene o le korama a toea ina ia mafai e ia ma isi uso, e aofia ai uso o auunaga ona fesoasoani atu i le aiga mafatia. O fesoasoaniga faapea e mafai ona aofia ai le faaofuina o se alii ua malii mo le falelauasiga, malupuipua o le fale o le aiga i le taimi o le malii a o auai atu uma le aiga i le falelauasiga, ma le tuuina atu o isi fesoasoaniga (tagai i le 7.10.2).

E logo foi e le epikopo le peresitene o le Aualofa ina ia mafai e ia ma isi tuafafine, e aofia ai tuafafine o auunaga ona fesoasoani atu i le aiga. O na fesoasoani e mafai ona aofia ai le faaofuina o le tino malii o se tamaitai ua malii mo le falelauasiga, fesoasoani i teufugalaau, vaaiga o tamaiti laiti, malupuipua o le fale i le taimi o le falelauasiga, ma saunia taumafa (tagai 9.10.3).

18.6.3

Maimoaina (I Nofoga e Masani Ona Fai Ai)

Afai e maimoaina le tino o le ua malii ae le o toe mamao faia le sauniga lotu o le malii, e tatau i le

epikopo ona faamutaina ia le itiiti ifo ma le toe 20 minute ona amata lea o le sauniga lotu o le maliu. A maea le maimoaina o le tino maliu, e mafai ona faia se tatalo faaleaiga pe afai e mananao i ai le aiga. O lenei tatalo e tatau ona mae'a a o lei amataina le sauniga o le maliu e pei ona faatulagaina ai, ina ia le laaloa i le taimi o le potopotoga ua faapotopoto i le falesa. E tatau ona tapuni le pusa maliu a o lei aveina atu i le falesa mo le sauniga o le maliu.

E tatau i taitai ona tatala le falelotu mo le afaatonu o maliu ia le itiiti ifo ma le tasi le itula a'o le'i oo i taimi faatulagaina mo le maimoaina ma le sauniga o le maliu.

18.6.4

Sauniga o Falelauasiga

Afai e faia se sauniga o se maliu mo se tagata o le ekalesia i se fale o le Ekalesia, o le epikopo e taitaia. Afai e faia i se fale o se aiga, i se fale maliu, po o le fanua maliu, e mafai ona talosaga le aiga i le epikopo na te faia. E mafai e se fesoasoani o le epikopo ona taitai pe afai e le mafai ona auai le epikopo.

O se sauniga o se maliu e taitai e le epikopo, e tusa lava pe faia i se fale o le Ekalesia po o se isi nofoaga, o se sauniga lava a le Ekalesia ma o se sauniga faalelotu. E tatau ona avea ma se faatasiga faaleagaga e faapoopo atu i se faatasiga faaleaiga. E tatau i le epikopo ona uunaia tagata o le ekalesia ina ia tausisia pea se agaga po o se siosiomaga o le migao, mamalu, ma le paia i le taimi o le sauniga o se maliu faapea ma faatasiga e fesootea ma le sauniga lotu.

Afai e taitaia e se epikopo se sauniga o se maliu, o ia po o se tasi o ona fesoasoani e vaai le fuafuaina o le sauniga. Na te manatulia manaoga o le aiga, ae peitai na te faamautinoaina e faigofie ma mamalu le sauniga o le maliu, o musika ma tautalaga pupuu ma lauga ia taulai atu i le talalelei, ia aofia ai le faamafanafanaga ua mafai ona maua mai i le Togiola ma le Toetu o le Faaola. E le tatau ona manatu ia tagata o le aiga faapea e tatau ona fai ni a latou tautalaga pe auai i le faatinoina o le sauniga.

E pulefaamalumu se tasi o le au peresitene o le siteki, se Fitugafulu Eria, po o se Pulega Aoao i sauniga o maliu e susū ai. E vave faafesootaia o ia e lē e taitai ma faasilasila aloaia o ia i le taimi o le sauniga. E ao ona tuuina atu le avanoa i le taitai pulefaamalumu mo le saunoaga faaiu pe afai e finagalo ai.

E le tatau ona faaaogaina ni lipine vitio ma komepiuta po o nisi lava faatinoga faaeletonika faapea o se vaega o se sauniga o se maliu. E le tatau foi ona faasalalauina le sauniga i luga o le Initoneti po o se isi lava auala. Peitai, faatasi ma le faamaoniga mai lana peresitene o le misiona, e mafai ai e se faifeautalai ona maimoa i sauniga o le maliu o se tagata patino o le aiga i le initoneti.

E tatau lava ona amataina sauniga o maliu i le taimi ua atofaina. E avea o se faaloalo mo i latou o e auai mai, e le tatau ona uumi tele nei sauniga. O sauniga o maliu e sili atu ma le itula ma le afa, o le a avea ma avega mamafa e le tatau ai ia i latou o loo auai ma e maufioga ai.

O sauniga o maliu e maua ai se avanoa taua e aoao atu ai le talalelei ma molimau atu ai i le ata o le faaolataga. E maua ai foi se avanoa e saafi atu ai i le ua maliliu. Peitai, o na saafiafiga e le tatau ona tele le taimi o le sauniga o le maliu e alu ai. O le toatele naua o tagata e fai a latou saafiafiga pe faasoa mea latou te manatua, e mafai ona soona umi tele ai se sauniga o se maliu ma lē talafeagai ai mo se sauniga faale-Ekalesia. Afai e mananao tagata o le aiga e faaumiumi atu se taimi e faasoa ai na manatuaga, e mafai ona mafaufau e faia i se faapotopotoga faapitoa faaleaiga, e ese mai le sauniga o le falelauasiga.

E le masani ona faia ni sauniga o maliu i le Aso Sa.

18.6.5

Musika

O musika mo maliu e mafai ona aofia ai musika e mua'i tataina, se viiga amata, fatuga faamusika faapitoa, se viiga faaiu, ma se musika e mulia'i tataina. O viiga faigofie ma isi pese e i ai savali o le talalelei

e sili ona talafeagai mo taimi faapenei. O viiga amata ma viiga faaii e masani lava ona usuina e le potopotoga.

18.6.6

Tanuga po o le Susunuina o le Tino Malii

Afai e mafai, o tagata ua malilii o e ua maua faacega paia, e tatau ona falelauasi i laei o le malumalu. I tulaga o aganuu ma faiga o malii e le talafeagai ai pe faafaigata ai lenei mea, e mafai ona gaugau lelei ia laei ma tuu i tafatafa o le tino i totonu o le pusa malii. O faatonuga faaopopo i laei o le malumalu mo le tanuga ma le faaofuina o le malii o loo maua atu i le 7.10.2, 9.10.3, ma le *Tusitaulima 1*, 3.4.9.

Afai e mafai, ia le itiiti ifo ma le toatasi se uso o le au epikopo ia i ai i le solo o le malii i le fanua malii.

Afai o le a faapaiaina le tuugamau, e feutagai o ia ma le aiga ma tapa se e umia le Perisitua Mekisateko e faia e tusa ma faatonuga o i le 20.9. Afai e mananao ai le aiga, e mafai ona faia se tatalo i autafa o le tuugamau nai lo le faia o se tatalo o le faapaiaiga.

E le masani ona fautuaina e le Ekalesia le susunuina o le tino malii. Peitai, afai e susunuina le tino o se tagata ua maua ona faacega paia, e tatau ona faaofuina i laei o le malumalu pe a mafai. Mo faamatalaga e uiga i le faapaiaina o le nofoaga e teu ai lefulefu, tagai 20.9.

Siata o Fonotaga [po o Sauniga] a le Uarota

Siata o Fonotaga [po o Sauniga] a le Uarota (faaauau)

Sauniga [po o le Fonotaga]	Faamoemoega	Tagata e Auai	Faafia Ona Fai
Sauniga faamanatuga	Taumamafa i le faamanatuga, tapuai, sauni ma tuu atu aoaoga o le tala-lelei, faatino ia sauniga, faatautaia pisinisi faaleuarota, ma faamalolosia le faatuatua ma molimau.	Tagata uma o le uarota	Aso Sa Taitasi

18.6.7

Aiaiga o Mea Tau Tupe

O tagata o le Ekalesia e taitaia pe o i ai so latou sao i sauniga o le malii, e le tatau ona taliaina ni tupe e totogi atu po o ni foai, e tusa lava pe o le sauniga e mo se tagata o le ekalesia pe mo se tagata e le auai i le Ekalesia.

I nisi o tulaga, e mafai ai e epikopo ona fuafuaina ma pule o fale malii ina ia faia ni sauniga mamalu o le falelauasiga i se tau maualalo a le fale malii pe afai e totogiina ia tupe faaalua mai tupe o le taulaga anapogi a le Ekalesia.

18.6.8

Sauniga o Malii mo Tagata e le Auai i le Ekalesia

E mafai e epikopo ona ofoina atu le faaaogaina o falelotu o le Ekalesia mo sauniga o malii mo tagata e le auai i le Ekalesia. O na sauniga e masani lava e mafai ona faia i le faiga faatonuina e le ekalesia a le tagata malii. Peitai, e le mafai ona faia sauniga a isi ekalesia po o ni faalapotopotoga i fafo atu i se faletapu ai o le Ekalesia. Afai e mananao ai le aiga, e mafai ona faatautaia le lotu e se faifeau o le ekalesia a le tagata malii, pe afai e mamalu ma e talafeagai.

Sauniga [po o le Fonotaga]	Faamoemoega	Tagata e Auai	Faafia Ona Fai
Sauniga anapogi ma molimau	Taumamafa i le faamamafa natuga, tapuai, faatino ia sauniga, faatautaia pisinisi faaleuarota, ma tuu atu molimau.	Tagata uma o le uarota	E masani lava o le Aso Sa muamua o masina taitasi
Sauniga a le perisitua	Faatautaia pisinisi faalekorama, aoao tiute o le perisitua, faamalolosa tagata taitoatasi ma aiga, ma susesue ma aoao atu le talalelei.	O i latou uma o e umia le perisitua, o alii o loo faamoemoe mo le tofi toecaina, ma alii talavou ua aulia tausaga o le Perisitua Arona e lei faauuina i le perisitua.	Aso Sa Taitasi
Sauniga a le Aualofa i Aso Sa	Aoao atu le talalelei, faateleina le faatuatua ma le amiotonu, ma faamalolosa tagata taitoatasi ma aiga.	Tamaitai i le uarota ua ta'i 18 tausaga ma matutua atu (ma tamaitai e laiti ifo ua faaipoipo)	Aso Sa Taitasi
Sauniga faaopopo ma gaioioiga a le Aualofa	Aoao ma faaoga mataupu faavae ma tomai o le a fesoasoani ai i tuafafine o le Aualofa ia faateleina lo latou faatuatua ma le amiotonu, faamalolosa tagata taitoatasi ma aiga, ma sailia ma fesoasoani ia i latou e manaomia le fesoasoani.	Tamaitai i le uarota ua ta'i 18 tausaga ma matutua atu (ma tamaitai e laiti ifo ua faaipoipo)	E masani lava e ta'i masina i se taimi e ese ai mai le Aso Sa po o afiafi o Aso Gafua; e mafai ona faatulagaina faalekuata.
Tamaitai Talavou	Aoao atu le talalelei faatasi ai ma se faamamafa i le faaogaina o mataupu faavae o le talalelei i le olaga i aso taitasi.	O tamaitai talavou ua ta'i 12 i le 18 tausaga ma taitai o Tamaitai Talavou	Aso Sa Taitasi
Peraimeri	Aoao atu le talalelei ma fesoasoani i tamaiti ia lagonaina le alofa o le Tama Faalelagi mo i latou.	O tamaiti ua ta'i 18 masina e oo i le ta'i 11 tausaga ma taitai ma faiaoga o le Peraimeri	Aso Sa Taitasi

Sauniga [po o le Fonotaga]	Faamoemoega	Tagata e Auai	Faafia Ona Fai
Aoga Sa	Faamalolusia le faatuatua ma fesoasoani i tagata o le Ekalesia e aoao e le tasi le isi.	O tagata o le uarota ua ta'i 12 tausaga ma matutua atu ma taitai ma faiaoga o le Aoga Sa	Aso Sa Taitasi
Konafesi a le uarota	Faamalolusia le faatuatua ma molimau, tuu atu aoaoga o le talalelei, faatautaia pisinisi, ma iloilo le malolosi.	Au peresitene o le siteki, taitai o ausilali a le siteki, fautua maualuga ua tofia, au epikopo, ma tagata o le uarota	Faa-tasi i tausaga taitasi
Fonotaga a le au epikopo	Fuafua, iloilo, ma manatunatu i mataupu uma o loo aafia ai le uarota.	Au epikopo, failautusi a le uarota, failautusi faapitoa a le uarota, ma isi pe a valaaulia ai	E masani lava e le itiiti ifo ma le ta'i vaiaso
Fonotaga a le aufono a le uarota	Fuafua auala e faamalolusia ai tagata taitoatasi ma aiga. Faamaopoopo taumafaiga o le uelefea faaleagaga ma le faaletino, auaunaga, galuega faafaifeautalai, faatumaui, faatoagaina mai, galuega o le malumalu ma talafaasolopito o aiga, ma le aoao atu ma le aoao mai o le talalelei. Iloilo ma faamaopoopo ia polokalama ma gaoioiga.	O le au epikopo; failautusi o le uarota; failautusi faapitoa o le uarota; peresitene o le korama a toeaina; taitai misiona a le uarota; o peresitene o le Aualofa, Alii Talavou, Tamaitai Talavou, Peraimeri, ma le Aoga Sa; ma isi pe a valaauliaina.	Faia e le aunoa (ia le itiiti ifo ma le ta'i masina)
Fonotaga a le komiti talavou a le au epikopo	Faailoa manaoga o le autalavou a le uarota. Fuafua ni auala e taulima ai manaoga, fesoasoani i le autalavou e ola i tulaga faatonuina o le Ekalesia, ma fautuaina le auai i sauniga ma gaoioiga a le Ekalesia. Fuafua gaoioiga a le autalavou.	O le au epikopo, se tasi o fesoasoani o le epikopo i le korama a ositaulaga, peresitene o korama a aoao ma tiakono, peresitene o vasega a Tamaitai Talavou, peresitene o Alii Talavou ma Tamaitai Talavou, ma isi (e pei o fesoasoani i au peresitene o korama ma vasega) pe a valaaulia	E masani ona ta'i masina

Sauniga [po o le Fonotaga]	Faamoemoega	Tagata e Auai	Faafia Ona Fai
Fonotaga a le komiti a talavou nofofua matutua a le uarota	Fautuaina atu ni auala e fesoaoani ai i talavou nofofua matutua e auai i auaunaga ma le taitaiga. Sue ma faauo i talavou nofofua matutua ua le toaaga mai.	O se tasi o fesoasoani i le au epikopo, o fesoasoani o le Aualofa ma le korama a toeaina ua tofia i talavou nofofua matutua, taitai o talavou nofofua matutua, ma le ulugalii ua tofia e fai ma faufautua o talavou nofofua matutua.	Pe a manaomia ai
Fonotaga faamaopoopo a faifeautalai	Faamaopoopoina tau-mafaiga faafaifeautalai a faifeautalai faamisiona ma tagata o le uarota mo le, faatumauina ma le faatoagaina mai.	Taitai misiona a le uarota, faifeautalai o le uarota, ma faifeautalai faamisiona (i nofoaga o i ai)	Fai e le aunoa

Siata o Fonotaga [po o Sauniga] a le Siteki

Siata o Fonotaga [po o Sauniga] a le siteki (faaauau)

Sauniga [po o le Fonotaga]	Faamoemoega	Tagata e Auai	Faafia Ona Fai
Konafesi faalesiteki	Faamalolosia le faatuatua ma molimau, saunia ma tuu atu aoaoga o le talalelei, ma faatautaia pisinisi faalesiteki.	Pulega Aoao po o le Fitugafulu Eria (pe afai e tofia), au perisitene o le siteki, tagata uma o le siteki.	Faalua i tausaga taitasi
Sauniga aofai a le au perisitua o le siteki	Aoao ma musuia ai e ua umia le perisitua ma faatautaia mataupu a le au perisitua o le siteki.	O i latou uma o e umia le perisitua, o alii ua faamoemoe mo le tofi toeaina, ma alii talavou uma ua aulia tausaga o le Perisitua Arona e lei faauuina i totonu o le siteki	Faa-tasi i tausaga taitasi

Sauniga [po o le Fonotaga]	Faamoemoega	Tagata e Auai	Faafia Ona Fai
Fonotaga faaleautaitai perisitua o le siteki	Aoa ia taitai perisitua i o latou tiute, faatele lo latou atamai, ma fausia lo latou faatuatua.	O le au peresitene o le siteki; fautua maualuga; failautusi o le siteki (ma failautusi fesoasoani pe a manaomia); failautusi faapitoa o le siteki; au peresitene o Alii Talavou o le siteki (ma le failautusi pe a manaomia); au epikopo; failautusi a uarota (ma failautusi fesoasoani pe a manaomia); failautusi faapitoa a uarota; au peresitene o korama a toaina ma failautusi; taitai misiona a uarota; au peresitene o Alii Talavou a uarota (ma failautusi ma faufautua fesoasoani pe a manaomia); ma isi pe a valaaulia	E faatolu i le tausaga (faalua e o faatasi ma le konafesi faalesiteki)
Fonotaga a le korama a faitaulaga sili a le siteki	Faatautaia pisinisi faalekorama ma aoao uso o le korama i o latou tiute.	Korama a faitauluaga sili (tagai i le 7.1.2; o leneci fonotaga e le faia i itu)	A itiiti o le faa-tasi i le tausaga
Fonotaga a le au peresitene o le siteki	Iloilo, fuafua, ma manatunatu i mataupu e aafia ai le siteki.	Au peresitene o le siteki, failautusi a le siteki, failautusi faapitoa a le siteki, ma isi pe a valaaulia ai.	Fai e le aunoa
Fonotaga a fautua maualuga	Maua aoaoga po o faatonuga, tuu atu lipoti, faatautaia pisinisi, ma fefautuaai faatasi.	Au peresitene o le siteki, fautua maualuga, failautusi a le siteki, failautusi faapitoa o le siteki, ma isi pe a valaaulia ai.	Ta'i faalua i le masina, i mea e mafai ai

Sauniga [po o le Fonotaga]	Faamoemoega	Tagata e Auai	Faafia Ona Fai
Fonotaga a le aufono a le siteki	Maua aoaoga, fefautuaai faatasi, tuu atu lipoti, ma faamaopoopo ia fuafuaga o polokalama ma gaioioiga a le siteki.	Au peresitene o le siteki; fautua maualuga; failautusi a le siteki; failautusi faapitoa a le siteki; peresitene o le Aualofa, Alii Talavou, Tamaitai Talavou, Peraimeri, ma le Aoga Sa a le siteki; ma isi pe a valaaulia ai	E faalua i le faafa i le tausaga pe a manaomia ai
Fonotaga ma au epikopo	Aoa ia au epikopo, iloilo ia aiaiga, ma fefautuaai faatasi.	O le au peresitene o le siteki, au epikopo, failautusi a le siteki, ma le failautusi faapitoa a le siteki	Ta'itasi i le faafa i le tausaga pe a manaomia ai
Fonotaga a le komiti o le Perisitua Arona—Tamaitai Talavou a le Siteki	Fuafua ia gaioioiga tuu-faatasi e lagolagoina e le siteki mo alii talavou ma tamaitai talavou .	O se fesoasoani o le au peresitene o le siteki, fautua maualuga e tofia i Tamaitai Talavou ma Alii Talavou, au peresitene o Alii Talavou a le siteki ma le failautusi, au peresitene o Tamaitai Talavou ma le failautusi, ma le autalavou ma isi pe a valaaulia ai	Pe a manaomia ai
Fonotaga a le aufono o le uelefea a epikopo a le siteki	Mauaina o faatonuga i mataupu o le uelefea. Fefaasoai manatu ma poto masani. Iloilo le tulaga o i ai foai o tau-laga anapogi, manaoga o le uelefea, ma fesoasoani faale-uelefea. Faailoa avanoa faigaluga mo i latou o loo tuuina atu i ai le fesoasoani faale-uelefea. Faailoa punaoa faale-uelefea i alaafaga. Iloilo faiga faale-uelefea a le Ekalesia. Faamaopoopo tofitofiga faale-uelefea.	O epikopo uma ma peresitene o paranesi i le siteki (e tofia e le peresitene o le siteki se epikopo e toatasi e avea ma taitaifono); o le peresitene o le siteki (i nisi taimi); tagata faapitoa mo le uelefea pe a manaomia ai.	E le itiiti ifo ma le faalekuata

Sauniga [po o le Fonotaga]	Faamoemoega	Tagata e Auai	Faafia Ona Fai
Fonotaga faaleautaitai o ausilali a le siteki (mo le Aualofa, Tamaitai Talavou, Peraimeri, ma le Aoga Sa)	Aoa o ia taitai o ausilali a le uarota i o latou tiute, aoao i latou i tomai faafaiioga ma faaleautaitai, faamalolosia lo latou faatuatua, ma fefaasoai manatu.	Se sui o le au peresitene o le siteki (pe a manaomia); fautua maualuga e tofia i le faalapotopotoga a le ausilali; au peresitene o ausilali a le siteki ma le failautusi; au peresitene o ausilali a uarota ma failautusi; o isi taitai o ausilali a uarota, faiaoga, ma faufautua (pe a manaomia ai); sui o le au epikopo ua tofia i le ausilali (pe a manaomia ai).	Taitasi i le tausaga mo faalapotopotoga taitasi, pe faalua pe a faamaonia ai e le peresitene o le siteki (tagai i le 18.3.11)
Fonotaga a le komiti o talavou nofofua matutua a le siteki	Talanoaina manaoga o talavou nofofua matutua i le siteki. Saunia avanoa mo talavou nofofua matutua e o mai ai mo auaunaga, aoaoina o le talalelei, ma agafesootai i talaatu o a latou uarota. Faamautinoa o loo lelei ona faagaioia ia komiti a talavou nofofua matutua a uarota i nofoaga ua faatulagaina ai.	O se fesoasoani i le au peresitene o le siteki, o le fautua maualuga ua tofia i talavou nofofua matutua, o se tasi o le au peresitene a le Aualofa o le siteki, faufautua o talavou nofofua matutua a le siteki, ma taitai o talavou nofofua matutua a le uarota (pe afai ua tofia) po o isi talavou nofofua matutua o le siteki.	Pe a manaomia
Fonotaga a le komiti a le au matutua nofofua a le siteki	Talanoaina manaoga o le aumatutua nofofua i le siteki. Pe a manaomia ai, saunia avanoa mo le aumatutua nofofua e o mai faatasi ai mo auaunaga, aoaoina o le talalelei, ma agafesootai i talaatu o a latou uarota.	O se fesoasoani i le au peresitene o le siteki, o se fautua maualuga, se tasi o le au peresitene o le Aualofa a le siteki, ma nisi au matutua nofofua	Pe a manaomia

Faasologa o Sauniga i le Aso Sa

Fuafuaga 1				
70 min.	Sauniga faamanatuga			
10 min.	Malologa			
40 min.	Aoga Sa			Peraimeri (e aofia ai le vasega pepe) Tagai i le 11.4.1 mo faamatalaga auiliili.
10 min.	Malologa			
50 min.	Sauniga aofai a le au perisitua o le uarota	Sauniga amata	Sauniga amata	
	Perisitua Mekisateko	Perisitua Arona	Aualofa	Tamaitai Talavou
3 itula	O le taimi tonu o malologa i le va o sauniga, e fetuunai e tusa ai ma manaoga i le lotoifale.			

Fuafuaga 2					
50 min.	Sauniga amata a le au perisitua o le uarota		Sauniga amata	Sauniga amata	Peraimeri (e aofia ai le vasega pepe) Tagai i le 11.4.1 mo faamatalaga auiliili.
	Perisitua Mekisateko	Perisitua Arona	Aualofa	Tamaitai Talavou	
10 min.	Malologa				
40 min.	Aoga Sa				
10 min.	Malologa				
70 min.	Sauniga faamanatuga				
3 itula	O le taimi tonu o malologa i le va o sauniga, e fetuunai e tusa ai ma manaoga i le lotoifale.				

Faasologa o Sauniga Fesilia'i a Iunite e Eese Gagana

A potopoto i le fale e tasi ia iunite e lua e i ai tagata o le au paia e eese gagana, e ono manaomia mo tamaiti ma le autalavou ona nonofo faatasi i vasega. Mo se faataitaiga, afai e lolotu i le fale e tasi le uarota faa-Peretania ma le paranesi faa-Sipaniolo, e mafai ona auai faatasi tamaiti Peraimeri faa-Sipaniolo ma le Peraimeri o le uarota faa-Peretania. O le autalavou o le uarota faa-Sipaniolo e mafai auai faatasi i vasega o le Aoga Sa, Perisitua Arona, ma Tamaitai Talavou a le uarota faa-Peretania.

E mafai foi e le autalavou o le paranesi faa-Sipaniolo ona auai faatasi ma le uarota faa-Peretania mo Mutuale. E mafai e tamaiti ona auai faatasi ma

le uarota faa-Peretania mo le Sikauti ma aso o gaioiga.

O le faaogaina o leni fuafuaga e manaomia ai le faamaoniga a le peresitene o le siteki. A uma ona maua mai leni faamaoniga, ona fono lea o le au epikopo ma le au peresitene o le paranesi ma taitai perisitua ma ausilali o a latou lava iunite, e saili mai ai sa latou fautuaga ma le galulue faatasi i le faatino-ina o le fuafuaga.

O le au epikopo ma le au peresitene o le paranesi e fono faatasi foi e fuafua ai pe o ai tagata ma iunite taitasi e tatau ona tofia e galulue i faalapotopotoga. E talanoaina foi e taitai le valaauina o taitai o le korama o le Perisitua Arona ma vasega a Tamaitai Talavou. A uma ona faatino le fuafuaga, ona faaauau lea e taitai perisitua ona fono e le aunoa

e faamaopoopo a latou taumafaiga ma foia soo se atugaluga.

E tasi le sui o le au epikopo ma se sui se tasi mai le au peresitene o le paranesi, e auai i fonotaga a le komiti talavou a le au epikopo.

Ina ia faatino leni fuafuaga, e moomia le fesilia'i o taimi o sauniga a iunite e lua e pei ona faaalia i le siata o i lalo. O loo faaalia i le siata o le uarota e amata muamua, ae e mafai foi ona amata muamua le paranesi.

Uarota		Paranesi	
Sauniga faamanatuga		E amata le paranesi i le 80 minute pe a mae'a le uarota	
Aoga Sa	Peraimeri	Aoga Sa (faatasi le autalavou ma vasega a le uarota)	Peraimeri (faatasi ma le Peraimeri a le uarota)
Perisitua		Perisitua (faatasi alii talavou ma korama a le uarota)	
Aualofa		Aualofa	
Tamaitai Talavou		Tamaitai Talavou (faatasi ma tamaitai talavou a le uarota)	
E 80 minute e muamua uma ai le uarota i lo o le paranesi		Sauniga faamanatuga	

19.

Valaauga i le Ekalesia

O le mataupu leni o loo tuuina atu ai faamatalaga e uiga i le valaauina ma le faamaloloina o tagata e galulue auuina i le Ekalesia. O le Siata o Valaauga o loo i itulau e 159–66 o loo lisi atu ai valaauga filifilia ma faama’oti atu ai po o ai e fautuaina mai se tagata, pe o ai e faamaonia le fautuaina mai, pe o ai e lagolagoina le tagata, ma o ai foi e valaauina ma vaetofiaina le tagata. O valaauga o loo i luga o le siata e faatumu e tusa ma manaoga ma le avanoa o tagata.

19.1

Fuafuaina Po o Ai e Valaau

19.1.1

Taiala Lautele

E ao ona valaauina se tagata e le Atua e auuina i le Ekalesia (tagai Mataupu Faavae o le Faatuatua 1:5). E sailia e taitai le taitaiga a le Agaga i le iloiloina po o ai e valaau. Latou te iloiloina le agavaa e manaomia mo le valaauga. Latou te iloiloina foi tulaga patino po o tulaga faaleaiga o le tagata. O valaauga taitasi e tatau ona manuia ai tagata o loo auuina atu i ai, le tagata, ma le aiga o le tagata.

E ui lava ina manaomia le ositulaga i valaauga o le Ekalesia, ae e le tatau ona fetuutuuna’ia ai le tulaga e mafai ai e le tagata ona faataunuu ona tiutetauve faaleaiga ma faalegaluega (tagai 17.2.1). A o le’i valaauina se tagata ua faaipoipo i se tofiga e manaomia ona tautino atu se taimi tele, e silasila muamua taitai o le Ekalesia i le aafiaga o le ulugalii ma le aiga ona o le valaauga.

Afai e mafai, e tofia se tagata o le ekalesia e auuina atu i le na o se valaauga se tasi, e faaopoopo atu i le auuina ai o se uso po o se tuafafine o auuina.

E tausia e taitai le le faalauaitelina o faamatalaga e uiga i valaauga ma faamalologa ua faamoemoe e fai.

E na o i latou e moomia ona iloaina, e pei o se peresitene o se ausilali o loo vaaia le tagata, e logoina a o lei tuuina atu le tagata mo se palota e lagolagoina ai. O se tagata ua mafaufauina mo se valaauga, e le logoina seiloga e tuuina atu i ai le valaauga.

A oo ina tuuina atu se valaauga e le peresitene o le siteki po o lalo foi o lana taitaiga, e tatau ona faafesootai le epikopo e iloa ai le agavaa o le tagata ma tulaga o le aiga, galuega, ma le auuina i le Ekalesia. Ona talosagaina lea e le au peresitene o le siteki ia le au fautua maua luga ina ia lagolagoina le faaiuga e tuu atu le valaauga, pe afai e tatau ai e tusa ma le Siata o Valaauga.

Afai e valaauina se alii talavou po o se tamaitai talavou i se tofiga i le Ekalesia, e saili mai e se tasi o le au epikopo le faamaoniga mai matua po o e o loo tausia faaletulafono ao lei tuuina atu le valaauga.

E faatoa mafai e taitai ona tuuina atu se valaauga o le Ekalesia pe a maea (1) ona i ai i faila a le uarota ia le pepa faamaumau o se tagata ma ua maea ona iloiloina faalelei e le epikopo pe (2) ua uma foi ona faafesootai e le epikopo le epikopo muamua a le tagata ia iloa ai le agavaa o le tagata ma faamaonia ai e le o aofia ai i lona pepa faamaumau se faamatalaga faaopoopo po o se faamatalaga e uiga i se aoaiga faale-Ekalesia e lei faaleleia.

E tatau ona tuuina atu i tagata fou faatoa liliu mai se valaauga talafeagai po o se isi tiutetauve e galue ai i se taimi vave e mafai ai. O nisi tagata fou atonu e saunia mo valaauga i le taimi lava e uma ai ona papatiso ma faamauina. O isi atonu e manaomia le tuu atu i ai o ni tofiga faigofie e mafai ona fesoa-soani latou te saunia ai mo le taliaina o valaauga. E faatalanoaina e se tasi o le au epikopo ia tagata fou faatoa liliu mai a o le’i valaauina i latou e faiaoga i tamaiti po o le autalavou.

O tagata e le o ni tagata o le Ekalesia, e mafai ona valaauina i nisi o tofiga, e pei o le ta okeni, taitai

musika, ma le fesoasoani i le taitai Sikauti. Peitai, e le tatau ona valaauna i tulaga faafaiaoga po o le failautusi pe taitai musika i le Peraimeri. O le faata-gaga e valaaui ai tagata e le lolotu i nisi tofiga, e le faaaogaina i tagata ua tape igoa mai le ekalesia, o e e le mafai ona tuu atu i ai ni valaauga.

19.1.2

Fautuaga ma Faamaoniga mo Valaauga

O le Siata o Valaauga o loo faailoa mai ai po o ai e fautuaina atu valaauga taitasi ma pe o ai foi e tuuina atu le faamaoniga. I nisi o tulaga, e talosagaina ai ia taitai o le perisitua ma taitai o ausilali e tuuina atu ni fautuaga i lo latou au peresitene o le siteki po o le au epikopo. E tatau ona latou faia leni tiutetauave ma le agaga tatalo, i le iloaina lea e mafai ona latou mauaina le taitaiga mai le Alii po o ai e fautuaina atu. Ae peitai, e tatau ona latou manatuaina o le tiutetauave mulimuli lava i le mauaina o musumusuga po o ai e tofia, ua i ai i le au peresitene o le siteki po o le au epikopo.

E tatau i peresitene o siteki ma epikopo ona liu-liuina ma le toto'a ia fautuaga taitasi, ma ia iloaina sa iloiloina ma le agaga tatalo. Pe a manaomia ai, e mafai ona latou talosagaina le toe fautuaina mai o se isi.

19.1.3

Valaauga a le Siteki

O le peresitene o le siteki e vaaia ia valaauga o tagata o loo auauna atu i le tele o tofiga o le siteki e pei ona faailoa atu i le Siata o Valaauga.

19.1.4

Valaauga i le Uarota

O le au peresitene o le siteki e fautuaina atu ia uso e valaaui pe faamalolo o ni epikopo (tagai 19.6). O le peresitene o le siteki foi e vaaia ia valaauga o fesoasoani i le au epikopo, failautusi o uarota, failautusi fesoasoani o uarota, ma failautusi faapitoa o le

uarota. O le epikopo e vaaia isi valaauga i le uarota, e pei ona faaalua i le Siata o Valaauga.

19.1.5

Valaauga a le Korama a Toeaina

O le peresitene o le siteki e vaaia le valaauga o peresitene o korama a toeaina ma o latou fesoasoani, e pei ona faaali atu i le Siata o Valaauga.

O le peresitene o le korama a toeaina e vaaia le valaauna o failautusi o korama ma faiaoga. E moomia muamua le faamaoniga a le epikopo a o lei valaauna uso i nei tofiga.

19.2

Tuuina Atu o se Valaauga

O le Siata o Valaauga o loo otooto atu ai po o ai e mafai ona tuuina atu valaauga taitasi. A uma ona maua mai faamaoniga e tatau ai, e faatautaia e se taitai ua faatagaina se faatalanoaga ma le tagata e iloa ai le faamaoni ma le naunautai o le tagata e galue. Afai e naunau le tagata o le au paia, ona tuu atu lea o le valaauga e le taitai. E mafai e le taitai ona valaaulia le toalua o se tagata ua faaipoipo ina ia i ai ma tuu atu le lagolago pe a tuuina atu le valaauga.

O le taitai e tuuina atu le valaauga i le Ekalesia e faamalamalamaina lona faamoemoega, taua, ma tiutetauave. Na te fautuaina le tagata e saili le Agaga o le Alii i le faataunuuna o le valaauga. Na te tau atu i le tagata le igoa o le tagata e lipoti sa'o i ai o ia, ma faamamafa atu i ai le manaomia ona lagolago i taitai. Pe a manaomia ai, na te otooto atu i ai fonotaga e tatau ona auai le tagata ma faamatala atu i ai soo se punaoa o loo maua. E mafai ona ia faailoa atu ia atugaluga poo luitau faapitoa o le valaauga, ma valaaulia o ia e fai atu ni ana fesili e uiga i le valaauga.

E tatau i taitai ona mautinoa o le auala e tuuina atu ai se valaauga ia ogatasi ma lona natura paia. O valaauga e tatau ona tuuina atu i se auala

mamalu, aloaia, ae le o se tulaga po o se auala faasamasamanoa.

19.3

Lagolagoina o Tagata o le Ekalesia i Valaauga o le Ekalesia

O tagata e valaauina i le tele o tofiga o le Ekalesia, e tatau ona mauaina se palota lagolago a o lei amata ona latou galulue. O le Siata o Valaauga o loo faailoa mai ai pe manaomia se palota lagolago ma pe o le a foi le potopotoga e tatau ona avatu ai le palota lagolago. O le taitai na vaia le valaauga, po o se taitai perisitua na ia faatagaina, e tuuina atu se tagata i le potopotoga mo se palota lagolago.

O le tagata e faatautaia le lagolagoina na te faasilasila atu muamua po o ai e faamalolo mai le tofiga ma talosagaina tagata ina ia tuuina atu se faailoga o le faafetai mo le auunaga a le tagata (tagai i le 19.5 mo gagana ua filifilia).

Afai e tuuina atu se tagata mo se palota lagolago, e talosagaina o ia e se taitai perisitua ua faatagaina, ina ia tulai. E mafai e le taitai ona faapea atu:

“[O igoa] ua valaauina e avea ma [tofiga], ma e matou te tuuina atu o ia ina ia lagolagoina. O e finagalo i ai, ia faailoa mai i le sii o le aao. [Faatali laitiiti mo le palota lagolago.] O i latou e faatuiese, pe afai e i ai, ia faailoa mai. [Faatali laitiiti mo se avanoa mo i latou e tetee i ai, pe afai e i ai.]”

O le tagata o loo ta’u atu lona suafa, e tatau ona auai i le palota lagolago. Afai e sili atu ma le tasi le tagata o loo ta’u atu, e masani ona lagolagoina faatasi o se vaega.

Afai o se tagata tulaga lelei o le au paia e faatuiese lana palota pe a tuuina atu se tagata e lagolagoina, e feutagai le pulefaamalumalu po o se isi taitai perisitua e tofia ma le tagata na faatuiese tau lava o i la’ua pe a mae’a le sauniga. E fuafuaina e le taitai pe o le faatuiese e faavae mai i se iloa faapea o loo tausalaina le tagata i se amioga e tatau ai ona faaleaogaina

o ia mai le galue ai i le tofiga. O palota faatuiese mai tagata e le auai i le ekalesia e le manaomia ona amanaia.

Afai, o se tulaga e ese mai ai, ua moomia ona amata e taitai fou o le siteki le latou auunaga a o lei oo i le isi konafesi faalesiteki po o le sauniga aofai a le au perisitua o le siteki lea e masani ona lagolagoina ai i latou, e tatau ona lagolagoina i latou i sauniga faamanatuga a uarota ma paranesi o le siteki. O nei lagolagoina e tatau ona tausisia i se aofaiga laitiiti. O sui auai o le au peresitene o le siteki po o fautua maualuga e tuuina atu [tagata] mo le lagolagoina.

19.4

Vaetofiaina o Taitai ma Faiaoga

O tagata o le ekalesia e valaauina i le tele o tofiga o le Ekalesia, e tatau ona vaetofia a o lei amata ona latou auuna atu. O le Siata o Valaauga o loo faailoa atu ai po o ai ua faataga e faatino le vaetofiaina. E vaetofia muamua peresitene i lo o latou fesoasoani.

I lalo o le taitaiga a le taitai pulefaamalumalu, e tasi pe sili atu foi i latou e umia le Perisitua Mekisateko e mafai ona auai i se vaetofiaina, e aofia ai ma se tamā po o se tane agavaa (tagai 20.1.2). E tuu faamama e nei uso o latou lima i luga o le ulu o le tagata. O le perisitua o loo avea ma fofoga na te:

1. Ta’u le tagata i lona igoa atoa.
2. Ta’u atu faapea o loo ia faia i le pule o le Perisitua Mekisateko.
3. Ia vaetofiaina le tagata i le tofi talafeagai i totonu o le siteki, uarota, korama, po o le vasega.
4. Faace atu ki pe afai ua iai le aia tatau i le tagata na te maua ai na ki. (I totonu o siteki ma uarota, e na o le peresitene o le siteki, epikopo, ma peresitene o korama e maua ia ki o le au peresitene pe a vaetofia i latou. O le upu *ki* e le tatau ona faaoga pe a vaetofia ia fesoasoani, fautua maualuga, peresitene o faalapotopotoga a ausilali, o

fesoasoani o le epikopo i le korama a ositaulaga, po o faiaoga i se faalapopotoga.)

5. Tuuina atu upu o le faamanuiaga e pei ona taitai-ina ai e le Agaga.

6. Faaiu i le suafa o Iesu Keriso.

O se vaetofiaina o se avanoa lea e tuu atu ai se faamanuiaga. O fautuaga auiliili ma faatonuga e masani ona tuuina atu pe a aoao atu i le tagata ona tiute ae le o le taimi e vaetofia ai.

E le manaomia ona faalautele se vaetofiaina e avea ma se sauniga aloaia. E le o se mea tatau le faia o ni tatalo po o ni molimau po o ni aoaoga pe a vaetofia-ina se tasi.

19.5

Faamaloloina o Tagata o le Ekalesia mai Valaauga o le Ekalesia

O faamalologa mai valaauga o le Ekalesia e tatau foi ona oo mai e ala i musumusuga, sei vagana ua suia le mea e nofo ai se tagata ma ua tatau ai ona faamalolo, pe o le tofiga foi e mo na o sina vaitaimi, e pei o le galuega faifeautalai faamisiona.

O faamalologa mai valaauga o le Ekalesia e faia i le tulaga lava e tasi o le pule lea na tuuina atu ai valaauga. Ina ia tuuina atu se faamalologa, e feiloai se taitai ua faatagaina na o i la'ua ma le tagata, e logoina o ia i le faamalologa, ma faailoa atu i ai le agaga faafetai mo le auunaga. E fesili atu foi le taitai i le tagata e toe faafoi ane uma mea o loo faa-aogaina i le taimi nei ina ia mafai ona tuuina atu i le o le a suitulaga ia te ia. E na o i latou e moomia ona iloaina e logo i ai se faamalologa a o lei faasilasilaina faalauaitete.

O le faapotopotoga lava e tasi lea na lagolagoina le tagata, e tuuina atu se palota faafetai pe a faamaloloina le tagata. E mafai e le taitai perisitua ua faatagaina ona faapea atu:

“O [igoa] ua faamaloloina mai o se [tofiga], ma e matou te tuuina atu o ia ina ia avatu i ai se palota faafetai mo lana auunaga. O i latou o e finagalo e faailoa atu lo latou agaga faafetai, e mafai ona faailoa mai i le sii o le aao.” E le valaaua se palota faatuiese.

Afai e faamalolo se peresitene po o se epikopo, e otometi foi ona faamalolo ai ma fesoasoani. O isi o lo o umia ia tofiga i totonu o le faalapopotoga e pei o failautusi ma faiaoga, e le otometi ona faamaloloina.

19.6

Valaauina, Faauuina, ma le Vaetofiaina o Epikopo

O le au peresitene o le siteki e fautuaina atu ia uso e valaau pe faamalolo o ni epikopo. O loo maua faatonuga i luga o le fomu mo le Fautuaina Atu o se Epikopo Fou. O loo maua lenei fomu faaeletonika i iunite o loo faa-aogaina le polokalama faakomepi-uta mo le teuina o faamaumauga a le Ekalesia. I isi iunite, e maua mai le ofisa o le pulega ua tofia i ai.

Pe a fautuaina atu se tagata e avea o se epikopo, e tatau i le au peresitene o le siteki ona mata'ituina ma le toto'a ia mataupu faavae o loo tuuina mai i le 1 Timoteo 3:2–7. E le talafeagai ona sailia ni fautuaga, pe faatautaia ni sailiiliga i tagata o le uarota po o ai e mafai ona iloiloaina mo se valaauga e avea o se epikopo.

A o lei mafai ona faatalanoa, valaau, faauu, pe vaetofia se epikopo fou, e tatau ona faamaonia le fautuaina atu o ia e le Au Peresitene Sili. E mafai e le peresitene o le siteki ona tuuina atu le valaauga pe a maea ona ia mauaina mai se faamaoniga tusi-tusia mai le Au Peresitene Sili. Faatasi ai ma lenei faamaoniga, e mafai foi e le peresitene o le siteki ona faauuina ma vaetofia se epikopo pe a uma ona tuuina mai se palota lagolago a tagata o le uarota. E moomia foi le faamaoniga a le Au Peresitene Sili a o lei mafai e se peresitene o le siteki ona faamalolo mai

se epikopo. E le mafai e le peresitene o le siteki ona tofi atu nei tiutetauave i se fesoasoani.

Afai o se alii ua valaauina e fai ma epikopo e le o se faitaulaga sili, e tatau i le peresitene o le siteki ona vaai ua faauuina o ia o se faitaulaga sili a o lei faauuina o ia e fai ma epikopo. Afai o lea alii sa faauuina muamua e avea ma se epikopo, e moomia le na o le vaetofaina o ia e avea ma epikopo o le uarota.

A maea ona faamaoniaina e le Au Peresitene Sili le fautuaina atu o se alii e avea o se epikopo, latou te faatagaina se peresitene o le siteki, Fitugafulu Eria, po o se Pulega Aoao e faauu o ia ma vaetofia. O le taitai perisitua ua faatagaina na te:

1. Ta'u le igoa atoa o le alii.
2. Ta'u atu faapea o loo ia faia i le pule o le Perisitua Mekisateko.

3. Faauuina le alii e avea ma se epikopo (sei vagana sa faauuina muamua).

4. Vaetofaina o ia e pulefaamalumu i le uarota ma avea ma peresitene o le Perisitua Arona ma le korama a ositaulaga, ma faamamafa atu i ai ona tiutetauave mo le Perisitua Arona ma tamaitai talavou i totonu o le uarota.

5. Faaee atu i ona luga ia ki, aia tatau, mana uma, ma le pule o le tofi o le epikopo, e faatatau patino lava i tiute o le epikopo o se faamasino i Isaraelu ma le avea ai ma faitaulaga sili pulefaamalumu i totonu o le uarota.

6. Tuuina atu upu o le faamanuiaga e pei ona taitaiina ai e le Agaga.

7. Faaiu i le suafa o Iesu Keriso.

Siata o Valaauga

Valaauga a le Siteki

Valaauga a le Siteki (faauu)

O le siata leni o lo o aofia ai se lisi o valaauga filifilia o le siteki. Mo isi valaauga ma avanoa mo auunaga, tagai i mataupu taitasi o leni tusitaulima. E faatumuina valaauga e tusa ai ma manaoga ma pe a o i ai ni tagata o le au paia.

Tofi	Fautuaina Atu E	Faamaoniaina E	Lagolagoina E ¹	Valaauina ma Vaetofia E
Peresitene o le Siteki	Se Pulega Aoao po o se Fitugafulu Eria na tofia	Se Pulega Aoao po o se Fitugafulu Eria na tofia	Tagata o le ekalesia i le konafesi faalesiteki	Se Pulega Aoao po o se Fitugafulu Eria na tofia
Fesoasoani i le au peresitene o le siteki	Peresitene o le Siteki	Se Pulega Aoao po o se Fitugafulu Eria na tofia, po o se faaliga tusitusia mai le Au Peresitene Sili	Tagata o le ekalesia i le konafesi a le siteki po o se sauniga aofai a le au perisitua o le siteki	Se Pulega Aoao po o se Fitugafulu Eria na tofia, po o le peresitene o le siteki faatasi ai ma se faamaoniga tusitusia mai le Au Peresitene Sili

Tofi	Fautuaina Atu E	Faamaoniaina E	Lagolagoina E¹	Valaauina ma Vaetofia E
Failautusi a le siteki	Au peresitene o le siteki	Au peresitene o le siteki ma fautua maualuga	Tagata o le ekalesia i le konafesi a le siteki po o se sauniga aofai a le au perisitua o le siteki	Peresitene o le Siteki
Failautusi fesoasoani o le siteki	Au peresitene o le siteki	Au peresitene o le siteki ma fautua maualuga	Tagata o le ekalesia i le konafesi a le siteki po o se sauniga aofai a le au perisitua o le siteki	Peresitene o le siteki po o se fesoasoani e tofia
Failautusi faapitoa a le siteki	Au peresitene o le siteki	Au peresitene o le siteki ma fautua maualuga	Tagata o le ekalesia i le konafesi a le siteki po o se sauniga aofai a le au perisitua o le siteki	Peresitene o le siteki po o se fesoasoani e tofia
Fautua maualuga	Au peresitene o le siteki	Au peresitene o le siteki ma fautua maualuga	Tagata o le ekalesia i le konafesi a le siteki po o se sauniga aofai a le au perisitua o le siteki	Peresitene o le siteki po o se fesoasoani e tofia
Peteriaka o le siteki	Au Peresitene o le siteki	Korama a le Toasefululua	Tagata o le ekalesia i le konafesi a le siteki po o se sauniga aofai a le au perisitua o le siteki	O se uso o le Au Peresitene Sili po o le Toasefululua, po o le peresitene o le siteki faatasi ai ma se faamaoniga tusitusia mai le Korama a le Toasefululua.
Peteriaka o le siteki ua uma ona faauuina ae ua siitia atu i se isi siteki	Au peresitene o le siteki ua siitia atu i ai o ia	Korama a le Toasefululua	Tagata o le ekalesia i le konafesi a le siteki po o se sauniga aofai a le au perisitua o le siteki.	E le faauuina pe vaetofia ina ia amata ai le auau-naga i se siteki fou
Peresitene o ausilali a le siteki (Alii Talavou, Aualofa, Tamaitai Talavou, Peraimeri, ma le Aoga Sa)	Au peresitene o le siteki (e feutagai ai ma le fautua maualuga e tofia)	Au peresitene o le siteki ma fautua maualuga	Tagata o le ekalesia i le konafesi faalesiteki	Peresitene o le siteki po o se fesoasoani e tofia

Tofi	Fautuaina Atu E	Faamaoniaina E	Lagolagoina E¹	Valaauina ma Vaetofia E
Fesoasoani i au peresitene o ausilali a le siteki, failautusi, ma isi taitai o ausilali	Peresitene o le ausilali a le siteki (e feutagai ai ma le fautua maualuga e tofia)	Au peresitene o le siteki ma fautua maualuga	Tagata o le Ekalesia i konafesi a le siteki	Peresitene o le siteki po o se fesoasoani e tofia po o se fautua maualuga
Sui o le siteki mo fale ma fanua (fautua maualuga)	Tofia e le au peresitene o le siteki; e le valaauina, fai i ai se palota lagolago, pe vaetofiaina.			
Taitaifono o le komiti o gaioiga a le siteki (fautua maualuga)	Tofia e le au peresitene o le siteki; e le valaauina, e le faia i ai se palota lagolago, pe vaetofiaina.			
Faufautua ma faufautua fesoasoani o le malumalu ma tala-faasolopito o aiga	Au peresitene o le siteki	Au peresitene o le siteki ma fautua maualuga	Tagata o le Ekalesia i konafesi a le siteki	Peresitene o le siteki po o se fesoasoani e tofia po o se fautua maualuga
Taitaifono o musika a le siteki	Fautua o musika a le siteki (fautua maualuga)	Au peresitene o le siteki ma fautua maualuga	Tagata o le Ekalesia i konafesi a le siteki	Peresitene o le siteki po o se fesoasoani e tofia po o se fautua maualuga
Suetusi a le siteki	Taitaifono o le komiti suetusi a le siteki (fesoasoani i le au peresitene o le siteki)	Au peresitene o le siteki ma fautua maualuga	E le faia i ai se palota lagolago	Peresitene o le siteki po o se fesoasoani e tofia ²
Tagata tomai faapitoa o le uelefaa a le siteki (e aofia ai le tagata o le siteki e tomai faapitoa mo le sailia o galuega)	Au peresitene o le siteki	Au peresitene o le siteki ma fautua maualuga	E le faia i ai se palota lagolago	Peresitene o le siteki po o se fesoasoani e tofia po o se fautua maualuga ²
Faiaoga seminare ma le inisitituti a le siteki ma supavaisa	Epikopo (e mafai ona feutagai ma ofisa taitai o le seminare ma le inisitituti)	Au peresitene o le siteki ma fautua maualuga	Tagata o le Ekalesia i konafesi a le siteki	Peresitene o le siteki po o se fesoasoani e tofia po o se fautua maualuga

1 O se vaega e ese mai ai, afai ua moomia ona amata e taitai fou o le siteki le latou auaunaga a o lei oo i le isi konafesi faalesiteki po o le sauniga aofai a le au perisitua o le siteki lea e masani ona lagolagoina ai i latou, e tatau ona lagolagoina i latou i sauniga faamanatuga a uarota ma paranesi o le siteki (tagai i le 19.3).

2 E fuafua e le peresitene o le siteki pe tatau ona vaetofia ia tagata o le ekalesia ua valaauina e auauna atu i nei tofiga.

Valaauga o le Perisitua Mekisateko

Valaauga o le Perisitua Mekisateko (faaaau)

Tofi	Fautuaina Atu E	Faamaoniaina E	Lagolagoina E	Valaauga ma Vaetofia E
Au peresitene o le korama a faitaulaga sili o le siteki (au peresitene o le siteki)	Tagai i “Valaauga o le Siteki,” itulau 159			
Peresitene o le korama a toeaina	Au peresitene o le siteki (e feutagai ai ma le epikopo)	Au peresitene o le siteki ma fautua maualuga	Tagata o le korama	Peresitene o le Siteki
Fesoasoani i le au peresitene o le korama a toeaina	Peresitene o le korama (e feutagai ai ma le epikopo)	Au peresitene o le siteki ma fautua maualuga	Tagata o le korama	Peresitene o le siteki po o se fesoasoani e tofia po o se fautua maualuga
Failautusi, faiaoga, ma isi valaauga o le korama a toeaina	Peresitene o le korama (i le feutagai ai ma le epikopo ma fesoasoani i le peresitene o le korama a toeaina)	Epikopo	Tagata o le korama	Peresitene o le korama po o se fesoasoani e tofia
Uso o auaunaga	O le auauna atu o se uso o auaunaga o se tiutetauave faaleperisitua o faitaulaga sili ma toeaina. E tusa ai ma lena, o nei uso e <i>tofia</i> e avea ma uso o auaunaga e le au peresitene o le korama a toeaina, i lalo o le taitaiga a le epikopo. E le valaauga i latou, lagolago, pe vaetofia.			

Valaauga o le Perisitua Arona i Uarota

Valaauga o le Perisitua Arona i Uarota (faaaau)

Tofi	Fautuaina Atu E	Faamaoniaina E	Lagolagoina E	Valaauga ma Vaetofia E
Peresitene o le korama a ositaulaga (epikopo)	Tagai “Valaauga o le Uarota,” itulau e 162.			
Fesoasoani i le peresitene o le korama a ositaulaga	Epikopo (peresitene o le korama a ositaulaga)	Au Epikopo	Tagata o le korama	Epikopo
Peresitene o korama a aoa ma tiakono	Au Epikopo	Au Epikopo	Tagata o le korama	Valaauga e le epikopo po o se fesoasoani e tofia; vaetofia e le epikopo

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Fesoasoani i au peresitene o korama a aoao ma tiakono ma failautusi o korama	Peresitene o korama	Au Epikopo	Tagata o le korama	Epikopo po o se fesoasoani e tofia
Fautua o le korama a ositaulaga (peresitene o Alii Talavou a le uarota)	Au Epikopo	Au Epikopo	Tagata o le uarota	Epikopo
Fautua o korama a aoao ma tiakono (fesoasoani i le au peresitene o Alii Talavou a le uarota), fautua fesoasoani, ma le failautusi o Alii Talavou a le uarota	Au Epikopo	Au Epikopo	Tagata o le uarota	Epikopo po o se fesoasoani e tofia
Uso o auaunaga	O le auauna atu o se uso o auaunaga o se tiutetauave faaleperisitua o aoao ma ositaulaga. E tusa ai ma lena, o nei uso e <i>tofia</i> e avea ma uso o auaunaga e le au peresitene o le korama a toeaina, i lalo o le taitaiga a le au epikopo. E le valaauina i latou, lagolago, pe vaetofia.			

Valaauga o le Perisitua Arona i Paranesi i Siteki

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Peresitene o le korama a ositaulaga (peresitene o le paranesi, o le o loo galue o se peresitene o le korama a ositaulaga)	Au peresitene o le siteki	Au peresitene o le siteki ma fautua maua luga	Tagata o le paranesi	Peresitene o le Siteki
O Isi valaauga o le Perisitua Arona	Tagai i “Valaauga o le Perisitua Arona i Uarota,” itulau 161–62, suitulaga <i>le peresitene o le paranesi</i> i le <i>epikopo</i> ma le <i>paranesi</i> mo le <i>uarota</i> .			

Valaauga o le Uarota

Valaauga o le uarota (faaauau)

O le siata lea o loo aofia ai se lisi o valaauga filifilia o le uarota. Mo isi valaauga ma avanoa mo auaunaga, tagai i mataupu taitasi o lena tusitaulima. E faatumuina valaauga e tusa ai ma manaoga ma pe ao i ai ni tagata o le au paia.

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Epikopo	Au Peresitene o le siteki	Au Peresitene Sili ma le Korama a le Toasefululua	Tagata o le uarota	Se Pulega Aoao po o se Fitugafulu Eria, po o le peresitene o le siteki faatasi ai ma le faamaoniga tusitusia mai le Au Peresitene Sili
Fesoasoani i le au epikopo	Epikopo	Au peresitene o le siteki ma fautua maualuga	Tagata o le uarota	Peresitene o le siteki po o se fesoasoani e tofia
Failautusi o le uarota	Au Epikopo	Au peresitene o le siteki ma fautua maualuga	Tagata o le uarota	Peresitene o le siteki po o se fesoasoani e tofia
Failautusi Fesoasoani o le Uarota	Au Epikopo	Au peresitene o le siteki ma fautua maualuga	Tagata o le uarota	Peresitene o le siteki po o se fesoasoani e tofia po o se fautua maualuga
Failautusi faapitoa o le uarota	Au Epikopo	Au peresitene o le siteki ma fautua maualuga	Tagata o le uarota	Peresitene o le siteki po o se fesoasoani e tofia po o se fautua maualuga
Taitai misiona a le uarota	Au Epikopo	Au Epikopo	Tagata o le uarota	Epikopo
Faifeau faamisiona a le uarota	Au Epikopo	Au Epikopo	Tagata o le uarota	Epikopo po o se fesoasoani e tofia
Peresitene o ausilali a le uarota (Alii Talavou, Aualofa, Tamaitai Talavou, Peraimeri, ma le Aoga Sa)	Au Epikopo	Au Epikopo	Tagata o le uarota	Epikopo
Fesoasoani i le au peresitene o Alii Talavou a le uarota (fautua o korama a aoao ma tiakono), fautua fesoasoani, ma le failautusi o Alii Talavou o le uarota	Au Epikopo	Au Epikopo	Tagata o le uarota	Epikopo po o se fesoasoani e tofia

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Fesoasoani ma failautusi i ausilali a le uarota (sei vagana ai Alii Talavou)	Peresitene o le ausilali	Au Epikopo	Tagata o le uarota	Epikopo po o se fesoasoani e tofia
Fautua, faiaoga, po o le au faatonutonu; taitai musika; ma isi valaauga i ausilali a le uarota (sei vagana Alii Talavou)	Au Peresitene o le Ausilali	Au Epikopo	Tagata o le uarota	Epikopo po o se fesoasoani e tofia
Tuafafine o auaunaga	O tuafafine o le Aualofa e <i>tofia</i> e avea ma tuafafine o auaunaga e le au peresitene o le Aualofa, i lalo o le taitaiga a le epikopo. I le mavae ai o feutagaiga ma matua ma taitai, e mafai e le au peresitene o le Aualofa ona tofia Maia Maite ma Lora o ni soa i tuafafine matutua. O tuafafine o auaunaga e le valaauina, lagolagoina, pe vaetofiaina.			
Faiaoga o le semina e sauniuni ai mo le malumalu	Au Epikopo	Au Epikopo	Tagata o le uarota	Epikopo po o se fesoasoani e tofia
Peresitene o vasega a Tamaitai Talavou	Au epikopo (e feutagai ai ma le au peresitene o Tamaitai Talavou)	Au Epikopo	Tagata o le vasega	Epikopo po o se fesoasoani e tofia
Fesoasoani i au peresitene ma failautusi o vasega a Tamaitai Talavou	Peresitene o le vasega	Au Epikopo	Tagata o le vasega	Epikopo po o se fesoasoani e tofia
Taitaifono o musika a le uarota	Fautua o musika a le uarota (sui o le au epikopo)	Au Epikopo	Tagata o le uarota	Epikopo po o se fesoasoani e tofia
Taitai musika a le uarota, ta okeni po o le ta piano a le uarota, taitai o le aufaipese a le uarota ma le ta laau, ma le peresitene o le aufaipese a le uarota.	Taitaifono o musika a le uarota	Au Epikopo	Tagata o le uarota	Epikopo po o se fesoasoani e tofia
Taitai musika a le au perisitua a le uarota ma le ta piano po o le ta okeni	Fautua o musika a le uarota (sui o le au epikopo)	Au Epikopo	Tagata o le uarota	Epikopo po o se fesoasoani e tofia

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Tausi potutusi a le uarota	Peresitene o le Aoga Sa	Au Epikopo	Tagata o le uarota	Epikopo po o se fesoasoani e tofia
Sui tausi potutusi a le uarota	Peresitene o le Aoga Sa	Au Epikopo	Tagata o le uarota	Epikopo po o se fesoasoani e tofia
Faufautua mo Malu-malu ma Talafaasolopito o Aiga	Au Epikopo (i le feutagai ai ma le peresitene o le korama a toeaina)	Au Epikopo	Tagata o le uarota	Epikopo po o se fesoasoani e tofia
Taitai o talavou nofofua matutua	Au Epikopo	Au Epikopo	Tagata o le uarota	Epikopo po o se fesoasoani e tofia
Sui o mekasini a le uarota	Au Epikopo	Au Epikopo	Tagata o le uarota	Epikopo po o se fesoasoani e tofia ¹
Tagata tomai faapitoa o le uelefea a le uarota (e aofia ai le tagata tomai faapitoa mo galuega a le uarota)	Au Epikopo	Au Epikopo	Tagata o le uarota	Epikopo po o se fesoasoani e tofia ¹

¹ E fuafua e le epikopo pe tatau ona vaetofiaina ia tagata o le uarota ua valaauina e galulue i nei tofiga.

Valaauga o Paranesi i Siteki

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le paranesi	Au peresitene o le siteki	Au peresitene o le siteki ma fautua maualuga	Tagata o le paranesi	Peresitene o le Siteki
O isi valaauga o le paranesi	Tagai i “Valaauga o le Uarota,” itulau 162–64, suitulaga le <i>peresitene o le paranesi</i> i le <i>epikopo</i> ma le <i>paranesi</i> i le <i>uarota</i> .			

Valaauga a le Misiona

Valaauga o le Misiona (faaauau)

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le misiona	Pulega Aoao po o le Fitugafulu Eria	Au Peresitene Sili ma le Korama a le Toasefululua	E le tuuina atu mo le lagolagoina	Uso o le Au Peresitene Sili po o le Korama a le Toasefululua

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Fesoasoani i le au peresitene o le misiona	Peresitene o le misiona	Au Peresitene o le Eria	Faamautuina i konafesi a le itu i itu uma	Uso o le Au Peresitene o le Eria, po o le peresitene o le misiona i lalo o le latou taitaiga
Failautusi o le misiona ma le failautusi faapitoa o le misiona	Peresitene o le misiona	Au Peresitene o le misiona	Faamautuina i konafesi a le itu i itu uma	Peresitene o le misiona

E le fautuaina mai ni peresitene o ausilali a le misiona. A silafia e le peresitene o le misiona e manaomia e taitai o ausilali a le misiona ni aoaoga ina ia maua atili e taitai o ausilali le poto masani, e mafai ona ia tofia ni tagata latou te tuuina atu.

Valaauga a le Itu

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le Itu	Peresitene o le misiona	Au Peresitene o le Eria	Tagata o le ekalesia i le konafesi a le itu	Peresitene o le misiona
Fesoasoani i le au peresitene o le itu	Peresitene o le Itu	Au Peresitene o le misiona	Tagata o le ekalesia i le konafesi a le itu po o le sauniga aoao a le au perisitua o le itu	Peresitene o le misiona po o se fesoasoani e tofia
Fesoasoani ma le failautusi a le itu, failautusi fesoasoani, failautusi faapitoa, ma taitai o ausilali.	Tagai i “Valaauga o le Siteki,” itulau 159–60, suitulaga le <i>peresitene o le itu</i> i le <i>peresitene o le siteki</i> ma le <i>itu</i> mo le <i>siteki</i> .			

Valaauga o Korama a Toeaina i Paranesi i Misiona

Valaauga o Korama a Toeaina i Paranesi i Misiona (faauau)

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le korama a toeaina	Au Peresitene o le misiona po o le au peresitene o le itu	Au peresitene o le misiona, po o le au peresitene o le itu, pe a faatagaina ai e le peresitene o le misiona.	Tagata o le korama	Peresitene o le misiona po o le peresitene o le itu pe a tofia ai

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Fesoasoani i le au peresitene o le korama a toeaina	Peresitene o le korama (pe a feutagai ai ma le peresitene o le paranesi)	Au peresitene o le misiona pe, a faatagaina ai e le peresitene o le misiona, o le au peresitene o le itu	Tagata o le korama	Peresitene o le misiona po o le peresitene o le itu po o se isi taitai perisitua pe afai e tofia ai
Failautusi, faiaoga, ma isi valaauga o le korama a toeaina	Peresitene o le korama (pe a feutagai ai ma le peresitene o le paranesi ma fesoasoani i le peresitene o le korama)	Peresitene o le paranesi ma le au peresitene o le korama	Tagata o le korama	Peresitene o le korama po o se fesoasoani e tofia
Uso o auaunaga	O le auauna atu o se uso o auaunaga o se tiutetauave faaleperisitua o e umia le Perisitua Mekisateko. E tusa ai ma lena, o nei uso e <i>tofia</i> e avea ma uso o auaunaga e le au peresitene o le korama a toeaina, i lalo o le taitaiga a le peresitene o le paranesi. E le valaauina i latou, lagolago, pe vaetofia.			

Valaauga o le Perisitua Arona i Paranesi i Misiona

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le korama a ositaulaga (peresitene o le paranesi, o le o loo galue o se peresitene o le korama a ositaulaga)	Au Peresitene o le misiona po o le au peresitene o le itu	Au Peresitene o le misiona	Tagata o le paranesi	Peresitene o le misiona po o le peresitene o le itu pe a tofia ai
O Isi valaauga o le Perisitua Arona	Tagai i “Valaauga o le Perisitua Arona i Uarota,” itulau 161–62, suitulaga le <i>peresitene o le paranesi</i> i le <i>epikopo</i> ae o le <i>paranesi</i> mo le <i>uarota</i> .			

Valaauga o le Paranesi i Misiona

Valaauga o le Paranesi i Misiona (faaauau)

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Peresitene o le paranesi	Au Peresitene o le misiona po o le au peresitene o le itu	Au Peresitene o le misiona	Tagata o le paranesi	Peresitene o le misiona, po o le peresitene o le itu, pe a tofia ai

Tofi	Fautuaina Atu E	Faamaoniaina e le	Lagolagoina E	Valaauina ma Vaetofia e le
Fesoasoani i le au peresitene o le paranesi	Peresitene o le paranesi	Au peresitene o le misiona, po o le au peresitene o le itu, pe a faatagaina ai e le peresitene o le misiona.	Tagata o le paranesi	Peresitene o le misi-ona, ma pe a tofia i ai, o se tasi o ona fesoasoani, peresitene o le itu, po o se tasi o fesoasoani o le peresitene o le itu
Failautusi o le paranesi, failautusi fesoasoani, ma le failautusi faapitoo	Au peresitene o le paranesi	Au peresitene o le misiona po o le, au peresitene o le itu, pe a faatagaina ai e le peresitene o le misiona	Tagata o le paranesi	Peresitene o le itu po o se taitai perisitua na te tofia
Taitai o ausilali a le paranesi ma isi valaauga	Tagai i “Valaauga o le Uarota,” itulau 162–64, suitulaga le <i>peresitene o le paranesi</i> i le <i>epikopo</i> ma le <i>paranesi</i> mo le <i>uarota</i> .			

Valaauga o le Vaega o Tagata o le Ekalesia o loo Tautua i le Militeli

Tofi	Fautuaina Atu E	Faamaoniaina E	Lagolagoina E	Valaauina ma Vaetofia E
Taitai o le vaega o tagata e auaua i le militeli	Au Peresitene o le siteki po o le peresitene o le misiona	Au Peresitene o le siteki ma fautua maualuga po o le au peresitene o le misiona	Tagata o le vaega	Peresitene o le siteki po o le peresitene o le misiona, i tulaga e mafai ai ¹
Fesoasoani i le taitai o le vaega o tagata e tautua i le militeli	Taitai vaega	Au peresitene o le siteki ma fautua maualuga po o le au peresitene o le misiona	Tagata o le vaega	Peresitene o le siteki po o le peresitene o le misiona po o se taitai perisitua e tofia e se tasi o i la'ua ¹

¹ I se sone o le taua po o se eria e matua mamao ese ma tuufua, atonu e le mafai e se peresitene o le siteki po o se peresitene o le misiona ona valaau ma vaetofia ni taitai ma ni fesoasoani o ni vaega o tagata o loo tautua i le militeli. O faatonuga e faatatau i nei tulaga o loo tuuina atu i le *Tusitaulima 1*, 10.5.

20.

Sauniga ma Faamanuiaga o le Perisitua

O loo otooto atu i leni mataupu ia faatonuga mo le faatinoina o sauniga ma faamanuiaga o le perisitua. E tatau i peresitene o siteki ma epikopo ona silafia ia aiaiga o sauniga o loo otooto atu i le *Tusitaulima 1*, mataupu 16.

20.1

Faatonuga Aoao

O se sauniga o se faatinoga paia, e pei o le papatisoga, lea e faatino i le pule o le perisitua. O sauniga o le papatisoga, faamauga, faauuina i le Perisitua Mekisateko (mo alii), o le faaeega paia i le malumalu, ma le faamauga i le malumalu e manaomia mo le faaeega mo tagata faamoemocina uma. Ua ta'ua ia sauninga o sauniga faaola. O se vaega o sauniga faaola taitasi, e osifeagaiga ai le tagata e tuu atu i ai le sauniga ma le Atua.

O le faatinoina o se sauniga faaola e manaomia ai le faatagaga mai se taitai perisitua o loo umia ia ki talafeagai pe o loo galue i lalo o le taitaiga a se tagata o loo umiaina na ki. O lea faatagaga e manaomia foi mo le faaigoaina ma le faamanuiaina o se tamaitiiti, faapaiaina o se tuugamau, tuuina atu o se faamanuiaga faapeteriaka, ma le saunia, faamanuiaina, ma le tufatufaina atu o le faamanatuga. O e umiaina le Perisitua Mekisateko e mafai ona faamanuiaina le suauu, faauu le ma'i, tuuina atu le faamanuiaga faaletama, ma tuu atu isi faamanuiaga o le faamafanafanaga ma le fautuaga e aunoa ma le sailia muamua o le faatagaga mai se taitai perisitua.

O uso e faatinoina sauniga ma faamanuiaga e tatau ona saunia i latou lava e ala i le ola agavaa ma taumafai ia taialaina e le Agaga. E tatau ona latou faatinoina ia sauniga taitasi po o faamanuiaga i se faiga mamalu, ia mautinoa e ogatasi ma tulaga manaomia nei:

1. E ao ona faatinoina i le suafa o Iesu Keriso.
2. E ao ona faatinoina i le pule o le perisitua.

3. E ao ona faatinoina i soo se faasologa e tatau ai, e pei o le faaogaina o upu patino po o le faaogaina o le suauu paia.

4. E ao ona faatagaina e le taitai pulefaamalumalu o le o loo umia ia ki e tatau ai (e masani lava o le epikopo po o le peresitene o le siteki), pe afai e tatau ai e tusa ma faatonuga i le mataupu leni.

O se taitai perisitua o loo vaaia se sauniga po o se faamanuiaga, e faamautinoaina o le tagata o loo faatinoina o lo o iai le pule e tatau ai o le perisitua, o loo agavaa, ma, iloa ma mulimuli i faasologa e tatau ai. E saili foi taitai ina ia faia le sauniga po o le faamanuiaga o se aafiaga migao ma le faaleagaga.

Afai e faatinoina ia sauniga po o faamanuiaga i le sauniga faamanatuga, e faamautinoa e le epikopo o loo sa'o lelei le faatinoina. Ina ia aloese mai le faamainaina o se tasi e umia le perisitua, e faasa'oaina lemu e le epikopo ia mea sese pe afai e le o sa'o elemene taua o le sauniga po o le faamanuiaga.

O i latou e tuuina atu faamanuiaga o le perisitua, e tautala i upu o le faamanuiaga (“Ou te [po o le matou te] faamanuia ia te oe ina ia . . .”) ae le o le faia o se tatalo (“Le Tama Faalelagi e, faamolemole ia faamanuia leni tagata ina ia . . .”).

20.1.1

Auai i Sauniga ma Faamanuiaga

E na o uso o loo umia le perisitua e tatau ai ma o loo agavaa, e mafai ona faatinoina ia se sauniga po o se faamanuiaga, pe tu i le li'o. O i latou o e auai e masani lava ona faatapulaina na o nai tagata, e aofia ai taitai perisitua, tagata o le aiga e vavalalata sootaga, ma paaga vavalalata e pei o uso o auunaga. E le fautuaina le valaaulia o ni tagata se toatele o le aiga, uo, ma taitai e fesoasoani atu i se sauniga po o se faamanuiaga. Afai e toatele naua e auai, e mafai ona faigata ma o le a aveesea ai le

agaga o le sauniga. O i latou e faatinoina se sauniga ma i latou e pulefaamalumu e na o le pau na o tagata e moomia. O isi e tapua'ia ma lagolagoina le e fai ma fofoga.

Afai e toatele ni uso e auai i se sauniga po o se faamanuiaga, e tuu faamama e tagata taitoatasi lona lima taumatau i luga o le ulu o le tagata (po o lalo ifo o le pepe o loo faamanuiaina) ma lona lima tauagavale i luga o le tauau o le uso o loo i lona itu tauagavale.

E ui lava e na o se numera faatapulaa o uso e tutu i le li'o pe a tuuina atu se sauniga po o se faamanuiaga i se tagata, e masani lava ona valaulia tagata o le aiga e mafuta mai.

E uunaia e taitai ia alii agavaa o e o loo umia le perisitua talafeagai e faatinoina pe auai ai i sauniga ma faamanuiaga mo tagata o o latou aiga.

20.1.2

Agavaa e Auai i se Sauniga po o se Faamanuiaga

E na o sē o umia le Perisitua Mekisateko o loo agavaa e umia se pepa faataga o le malumu e mafai ona avea ma fofoga i le faamauina o se tagata e avea ma tagata o le Ekalesia, faace atu le Perisitua Mekisateko, faauuina se tagata i se tofi o lona perisitua, pe vaetofiaina foi se tagata e galue i se valaauga faale-Ekalesia.

E pei ona taialaina ai e le Agaga ma faatonuga o i le isi parakalafa, ua i ai i epikopo ma peresitene o siteki le faautautaga e faataga ai i latou e umia le perisitua, o ē le o atoatoa ona agavaa mo le malumu e faatino ai pe auai foi i nisi o sauniga ma faamanuiaga. Peitai, e le tatau i taitai pulefaamalumu ona faatagaina lona auai i le faatinoga, pe afai o i ai ni agasala matuia e lei foia a sē o umia le perisitua.

E mafai e se epikopo ona faatagaina se tamā o loo umia le Perisitua Mekisateko e faaigoa ma faamanuia lana fanau tusa lava pe le o agavaa atoatoa le tamā mo le malumu. E faapena foi, e mafai e se epikopo ona faataga se tamā o sē o avea ma ositaulaga pe

o umia foi le Perisitua Mekisateko e papatisoina lana fanau pe faauuina ona atalii i tofi o le Perisitua Arona. I tulaga foi faapena e mafai ai ona faatagaina sē o umia le Perisitua Mekisateko ona tu i le li'o mo le faamauga o lana fanau, mo le faaceina atu o le Perisitua Mekisateko i luga o ona atalii, po o le vaetofiaina o lona toalua po o le fanau. Peitai, e le mafai ona avea o ia ma fofoga.

20.1.3

Faatinoina o se Sauniga po o se Faamanuiaga i se Isi Uarota

Ina ia avea ma fofoga i le faaigoaina ma le faamanuiaina o se tamaitiiti, papatisoina po o le faamauina o se tagata, faauuina o se tagata i se tofi o le perisitua, po o le faapaiaina o se tuugamau, e tatau ai i se tasi ua umia le perisitua o loo i fafo atu o lana lava uarota ona faali atu i le taitai pulefaamalumu se pepa faataga aoga o le malumu po o se Pepa Faataga e Faia ai se Sauniga lea na sainia e se tasi o lana au epikopo.

20.1.4

Faatinoina o Sauniga e Tagata E I Ai Manaoga Faapitoa ma mo Tagata e I Ai Manaoga Faapitoa

O taiala mo le faatinoina o sauniga e tagata e i ai manaoga faapitoa ma mo tagata e i ai manaoga faapitoa, o loo maua i le *Tusitaulima 1*, 16.1.8 ma le 16.1.9.

Mo taiala e uiga i le faamatalaupiina o sauniga mo i latou o e logonoa pe faaletonu le faalogo, tagai i le 21.1.26 o le tusitaulima leni.

20.1.5

Faaliliuina o Sauniga ma Faamanuiaga

O taiala mo le faaliliuina o sauniga ma faamanuiaga o loo maua i le *Tusitaulima 1*, 16.1.2.

20.1.6**Faatonuga mo le Faatinoina o Sauniga ma Faamanuiaga**

O lomiga nei o loo maua atu ai faatonuga i le faatinoina o sauniga ma faamanuiaga:

1. O le mataupu lenei o le tusitaulima
2. *Tusitaiala mo le Aiga*, itulau e 18–25
3. *O Tūte ma Faamanuiaga o le Perisitua, Vaega E*, itulau e 42–47

O le faaogaina o nei lomiga, e aoao ai e taitai perisitua le usoga i le ala e faatino ia sauniga ma faamanuiaga. E faamautinoa e taitai ua tofua e e umia le perisitua ma le *Tusitaiala mo le Aiga* po o le *Tūte ma Faamanuiaga o le Perisitua Vaega E*, ina ia mafai ona i ai lana lava kopi o nei faatonuga.

E le tatau i taitai perisitua ona gaosia pe faaogaina nisi lomiga o loo tuuina atu ai faatonuga mo sauniga, faamanuiaga, po o tatalo sei vagana ua faatagaina atu e le Au Perisitene Sili ia na lomiga.

20.2**Faaigoaina ma le Faamanuiaina o Fanau****20.2.1****Taiala Lautele**

“O le au paia uma lava o le Ekalesia a Keriso o i ai fanau e ao ina aumaia i latou i luma o le ekalesia i tocaina, o le a faaee o latou lima i luga ia te i latou i le suafa o Iesu Keriso, ma faamanuiaina i latou i lona suafa” (MFF 20:70). Ina ia ogatasi ma lenei faaaliga, ua na o ē umia le Perisitua Mekisateko e mafai ona auai i le faaigoaina ma le faamanuiaina o fanau. E tatau i taitai perisitua ona logoina tagata o le ekalesia i lenei faatonuga a o lei faaigoaina ma faamanuiaina a latou fanau. A o tausia le natura mamalu o le faamanuiaga, e tatau i taitai ona faia ia

taumafaiga lelei uma ina ia taofia ai le faamaina po o le faatiga i tagata taitoatasi po o aiga.

E masani lava ona faaigoa ma faamanuiaina fanau i le taimi o le sauniga anapogi ma molimau i le uarota o loo i ai pepa faamaumau o matua.

20.2.2**Faatonuga mo le Faaigoaina ma le Faamanuiaina o se Tamaitiiti**

A faamanuia se pepe, e faapotopoto i se li’o i latou e umia le Perisitua Mekisateko ma tuu o latou lima i lalo o le pepe. A faamanuia se tamaitiiti matua, e tuu faamama e uso o latou lima i luga o le ulu o le tamaitiiti. O le tagata na te tuuina atu le faamanuiaga e:

1. Faalupe le Tama Faalelagi.
2. Ta’u atu o le faamanuiaga o loo faatinoina e ala i le pule o le Perisitua Mekisateko.
3. Tuu atu i le tamaitiiti se igoa
4. Tuuina atu upu o le faamanuiaga e pei ona taitaiina ai e le Agaga.
5. Faaiu i le suafa o Iesu Keriso.

20.2.3**Faamaumauga ma le Tusi Faamaonia o Faamanuiaga**

A o le’i faamanuiaina se tamaitiiti, e saunia e le failautusi a le uarota se Faamaumauga o le Faamanuiaga o le Tamaitiiti. A uma le faamanuiaga, e faamautinoa e le failautusi ua uma ona faatumu le fomu lenei, ma na te faagaioia pe tufatufa atu e tusa ai ma faatonuga o loo i ai i le fomu. E saunia foi e le failautusi se tusi faamaonia o le faamanuiaga. E saina e le epikopo le tusi faamaonia, ma tuuina atu e ia po o le failautusi i (le) matua po o (le) tagata o loo tausia faaletulafono le tamaitiiti.

Afai o se pepe na fanau i fafo atu o le faaipoipoga, o le igoa i luga o le pepa faamaumau ma le tusi

faamaonia e tatau ona tutusa ma le igoa o loo i luga o le pepa fanau po o le pepa lesitala a le malo o e fananau mai. Afai e leai se pepa fanau poo se pepa lesitala a le malo, e faaoga le auala o le faaigoaina e tusa ai ma tu ma agaifanua a le atunuu.

20.3

Papatisoga ma le Faamauga

20.3.1

O Tamaiti O E Auai i le Ekalesia ma I Ai Pepa Faamaumau

I lalo o le taitaiga a le taitai pulefaamalumu, o tamaiti o e auai i le ekalesia ma i ai pepa faamaumau e tatau ona papatisoina ma faamau i o latou aso fanau o le 8 tausaga po o se taimi vave pe a uma le aso fanau o le 8 tausaga pe a talafeagai. O fanau nei o ē ua i ai pepa faamaumau i le Ekalesia .

E tuu atu le gauaiga faapitoa a epikopo i fanau ua ta'i 7 tausaga le matutua i totonu o le uarota, ia mautinoa o loo fesoasoani o latou matua, taitai ma faiaoga o le Peraimeri, ma i latou ua tofia e auauna atu i o latou aiga, ia i latou ia saunia mo le papatisoga ma le faamauga. E faamalosiaina foi e taitai o le Perisitua Mekisateko ma le Aualofa ia matua ina ia aoao ma saunia a latou fanau mo nei sauniga. Afai e aulia e tamaiti le ta'i 8 tausaga, ia mautinoa e le epikopo ua latou maua avanoa uma e taliaina ai le talalelei ma ia papatisoina ma faamau.

20.3.2

Tagata Liliu Mai

E tatau ona papatisoina ma faamauina tagata liliu mai, pe a ua latou ausia tulaga manaomia o loo ootoo atu i le "Faatonuga mo Faatalanoaga" i le *Tusitaulima 1*, 16.3.3.

O papatisoga liliu mai ua faauigaina o papatisoga o (1) tagata ua ta'i 9 tausaga ma matutua atu e lei

papatisoina lava ma faamauina ma (2) tamaiti ua ta'i 8 tausaga le matutua o o latou matua e le o ni tagata o le Ekalesia pe o o latou matua o loo papatisoina ma faamauina i le taimi e tasi ma tamaiti.

20.3.3

Faatalanoaga o Papatisoga ma Faamauga

O le epikopo po o se fesoasoani ua tofia, e faatautaia ia faatalanoaga mo papatisoga ma faamauga o tamaiti ua ta'i 8 tausaga le matutua, o e ua i ai pepa faamaumau ma tamaiti ua ta'i 8 tausaga ae le o i ai ni pepa faamaumau ma pe e lotu se toatasi o matua po o se o tausia.

O faifeautalai faamisiona e faatalanoaina tagata liliu mai (e pei ona faamalamalama atu i le 20.3.2) mo papatisoga ma faamauga.

O faatonuga mo faatalanoaga o loo maua i le *Tusitaulima 1*, 16.3.3.

20.3.4

Sauniga o le Papatisoga

O sauniga o le papatisoga e tatau ona faigofie, puupuu, ma faaleagaga. E masani lava, o taitai o le uarota po o le siteki e faatautaia faalemasina ia sauniga o papatisoga mo tamaiti uma ua ta'i 8 tausaga ua i ai pepa faamaumau i totonu o le uarota po o le siteki. E le tatau i tagata o le au paia ona talosagaina ni taimi faapitoa po o ni taimi eseese pe faatonu mai foi ia vaega e ao ona faia i sauniga o papatisoga.

O tagata e mafai ona valaaulia i se sauniga o le papatisoga e aofia ai tagata totino o le aiga, o isi tagata o le aiga, uo, taitai perisitua, uso ma tuafafine o auaunaga, taitai o ausilali ma faiaoga o le a galulue ma le tagata fou o le ekalesia, ma tagata sailiili o loo fai a latou lesona. E mafai foi ona auai mai isi tagata o le uarota.

E le tatau ona fuafuaina ia sauniga o papatisoga e fai i afiafi o Aso Gafua.

Sauniga E Na o le Tasi le Uarota e Aofia Ai

Mo Tamaiti ua Ta'ivalu Tausaga ua i ai Pepa Faamaumau. O se uso o le au epikopo e pulefaamalumalu i le sauniga o le papatisoga mo tamaiti ua ta'i 8 tausaga ua i ai pepa faamaumau pe afai e na o le tasi le uarota e aofia ai.

O se uso o le au epikopo e vaaia le fuafuaina o nei sauniga o le papatisoga. E mafai e ia ona taitai ia saniga pe tofi le taitai misiona a le uarota e taitai. E mafai ona fesoasoani taitai o le Peraimeri e fuafua ia sauniga i lalo o le taitaiga a le au epikopo.

Mo Tagata Liliu Mai. Afai e mafai, ia auai se tasi o le au epikopo i sauniga papatisoga o tagata liliu mai taitoatasi. Afai na o le tasi le uarota e aofia ai, e pulefaamalumalu o ia sei vagana ua auai atu se uso o le au peresitene o le siteki.

I lalo o le taitaiga a le au epikopo, e masani ai ona galulue le taitai misiona a le uarota ma faifeautalai faamisiona e fuafuaina nei sauniga o papatisoga. E masani lava o se uso o le au epikopo poo le taitai misiona a le uarota e taitaia nei sauniga. Afai e leai se tasi o nei taitai o le uarota o avanoa, e mafai e faifeautalai faamisiona o loo avea ma taitai itu po o taitai sone ona fuafuaina nei sauniga faatasi ai ma le faamaoniga a le peresitene o le misiona.

Sauniga e Silia ma le Tasi le Uarota e Aofia Ai

Mo Tamaiti ua Ta'ivalu Tausaga ua i ai Faamaumauga. O se uso o le au peresitene o le siteki e masani ona pulefaamalumalu i sauniga o papatisoga mo tamaiti ua ta'ivalu tausaga ua i ai pepa faamaumau pe afai e sili atu ma le tasi uarota e aofia ai i ia sauniga. Ae peitai, e mafai e le au peresitene o le siteki ona tofia se fautua maualuga e pulefaamalumalu. E tatau ona auai se tasi o le au epikopo mai uarota taitasi o loo aofia ai.

E mafai e le au peresitene o le siteki ona tofia se fautua maualuga e vaaia le fuafuaina o sauniga ma taitai ai. E mafai e taitai o le Peraimeri ona fesoasoani e fuafua nei sauniga i lalo o le taitaiga a taitai pulefaamalumalu.

Mo Tagata Liliu Mai. O se uso o le au peresitene o le siteki e masani ona pulefaamalumalu i sauniga o papatisoga mo tagata liliu mai pe afai e sili atu ma le tasi le uarota e aofia ai i sauniga. Ae peitai, e mafai e le au peresitene o le siteki ona tofia se fautua maualuga e pulefaamalumalu. E tatau ona auai se tasi o le au epikopo mai uarota taitasi o loo aofia ai.

E mafai e le au peresitene o le siteki ona tofia se fautua maualuga po o se epikopo e vaaia le fuafuaina o sauniga ma taitai ai.

Faatulagaina o Sauniga o Papatisoga mo Tagata Liliu Mai

E tatau ona faatulagaina sauniga o papatisoga i le taimi lava e tautino mai ai se tagata sailiili e papatiso. E le tatau ona masani ona tolopo ia sauniga e silia ma le aso lea, sei vagana e le'i saunia le tagata. E le tatau ona tolopoina ia papatisoga o tagata o le aiga sei mafai e le tamā ona maua le perisitua ma faatino e ia lava le papatisoga.

O sauniga o papatisoga mo tagata liliu mai e tatau ona fuafuaina e auala atu i le taitai misiona. Afai e faatulagaina se sauniga i le Aso Sa, e tatau ona faia i se taimi e le faalavelave ai i fonotaga masani o le Aso Sa.

O Elemene o se Sauniga o le Papatisoga

O se sauniga o le papatisoga e mafai ona aofia ai:

1. Musika e mua'i tataina.
2. Se faafeiloaiga puupuu e saunia e le taitai perisitua o loo taitaia le sauniga.
3. Se viiga ma se tatalo amata.
4. Ni lauga pupuu e tasi pe lua i mataupu o le tala-lelei, e pei o le papatisoga ma le Agaga Paia.
5. Se musika e filifilia.
6. Faatinoina o le papatisoga (tagai i le 20.3.8).

7. Se taimi o le migao a o sui tagata sa auai i le faatinoina o le papatisoga, i o latou laei mamago. E mafai ona aofia ai se musika vailauga poo ni pesepesega o viiga lauiloa ma pese a le Perai-meri. E mafai foi ona aofia ai se aoaoga puupuu o le talalelei e faifeautalai faamisiona mo tagata le lolotu atonu e i ai.
8. Faatinoina o le faamauga (mo na’o tamaiti ua ta’i 8 tausaga o loo i ai pepa faamaumau, afai o le a le faamauina i latou i se sauniga anapogi ma molimau; tagai i le 20.3.9 ma le 20.3.10).
9. Se avanoa mo tagata fou ua liliu mai e tuuina atu ai a latou molimau, pe a mananao ai.
10. Se viiga ma se tatalo faaii.
11. Musika e tata pe a maea le sauniga.

20.3.5

Vai Papatiso

E galulue faatasi faifeautalai ma le epikopo o loo vaaia le falelotu poo se isi tagata ua tofia e le au peresitene o le siteki, mo le faaaogaina o le vai papatiso. O le faasologa mo le faaaogaina o se vai papatiso e tatau ona faatagaina ai faifeautalai e faia papatisoga ia taitasi i le vaiaso po o le sili atu foi , pe a tatau ai. Ae peitai, e le tatau i faifeautalai ona faamoemoe e faaaogaina se vai papatiso i ni taimi e le talafeagai. E leai se totogi mo le faaaogaina o le vai papatiso.

E tatau ona i ai se tagata matua faatuatuaina i le taimi e faatumu ai le vai papatiso ma ia i ai pea seia maea ona toe faaaluese le vai ma ua saogalemu. E tatau ona faaaluese le vai ma faamama le vai papatiso i le taimi lava e maea ai sauniga taitasi o papatisoga. E tatau ona usitaia lapataiga mo le saogalemu i soo se taimi e iai le vai i totonu o le faatanoa.

Afai e le o faaaogaina le vai, o faitotoa uma e tau atu i ai e tatau ona tapuni ma loka.

Afai e le o maua se vai papatiso, e mafai ona faaaogaina soo se ituaiga vai e saogalemu mo se papatisoga pe afai e lava lona tele e faatofu ai le tagata ma mafai ai e le perisitua e faia le papatisoga on tutu faatasi ma le tagata i totonu o le vai. E le faapaiaina le vai mo papatisoga.

20.3.6

Laei mo Papatisoga

O le tagata e faia le papatisoga ma le tagata o loo papatisoina, e tatau ona fai ni ofu papae e lē valavala pe a susū. O se tagata ua maea ona maua faaeege paia na te ofuina le ofusa o le malumalu i totonu o ona laei a o faatinoina le papatisoga.

E tatau i iunite i le lotoifale ona i ai ni lavalava mo papatisoga ma ia le totogiina se tupe e faaaoga ai. O nei laei e faatau mai i tupe o le paketi. E mafai e le epikopo ona faatonu tagata o le au paia e faamama ma fai faalelei ia laei.

20.3.7

Molimau o se Papatisoga

E toalua ositaulaga po o e umia le Perisitua Mekisateko e molimauina ia papatisoga taitasi ia mautinoa o loo sa’o lelei ona faatino. E tatau ona toe faia le papatisoga pe afai e le o sa’o lelei le ta’uga o upu e pei ona tuuina mai i le Mataupu Faavae ma Feagaiga 20:73 ma pe afai e le o lilofia atoa le tino po o lavalava o le tagata i le vai.

20.3.8

Faatonuga mo le Faatinoina o se Papatisoga

I lalo o le taitaiga a le taitai pulefaamalumalu, e mafai e se ositaulaga po o se tasi o loo umia le Perisitua Mekisateko ona faatinoina le sauniga o le papatisoga. Ina ia faia, e tatau ona ia:

1. Tu i totonu o le vai faatasi ma le tagata o le a papatisoina.

2. Uuina le tapulima taumatau o le tagata i lona lima tauagavale (mo le faigofie ma le saogalemu); e uu e le tagata o le a papatisoina le tapulima tauagavale o le perisitua i lona lima tauagavale.
3. Sii lona lima taumatau i le sikuea.
4. Ta'u atoa le igoa o le tagata ma faapea atu, "Ona ua tofia au e Iesu Keriso, ou te papatiso ia te oe i le suafa o le Tama, ma le Alo, ma le Agaga Paia. Amene" (MFF 20:73).
5. Ia uu e le tagata lona isu i le lima taumatau (mo le faafaigofieina); ona tuu lea o le lima taumatau o le perisitua ia faamaualuga i le tua o le tagata ma faatofu atoa le tagata i lalo, e aofia ai ma lavalava o le tagata.
6. Fesoasoani e toe faatu a'e le tagata mai le vai.

O papatisoga o tagata liliu mai e masani ona faia e se tasi o le uarota e umia le perisitua, po o se tasi o faifeautalai sa aoaina le tagata. E mafai foi e le tagata liliu mai ona talosagaina se tasi tagata agavaa o le ekalesia na te faatinoina le papatisoga.

20.3.9

Faamauga ma le Meaalofa o le Agaga Paia

E faamauina se tagata e avea ma tagata o le Ekalesia ma mauaina le meaalofa o le Agaga Paia pe a uma ona papatiso (tagai i le MFF 20:41). E faatoa avea se tasi ma se tagata o le Ekalesia pe a maea uma sauniga o le papatisoga ma le faamauga ma ua faamauina lelei (tagai i le Ioane 3:5; MFF 33:11).

O le epikopo e umia ki mo le faamauga o tagata ta'i 8 tausaga le matutua ua i ai faamauga. O le perisitene o le misiona na te umia ki mo le faamauga o tagata liliu mai. Peitai, o le epikopo na te vaaia le faatinoina o lenei sauniga, pe o se tagata ua 8 tausaga le matua ua i ai faamauga po o se tagata e liliu mai. E faamautinoa e le epikopo ua faia i se taimi vave pe a uma le papatisoga.

O tamaiti ua tai-valu-tausaga o loo i ai pepa faamau-mau e mafai ona faamauina i le sauniga o le papatisoga po o se sauniga faamanatuga i le uarota latou te nonofo ai, e sili atu pe a mafai ona fai i se sauniga anapogi ma molimau.

E faamauina papatisoga o tagata liliu mai i soo se sauniga faamanatuga i le uarota o loo nonofo ai, ae sili ai le Aso Sa e sosoo ma o latou papatisoga. E le faamauina tagata liliu mai i le sauniga o le papatisoga.

Ia i ai lava se tasi o le au epikopo e auai i lenei sauniga. Afai na aoaina e faifeautalai faamisiona se tagata liliu mai, e tataua i le epikopo ona valaaulia i latou e auai ai.

E le faia e le epikopo se isi faatalanoaga e ese mai ai mo lenei sauniga.

20.3.10

Faatonuga mo le Faatinoina o se Faamauga

I lalo o le taitaiga a le au epikopo, e toatasi pe sili atu i latou e umia le Perisitua Mekisateko e mafai ona auai i se faamauga. Latou te tuu faamama o latou lima i luga o le ulu o le tagata. O le tagata na te faia le sauniga e:

1. Ta'u le igoa atoa o le tagata.
2. Ta'u atu faapea o loo faatinoina le sauniga i le pule o le Perisitua Mekisateko.
3. Faamauina le tagata o se tagata O Le Ekalesia a Iesu Keriso o le Au Paia o Aso e Gata Ai.
4. Faaaoga ia upu "Talia le Agaga Paia" (e lē o le meaalofa o le Agaga Paia").
5. Tuuina atu upu o le faamanuiaga e pei ona taitaina ai e le Agaga.
6. Faaiu i le suafa o Iesu Keriso.

20.3.11**Faamaumauga o le Papatisoga ma le Faamauga ma le Tusi Faamaonia**

A faatalanoa e le epikopo po o se fesoasoani ua tofia se tamaitiiti ua 8 tausaga le matua, na te faatumuina le Faamaumauga o le Papatisoga ma le Faamauga e tusa ai ma le faatonuga o loo i ai i le fomu. A maea le papatisoga ma le faamauga, e faaoga e le failautusi a le uarota le faamatalaga o loo i Faamaumauga o le Papatisoga ma le Faamauga e faafou ai le pepa faamaumau o le tamaitiiti.

A faatalanoa e se faifeautalai faamisiona se tagata liliu mai mo le papatisoga, na te faatumuina uma le Faamaumauga o le Papatisoga ma le Faamauga sei vagana ai faamatalaga e uiga i le faamauga. I le sauniga o le papatisoga, e tuuina atu e faifeauitalai le fomu leni i le epikopo po o se tasi o ona fesoasoani. A maea le faamauga, e faatumu e le epikopo po o le failautusi o le uarota ia faamatalaga o le faamauga. Ona toe faafoi lea e le failautusi o le uarota ia kopi e lua o le fomu i faifeautalai faamisiona. E auina atu e faifeautalai le kopi e tasi i le ofisa o le misiona mo le fatuina o se pepa faamaumau.

O le sa’o o le faatumuina ma le tufatufaina o le Faamaumauga o le Papatisoga ma le Faamauga e taua mo le faafouina po o le fatuina o pepa faamaumau.

A maea le faamauga, e saunia e le failautusi o le uarota se tusi faamaonia o le papatisoga ma le faamauga. E saina e le epikopo le tusi faamaonia, ona tuu atu lea e ia po o le failautusi i le tagata fou.

E tatau ona tusia le igoa ua faamaonia faaletulafono o se tagata, e pei ona faamatalaina e le tulafono po o aganuu o le lotoifale i luga o le Faamaumauga o le Papatisoga ma le Faamauga ma luga o le tusi faamaonia.

20.4**Faamanatuga****20.4.1****Taiala Lautele**

E feiloai tagata o le Ekalesia i le Sapati e tapuai i le Atua ma taumamafa i le faamanatuga (tagai i le MFF 20:75; 59:9). I le taimi o leni sauniga paia, latou te aai ai i le areto ma feinu i le vai e manatua ai le taulaga a le Faaola o Lona tino ma le toto ma toe faafouina ai a latou feagaiga (tagai i le Mataio 26:26–28; Faaliliuga a Iosefa Samita, Mareko 14:20–25; Luka 22:15–20; 3 Nifae 18; Moronae 6:6).

I lalo o le taitaiga a le au epikopo, e faamanuia ai e i latou o loo umia le perisitua le faamanatuga ma tufatufa atu i tagata o le faapotopotoga i le taimi o sauniga faamanatuga taitasi. E masani lava o i latou e umia le Perisitua Arona e faatinoina nei tiute. I lalo o le taitaiga a le au epikopo, ua i ai i le perisitene o le korama a tiakono le avanoa ma le tiute-tauave e valaaulia ai isi e fesoasoani i le tufaina o le faamanatuga. Afai e le o lava ni tiakono, e tatau ona la feutagai ma se uso o le au epikopo e fuafua ai po o ai e mafai ona talosagaina e fesoasoani atu.

O le mea e masani ai, e tatau ona valaaulia muamua ia aoao ma ositaulaga i le Perisitua Arona e tufaina le faamanatuga a o lei valaaulia i latou o loo umia le Perisitua Mekisateko e faia. I nofoaga o loo lava ai i latou e umia le Perisitua Arona, e le tatau ona valaaulia i latou o umia le Perisitua Mekisateko e faamanuia ma tufatufa le faamanatuga i se faiga faifai pea.

O i latou uma e umia le perisitua e auai i le faatinoina o leni sauniga e tatau ona malamalama o loo ia galue e fai ma sui o le Alii. E fautuaina e le au epikopo i latou e umia le perisitua ina ia mafaufau loloto i le Togiola a le Faaola a o latou sauniaina, faamanuia, ma tufa le faamanatuga. Ia mautinoa foi e le au epikopo o loo i ai i e umia le perisitua se uiga migao, ma le mamalu a o latou auai i le faatinoina o leni sauniga.

O latou e faamanuiaina ma tufaina le faamanatuga e tatau ona oofu i ofu talafeagai ma ia manaia ma mama lelei. O ofu po o teuga ilaila e le tatau ona tosina atu i ai le vaai pe avea ma faalavelave i tagata i le taimi o le faamanatuga. E fautuaina le faia o fusiua ma ofutino papa'e aua e faaopoopo atu ai i le mamalu o le sauniga. Peitai, e le tatau ona latou avea lena mea faapea e tatau lava ona i ai, ona faatou mafai lea e se tasi o umia le perisitua ona auai i le faatinoina. E le manaomia foi ona faapea e tatau ona tutusa uma ofu ma foliga o tagata uma. E tatau i epikopo ona faaoga le faautautaga pe a tuuina atu ia taiala faapea i alii talavou, ia faitaulia o latou tulaga tautupe ma lo latou matutua i le Ekalesia.

O le natura paia o lena sauniga e faamautuina ai le faaeteetega ma le sauniuniga aupito sili ina ia mautinoia ai le faatulagaina lelei ma le migao. O tofitofiga e faamanuia ma tufa le faamanatuga e tatau ona vave fai. O i latou e auai i le faatinoina e tatau ona nonofo ma le migao a o lei amataina le sauniga.

O le tufaina o le faamanatuga e tatau ona [faia] o se mea ua masani ai ma e faaleiloga, a le o le faamalo po o le soona pau foi. O i latou e tufaina le faamanatuga e le tatau ona faapea e tatau ona faia se ituaiga tu po o se gaoioiga faapitoa, e pei o le tuu o le lima tauagavale i le papatua. O le faiga o le tufaina o le faamanatuga e le tatau ona tosina atu i ai, pe aveeseina ai foi le faamoemoega o le sauniga.

E tatau i e umia le perisitua ona fufulu mama lelei o latou lima i se fasimoli, se pepa sololima e uma ma lafoai, , po o se isi mea sololima ao lei sauniaina, faamanuiaina, pe tufatufaina le faamanatuga.

O se tasi o loo umia le perisitua na faia se solitulafono matuia e le tatau ona ia sauniaina, faamanuiaina, pe tufaina le faamanatuga seiloga e salamo o ia ma faaleleia le mataupu ma lona epikopo.

E ui o le faamanatuga e mo tagata o le Ekalesia, ae le tatau i le au epikopo ona faasilasila atu faapea o le a na o tagata o le ekalesia e tufaina atu i ai, ma e leai se mea e tatau ona faia e taofi ai tagata e le auai i le ekalesia, mai le taumamafa ai.

20.4.2

Sauniaina o le Faamanatuga

O aoao, ositaulaga, ma e o loo umia le Perisitua Mekisateko e mafai ona sauniaina le faamanatuga. A o lei amataina le sauniga, o i latou o e sauniaina le faamanatuga e tatau ona mautinoia ua i ai ia fata falaoa o loo i ai ni falaoa e le tofitofiina, o fata vai o loo i ai ipu ua faatutumu i vai mama ma ni ie ufilaulau mama. A uma le sauniga, ona tapena ese lea e uso nei ia fata ma ie ufilaulau.

O ie ufilaulau o le faamanatuga e tatau ona papae, e le valavala, mama, ma auli faamafolafola. O fata o le faamanatuga e tatau ona tausia ia mama. E maua fata ma ipu o le faamanatuga i Faletusi o le Ekalesia.

20.4.3

Faamanuiaina ma le Tufaina o le Faamanatuga

E mafai e ositaulaga ma i latou o loo umia le Perisitua Mekisateko ona faamanuiaina le faamanatuga. O tiakono, aoao, ositaulaga, ma Perisitua Mekisateko e mafai ona tufaina le faamanatuga.

A o lagiina e le faapotopotoga le viiga o le faamanatuga, o e umia le perisitua o le a faamanuiaina le faamanatuga e tutulai ma le faaaloalo, aveese le ie o loo ufiufi ai ia fata falaoa, ma tofitofi le falaoa ia faaninii mo le taumafaina. A uma ona latou tofitofiina le falaoa, ona latou nonofo lea i lalo ma auai i le lagiina o le viiga. E le mafai ona suitulaga ni pese taitoatasi po o ni mea faimusika i lena viiga.

A maea le viiga, o le tagata e faamanuiaina le falaoa e tootuli ma fai le tatalo o le faamanatuga mo le falaoa. O tatalo o le faamanatuga na faaalua mai e le Alii (tagai i le MFF 20:77, 79; Moronae 4–5). Ia mautinoia e le epikopo o loo manino, sa'o lelei, ma mamalu le fofogaina. Afai e sese se upu e ta'u e le tagata o loo faamanuiaina le faamanatuga ae na faasa'o e ia lava, e le toe manaomia se isi faasa'oga. Afai e le faasa'oina e le tagata se mea na sese, e faailoa atu e le epikopo e tatau ona toe fofogaina le tatalo

ia sa’o. O le faia o lena mea, e tatau i le epikopo ona faateete ina ia aloese mai le faalumaina pe faalavelave ai foi i le natura paia o le sauniga.

A maea le tatalo, ona tufatufa atu lea e tiakono po o isi e umia le perisitua le falaoa i le faapotopotoga i se uiga migao ma le faatulagaina lelei. E talia muamua e le taitai pulefaamalumalu le faamanatuga.

O le epikopo (po o se fesoasoani pe a o toesea o ia) e pulefaamalumalu i le sauniga faamanatuga sei vagana o susū i luga o le tulaga se tasi o le au perisitene o le siteki, se Fitugafulu Eria, po o se Pulega Aoa. E le pulefaamalumalu se fautua maua ma e le taliaina muamua foi e ia le faamanatuga.

A o taliaina e le taitai pulefaamalumalu le faamanatuga, e mafai foi e isi o e o loo tufaina le faamanatuga ona savavali atu i nofoaga ua tofi i ai i latou.

A maea ona taua atu e se perisitua se fata faamanatuga i se tagata o le au paia, e mafai e isi ona tuufaasolo atu le fata mai le tasi i le isi mo le faafaigofieina.

A uma ona tufaina e uso le falaoa, ona latou toe faafoi atu lea o fata i le laulau faamanatuga. O i latou o loo taitai i le laulau faamanatuga e toe ufiufia ia fata o le falaoa i le ie ae afeese le ie o loo ufiufi ai fata vai. Ona tootuli lea o le tagata e faamanuiaina le vai ma fai le tatalo o le faamanatuga mo le vai (tagai i le MFF 20:79), ma faaoga le upu *vai* e sui ai le *uaina*.

A maea le tatalo, ona tufa atu lea e tiakono po o isi perisitua ia le vai i le potopotoga. A maea, ona latou toe faafoi atu lea o fata i le laulau faamanatuga, e faatali mo i latou o loo taitaia le sauniga e toe ufiufi fata, ona toe foi atu lea ma le migao i o latou nofoaga.

O tagata uma lava e auai i le sauniga e tatau ona migao i le taimi atoa o le sauniga o le faamanuiaina ma le tufatufaina o le faamanatuga.

E le tatau ona tataina se musika i le taimi o le tatalo, i le taimi a o tufa le faamanatuga, po o se musika foi e tata pe a maea ona tufa le faamanatuga.

20.4.4

Faamanatuga Mo Tagata Ua Le Mafai Ona Auai Mai

Tagai i le “Sauniga Faamanatuga i ni Tulaga e Le Masani Ai” i le 18.2.2.

20.5

Faapaiaina o le Suauu

E toatasi pe sili atu i latou e umia le Perisitua Mekisateko e tatau ona faapaiaina le suauu olive a o lei faaogaina e faauuina ai e mama’i pe o mafatia foi. E leai se isi suauu e mafai ona faaoga. Ina ia faapaiaina le suauu, o le ua umia le perisitua e:

1. Uuina se fagu ua tatala o loo i ai le suauu olive.
2. Faalupe le Tama Faalelagi.
3. Ta’u atu faapea o loo ia faia i le pule o le Perisitua Mekisateko.
4. Faapaiaina le suauu (ae le o le fagu) ma vaetofia mo le faauuina ma le faamanuiaina o e mama’i ma mafatia.
5. Faaiu i le suafa o Iesu Keriso.

E le tatau i tagata o le ekalesia ona inuina le suauu paia pe faaoga foi i vaega o le tino o loo mafatia.

20.6

Faauuina o e Mama’i

20.6.1

Taiala Lautele

E na o e umia le Perisitua Mekisateko e mafai ona faauuina e mama’i pe mafatia foi. E masani lava e toalua pe sili atu i latou o loo umia le perisitua e faauuina le ma’i, ae mafai e le toatasi ona faatinoina uma na o ia le faauuga ma le faaanga pe afai ua tatau ai. Afai e le o i ai se suauu ua faapaiaina, e

mafai lava ona tuuina atu se faamanuiaga e ala i le pule o le perisitua e aunoa ma le faauuina.

O se tamā agavaa o loo umiaina le Perisitua Mekisateko e masani lava ona ia faauuina tagata mama'i o lona aiga.

E tatau i uso ona faauu i e mama'i pe a talosaga mai le tagata ma'i po o se tasi o i latou o e o loo matuai popole lava ina ia faamanuiaina e tusa ai ma lo latou faatuatua (tagai i le MFF 24:13–14; 42:43–44, 48–52). O Perisitua Mekisateko o e asiasi atu i le falemai, e le tatau ona talosagaina ni avanoa e faauu ai e mama'i.

Afai e talosagaina e se tagata ni faamanuiaga e sili atu i lo le tasi mo le ma'i lava e tasi, e le manaomia e le o umia le perisitua ona toe faauuina i le suauu pe a maea le faamanuiaga muamua. Ae, na te tuuina atu se faamanuiaga e ala i le faaee atu o lima ma le pule o le Perisitua Mekisateko.

O le faauuina o e mama'i e lua ona vaega: faauuina i le suauu ma le faamauina o le faauuga.

20.6.2

Faauuina i le Suauu

O le faauuga e faia e se tagata e toatasi o loo umia le Perisitua Mekisateko. Na te:

1. Faatulutulu sina mataua o le suauu paia i luga o le ulu o le tagata.
2. Tuu faamama ona lima i luga o le ulu o le tagata ma ta'u le igoa atoa o le tagata.
3. Ta'u atu faapea o loo ia faia i le pule o le Perisitua Mekisateko.
4. Ta'u atu faapea o loo ia faauuina i le suauu ua uma ona faapaiaina mo le faauuina ma le faamanuiaina o e mama'i ma mafatia.
5. Faaiu i le suafa o Iesu Keriso.

20.6.3

Faamauina o le Faauuga

E masani lava, e toalua pe sili atu i latou e umia le Perisitua Mekisateko e tuu faamāmā o latou lima i luga o le ulu o le tagata. O le tagata o loo faamauina le faauuga e:

1. Ta'u le tagata i lona igoa atoa.
2. Ta'u atu faapea o loo ia faamauina le faauuga e ala i le pule o le Perisitua Mekisateko.
3. Ta'u atu upu o le faamanuiaga e pei ona taitaiina ai e le Agaga.
4. Faaiu i le suafa o Iesu Keriso.

20.7

Faeeina Atu o le Perisitua ma le Faauuina i se Tofi

O le peresitene o le siteki e vaavaaia le faaeeina atu o le Perisitua Mekisateko ma le faauuina i tofi o le toeaina ma le faitaulaga sili. Ae peitai, e masani ona muai fautuaina mai e le epikopo nei faauuga. O faatonuga mo le fautuaina atu, faatalanoaina, ma le tuuina atu o nei uso mo se palota lagolago o loo ootoo atu i le *Tusitaulima 1*, 16.7.1.

O le epikopo e vaavaaia le faaeeina o le Perisitua Arona ma faauuga i tofi o le tiakono, aoao, ma le ositaulaga. O uso agavaa e mafai ona faauuina i tausaga aupito mauualalo nei:

Tiakono: 12 tausaga

Aoao: 14 tausaga

Ositaulaga: 16 tausaga

O faatonuga mo le faatalanoaina o nei uso ma le tuuina atu o i latou mo se palota lagolago o loo ootoo atu i le *Tusitaulima 1*, 16.7.2.

20.7.1**Faatonuga mo le Faatinoina o se Faauga**

Afai e maea ia faatalanoaga ma faamaoniga e tatau ai:

1. O le perisitene o le siteki (po o se tasi i lalo o lana taitaiga) e mafai ona faauuina le tagata i le tofi o le toeaia, e mafai foi ona ia faatagaina se isi o loo umia le Perisitua Mekisateko e faia. E na o e umia le Perisitua Mekisateko e mafai ona tutu i le li'o.
2. O le perisitene o le siteki (po o se tasi i lalo o lana taitaiga) e mafai ona faauuina le tagata i le tofi o le faitaulaga sili, e mafai foi ona ia faatagaina se isi faitaulaga sili na te faia. E na o faitaulaga sili e mafai ona tutu i le li'o.
3. O le epikopo (po o se tasi i lalo o lana taitaiga) e mafai ona faauuina le tagata i le tofi o le tiakono, aoao, po o le ositaulaga. E na o ositaulaga ma i latou e umia le Perisitua Mekisateko e mafai ona fofogaina pe tutu foi i le lio.

Ina ia auai i le faatinoina o se faauuga, e tatau i se tagata ona (1) avea o se ositaulaga po o se e umia le Perisitua Mekisateko ma (2) ia i ai le pule lava lea pe maua atu nai lo lea o le a tuuina atu i le sauniga. Mo se faataitaiga, e le tatau i se toeaia ona tu i le li'o pe a faauuina se faitaulaga sili poo le vaetofaia-ina foi o se alii i se tofi e moomia ai ona avea ma se faitaulaga sili.

Ina ia faatino se faauuga o le perisitua, e tuu faamamā e se toatasi pe sili atu o i latou o loo umia le perisitua, o latou lima i luga o le ulu o le tagata. O le e umia le perisitua e faia le faauuga e:

1. Ta'u le tagata i lona igoa atoa.
2. Ta'u atu le pule o loo faatinoina ai le faauuga (Perisitua Arona po o le Mekisateko).
3. Faace atu le Perisitua Arona po o le Mekisateko, sei vagana ua uma ona faaceina atu

4. Faaau le tagata i se tofi o le Perisitua Arona po o le Perisitua Mekisateko ma faace atu aia tatau, mana, ma le pule o lena tofi. (O ki o le perisitua e le faaceina atu i le tuuina atu o le perisitua po o le faauuina i se tasi o nei tofi.)

5. Tuuina atu upu o le faamanuiaga e pei ona taitai-ina ai e le Agaga.

6. Faaiu i le suafa o Iesu Keriso.

O se faauuga o se avanoa lea e tuuina atu ai se faamanuiaga. O fautuaga ma faatonuga auiliili e masani ona tuuina atu pe a aoao atu i le tagata ona tiute ae le o le taimi o le faauuga.

E le tatau ona faalateleina atu se faauuga e avea o se sauniga aloaia. E le tau moomia ona fai ni tatalo, molimau, po o faatonuga pe a faauuina se tagata.

20.7.2**Faamaumauga ma le Tusi Faamaonia o le Faauga**

A maea se faauuga i le Perisitua Mekisateko, e faamautinoa e le failautusi o le siteki ua uma ona faatumu le Faamaumauga o le Faauga i le Perisitua Mekisateko, ma na te tufatufaina e tusa ai ma faatonuga o loo i le fomu. E saunia foi e le failautusi o le siteki po o le uarota se tusi faamaonia o le faauuga, lea e saina e le perisitene o le siteki. E tuuina atu e se taitai perisitua po o le failautusi le tusi faamaonia ua uma ona saina i le tagata.

A maea se faauuga i le Perisitua Arona, e faamautinoa e le failautusi o le uarota ua uma ona faatumu le Faamaumauga o le Faauga i le Perisitua Arona, ma faagasolo e ia pe tufatufa e tusa ai ma faatonuga o loo i le fomu. E saunia foi e le failautusi a le uarota se tusi faamaonia o le faauuga. E saina e le epikopo le tusi faamaonia, ona ia tuuina atu lea pe tuu atu foi e le failautusi i lea tagata.

O se igoa faaletulafono o le tagata, e pei ona faamaino mai i le tulafono po o agaifanua i le lotoifale,

e tatau ona tusia i le faamaumauga o le faauuga ma luga o le tusi faamaonia.

20.8

Faamanuiaga Faatamā ma isi Faamanuiaga o le Faamafanafanaga ma Fautuaga

O faamanuiaga faatamā ma isi faamanuiaga o le perisitua e tuuina atu e avea ma taiala ma faamafanafanaga e pei ona taialaina ai e le Agaga.

O se tama e umia le Perisitua Mekisateko e mafai ona tuuina atu ia faamanuiaga i lana fanau. O nei faamanuiaga e mafai ona faapitoa le aoga pe a o atu fanau i le aoga, o misiona, faaipoipo, ulufale atu e tautua i le militeli, po o le feagai ai ma ni luitau faapitoa. E mafai e se aiga ona tusifaamaumau se faamanuiaga faatama mo faamaumauga faaleaiga, peitai e le teuina i faamaumauga a le Ekalesia. E tatau i matua ona fautuaina a latou fanau e saili atu faamanuiaga faatama i taimi e moomia ai.

E mafai e i latou o loo umia le Perisitua Mekisateko ona tuuina atu foi ia faamanuiaga o le faamafanafanaga ma fautuaga i isi tagata o le aiga ma isi e talosagaina i latou.

Ina ia tuuina atu se faamanuiaga faatamā po o se isi faamanuiaga o le faamafanafanaga ma fautuaga, e toatasi pe sili atu i latou e umia le Perisitua Mekisateko e tuu faamama o latou lima i luga o le ulu o le tagata. O le perisitua o loo tuuina atu le faamanuiaga na te:

1. Ta'u le tagata i lona igoa atoa.
2. Ta'u atu o le faamanuiaga o loo faatinoina e ala i le pule o le Perisitua Mekisateko.
3. Tuuina atu upu o le faamanuiaga e pei ona taitaiina ai e le Agaga.
4. Faaiu i le suafa o Iesu Keriso.

20.9

Faapaiaina o Tuugamau

O le tagata e faapaiaina se tuugamau e tatau ona ia umia le Perisitua Mekisateko ma ua faatagaina e le taitai perisitua o loo taitaia le sauniga. Ina ia faapaiaina se tuugamau, na te:

1. Faalupe le Tama Faalelagi
2. Ta'u atu faapea o loo ia faia i le pule o le Perisitua Mekisateko.
3. Ia faapaia ma faamanuia le tuugamau e avea ma nofoaga e malolo i ai le tino o le ua maliu.
4. Tatalo ina ia faapaiaina ma puipuia le nofoaga seia oo i le Toetu (i vaega e talafeagai ai).
5. Ole atu i le Alii ina ia faamafanafana i le aiga ma faailoa atu mafauaoga e pei ona taitaia ai e le Agaga.
6. Faaiu i le suafa o Iesu Keriso.

Afai e mananao ai le aiga, e mafai ona faia se tatalo i autafa o le tuugamau nai lo le faia o se tatalo o le faapaia.

Afai e susunuina le tino maliu o se tagata o le Ekalesia, e mafai e le taitai pulefaamalumalu ona faaoga lana faautautaga i le fuafuaina pe faapaia le nofoaga e teu ai le lefulefu. Na te silasila i le manaoga o le aiga, o tu ma agaifanua, ma tulafono i le lotoifale. Afai e faapaia le nofoaga, e mafai e le o umia le perisitua ona fetuunai ia faatonuga mo le faapaiaina o se tuugamau.

20.10

Vaetofiaina o Taitai ma Faaoga

Tagai i le 19.4.

20.11**Faapaiaina o Fale**

E mafai e tagata o le Ekalesia ona faapaiaina o latou fale e avea ma nofoaga paia e mafai ona afio ai le Agaga Paia ma mafai ai e tagata o le aiga ona tapuai, maua ai le saogalemu mai le lalolagi, e tutupu ae ai faaleagaga, ma saunia ai mo sootaga faaleaiga e faavavau. E le tau manaomia le faapea se'i leai se aitalafu o le fale ona faapaiaina lea. E le pei o fale o le Ekalesia, o fale o aiga e le faapaiaina mo le Alii.

E mafai e se tasi o umia le Perisitua Mekisateko ona faapaia se fale i le mana o le perisitua. Afai e leai se tasi o umia le Perisitua Mekisateko i le fale, e mafai e se aiga ona valaaulia se tagata e vavalalata le sootaga faaleaiga, se uso o le auaunaga, po o se tasi tagata e umia le Perisitua Mekisateko na te faapaiaina le fale. E mafai foi ona potopoto se aiga ma faia se tatalo e aofia ai ia elemene o loo ta'ua i le parakalafa na muamua, ma isi upu e taitaiina ai e le Agaga.

20.12**Faamanuiaga Faapeteriaka****20.12.1****Taiala Lautele**

O tagata agavaa uma o le Ekalesia ua papatisoina ua i ai le aia tatau ma e tatau ona mauaina se faamanuiaga faapeteriaka, lea e tuuina mai ai le taitaiga musuia mai le Alii. E fautuaina e taitai o le Ekalesia ma matua ia tagata e sauniuni faaleagaga ia maua o latou faamanuiaga faapeteriaka.

E faatalanoa e le epikopo po o se fesoasoani e tofia ia tagata e mananao e maua ni faamanuiaga faapeteriaka. Afai ua agavaa se tagata o le ekalesia, e tuuina atu i ai ma sainia e le fai faatalanoaga se Pepa Faataga mo Faamanuiaga Faapeteriaka.

O peresitene o siteki ma epikopo e manaomia nisi faamatalaga e uiga i faamanuiaga faapeteriaka, e mafai ona tagai i punaoa nei:

Tusitaulima 1, 16.12

Faamatalaga ma Fautuaga mo Peteriaka

Fonotaga Faaleaoga a Taitai i le Lalolagi Atoa: O Le Peteriaka

20.12.2**Mauaina o se Faamanuiaga Faapeteriaka**

E tatau i tagata o le ekalesia ona o atu i le peteriaka ma se uiga tatalo ma laei o le Aso Sa. E mafai ona latou anapopogi, ae le o se tulaga e manaomia.

O faamanuiaga faapeteriaka taitasi e paia, e le faalauaiteleina, ma e mo le tagata lava ia. O le mea lea, e tuuina atu ai i se auala e le faalauaiteleina sei vagana ai ua na o ni nai tagata o le aiga e mafai ona auai.

E le tatau i tagata o le Ekalesia ona faatusatusaina ia faamanuiaga ma e le tatau ona latou faasoaina atu sei vagana ai o tagata totino o le aiga. E le tatau ona faitauina atu ia faamanuiaga faapeteriaka i sauniga a le Ekalesia poo nisi faatasiga faitele.

Afai e le o aofia ai i se faamanuiaga faapeteriaka se faailoaina mai o le tupuaga, e mafai e le peteriaka ona tuuina atu se faamatalaga faaopoopo i se taimi mulimuli e faailoa ai le tupuaga.

20.12.3**Mauaina o Kopi o Faamanuiaga Faapeteriaka**

E tatau i se tagata o le na mauaina se faamanuiaga faapeteriaka ona puipuia ma le faaeteete le kopi na ia mauaina. Ae peitai, afai e leiloa pe faaleagaina, e mafai ona toe maua mai se kopi mai le peteriaka

pe afai o loo ia te ia pea le uluai kopi i lana faila o faamaumauga. Afai ua auina atu le uluai kopi i le laumua o le Ekalesia, e mafai ona maua mai se kopi mai le:

Patriarchal Blessings
15 East North Temple Street
Salt Lake City, UT 84150-1600
Telefoni: 1-801-240-3581

O se tagata e talosagaina se kopi o lona faamanuiaga faapeteriaka, e tatau ona aumai lona igoa atoa, mumera o le pepa faamaumau (pe a o i ai), ma le aso fanau. Afai e mafai, e tatau i le tagata ona aofia mai ai le igoa o le peteriaka ma le aso atonu na faia ai le faamanuiaga.

21.

Aiaiga ma Taiala Filifilia a le Ekalesia

O le tele o aiaiga nei e filifilia mai i mataupu o “Aiaiga a le Ekalesia” ma “Fale ma Fanua” o le *Tusi-taulima 1*. O fesili e uiga i nei aiaiga ma isi aiaiga a le Ekalesia e tatau ona faasino atu i le epikopo.

O le mataupu leni e aofia ai vaega e fa. E tofua vaega taitasi ma soāautu i le faasologa faaalafapeta:

1. Aiaiga faavae e faatatau i le taitaiga
2. Aiaiga mo le faaaogaina o fale ma isi meatotino o le Ekalesia
3. Aiaiga faafomai ma le soifua maloloina
4. Aiaiga faavae e faatatau i faafitauli o amioga mama

21.1

Aiaiga Faavae e Faatatau i le Taitaiga

21.1.1

Puipuia o Faalavelave ma le Tali Atu I Ai

Tagai i le 13.6.20.

21.1.2

Aiaiga Faavae mo Gaoioiga

Tagai i le 13.6.

21.1.3

Fanau Vaetamaina ma o Latou Matua Moni

O fesili e faatatau i le fesuiaiga o faamatalaga ma fesootaiga i le va o fanau vaetamaina ma o latou matua moni, e tatau ona taulimaina ma le faautauta. E tatau ona magafagafa i aia tatau faaletulafono ma manaoga faalelagona o vaega uma e aofia ai.

21.1.4

Vaetamaina ma le Tausiga Mo se Taimi Le Tumau

O tagata o e o loo saili e vaetamaina ia ni fanau pe tuuina atu le tausiga mo se taimi le tumau, e tatau ona matuai usitaia ia tulaga manaomia faaletulafono a atunuu (ma a latou matagaluega faalemalo) o loo aofia ai. E uunaia i latou ina ia galulue e auala atu i ni sui ua faatagaina, ma laisencina.

21.1.5

O Mea Tau Otiovisio

E mafai e tagata o le ekalesia ona faaoga mea tau otiovisio, e pei o CD, DVD, ma aoaoga faakomepiuta, i faatulagaga faale-Lotu ma tulaga faatapu-laa nei:

1. E le mafai ona faaaogaina i sauniga faamanatuga po o sauniga aoao o konafesi faalesiteki (peitai, e mafai ona faaoga se musika ua pueina pe afai e leai se piano, okeni, pe leai foi se ta laau).
2. E le mafai ona faaaogaina pe afai o loo faasaina mai e le puletaofia (tagai i le 21.1.12).
3. E le mafai ona faaaogaina pe afai o loo aofia ai ni mea e le fetui ma tulaga o le Ekalesia.

O mea tau otiovisio e ausia uma nei tulaga, e mafai ona faaoga i le falesa i le taimi o sauniga e ese mai le sauniga faamanatuga po o le sauniga aoao o le konafesi faalesiteki, pe afai o se vaega taua o le sauniga.

21.1.6

Saini ma Atapu'e o Pulega Aoao ma Fitugafulu Eria

E le tatau i tagata o le Ekalesia ona latou sailia saini a le Au Pulega Aoao po o Fitugafulu Eria, e aofia ai

le saina i totonu o a latou tusitusiga paia, tusipese, po o polokalama. O le faia faapea e aveeseina ai le tulaga paia o o latou valaauga ma le agaga o sauniga. O le faia o lena mea, e mafai foi ona taofia ai lo latou feiloai atu i isi tagata o le au paia.

E le tatau i tagata ona pueina ata o le Au Pulega Aoa po o Fitugafulu Eria i totonu o falesa.

21.1.7

Tusi Paia

O tagata o le ekalesia e tautatala i le gagana Peretania, e tatau ona latou faaogaina le lomiga a le Au Paia o Aso e Gata Ai o le King James Version o le Tusi Paia. O lena lomiga o loo aafia ai Taiala o Autu; vaefaamatalaga; o fuaitau mai le Faaliliuga a Iosefa Samita; o mau e femolimauai ai i le Tusi Paia ma le Tusi a Mamona, Mataupu Faavae ma Feagaiga, ma le Penina Tau Tele; ma isi fesoasoaniga mo suesuega. E ui atonu e faigofie atu ona faitau isi lomiga o le Tusi Paia, a o mataupu tau i aoaoga faavae, ua lagolagoina ai i faaaliga o aso e gata ai le Lomiga a King James nai lo isi faaliliuga i le gagana Peretania.

O tagata o le ekalesia e tautatala i le gagana Sipaniolo e tatau ona latou faaogaina le lomiga a le Au Paia o Aso e Gata Ai o le Tusi Paia Reina-Valera. O lena lomiga o loo i ai fesoasoaniga mo suesuega e taitutusa ma fesoasoaniga mo suesuega i le lomiga a le Au Paia o Aso e Gata Ai i le gagana Peretania.

I le tele o isi gagana e ese mai le gagana Peretania, ua faamaonia ai e le Ekalesia se lomiga e lē a le—Au Paia o Aso e Gata Ai o le Tusi Paia mo le faaogaina i sauniga ma vasega a le Ekalesia. E tatau i tagata o le ekalesia ona faaogaina nei lomiga o le Tusi Paia.

O le auala sili ona faatuatua e fuafua i ai le sa’o o soo se fuaitau faatusi paia e le o le faatusatusa lea i le escese o faaupuga, ae faatusatusa i le Tusi a Mamona ma faaaliga o ona po nei.

O loo maua kopi ua lolomi o lomiga ua faamaonia o le Tusi Paia i Faletusi o le Ekalesia. O loo maua foi

anotusi faaeletonika ma lipine faalogologo o lomiga a le Au Paia o Aso e Gata Ai i le scriptures.lds.org.

21.1.8

Tusi a Mamona

Ua le fautuaina e le Ekalesia le toe tusia o le Tusi a Mamona i se gagana faaPeretania faigofie o ona po nei. Na saunoa le Au Peresitene Sili:

“Afai e faaliliuina se anotusi paia i se isi gagana po o le toe tusia i se isi gagana faigofie atu, e i ai tulaga matautia e ono tulai mai ai, ona o lena faiga e mafai ona faaulufale mai ai ni aoaoga faavae sese po o le punitia ai foi o le faamaoniga o lona faapogai anamua. Ina ia puipuia mai nei tulaga matautia, o lea ua matuai tuu atu ai lava le vaavaaiga toto’a a le Au Peresitene Sili ma le Aufono a le Toasefululua i le faaliliuga o tusitusiga paia mai le faaPeretania i isi gagana ma e le faatagaina ia taumafaiga ina ia faamatalaina aoaoga faavae o le Tusi a Mamona i se gagana faigofie po o le faaPeretania o ona po nei. (O nei atugaluga e le o faatatau i lomiga a le Ekalesia mo tamaiti.)” (*Ensign*, Ape. 1993, 74).

21.1.9

Mekasini a le Ekalesia

O loo fautuaina pea lava pea e le Au Peresitene Sili ia tagata o le Ekalesia e faitau mekasini a le Ekalesia. E tatau i taitai o le Ekalesia i le lotoifale ona fautuaina tagata ina ia i ai mekasini a le Ekalesia i o latou maota ma laoa. O nei mekasini o loo i ai le taitaiga a le Alii e tuuina atu e ala i perofeta o aso e gata ai. O mekasini a le Ekalesia e faamalolosia ai le faatuatua i le Faaola ma tuuina atu ai le taitaiga musuia mo luitau faaletagata lava ia.

E mafai e le peresitene o le siteki ma le epikopo ona tofia a latou failautusi faapitoa e faamaopoopoina taumafaiga mo le lesitala i mekasini a le Ekalesia (tagai *Tusitaulima 1*, 13.3.4 ma le 13.4.4). E mafai foi e au epikopo ona tofia se sui mo mekasini a le uarota ma tofia isi e fesoasoani i ai. Afai e tofia se sui mo

mekasini a le uarota, e fesoasoani o ia e fuafua ma faatautaia ni faalauiloaga mo mekasini a le Ekalesia, fesoasoani i tagata ia amata pe faafou la latou saofaga, ma aoao atu i tagata ia faamanuiaga o le lesitala mo mekasini a le Ekalesia.

E mafai ona totogi ia saofaga a tagata o le au paia mo mekasini a le Ekalesia e ala i Faletusi o le Ekalesia. I nisi eria, e mafai e tagata ona lesitala e ala i le faatumuina lea o fomu mo le saofaga o loo i itulau uepi o mekasini a le Ekalesia.

21.1.10

Igoa o le Ekalesia ma Lana Tagavai

O le igoa o le Ekalesia ma le tagavai o faailoaga autu ia o le Ekalesia. Ua lesitalaina o faailoga aloaia ia pe ua puipuia faaletulafono i le lalolagi atoa. E na o taiala nei e tatau ona faaaogaina ai.

E mafai e iunite i le lotoifale ona faaaoga le igoa tusitusia o le Ekalesia (ae le o le tagavai) pe a ausia tulaga uma nei:

1. O le gaoioiga po o le faamoemoega e o faatasi ma le igoa e lagolagoina aloaia e le iunite (mo se faataitaiga, o se polokalama o le sauniga faamanatuga).
2. O le igoa o le iunite a le Ekalesia i le lotoifale o loo faaaoga e muamua i luma o le igoa o le Ekalesia (mo se faataitaiga, Uarota a Canyon View O Le Ekalesia a Iesu Keriso o le Au Paia o Aso e Gata Ai).
3. O le ituaiga lolomi o loo faaaogaina, e le o tau-mafai e faafofoga i le lomiga faapitoa o le igoa o le Ekalesia.

O le tagavai aloaia a le Ekalesia (tagai i le faavaa i luma o lenei tusitaulima) e na o mea lava ua faamaonia e le Correlation Department [Matagaluega Faamaopopo] i le laumua o le Ekalesia e faaaoga ai. O ni faataitaiga o nei aitema o:

1. Lomiga aloaia ma api/tusi/pepa a le Ekalesia.

2. Pine o igoa o faifeautalai faamisiona.

3. Faailoga i fafo o falelotu.

E le mafai ona faaaogaina le tagavai e avea o se elemente teuteu po o se ata vaaia (screen saver) i luga o le lau o le komepiuta. E le mafai foi ona faaaogaina le tagavai i soo se mea e patino i le tagata lava ia, faapisinisi, po o ni ala faalauiloa, e pei o luga o tusi o talafaasolopito o le aiga, mitiafu, faamau, po o fu'a. E mafai ona tuuina atu fesili i le:

Intellectual Property Office

50 East North Temple Street, Room 1888

Salt Lake City, UT 84150-0018

Telefoni: 1-801-240-3959 po o le 1-800-453-3860, laina tuusao 2-3959

Fesi: 1-801-240-1187

Imeli: cor-intellectualproperty@ldschurch.org

21.1.11

Komepiuta

E pei ona faatagaina ai e aufono pulefaamalumalu a le Ekalesia, o nisi iunite o le Ekalesia ua tuuina atu i ai komepiuta mo faamoemoega e pei o le tausiga o faamaumauga ma talafaasolopito o aiga. O le peresitene o le siteki e vaaia le tuuina atu ma le faaaogaina o komepiuta i le siteki. O loo maua taiala mo le mauaina mai ma le puleaina o komepiuta a le Ekalesia mai le laumua o le Ekalesia po o le ofisa o le pulega ua tofia. O nei taiala o loo tuuina atu ai faamatalaga e uiga i mataupu e pei o masini ma polokalama komepiuta, komepiuta e foai atu, sootaga i Initoneti, lipea, lafoaiina o komepiuta, komepiuta e gaoia pe faaleagaina, malupuipuia, ma le faaaogaina e tagata o le au paia.

I nofoaga e tatau ai, e fuafua e peresitene o siteki e faaavanoa atu komepiuta a le siteki ma uarota mo tagata e faaaogaina ia polokalama komepiuta mo talafaasolopito o le aiga. O komepiuta a le uarota ma le siteki e le faatagaina mo le faaaogaina mo isi mea e patino i le tagata lava ia.

Ina ia puipuia faamatalaga e le faalauaitelina i luga o komepiuta, e tatau i taitai ma failautusi ona faaoga le faiga o le uputatala o polokalama mo le teuina o faamaumauga a le Ekalesia. O faamatalaga faaopopo e uiga i le puipuia o faamatalaga e le faalauaitelina o loo maua atu i le *Tusitaulima 1*, 13.8 ma le 13.9.

E tatau ona tuu komepiuta i se mea e mafai ai e uso o le au epikopo ma failautusi ona faagasolo le faiga o foai a tagata i vaiaso taitasi e aunoa ma le iloa e nisi.

Mo le faasa ona kopiina o polokalama faakomepiuta, tagai i le 21.1.12.

21.1.12

O Mea ua Puletaofia

O tulafono e pulea ai galuega fatufatu ma le faaoga e faatagaina, e eseese lava mai lea atunuu i le isi. O aiaiga faavae a le Ekalesia o loo ootoo atu i lenei vaega e ogatusa lelei ma tuutuuga faavaomalo o loo faaoga i le tele o atunuu. Mo le faafaigofieina, o le vaega leni o loo faasino i aia tatau a se tagata na fatuina, o se “puletaofia.” Peitai, o nisi o nei aia tatau e mafai ona iloa i nisi igoa eseese i nisi o atunuu.

O le puletaofia o le puipuiga lea ua tuuina atu e le tulafono ia i latou e ana uluai galuega lea o loo faaaliga i se faiga e tino mai, e aofia ai:

1. Galuega tusitusi, musika, tala faatino, ma siva.
2. Galuega o ata tusi, ata pu'e, ma le vane faatagata.
3. Galuega o leo ma otiovisio (e pei o tifaga ma vitio, CD, ma DVD).
4. Polokalama po o taaloga komepiuta.
5. Initoneti ma isi utu faamatalaga faaeletonika.

E tatau i tagata o le Ekalesia ona matua usitaia tulafono uma o puletaofia. E masani lava, e na o i latou e i ai le puletaofia e mafai ona faatagaina le toe faia o ni kopi, tufatufaina, faatinoina faalauaitelina, faaaliga faalauaitelina, po o ni galuega e pogai mai i a latou galuega. O le faaogaina o se galuega i soo

se tasi o nei auuala e aunoa ma le faatagaina mai lē e ona le puletaofia, e le ogatasi ma le aiaiga faavae a le Ekalesia ma e mafai foi ona oo ai le Ekalesia po o le tagata e faaogaina i se sala faaetulafono.

O se tagata e faaogaina se galuega e tatau ona mautinoa o loo puipuia e le puletaofia. O galuega e faasalalauina e masani ona aofia ai se faaaliga o le puletaofia e pei o le “© 1959 e John Doe.” (Mo leo e pueina, o le faailoga o le ®.) Peitai, e le manaomia se faaaliga o le puletaofia mo le puipuiga faaetulafono. E faapena foi, o le tulaga faapea o se lomiga ua le toe lolomiina e le aveesea ai lava lona puletaofia pe faamaonia ai foi le faia o ni kopi, tufatufaina, faatinoina, faaaliga, pe avee foi ma pogai o ni galuega e aunoa ma se faatagaga.

O le Intellectual Property Office IPO (Ofisa o le Puletaofia ma Fatufatuga) a le Ekalesia e fesoasoani i le faagaioioia o talosaga ina ia faaoga faamatalaga ua i ai le puletaofia, i mea po o polokalama a le Ekalesia, e aofia ai tusi ma mea ua puletaofia e le Intellectual Reserve, Inc. (IRI). O le IRI o se faalapotopotoga e ese mai ai, e le mauaina se tupe faasilina, lea e umiaina fatufatuga totino tau i le atamai o loo faaogaina e le Ekalesia. O faamatalaga faaopopo mo le talosagaina o le faaogaina o anomea e umia e le Ekalesia, e mafai ona maua e ala i le mulimuli i le sootaga o le “Aiaiga o le Faaogaina (Terms of Use)” i le LDS.org

E mafai ona fesoasoani fesili ma tali o loo mulimuli mai i tagata ina ia malamalama ma tausia tulafono o le puletaofia pe a faaoga tusi ma mea ua puletaofia i le lotu ma le fale. Afai e i ai ni fesili a tagata o le ekalesia e le o taliina i nei taiala, e mafai ona latou faafesootaia le:

Intellectual Property Office
 50 East North Temple Street, Room 1888
 Salt Lake City, UT 84150-0018
 Telefoni: 1-801-240-3959 po o le 1-800-453-3860,
 laina tuusao 2-3959
 Fesi: 1-801-240-1187
 Imeli: cor-intellectualproperty@ldschurch.org

Pe mafai ona ou kopiina ata mai mekasini a le Ekalesia? O ata o loo i totonu o lomiga a le Ekalesia e masani ona mafai ona faia ni kopi mo le faaaogaina i le Lotu, fale, ma le aiga. Ae peitai, e le mafai ona kopiina mo ni faamoemoega faapisinisi e aunoa ma le faatagaga tusitusia mai le IPO. Afai o se ata o loo faasa ona kopiina, o le a faaalua mai upu e pei o le “e le mafai ona kopiina” i faamatalaga mo le ata.

Pe mafai ona ou kopiina ia anomea lolomi a le Ekalesia? O lomiga a le Ekalesia e masani ona mafai ona faia ni kopi mo le faaaogaina i le Lotu, fale, ma le aiga. E le mafai ona faaaogaina mea e gaosia e le Ekalesia mo ni faamoemoega faapisinisi e aunoa ma le faatagaga tusitusia patino mai le IPO.

Pe mafai ona ou kopiina ia musika? E i ai tulafono faapitoa o le puletaofia e faatatau i musika. E mafai e se tagata ona kopi mai se musika mai *Viiga*, o le *Tusipese a Tamaiti*, ma mekasini a le Ekalesia mo mea e le o ni mea faapisinisi a le Ekalesia, aiga, ma le faaaogaina i le fale sei vagana ai ua i ai se faasa o tusia i luga o se viiga po o se pese. O le kopiina o musika ua lolomi pe pueina e aunoa ma le faatagaga mai lē ona le puletaofia, e le ogatasi ma le aiaiga faavae a le Ekalesia. O musika ua kopiina e le ogatasi ma lenei aiaiga faavae, e le tatau ona faaaogaina mo faamoemoega o le Ekalesia.

Pe mafai ona ou fesuiia, kopiina, pe tuuvaegaina ia anomea faa-otiovisio e gaosia e le Ekalesia? E le mafai sei vagana o lena faaaogaaga ua faatagaina patino e le IPO. O otiovisio e gaosia e le Ekalesia e tatau ona faaaogaina e tusa ai ma faatonuga o loo faamatala atu i totonu o tusi ma luga o pusa o loo afifi atu ai.

Pe mafai ona ou kopiina anomea e le o ni mea a le Ekalesia? E masani lava e le mafai. O tulafono o le puletaofia e pulea ai le faaaogaina o anomea ua umia tumaoti. E masani lava ona i ai tapu e tuu mai ai tuutuuga e tatau ona mulimulita’ia e tagata lautele a o lei kopiina ni anomea e le o ni mea a le Ekalesia. O nei faasa e masani ona lisiina i le amataga o se lomiga. E tatau i tagata o le ekalesia ona matua usitaia tulafono uma o le puletaofia.

Pe mafai ona ou faaaliina otiovisio faapisinisi i faatasiga a le Ekalesia? E masani lava e le mafai. E le tatau i tagata o le Ekalesia ona solia ia lapataiga ma faasa ua tuu i luga o oloa otiovisio faapisinisi. O le faaaogaina o oloa otiovisio i faamoemoega o le Ekalesia e masani lava ona manaomia ai le faatagaga mai i ē ona le puletaofia.

Pe mafai ona ou sii maia pe fai ni ata o ni polokalama faakomepiuta po o nisi polokalama mo le faaaogaina i le Ekalesia? E masani lava e le mafai. O polokalama faakomepiuta ma isi polokalama e le mafai ona kopiina pe auina mai sei vagana ua faatauina uma ia laisene e talafeagai i ai. E avea ma se tuusaunoaga, o polokalama o talafaasolopito o aiga a le Ekalesia e mafai ona sii mai e leai se totogi.

Pe mafai ona ou sii maia pe tufatufaina anomea ou te maua i luga o uepisaite a le Ekalesia? E tele uepisaite ua fatuina e le Ekalesia, e pei o le LDS.org; Mormon.org, ma le FamilySearch.org. Sei vagana ua ta’u atu, a o mea uma e i luga o uepisaite a le Ekalesia, e aofia ai ata, tusiga, aikona, faaaliga, utufaamatalaga, ma faamatalaga lautele, e mafai ona matamata i ai, sii mai, ma lolomi mo na o le faaaogaina i mea e le faapisinisi a le Ekalesia, fale, ma le aiga. O anomea mai nei saite e le mafai ona tuuina i luga, faaliliuina, pe tufatufaina i isi uepisaite po o ni uepa o fesootaiga faakomepiuta e aunoa ma le faatagaga mai le IPO.

O saite o loo umia e le Ekalesia ma soo se faamatalaga i luga o nei saite, e aofia ai igoa ma tuatusi o i latou na auina atu ia faamatalaga, e le mafai ona faaaogaina mo le faatauina atu po o le faalauiloina o ni oloa po o ni tautua, sailia ai ni tagata e galulue i ai, po o soo se faamoemoega lava faapisinisi.

Mo nisi faamatalaga faaopoopo, tagai i aiaiga o le faaaogaina e fesootai ma ia uepisaite.

O le a le faatagaga e moomia e tuuina atu ai se faatinoga faamusika po o se tala faatino? O faatinoga e umia e le Ekalesia po o le IRI e mafai ona faatinoina i faatagaga faale-Ekalesia e aunoa ma se faatagaga mai le laumua o le Ekalesia. Afai o se faatinoga o loo puletaofia ae le o se mea a le Ekalesia, e ao i tagata ona

maua mai se faatagaga mai le e ana e faatino uma ai pe na o se vaega i se faatulagaga faale-Ekalesia. E masani lava o le e umia le puletaofia e moomia se totogi po o se tupe tusa lava pe le'i tapā se totogi mo le faatinoga. O faatinoga uma lava e tatau ona i ai le faamaoniga a taitai perisitua i le lotoifale.

21.1.13

O Mea mo Mataupu e Aoaina

E saunia e le Ekalesia ia tusitusiga paia, mekasini, tusi lesona, tusi, ma isi mea e fesoasoani ai i tagata e aoao ma ola ai i le talalelei a Iesu Keriso.

E fautuaina e taitai perisitua ma ausilali tagata o le ekalesia ia maua a latou kopi o tusitusiga paia ma isi mea mo mataupu aoaina e faaoga i o latou aiga ma le lotu.

E faamautinoa e taitai o loo faaogaina e faiaoga mea ua faamaonia a le Ekalesia mo aoaoga o korama ma vasega. O le lomiga o *Faatonuga mo Mataupu Aoaina* o loo maua ai faamatalaga e uiga i le auāla e faatulaga ai vasega o le Aso Sa ma po o a foi mea e faaoga mo lesona.

21.1.14

Pisinisi o Tafaoga ma Faamasaniga mo Tagata Nofofua o le Ekalesia

O pisinisi o tafaoga ma faamasaniga e masani ona faalauiloaina atu a latou tautua i tagata nofofua o le Ekalesia. E le mafai ona faaogaina falelotu o le Ekalesia, vasega, po o polokalama e faalauiloa atu ai ni pisinisi tumaoti, e aofia ai pisinisi po o tautua mo tafaoga ma faamasaniga. E le tatau ona tuuina atu ni lisi o vaega o le Ekalesia po o isi faamatalaga e uiga i tagata o le au paia i pisinisi faapena.

21.1.15

Tusitaiala

E mafai ona lolomiina tusitaiala a siteki ma uarota e tusa ai ma faatonuga nei:

E mafai ona aofia ai igoa, tuatusi, ma numera o telefoni i totonu o se tusitaiala pe afai o loo lisiina i se tusi telefoni, pe, a le o lisiina foi, ia maua mai le faatagaga a le tagata. E faatoa mafai ona aofia ai tuatusi o le i-meli pe a i ai le faatagaga a le tagata.

E faaoga tupe o le paketi a le siteki po o le uarota e totogi ai tusitaiala. O tusitaiala e le mafai ona aofia ai ni faasalalauga faapisinisi.

E le tatau i taitai ona tufatufa atu ia tusitaiala i fafo atu o tuaoi o le siteki po o le uarota pe faatagaina foi lo latou faaogaina mo faamoemoega faapisinisi po o mea faapolokiki.

O le amataga o tusitaiala taitasi e tatau ona aofia ai se faamatalaga faapea e na o faamoemoega o le Ekalesia e faaoga ai, ma e le tatau ona kopiina e aunoa ma le faatagaga a le epikopo po o le peresitene o le siteki.

21.1.16

Faimalaga Ese Atu o Tagata o le Ekalesia

O le tulaga masani lava, e faamalosiaina tagata o le Ekalesia ina ia nonofo pea i o latou atunuu ma atiina ae ma faamalosi ai le Ekalesia. O avanoa mo le malosi o le Ekalesia, ma mo le mauaina ma le fefaasoa'iina o faamanuiaga o le talalelei, ua matua faateleina lava i le lalolagi atoa. A o nonofo ai pea tagata o le ekalesia i vaega eseese o le lalolagi i o latou lava atunuu ma galulue e atiina ae le Ekalesia iina, o le a oo mai faamanuiaga silisili ia i latou tai-toatasi ma le Ekalesia. O le a faamalolosi siteki ma uarota i le lalolagi atoa, ma mafai ai ona fefaasoa'i ma se vaega toatele atu o fanau a le Tama Faalelagi ia faamanuiaga o le talalelei.

Ua faaalua i aafiaga o i latou o e faimalaga ese mai o latou atunuu e masani ona fetaii ma luitau o le gagana, aganuu, ma le tamaoiga, ma oo atu ai i le faanoanoa ma faigata faaletagata ma faaleaiga.

E le tatau i faifeau faamisiona ona talosaga atu i o latou matua, aiga, po o isi ina ia lagolagoina ni

tagata o le ekalesia o loo mananao e faimalaga ese atu i isi atunuu.

O tagata e faimalaga ese atu i soo se atunuu e ao ona usitaia tulafono e tatau ai.

Afai e malaga mai i le Iunaite Setete po o isi atunuu i ni visa a’oga po o ni visa tafao, e le tatau i tagata ona faamoemoe e sailia ni galuega pe mauaina ni visa nofomau pe a uma ona ulufale atu i lena atunuu.

Ina ia fuafuaina e faigaluega mo le Ekalesia i soo se atunuu, e tatau i se tagata ona ausia tulaga uma o femalagaaiga ma tulafono o le nofomau. E le lagolagoina e le Ekalesia femalagaaiga e ui atu i galuega a le Ekalesia.

21.1.17

Aso Anapogi

O le tausiga sa’o o se aso anapogi e aofia ai le le tagofia o meaa ma vaiinu mo ‘aiga sosoo e lua i se umi e 24-itula, ia auai i le sauniga anapogi ma molimau, ma tuuina atu se foi matamau i le tau-laga anapogi e fesoasoani ai e tausia i latou o e le tagolima.

21.1.18

Sailiga Tupe

Tagai i le 13.6.8.

21.1.19

Taaloga Faitupe ma Lulu

E tetee le Ekalesia i soo se ituaiga taaloga tupe, e aofia ai lulu e lagolagoina e le malo.

21.1.20

Failauga po o Faiaoga Valaaulia

Mo le tele lava o sauniga a le Ekalesia, o failauga ma faiaoga e tatau lava o ni tagata o le uarota po o le siteki lava ia.

E moomia le faamaoniga a le epikopo ao lei mafai e ni failauga po o ni faiaoga valaaulia ona auai atu i soo se sauniga a le uarota, e aofia ai ma sauniga po o fonotaga a ausilali. E moomia le faamaoniga a le peresitene o le siteki mo tagata faapea e auai atu i fonotaga po o sauniga a le siteki.

E matua vailiili lelei e le epikopo po o le peresitene o le siteki ia failauga aami po o faiaoga ma mataupu o a latou aoaoga po o faatinoga. E mafai ona aofia ai le faafesootai o le epikopo a le tagata. E faamautinoa e le epikopo po o le peresitene o le siteki o:

1. Mataupu e tuuina atu e ogatasi ma aoaoga faavae a le Ekalesia.
2. Failauga po o faiaoga faapitoa e le totogiina, e le o aumaia ni tagata e auai, ma aua ne’i tauanauina ni tagata auai.
3. O tupe faaalu mo femalagaaiga a failauga po o faiaoga faapitoa e le o totogiina i ni tupe o le alauni paketi po o foi a tagata taitoatasi.
4. E ogatusa aoaoga po o faatinoga ma taiala mo le faaogaina o fale ma meatotino a le Ekalesia (tagai i le 21.2).

21.1.21

Lafoga o Tupe Maua

Ua poloaaina tagata o le Ekalesia i le mataupu faavae o le faatuatua lona sefululua, ina ia usitaia tulafono o lafoga a le atunuu o loo latou nonofo ai (tagai foi i le MFF 134:5). O tagata e le malilie i tulafono o lafoga, e mafai ona latou taumafai ina ia suia e ala lea i le tulafono po o le suia o faiga faavae. O tagata ua mautu lelei ni o latou manatu faale-tulafono e teena ai, e mafai ona latou fesiligia i le faamasinoga ia tulafono o lafoga.

O tagata o le ekalesia e mumusu e faila a latou lafoga, totogi lafoga o tupe maua e moomia, pe mumusu foi e usitaia se faaiuga mai le faamasinoga o se mataupu tau lafoga, e matuai feteenai lava ma le tulafono ma aoaoga a le Ekalesia. O tagata

faapena, e mafai ona le agavaa mo se pepa faataga o le malumalu ma e le tatau ona valaauina i ni tofiga e i ai ni tiutetauave autu i le Ekalesia. O tagata e molia i le solia o tulafono o lafoga, e tatau ona faia se aoaiga faale-Ekalesia e tusa ma le tulaga o le mea ua ia faia.

21.1.22

Initoneti

A faaaogaina ma le faaeteete, e mafai ona fesoasoani le Initoneti e faamaopoopo le galuega a le Ekalesia, faamalosia le faatuatua, ma auauna atu i manaoga o isi. E mafai foi ona fesoasoani le Initoneti i tagata e fesootai ai le tasi ma le isi ma fefaasoai ai anotusi ma uo ma aiga. Peitai, e tatau i tagata ona faamautinoia e le suia e fesootaiga faaeletonika ia avanoa mo fesootaiga faafesagai, i mea e mafai ai.

Punaoa Aloaia o Initoneti a le Ekalesia

Ua tuuina mai e le Ekalesia se aofaiga o uepisaite aloaia, lautusi faaletagata i le initoneti, ma atatosi o fesootaiga faaagafesootai mo le faaaogaina lautele. O nei saite ma punaoa ua faamalamalama manino mai ua aloaia e ala i le faaaogaina o le tagavai a le Ekalesia po o nisi auala talitutusa. O loo ogatasi foi ma tulaga manaomia faaletulafono ma aiaiga faavae a le Ekalesia o fatufatuga totino tau i le atamai.

O malumalu, misiona, ma nofoaga autu mo tagata asiasi mai e le faatagaina ona fatuina ni uepisaite.

Faaaogaina o le Initoneti e Tagata o le Au Paia i Valaauga Faale-Ekalesia

E le mafai e tagata o le au paia ona fatuina ni uepisaite, lautusi faaletagata i le initoneti, po o atatosi o fesootaiga faaagafesootai mo le Ekalesia pe fai ma sui aloaia o le Ekalesia ma ona manatu. Peitai, e mafai ona latou fatuina uepisaite, lautusi faaletagata i le initoneti po o atatosi o fesootaiga faaagafesootai e fesoasoani ai i o latou lava valaauga. A faia lena mea, e tatau i tagata o le au paia o faaafia ai

se faamatalaga e pei o le “E le o se uepisaite aloaia lena a le Ekalesia a Iesu Keriso o le Au Paia o Aso e Gata ai” ma ia ogatusa ma taiala nei:

1. E tatau ona faamaonia muamua e taitai perisitua i le lotoifale le fatuina o uepisaite, lautusi faaletagata, po o atatosi o fesootaiga faaagafesootai e fesootai i valaauga.
2. E le mafai ona faaaogaina le tagavai a le Ekalesia pe faata’ita’ia foi.
3. O le igoa ma le faamatalaga e faafesootai ai le tagata e nafa ma le uepisaite, lautusi faaletagata, po o le atatosi o fesootaiga faaagafesootai e tatau ona faasilasila faalauaite.
4. E le tatau i tagata o le au paia ona ta’ua pe faafoliga mai o anotusi, ata, po o isi anomea o a latou punaoa i le initoneti e lagolagoina pe o faamaonia e le Ekalesia pe fai ma sui aloaia o le Ekalesia i soo se itu.
5. E le tatau ona faasalalauina faalauaite galuega tau faatufugaga, musika, po o isi anomea e umia e le Ekalesia, sei vagana o lena faaogaaga ua manino le faatagaina mai e le itulau o le “Aiaiga o le Faaaogaina” a se uepisaite aloaia a le Ekalesia po o se Ofisa o le Puletaofia o Meatotino a le Ekalesia.
6. O atapu’e o isi tagata po o faamatalaga patino e uiga ia i latou e le tatau ona faaalua e aunoa ma lo latou maliega.
7. O meatotino o fesootaiga faaagafesootai e tatau ona tausisia faalelei ma taulimaina ma le mataalia ia mautinoa ai e vave ona aveese soo se anotusi e le talafeagai.
8. O le uepisaite, lautusi faaletagata, po o le atatosi o fesootaiga faaagafesootai e le tatau ona faaoga le igoa o se iunite o le Ekalesia. Mo se faaitaiga, “Talafoa o le Uarota Muamua” po o le “O Uo a le Uarota Muamua” e talia, ae o le “Uarota Muamua” e le talia.

Faamolemole tagai i le internet.lds.org mo nisi faa-taitaiga faaopoopo ma faamaninoga.

Mo se fesoasoani i le kalena, taiala, ma isi meafaigaluega i luga o le LDS.org, faamolemole asiasi ane i le tools.lds.org.

Faaogaina Faaletagata Lava ia o le Initoneti

E fautuaina tagata o le au paia e faaoga le Initoneti e faalilofia ai le lalolagi i molimau i le Faaola ma Lana talalelei toefuataiina. E tatau ona latou vaavaai i lautusi faaletagata, upega faaagafesootai, ma isi tekinolosi faa-Initoneti o ni meafaigaluega e faateleai o latou leo i le faalauiloina o savali o le filemu, faamoemoe, ma le olioli e maua mai i le faatuatua ia Keriso.

E fautuaina tagata o le au paia e faasoa atu savali mai uepisaite aloaia a le Ekalesia ma mau faaagafesootai, faapea foi a latou lava upu, ata, ma fesootaiga. A o faaali atu e tagata o le au paia o latou lava mafaufauga ma lagona, e le tatau ona latou avatua ni lagona faapea o loo fai i latou ma sui pe o lagolagoina foi e le Ekalesia.

A o faaoga e tagata o le au paia le Initoneti e faatelevave ai le galuega a le Alii, e tatau ona latou faaa'oa'o atu le amiosolia ma taulai i le faasoina atu o savali logolelei e faamalolosa ai i latou e latou te fesootai.

Sue le “Internet Usage Helps for Members” i luga o le LDS.org e maua ai isi taiala fesoasoani.

21.1.23

Tulafono o Laueleele

E tatau i tagata o le Ekalesia ona usiusitai, faamamalu, ma lagolagoina ia tulafono i soo se atunuu latou te nonofo ai pe asiasi atu i ai (tagai i le MFF 58:21–22; Mataupu Faavae o le Faatuatua 1:12). E aofia ai ma tulafono e faasa ai le talaiga.

21.1.24

Fesootaiga a Tagata ma le Laumua o le Ekalesia

E le fautuaina tagata o le Ekalesia ina ia telefoni pe tusi atu ni tusi i le Au Pulega Aoa e uiga i ni aoaoga faavae po o ni mataupu patino faaletagata. Ona o le matua toatele naua o le faitau aofai o tagata o le Ekalesia, o lea o le tali atu taitoatasi i nei talosaga o le a tulai mai ai se galuega e mamafatu ma o le a faigata ai i le Au Pulega Aoa ona faa-taunuaina tiute ia e na o i latou lava ua i ai lea matafaioi. E alolofa le Au Pulega Aoa i tagata o le Ekalesia ma latou te le mananao latou te lagonaina faapea ua latou le maua le lagolago ma le taitaiga o loo latou moomia. Ae peitai, o mea uma lava e ao ona faia ma le faautauta ma le faatulagaga lelei.

Ua faatulagaina e le Alii ia Lana Ekalesia ina ia tofu le tagata o le ekalesia ma se epikopo po o se peresitene o le paranesi ma se peresitene o le siteki, itu, po o le misiona, ua avea ma faufautua faaleagaga ma fesoasoani faaletino. Ona o o latou valaauga, ua i ai i nei taitai i le lotoifale le aia tatau i le agaga o le iloaitino ma musumusuga e mafai ai ona latou fautuaina tagata o le au paia o i totonu o la latou pulega.

O tagata e manaomia le taitaiga faaleagaga, e i ai faa-fitauli tuga faaletagata lava ia, po o ni fesili e uiga i aoaoga faavae, e tatau ona faia se taumafaiga maelega, e aofia ai tatalo faatauanau ma le suesue i tusitusiga paia, e saili ai vaifofo ma tali e i latou lava. E fautuaina tagata ina ia saili le taitaiga mai le Agaga Paia ina ia fesoasoani ia i latou i o latou olaga taitoatasi faapea o latou tiutetauave faaleaiga ma le Ekalesia.

Afai e manaomia pea e tagata le fesoasoani, e tatau ona latou talanoa muamua ma lo latou epikopo. Afai e tatau ai, na te auina atu i latou i le peresitene o le siteki.

I le tele lava o tulaga, o mataupu e aumai mai tagata i le Au Pulega Aoa, e toe faafoi atu lava i o latou taitai i le lotoifale. O peresitene o siteki o e

manaomia ni faamaninoga e uiga i aoaoga faavae po o isi mataupu faale-Ekalesia, e mafai ona tusi atu mo o latou tagata i le Au Peresitene Sili.

21.1.25

Galuega, Matata, ma Fegalegaleaiga a Tagata o le Ekalesia

O le papatisoga i totonu o le Ekalesia, faauuga i le perisitua, ma le tuuina atu o pepa faataga o le malu-malu e faalagolago i le agavaa patino o tagata tai-toatasi e pei ona mauaina i se faatalanoaga maeaea e faia e taitai perisitua i le lotoifale o lona tagata. E tatau i tagata o le Ekalesia ona taumafai ina ia aofia ai i gaoioiga ma galuega, ia e mafai ai ona latou talosagaina ma le faautauta ia faamanuiaga a le Alii, ma e ogatasi foi ma mataupu faavae o le talalelei ma aoaoga a le Faaola.

21.1.26

Tagata e I Ai Manaoga Faapitoa

E fautuaina tagata o le Ekalesia ina ia mulimuli i faaitaiga a le Faaola mo le ofoina atu o le faamoc-moe, malamalama, ma le alofa ia i latou e i ai manaoga faapitoa. E tatau i taitai perisitua ma ausilali ona iloa i latou e i ai manaoga faapitoa ma ia faaali atu i ai lo latou naunau moni ma le popole i ai.

E faailoa mai foi e taitai perisitua ma ausilali tagata o le au paia atonu e manaomia se tausiga faaopoopo ona e i ai manaoga faapitoa o se matua, tamaitiiti, po o se tei. O tausiga o se tagata o le aiga e i ai se manaoga faapitoa e mafai ona avea ma faiga sili atu e fausia ai le faatuatua. Ae e mafai foi ona faaopoopo i luitau i tulaga tautupe, faaipoipoga, ma aiga.

E sailia foi e taitai perisitua ma ausilali ia tagata o le au paia e i ai manaoga faapitoa, o e o nonofo i nofoaga autu e tausi faatasi ai i latou e i ai manaoga faapitoa, po o isi nofoaga e nonofo ese ai mai tagata o aiga.

Faateleina o le Silafia ma le Malamalama

E tatau i taitai, faiaoga, ma isi tagata o le au paia ona sailia ia malamalama i manaoga faapitoa o se tagata, ma soo se manaoga e ono tulai mai ai. E mafai ona faateleina lo latou malamalama i le talanoa atu i le tagata ma tagata o lona aiga. E mafai foi ona latou faitauina saunoaga a taitai o le Ekalesia, o tala i mekasini a le Ekalesia, ma punaoa e maua i le disabilities.lds.org.

Tuuina Atu o le Fesoasoani

E iloilo e taitai perisitua ma ausilali ia manaoga o i latou e i ai manaoga faapitoa ma i latou o e tausia. E fuafua e taitai nei pe mafai faapefea ona faaoga punaoa a le uarota po o le siteki e fesoasoani ai i le taulimaina o manaoga pe a talafeagai ai. E fautuaina e taitai ia tagata o le au paia e tuuina atu le fesoasoani ma aapa atu i le alofa ma le faauo. E mafai e le au epikopo po o le au peresitene o le siteki ona valaau se tagata tomai faapitoa o le uarota po o le siteki e fesoasoani i tagata taitasi e i ai manaoga faapitoa ma o latou aiga.

E mafai foi e taitai ona faailoa mai punaoa talafeagai a nuu e mafai ona fesoasoani i tagata taitasi e i ai manaoga faapitoa ma o latou aiga.

Mo nisi faamatalaga e uiga i le fesoasoani atu i tagata e i ai manaoga faapitoa, e mafai e taitai ma tagata o le au paia ona o i le disabilities.lds.org. E mafai foi e taitai ona faafesootai le Tautua a le AAG mo Aiga (i mea e maua ai).

E le tatau i taitai ma tagata o le ekalesia ona taumafai e faamatala pe aisea ua oo mai ai le luitau o manaoga faapitoa i se aiga. E le tatau lava ona latou faapea atu o se manaoga faapitoa o se faasalaga mai le Atua (tagai Ioane 9:2–3). E le tatau foi ona latou faapea atu o se faamanuiga le i ai o se tamaitiiti e i ai se manaoga faapitoa.

Tuuina Atu o Sauniga

A oo ina mafaufau pe faatino ni sauniga mo se tagata e i ai se manaoga faapitoa i le mafaufau, e mulimuli ia taitai perisitua i taiala o loo i le *Tusitaulima 1*, 16.1.8.

Saunia o Avanoa e Auauna Atu ai ma Auai i le Faatinoga

E toatele tagata o le au paia e i ai manaoga faapitoa e mafai ona auauna atu toetoe lava o soo se tofiga o le Ekalesia. O taitai perisitua ma ausilali e manatunatu ma le agaga tatato i tomai ma mea e mananao ai tagata taitoatasi ona tuuina atu lea i ai o avanoa talafeagai e galulue auauna ai. E fefautuaai foi taitai ma le aiga o le tagata ma manatunatu i aafiaga o se valaauga faale-Ekalesia i le tagata ma lona aiga po o le e tausua.

A oo ina mafaufauina ia tofiga faale-Ekalesia po o valaauga mo tagata o loo tausua ia tagata e i ai manaoga faapitoa, ia silasila toto'a ia taitai i tulaga o tagata taitoatasi ma o latou aiga.

E tatau i taitai ma faiaoga ona faaafia ai tagata e i ai manaoga faapitoa i sauniga, vasega, ma gaoioiga i le tulaga ato e mafai ai. E tatau ona fetuunai ia lesona, lauga, ma metotia faafaioga ina ia taulima ina manaoga o tagata taitasi. Mo faamatalaga e uiga i le fetuutuunai o lesona, tagai disabilities.lds.org.

E mafai e le au epikopo ona valaau se faiaoga lagoonago e fesoasoani i se tagata i se vasega. E mafai foi e le au epikopo ona talosagaina se tasi tagata e fesoasoani i se tagata i se sauniga po o se gaoioiga.

Afai e le mafai ona auai se tagata i se sauniga, vasega, po o se gaoioiga, e mafai e taitai ma faiaoga ona feutagai ma le aiga e uiga i se auala e taulima ai ona manaoga. E mafai e le peresitene o le siteki poo le epikopo ona faamaonia le faatulagaina o ni vasega faapitoa po o ni polokalama mo tagata o le au paia e i ai manaoga faapitoa (tagai "Faatulagaina o Vasega Faapitoa, Polokalama, po o Iunite" o loo i lalo). Afai e le mafai ona

auai se tagata i sauniga Lotu, e mafai ona tuuina atu i ai ni tusi po o lipine pu'e o lesona ma lauga.

E faamalosiaina e taitai perisitua ia alii e umia le perisitua ia auai i le faatinoina o sauniga pe a talafeagai ai. O i latou e umia le perisitua ma tamaitai ua ta'i 12 tausaga o e ua papatiso ma faamaonia ma e agavaa, e mafai ona papatiso ma faamaonia mo e ua maliliiu i le malumalu. O taiala e uiga i tagata e i ai manaoga faapitoa mo le mauaina o o latou lava sauniga o le malumalu o loo tuuina atu i le *Tusitaulima 1*, 3.3.3.

Faatulagaina o Vasega, Polokalama, po o Iunite Faapitoa

O tagata o le ekalesia e i ai manaoga faapitoa e fautuina e auai i sauniga i le Aso Sa i a latou uarota tumau, sei vagana ai o nonofo i se nofoaga e tausua ai i latou ma o loo faatulagaina ai ia polokalama a le Ekalesia.

A i ai tagata o le ekalesia e faapena foi o latou manaoga faapitoa e nonofo i se uarota, ni uarota, siteki, po o ni siteki, e mafai e taitai ona faatulaga se Mutuale po o vasega Peraimeri po o polokalama faapitoa mo i latou. E mafai foi e taitai ona faatulaga ni vasega faapitoa o le Aoga Sa po o isi vasega. O nei vasega po o polokalama e faaopoopo i se polokalama a le uarota tumau a le tagata.

Ina ia faatulaga se vasega faapitoa po o se polokalama i se tulaga o ni siteki tuufaatasi, e manaomia se faamaoniga mai le Au Peresitene o le Eria. E tofi e nei taitai se peresitene o le siteki e taiulu, na te vaia le uluai faatulagaga ma le faagaoioiga faifai pea o se vasega po o se polokalama mo se taimi e atofaina.

Ina ia faatulagaina se vasega faapitoa po o se polokalama i le tulaga o siteki tuufaatasi, e manaomia le faamaoniga a peresitene o siteki. E tofi e le peresitene o le siteki se epikopo taiulu e vaia le uluai faatulagaga ma le faagaoioiga faifai pea o se vasega po o se polokalama mo se taimi e atofaina.

E feutagai le peresitene o le siteki po o le epikopo taiulu ma isi peresitene o siteki po o epikopo o loo auai faatasi, ina ia faavaeina se aiaiga mo le

lagolagoina tautupe o nei vasega po o polokalama. O matua ma tagata o loo tausua e nafa ma le fela'uaiga.

Afai e faatulaga se vasega po o se polokalama i siteki tuufaatasi, e mafai e peresitene o siteki taitasi o loo auai ona tofi se fautua maua e fesoasoani i taumafaiga faamaopoopo e lesitala tagata e mana'ao e auai, saunia ni taitai ma faiaoga, ma faatautaia le aiaiga tau tupe e faavaeina e le peresitene o le siteki taiulu.

O tagata o le au paia e galulue i se vasega po o se polokalama faapitoa e valaau ma vaetofaina e, po o lalo o le taitaiga a le peresitene siteki po o le epikopo taiulu. E mulimuli nei taitai i faiga faavae masani a le Ekalesia mo le tuuina atu o valaauga ma faamalologa. O taitai ma faiaoga o se vasega po o le polokalama faapitoa latou te faasoaina atu faamatalaga e uiga i gaioiga a tagata ma mea ua ausia i taitai o uarota tumau, o loo teu ai pepa faamaumau tumau ma mafai ai foi ona faalauiloa aloaia i latou.

Pe a valaaulia ai e le peresitene o le siteki po o le epikopo taiulu, e mafai e taitai o se vasega po o se polokalama faapitoa ona auai i fonotaga faaleautaitai a le siteki po o le uarota. E mafai foi ona latou faatautaia a latou lava fonotaga e fuafua ai gaioiga a le vasega po o le polokalama.

E mafai e taitai ona faafesootai ia taitai o Seminare ma Inisitituti o Aoaoga Faalelotu e aoao ai e uiga i vasega mo tagata e i ai manaoga faapitoa, e mafai ona faavaeina i totonu o le Ofisa o Aoga a le Ekalesia.

E mafai ona fatuina uarota po o paranesi mo tagata o le au paia e tutuli pe logonoa. A le o lena, e mafai ona talosagaina se uarota e faatu ai se vaega mo i latou o e logonoa ma faaletonu le faalogo i se eria patino i le faataatiaga faafaafanua. O na uarota, paranesi, po o vaega e fesoasoani i nei tagata o le au paia ia auai atoatoa i le auauunaga ma le aoaoina o le talalelei. O faatonuga mo le faatulagaina o nei iunite o loo maua i le *Tusitaulima 1*, 9.1.4 ma le 9.1.10.

O tagata o le ekalesia e faaaogaina le gagana e fai i faailoga, ma o latou aiga, e mafai ona filifili e tuu o latou pepa faamaumau o le Ekalesia i se nofoaga se tasi: (1) o la latou uarota tumau, (2) se uarota ua atofa e faatu ai se vaega mo tagata e logonoa pe faaletonu le faalogo, po o (3) se uarota po o se paranesi ua faatulagaina mo tagata e logonoa pe faaletonu le faalogo.

Faamatalaupu mo Tagata o le Ekalesia e Logonoa pe Faaletonu le Faalogo

O tagata o le au paia e logonoa pe faaletonu le faalogo e feagai ma toatuga o fesoootaiga i le aoaoina o mataupu faavae ma aoaoga faavae o le talalelei. Afai latou te faaaogaina le gagana e fai i faailoga, latou te manaomia ni faamatalaupu e fesoasoani ia i latou e auai ai atoatoa i sauniga a le Ekalesia, faauuga i le perisitua, galuega i le malumalu, tuuina atu o moli-mau, faatalanoaga ma gaioiga.

O tagata o le ekalesia e logonoa pe faaletonu le faalogo, e faamalosiaina ina ia faalagolago ia i latou lava ma taumafai e galulue ma taitai perisitua i le faamaopoopoina o le tautua faamatalaupu latou te manaomia. I sauniuniga mo tulaga maaleale e pei o faatalanoaga patino po o fono aoai faale-Ekalesia, e feutagai ia taitai perisitua ma le tagata e fuafua ai pe faaoga se faamatalaupu. I tulaga faapenei, e tatau i taitai ona sailia se faamatalaupu e le o se tagata o le aiga (pe a mafai) ma ia faamamafa atu i ai le faalauaitelina.

Afai e le lava ni faamatalaupu e maua, e mafai e taitai ona faatulaga ni vasega i le uarota po o le siteki e aoao ai le gagana e fai i faailoga lea e faaoga i lo latou eria. E mafai e taitai ona valaau ni tagata o le au paia ua i ai lea agavaa e faiaoga i nei vasega. O tagata o le ekalesia e logonoa pe faaletonu le faalogo ma faaogaina le gagana e fai i faailoga e aveva ma a latou gagana autu, e tatau ona manatunatu muamua i ai e faiaoga i vasega. O se punaoga aoga tele o le *Dictionary of Sign Language Terms for The Church of Jesus Christ of Latter-day Saints*.

E na o tagata agavaa o le au paia e tatau ona faamatalaupu i sauniga faamanatuga, sauniga a le au perisitua, ma faatalanoaga. Afai e le maua sē o umia le perisitua e faamatalaupu i le taimi o se sauniga perisitua, e mafai e se taitai pulefaamalumalu ona talosagaina se tamaitai e faamatalaupu. E mafai ona faaoga ia faamatalaupu e le lolotu mo se taimi le tumau, o ni tagata ofofua mai [volēnitia] i gaioioiga ma le tele o isi fonotaga seia oo ina atia'e e tagata o le au paia ia tomā e faamatalaupu ai.

E mafai foi e se taitai pulefaamalumalu ona talosagaina sē o umia le perisitua e faamatalaupu i se sauniga po o se faamanuiga pe afai e logonoa pe faaletonu le faalogo a le tagata e tuuina atu i ai. Afai e le maua sē o umia le perisitua, e mafai e se taitai pulefaamalumalu ona talosagaina se tamaitai e faia le faamatalaupu.

I le taimi o se vasega po o se fonotaga, e tatau i le faamatalaupu ona tu i luma o le potuaoga po o le falesa ae le o luga o le tulaga. E tatau foi ona tutu i autafa o le failauga ina ia le faalavelave ai i le vaai atu i ai. Talu ai e faateleina le malamalama i le vaai atu i laugutu ma le minoi o le tino a le tagata o loo tautala, e tatau ona mafai e i latou e logonoa pe faaletonu le faalogo ona iloa atu le faamatalaupu ma ia mafai foi ona iloa atu le failauga po o le faiaoga i o latou si'umata. Afai e lava ia faamatalaupu e maua, e talosagaina i latou e le taitai ia tai 30 minute ma fesuia'i ia le lagona ai le vaivai.

I le taimi o se sauniga o le perisitua po o se faatalanoaga, e tatau i le faamatalaupu ona latalata i le tagata o loo faatinoina le sauniga pe o faautaitai le faatalanoaga.

Afai e le faaogaina e tagata logonoa pe faaletonu le faalogo ia le gagana e fai i faailoga, ma e manaomia se faamatalaupu o le gagana tautala e fesoasoani ia i latou e faitau mai laugutu, e faaoga e taitai le faiga faavae lava lea e tasi o loo latou mulimuli ai i le sailia o se faamatalaupu e faaogaina le gagana e fai i faailoga.

Tulaga Patino e Le Faalauaitelina

E tatau i taitai ona faaaloogia le tulaga patino e le faalauaitelina o tagata e i ai manaoga faapitoa i le taimi o fonotaga faaleautaitai ma pe a uma foi, lea atonu e talanoaina ai manaoga taitasi.

Punaoa

O punaoa mo tagata e i ai manaoga faapitoa, mo o latou aiga ma tagata e tausia, ma mo taitai ma faiaoga o loo maua lea i le disabilities.lds.org. O loo maua i leni uepisaite:

1. Faamatalaga e fesoasoani e faateleina ai le malamalama i luitau o loo feagai ma i latou e i ai manaoga faapitoa.
2. Vaega e uiga i manaoga faapitoa patino ma tali i fesili e fesiligia soo.
3. Faamafanafanaga mo tagata o le ekalesia e i ai manaoga faapitoa ma o latou aiga e ala i tusitusiga paia, upusii, ma sootaga e maua ai faamatalaga aoga.
4. Lisi o mea o le a fesoasoani i tagata o le ekalesia e i ai manaoga faapitoa a o latou taumafai e ola i le talalelei a Iesu Keriso ma auauna atu i le Ekalesia.

O punaoa a le Ekalesia mo tagata e i ai manaoga faapitoa o loo lisi atu i le *Church Materials Catalog* ma le disabilities.lds.org.

O fesili e uiga i anomea mo tagata o le ekalesia e i ai manaoga faapitoa, e mafai ona faatuatusi atu i le:

Members with Disabilities

50 East North Temple Street

Salt Lake City, UT 84150-0024

Telefoni: 1-801-240-2477

Imeli: specialcurriculum@ldschurch.org

21.1.27**O Isi Faatuatuaga**

O le tele o mea e musuia, mamalu, ma faaaloologia o loo maua i le tele o isi faatuatuaga. E ao i faifeau faamisiona ma isi tagata o le Ekalesia ona nofouta ma faaaloalo i talitonuga o isi ma aloese mai le faaonoono atu i ai. O peresitene o siteki ma misiona e i ai ni fesili e uiga i sootaga ma faatuatuaga e le o ni Kerisiano e tatau ona faafesootai le Au Peresitene o le Eria. O isi taitai i le lotoifale e i ai ni fesili faapea e tatau ona faafesootai le peresitene o le siteki po o le misiona.

21.1.28**Gaoioiga e Faasoloatoa ma le Po**

Tagai i le 13.6.12 ma le 21.2.8.

21.1.29**Gaoioiga Faapolokiki ma Faaleatunuu**

I le avea ai ma tagatanuu, e fautuaina tagata o le Ekalesia ina ia auai i mataupu faapolokiki ma faalemalo, e aofia ai le auai i pati faapolokiki latou te filifilia. E faamalosiaina foi tagata ina ia matuai aafia i faamoemoega aoga e faaleleia ai o latou nuu ma avea ma ni nofoaga lelei latou te nonofo ma tausua ai aiga.

E tusa ai ma tulafono a o latou malo, e fautuaina tagata o le ekalesia ina ia lesitala e palota, ia suesue maeaea i mataupu ma sui tauva, ma ia palota mo tagata ua latou talitonu o le a galulue ma le amiosa'o ma le faautautaga poto. Ua i ai i le Au Paia o Aso e Gata Ai se matafaioi faapitoa e saili, palota, ma lagolagoina taitai o e faamaoni, lelei ma faautaua (tagai i le MFF 98:10).

E ui i le faamautuina o le aia tatau o le faailoaina o mataupu faapolokiki ma faalauaitete, e tutoatasi lava le Ekalesia mai vaega faapolokiki, tulafono faapolokiki, ma sui tauva mo tofiga faapolokiki. E le tuuina atu e le Ekalesia se faamaoniga i soo se vaega faapolokiki po o se sui tauva. Na te le fautuaina foi

ona tagata i le auala e palota ai. Peitai, i ni tulaga e ese mai ai, o le a tu le Ekalesia i se tulaga e faatatau i tulafono patino, aemaise lava pe a i ai se faaiuga e aofia ai mataupu o le amio mama. E na o le Au Peresitene Sili lava e mafai ona saunoa mo le Ekalesia pe tautino atu foi le lagolago a le Ekalesia pe tetee i tulafono patino pe saili foi e faalavefau i mataupu faaletulafono. A leai, e le tatau i peresitene o siteki ma isi taitai i le lotoifale ona faatulagaina tagata o le ekalesia e auai i ni mataupu faapolokiki pe taumafai e uunaia le auala latou te auai ai.

E fautuaina tagata o le Ekalesia e mafaufau e tautua i tofi taua po o tofi filifilia lautele i faigamalo i le lotoifale po o le atunuu. E le tatau i ni sui tauva mo tofiga lautele ona latou faailoaina atu faapea o loo lagolagoina i latou e le Ekalesia po o ona taitai. E tatau i taitai ma tagata o le Ekalesia ona aloese mai faamatalaga po o ni amioga atonu e faaliliuina faapea o loo lagolagoina e le Ekalesia soo se vaega faapolokiki, tulafono, aiaiga faavae, po o ni sui tauva.

E fautuaina tagata ina ia lagolagoina le faatinoga o aiaiga faavae e faamalolosia ai le faatulagaga lelei o tagata, aemaise lava mea ua mamanuina e tausisia ai ma faamalolosia le aiga o se iunite faavae o malo.

O faamaumauga a le Ekalesia, tusitaiala, ma isi mea faapena e le mafai ona faaaogaina mo faamoemoega faapolokiki.

E le mafai ona faaaogaina fale ma meatotino a le Ekalesia mo faamoemoega faapolokiki. Peitai, e mafai ona faaaoga ia fale mo le lesitalaina ai o tagata palota po o faigapalota, i mea e le o i ai se isi nofoaga e talafeagai (tagai i le 21.2).

21.1.30**Tulafono o Meli**

I totonu o le Iunite Setete ma nisi o atunuu, o se solitulafono i tulafono tau meli le tuuina o soo se mea e aunoa ma se faailogatusi i luga po o totonu o pusa meli. O lenei faasa e faatatau i tusitusiga a le uarota po o le siteki, faasilasilaga, pepa faalauiloa,

ma isi mea faapea faale-Lotu. E tatau i taitai faale-Ekalesia ona aoao tagata ma faifeau faamisiona e aua nei tuuina mea faapena i totonu po o luga o pusameli.

21.1.31

Tulaga Patino e Le Faalauaitelina o Tagata

Ua i ai i taitai o le Ekalesia le matafaioi e puipuia ai le tulaga patino e le faalauaitelina o tagata. O faamaumauga, tusitaiala a le Ekalesia, ma isi mea faapena e le mafai ona faaaogaina mo faamoemoega mo le tagata lava ia, faapisinisi, po o ni faiga faapolokiki (tagai foi i le 21.1.15).

21.1.32

Tusitusiga a le Tagata Lava Ia e Lolomi ma Faasalalau

E le tatau i tagata ona talosaga i le Au Pulega Aoao po o Fitugafulu Eria e lagolago atu i le tusiaina o a latou tusi po o le faamaoniaina o tusi a le Ekalesia po o isi tusitusiga a le Ekalesia.

21.1.33

Pueina o Lauga po o Saunoaga a le Au Pulega Aoao ma Fitugafulu Eria

E le tatau i tagata o le Ekalesia ona pueina lauga po o saunoaga a le Au Pulega Aoao ma Fitugafulu Eria e tuuina atu i konafesi a siteki, fonotaga a faifeau faamisiona, po o isi sauniga. Peitai, e mafai e tagata ona pueina ia faasalalaua o konafesi aoao i masini i le fale mo le faaaogaina e le tagata lava ia, ae le o ni mea faapisinisi.

21.1.34

Faatatau i le Ekalesia ma Ona Tagata

A o faatupulaia le Ekalesia ma sopoia atu tuaoi, aganuu, ma gagana, o le faaaogaina o lona igoa ua faaalai mai, O Le Ekalesia a Iesu Keriso o le Au Paia o Aso e Gata Ai (tagai i le MFF 115:4), ua

faateteleina le taua i le tiutetauave o le Ekalesia ma ona tagata ina ia folafola atu le suafa o le Faaola i le lalolagi atoa. O lea la, o faamatalaga uma e faatatau i le Ekalesia e tatau ona aofia ai lona igoa atoa i soo se tulaga e mafai ai. O le mulimuli ai i se faamatalaga faapuupuua i le igoa atoa o le Ekalesia, o faapuupuuga e pei “o le Ekalesia” po o le “o le Ekalesia a Iesu Keriso” e taliaina.

O le faatatau i le Ekalesia o le “Lotu Mamona,” “o le Ekalesia a le Au Paia o Aso e Gata Ai,” po o “le Ekalesia AAG” ua le fautuaina.

Afai e faatatau i tagata o le Ekalesia, e sili atu le faaoga o le faaupuga o “tagata O Le Ekalesia a Iesu Keriso o le Au Paia o Aso e Gata Ai.” O se faapuupuuga, “Au Paia o Aso e Gata Ai” e lelei lena ma le “Mamona” e taliaina foi.

O le upu *Mamona* o le a faaaauu pea ona faaaogaina i igoa talafeagai e pei o le Tusi a Mamona po o le Aufaipese a le Tapeneko Mamona. O le a faaaauu pea foi ona faaaogaina o se upu e faamatalaina ai se nauna e pei o “paionia Mamona.” E le gata i lea, e mafai foi ona talafeagai pe a faaaogaina le upu *Mamona* e faailoa ai le Ekalesia e pei ona iloa ai i nisi o atunuu.

21.1.35

Suesuega Sailiili i le Ekalesia

Na pau le ofisa suesue ua faatagaina a le Ekalesia o le Correlation Research Division of the Correlation Department (Vaega Faamaopoopo o Suesuega a le Matagaluega o le Faamaopoopoga). O sui o leni vaega e faaaogaina fesili ma faatalanoaga ina ia maua mai ai faamatalaga i faafitauli o loo atugalua ai le Au Pulega Aoao. A faafesootai e le au suesue ua faatagaina e le Ekalesia ia tagata o le au paia, latou te saunia ia numera e valaau atu ai e aunoa ma se totogi ma se igoa e faafesootai ai i le laumua. E le gata i lea, latou te tuuina atu e le aunoa i le tagata le avanoa e filifili ai pe le talia nisi o fesili po o fesili uma foi o loo i luga o se sailiiliga.

E le mafai ona faaaogaina sauniga a le Ekalesia e ao mai ai faamatalaga e ni tagata po o ni sui e lei faatagaina. E le tatau foi ona tuuina atu igoa o tagata o le Ekalesia i tagata po o sui faapena. Afai e mananao taitai i le lotoifale e faamaonia le faatagaina o fesili po o faatalanoaga, e tatau ona latou faafesootai atu le Vaega Faamaopoopo o Suesuega (1-801-240-2727 po o le 1-800-453-3860, laina 2-2727).

21.1.36

Sui e Faia Fefaatauaiga

E le tatau i taitai i le lotoifale ona taliaina ni faamatalaga a ni sui e faia fefaatauaiga faapea ua faatagaina i latou e le Ekalesia po o se taitai o le Ekalesia ina ia faafesootai atu taitai i le alaafaga e faataua atu i ai a latou oloa.

21.1.37

Satelite ma Masini Vitio

O satellite ma le masini vitio a le Ekalesia e mafai ona faaaogaina mo na o faamoemoega o le Ekalesia ae le o ni mea faapisinisi e pei ona faatagaina ai e le au peresitene o le siteki po o le au epikopo. O leni masini e le mafai ona faaaogaina e pueina ai ni polokalama o le televise, keipo (cable), po o satellite e le o lagolagoina e le Ekalesia. E le mafai foi ona faaaogaina masini satellite a le Ekalesia e matamata ai ni polokalama e le o ni polokalama a le Ekalesia. E le mafai foi e tagata ona faatonutonuina le enitena (antenna) mai se isi satellite po o le masini e maua ai fesootaiga i se isi e aunoa ma le faatagaga mai le laumua o le Ekalesia.

E na o tagata ua aoaoina lelei e faafoeina ia masini e mafai ona latou faia. E faatoa mafai e le autalavou ona fesoasoani e faafoe pe afai e vaavaaia i latou.

E tatau ona loka maluina lelei masini uma pe a le faaaogaina. E le mafai ona aveesea mai le falelotu mo le faaaogaina i le aiga po o le tagata lava ia.

21.1.38

Talosagaina o Tupe

O polokalama faavae a le Ekalesia ua tuuina atu ai le fesoasoaniga tau tupe i tagata taitoatasi ua tatau ai, ma mo mafuaaga tatau. O fesoasoani a le Ekalesia e faatautaia e epikopo, o e ua masani i tulaga e mafai ai ona taofia le tuuina atu faalua o le fesoasoani ma le faaaogaina sese po o le faia faatautala. O lea la e le tatau i tagata ona talosagaina ni fesoasoani tau tupe faaopoopo mai le laumua o le Ekalesia pe mai taitai po o tagata i le lotoifale.

Afai e maua e tagata se talosaga faapena mo ni tupe, e mafai ona latou tali atu e ala lea i le faapea atu i ai o loo latou foai atu i a latou lava uarota ina ia tuuina atu ai tupe mo le fesoasoani e tusa ai ma mataupu faavae o le uelefea a le Ekalesia.

21.1.39

O Faamatalaga Ua Manatu ua Faamaonia e Taitai o le Ekalesia

Mai lea taimi i lea taimi, e faasalalauina ai faamatalaga e le sa'o ua manatu ua faamaonia e taitai o le Ekalesia. O le tele o ia faamatalaga e faasese ai le uiga o aoaoga a le Ekalesia ma e masani lava ona faavae mai i tala salatua ma faamatalaga taufaaataata. E lei tuuina mai aloaia, ae ua na o ni tala e tuugutu, i-meli, po o nisi auala e le aloaia. E le tatau i tagata o le Ekalesia ona aoao atu pe pasi atu ia ituaiga faamatalaga e aunoa ma le faamautuina na maua mai i punaoa ua faamaoniaina e le Ekalesia, e pei o faamatalaga aloaia, fesootaiga, ma lomiga.

Soo se faamatalaga lava e tusitusia pe afai e saunoa le Au Pulega Aoao, o Fitugafulu Eria, po o isi taitai aoao o le Ekalesia i konafesi a siteki po o isi sauniga, e le tatau lava ona faasalalauina atu e aunoa ma le maliega a le failauga. O faamatalaga tusitusia a le tagata lava ia e faaaoga mo ia lava.

21.1.40**Fonotaga a Tagata Tomai Faapitoa e Talanoaina ai ni Mataupu Patino ma Isi Faapotopotoga Faapena**

Ua lapataia e le Ekalesia ona tagata mai fonotaga a tagata tomai faapitoa e talanoaina ai mataupu patino ma isi faapotopotoga faapena e aofia ai aoaoga e (1) taufaaleaga, faatauemu, e ta'ufaatau-vaaina ai, po o le le talafeagai foi i le taulimaina o mataupu paia po o le (2) mafai ai foi ona faamanu'alia le Ekalesia, aveesea mai lana misiona, pe lamatia ai le soifua manuia o ona tagata. E le tatau i tagata o le ekalesia ona faatagaina o latou tofiga po o tulaga i le Ekalesia ina ia faaaoga e faalauiloa ai pe faaātaāta atu ai se faamaoniga o na tauaofiaga.

21.1.41**Gaoioiga e Totogi ai Lafoga**

E tatau i taitai o uarota ma siteki ona mautinoa o gaoioiga a le Ekalesia i le lotoifale e le lamatia ai le tulaga tuusaoloto o le Ekalesia mai le totogiina o lafoga. Mo taiala, tagai 21.2.

21.1.42**Laei ma Ofusa o le Malumalu**

O tagata o le ekalesia ua maua ia faaeega paia e fautuaina ina ia faatauina o latou lava laei o le malumalu mo le faaaogaina pe a faatinoina ia sauniga o le malumalu. E mafai ona faatau mai nei laei paia i Faletusi o le Ekalesia. O nisi malumalu o loo maua ai foi ia laei o le malumalu e faaune atu. Afai e leai ni laei e faauneina atu i se malumalu, e moomia ona malaga mai tagata o le ekalesia ma aumai o latou lava laei o le malumalu.

E mafai e tagata o le ekalesia ona su'i o latou lava ufiufi o le malumalu pe afai latou te faaaogaina le su'iga ma le mamanu o le ufiufi ua faamaonia ma le seti o mea e faaaoga mo suisuiga, lea o loo maua i Faletusi o le Ekalesia. E le mafai ona su'iina isi laei

o sauniga o le malumalu. E le mafai foi ona su'iina ofusa o le malumalu.

O tagata o le Ekalesia o e ua faaofuina i le ofusa i totonu o se malumalu, ua latou tauaveina i o latou lava luga se matafaioi o se feagaiga e ofuina e tusa ai ma faatonuga na tuuina atu i le faaeega paia. O le ofusa o se faamanatu faifai pea o feagaiga na osia i totonu o se malumalu. Afai e ofuina faalelei, e maua ai le puipuiga e tetee atu ai i faaososoga ma mea leaga. O le ofuina o le ofusa o se faailoga vaaia foi lea o se tautinoga i le loto ina ia mulimuli i le Faaola.

O tagata o le ekalesia ua maua faaeega paia e tatau ona ofuina le ofusa i le ao ma le po. E le tatau ona latou tatalaeseina, e tusa lava pe na o se vaega po o le ofu atoa, ina ia faia ai galuega i le fanua po o nisi gaoioiga ia e mafai ona faia a o ofuina lelei le ofusa i lalo ifo o lavalava. E le tatau foi ona latou aveeseina pe a na o le nofononofo i le fale i ni ofu taele po o ni laei e le talafeagai. Afai e ao ona latou tatalaina ese le ofusa, pe a faapea e feausi, e tatau ona latou toe faamauluina i le vave e mafai ai.

E le tatau i tagata o le ekalesia ona fetuunaia le ofusa pe ofuina i se tulaga e ese mai i faatonuga ina ia faia ai ituaiga sitaile eseese o laei. E le tatau foi ona latou fetuunaia le ofusa mai lona mamanu ua faatagaina. Afai e faaaoga le ofusa e lua ona vaega, e tatau ona ofuina uma vaega e lua i taimi uma.

O le ofusa e paia ma e tatau ona taulimaina ma le faaaloalo i taimi uma. E le tatau ona folaina i lalo ia ofusa. E tatau foi ona tausii mama ma su'isu'i pe a masaesae. A uma ona tata ia ofusa, e le tatau ona faatautau i vaega e feoai ai tagata e faamamago ai. E le tatau foi ona tatou faaalialia pe faailoa atu ia i latou o e le malamalama i lo latou taua.

O tagata o e ua osia feagaiga i le malumalu e tatau ona taialaina e le Agaga Paia e tali atu mo i latou lava i ni fesili faaletagata e uiga i le laeiina o le ofusa.

Ina ia faaleaogaina ia ofusa ua masaesae o le malumalu, e tatau i tagata o le ekalesia ona 'oti ese ia

faailoga ma susunuina. Ona 'oti'oti lea e tagata o le ekalesia ia le ie o loo totoe ina ia le mafai ona iloa ai o se ofusa. O le taimi lava e aveese ai ia faailoga, ua le toe paia foi le ofu.

Ina ia faaleaogaina ia laei o le malumalu ua tuai ma masaesae, e tatau i tagata o le ekalesia ona faaleaogaina le ofu e ala lea i le 'oti'oti ina ia le mafai ona iloa le mea na faaoga i ai muamua.

E mafai e tagata o le ekalesia ona tuuina atu ofusa ma laei o le malumalu o loo lelei pea i isi tagata agavaa o le ekalesia ua maua faaeega paia. E mafai ona faailoa mai e le epikopo i latou o loo manaomia ia laei. E le mafai lava i soo se tulaga ona tuuina atu e tagata o le ekalesia ia ofusa po o laei mo sauniga o le malumalu i Faleoloa o le Tesareta, faleteuoloo o epikopo, po o vaega e tuuina atu i ai foai alofa.

O faamatalaga e uiga i le okaina mai o laei o le malumalu po o le okaina o ofusa mo i latou e i ai tulaga faapitoa (e pei o tagata o le ekalesia o loo tautua i le militeli, tagata ua faiese, po o tagata e i ai manaoga faapitoa) o loo maua i le *Tusitaulima 1, 3.4.*

21.1.43

Aiaiga mo Femalagaaiga

Tagai i le 13.6.24.

21.2

Aiaiga Faavae mo le Faaogaina o Fale ma Isi Meatotino a le Ekalesia

O fale ma isi meatotino o le Ekalesia e faaogaina mo tapuaiga, aoaoga o mataupu faalelotu, ma isi gaoioiga a le Ekalesia. O meatotino a le Ekalesia e le tatau ona faaogaina mo faamoemoega faapisinisi pe faapolokiki, lea e solia ai tulafono na faatagaina ai le tuusaunoaga o ana lafoga. E le mafai foi ona faaogaina ia meatotino mo isi faamoemoega e solia ai nei tulafono. O le lisi lea o loo tuuina atu ai faaitaiga o le faaogaaga e le faamaonia:

1. Lisiina atu o fale ma meatotino a le Ekalesia mo faamoemoega faapisinisi.
2. Faalauiloaina o ni pisinisi po o ni kamupani faaputu tupe, e aofia ai le faapipiina o ni faasalalauga faapisinisi po o le lagolagoina o ni faafiafiaga faapisinisi.
3. Faatauina mai, faatauina atu, po o le faalauiloaina o oloa, tautua, faasalalauga, po o galuega taulima, po o le faaliina atu o ni oloa gaosi.
4. Faia o gaoioiga o sailiga-tupe e le faatagaina (tagai i le 13.6.8).
5. Taliaina o ni failauga po o ni faiaoga e totogi se tau, o e faafaigaluegaina tagata auai, o e faatauina i latou e auai a o tuuina atu semina, lesona, vasega faamalositino, ma isi mea faapena. E mafai ona faia ni tuusaunoaga i le faaogaina o piano ma okeni i falelotu mo ni aoaoga patino e totogiina (tagai 14.7).
6. Faia o taaloga afeleti faatulagaina e le lagolagoina e le Ekalesia, e aofia ai faaitaiga po o ni a'oga au.
7. Faia o ni fonotaga faapolokiki po o ni faiga faatosina. O se faatagaga faapitoa, e mafai ona faaogaina ia fale o le Ekalesia mo le lesitalaina o tagata palota ma avea foi ma se fale palota pe a talosagaina e ofisa fai palota pe afai:
 - a. Ua leai lava se isi mea e tua i ai.
 - e. E tausisia e au ofisa ma tagata palota ia tulaga faatonuina o le Ekalesia i totonu o le fale.
 - i. O le gaoioiga o le a le tula'i mai ai se tulaga matautia faaletino i le fale.
 - o. O le gaoioiga o le a le afaina ai le foliga vaaia o le Ekalesia.

O le faaogaina o meatotino a le Ekalesia e le tatau ona i ai se tulaga matautia pe lamatia ai i latou e auai po o meatotino foi. E le tatau foi ona i ai se

tulaga e lavelavea ai le Ekalesia pe avefa ma faasoefa i tuaoi tau lalata ane.

Mo nisi faamatalaga auiliili i le faaaogaina ma le tausaiaina o fale ma isi meatotino o le Ekalesia, tagai i le *Taiala o le Pulega o Fale ma Fanua mo Falelotu ma Isi Meatotino a le Ekalesia* pe faafesootai le laumua o le Ekalesia po o le ofisa o le pullega ua tofia.

21.2.1

Galuega o Faatufugaga

E maua atatusi mo falelotu ua faamaonia e le Ekalesia e ala atu i pullega o fale ma fanua e faaoga ai le lisi o ata o le *Church Facilities Artwork* o loo i ai. E mafai foi e le pullega o fale ma fanua ona maua mai galuega tau ata e talafeagai mo falelotu e ala mai i Faletusi o le Ekalesia.

O ata tusi ma isi galuega tau ata e mafai ona tuuina i ni nofoaga talafeagai i totonu o le falelotu. Ae peitai, e le mafai ona tuuina i totonu o le falesa pe tuu latalata i le vai papatiso. O faatagata, ata vali i luga o puipui, po o ata e fai i ta'ega tioata e le faatagaina. O lenei tulafono e le faatatau i galuega tau ata ua leva ona faaalua mo le tele o tausaga i totonu o falesa o falelotu o loo i ai nei.

O galuega tau ata i totonu o falelotu e tataua ona faavaa faalelei.

21.2.2

Teuteuga

O teuteuga mo le Kerisimasi, o isi aso faamanatu, ma isi faatasiga faapena e mafai ona tuuina mo sina taimi puupuu i le faapaologa po o le fale faafiafia o se falelotu, pe a faamaoniaina ai i lalo o le taitaiga a le au peresitene o le siteki. Sei vagana ai o fugalaau, ae le mafai ona tuuina ni teuteuga i totonu o vaega o le falesa o le falelotu. E le tataua foi ona teuteuina fafo o le falelotu po o le lotoa.

O teuteuga e tataua ona faigofie ma aua ne'i tau-gata ma e le tataua ona mu gofie. O vao mago, ofe, aulama, o isi mea mamago, ma moligao e le mafai ona faaaogaina. Afai e faaaogaina ia lauu Kerisimasi, e tataua o ni lauu palasitika pe malupuipua foi mai le mu gofie ma ia faaalua e aunoa ma ni moli e alu i le eletise po o ni moligao. E tataua ona mulimulitaia ia faatonuga mo mu ma le saogalemu i le lotoifale faapea ma tulafono mai se pullega faalemalu.

21.2.3

Faalavelave Faafuasei

I le taimi o se faalavelave faafuasei, e fuafuaina e le au peresitene o le siteki le faia ma le le faia o sauniga masani a le uarota.

I se faalavelave faafuasei po o se mafatiaga o aafia ai se afioaga, e mafai e le peresitene o le siteki ona lagolago atu i sui faaletulafono o fesoasoani mo le faalavelave e ala i le faatagaina o falelotu e faaoga e fai ma malutaga mo le faalavelave. O le Ekalesia lava e uuina le pule. E faamautinoa e taitai o siteki ma uarota e tausai e tagata o loo faaaogaina ia fale, tulaga faatonuina a le Ekalesia o le amio, e aofia ai le Upu o le Poto, a o latou i ai i totonu o ia fale.

21.2.4

Auupega Malolosi

O falesa e faapaiaina mo tapuaiga i le Atua ma o se malutaga mai popolega ma atugaluga o le lalolagi. O le tauaveina o auupega malolosi, nanaina ai po o se isi faiga, i totonu o o latou puipui e le talafeagai lea sei vagana ua moomia ai e taitai o le tulafono.

21.2.5

Afi ma Moliga'o

E le tataua ona faaaogaina ni afi ma moliga'o i totonu o fale o le Ekalesia.

21.2.6**Fu'a**

E mafai ona sisi le fu'a a le malo i lotoa o le Ekalesia i soo se taimi pe afai e tusa ai ma tu ma aga a le atunuu. E mafai ona faaali le fu'a a le malo i totonu o fale o le Ekalesia i faatasiga faapitoa, e pei o polokalama faalotonuu. O le lotonuu moni e le moomia ai le faaalua o le fu'a a le malo i taimi uma i nofoaga o tapuaiga.

21.2.7**Po o Aso Gafua**

Tagai i le 13.6.10.

21.2.8**Apitaga po o Tolauapiga e Alu ai ma le Po**

O meatotino o falelotu o le Ekalesia e le mafai ona faaaoga mo malologa, tolauapiga, po o pati e alu faasoloatoa ma le po.

21.2.9**Nofoaga e Paka ai Taavale**

O le faaaogaga o nofoaga a le Ekalesia e paka ai taavale e tatau ona ogatusa ma taiala o loo i le amataga o le vaega e 21.2. E faaopoopo atu i ai, o nofoaga a le Ekalesia e paka ai taavale e le tatau ona faaaogaina e paka ai taavale a i latou e malaga mamao mai mo galuega e aunoa ma se faatagaga mai le faatonusili o mataupu faaletino.

21.2.10**Atapu'e, Pu'eina o Vitio, ma Faasalalauga i Falelotu**

O le pu'eina o ata po o le pu'eina o ni vitio i totonu o falesa e le faatagaina. O fonotaga po o sauniga ma isi mea e faia i le falesa e le mafai ona faasalalauga i le Initoneti po o se isi lava ala o faasalalauga (tagai 18.3.1 mo se faatagaga faapitoa).

21.2.11**Vaega mo Lufilufiga**

O le vaega mo lufilufiga i totonu o falelotu o le Ekalesia, e le o faamoemoe e fai ai ni gaselega po o ni kuka sei vagana o se vaega o se lesona, se faata'ita'iga, po o isi aoaoga. Afai e tatau ona fai ni meaai i totonu o le fale po o le lotoa, e tatau ona saunia i se isi mea ona aumai ai lea i le falelotu, i se mea e mafai ona tumau ai le mafanafana po o le malulu foi seia oo ina lufilufiga.

21.2.12**Potu e Teu Ai Mea**

E na o le pau le potu e teu ai mea e faatagaina i falelotu e mo mea e faaaoga mo le tausiga ma le teuina o le fale ma isi mea ua faamaonia mo le faaaogaina. O oloa o le uelefea ma isi mea faapena e le mafai ona teuina i falelotu.

O mea e pei o penisini, kesi, afitusi, ma meafaigaluega e faaaoga i tolauapiga e tatau ona teuina i isi fale e ese mai le falelotu.

O taavale, o taavale mo faafiafiaga, ma isi masini a le tagata lava ia e le mafai ona teuina i totonu o fanua o le Ekalesia.

21.3**Aiaiga Faavae Faafomai ma le Soifua Maloloina****21.3.1****Taotoga o le Tino Maliu mo Suesuega**

E mafai ona faia taotoga mo le tino maliu mo sueduega pe afai e malilie i ai tagata o le aiga o le ua maliu, ma pe afai e faia lenei taotoga e tusa ai ma le tulafono.

21.3.2**Susunuina o le Tino Maliu**

E le masani ona fautuaina e le Ekalesia le susunuina o le tino maliu. E tatau i le aiga o le tagata ua maliu ona faia le tonu pe susunu le tino, ma ia amanaia soo se tulafono e faafoe ai tanuga po o le susunuina o le tino maliu. I nisi atunuu, e manaomia ai e le tulafono le susunuina o le tino maliu.

O atunuu e mafai ai, o se tagata o le ekalesia ua maliu a ua uma ona maua ona faaeege paia, e tatau ona faaofu i laei o le malumalu pe afai e susunuina. E mafai ona faia se sauniga falelauasi (tagai 18.6).

21.3.3**Faaumaina Filemu o le Ola**

O le faaumaina filemu o le ola ua faauigaina o le faaoo lea o le oti ma le faamoemoe i ai, o se tagata o loo mafatia mai se gasegase ua ui. O se tagata e auai i le faatinoina o le faaumaina filemu o le ola, e aofia ai ma le fesoasoani i se tasi e pule i le ola, ua solia ai poloaiga a le Atua. (Tagai foi i le 21.3.8.)

21.3.4**Sيامa o le HIV ma le AIDS**

O tagata o le ekalesia ua maua ai sيامa o le HIV (Human Immunodeficiency Virus) po o e ua maua i le AIDS (Acquired Immunodeficiency Syndrome), e ao lava ona taulimaina ma le faaaloalo ma le agaalofo. O nisi tagata ua aafia i le HIV o ni tagata ta'umamaina a ua aafia fua ona o aga a isi. Mo se faataitaiga, atonu na aafia ona o le faatamala o le tuiina o se toto po o se tasi o matua na aafia. Afai o le aafiaga na mafua mai i le solia o tulafono a le Atua, e lagolagoina e le Ekalesia le faataitaiga a le Alii, o le na Ia fetuu i le agasala ae alofa i le tagata agasala ma uunaia ai le salamo. E tatau i tagata ona aapa atu i le agalelei ma le faamafanafana i e ua aafia, tali atu i o latou manaoga ma fesoasoani atu ia i latou e sailia fofu mo o latou faafitauli.

O le puipuiga aupito taua lava mai le HIV ma le AIDS o le ola mama a o lei faaipoipo, faamaoni a'ia'i i le faaipoipoga, aloese mai soo se sootaga faatautane po o le faatauafafine, taumamao mai le faaogaina o fualaa faasaina, ma le ava ma migao ma le tausiga o le tino.

O le auai mai i sauniga Lotu o tagata ua maua ai sيامa o le HIV po o le AIDS, e le tupu mai ai se faafitauli matuia faalesoifua maloloina. Ua faamautuina mai e taitai o le soifua maloloina lautele e faapea o le HIV e le pipisi atu i ni fesoootaiga faasamasama-noa i aiga, aoga, lotu, ma falefaigaluega.

O i latou e manaomia i nisi taimi le faamamaina o toto po o le tuuina atu o le fesoasoani muamua e tatau ona aoao ma mulimuli i fautuaga a le matagalua o le soifua maloloina i le lotoifale.

E faatatau i le papatisoga ma le faamauga, o tagata ua aafia i le HIV pe ua maua i le AIDS, e taulimaina lava e pei o isi tagata uma o loo faaalua le faatua-tua i le Atua, salamo, ma o loo ola i le talalelei a Iesu Keriso.

21.3.5**Togafiti e Faamoe Ai**

O le faaogaina o togafiti e faamoe ai (hypnosis) i lalo o le vaaiga a fomai popoto faapolofesa mo le togafitiga o faama'i po o se toatuga tau i le mafau-fau, o se fesili faafomai e faia e fomai atamamai le tonu. E le tatau i tagata ona aafia i le faiga o togafiti e faamoe ai mo faamoemoega o se faataitaiga pe faafiafia ai.

21.3.6**Faiga Faafomai ma le Soifua Maloloina**

E le tatau i tagata ona faaogaina ia faiga faafomai po o le soifua maloloina e fesiligia ai lo latou faamaoni ma le faatulafonoina. E tatau i taitai i le lotoifale ona fautuaina tagata o i ai ni faafitauli tau le soifua maloloina ina ia vaai ni fomai atamamai ua laisena ina i atunuu o loo latou galulue ai.

21.3.7**Totoga ma Aano e Ofoina atu pe Fesiita'i**

O le foaiina atu o totoga ma aano o le tino o se tasi o se gaoioiga le manatu faapito lea e masani ona faamanuiaina tele ai tagata e i ai ni faaletonu faale-soifua maloloina. O le faaiuga e foai atu ia totoga po o aano o le tino o se tasi mo ni faamoemoega faafomai, po o le faaiuga ina ia faatagaina le fesiita'i o totoga po o aano mai se tagata o le aiga ua maliu, e faia lea e le tagata po o le aiga o lē ua maliu.

O se faaiuga ina ia mauaina se totoga na foai atu, e tatau ona faia pe a maea ona mau mai se fautuuga faafomai atamai ma faamautuina e ala i le tatalo.

21.3.8**Taofiofi Umi o le Ola**

A oo mai se ma'i faigata, e tatau i tagata ona faaoga le faatuatua i le Alii ma saili se fesoasoaniga atamai faafomai. Ae peitai, afai ua iloaitino o le a maliu le tagata, e tatau ona manatu i ai o se faamanuiaga ma se vaega faamoemocina o le olaga e faavavau. E le tatau i tagata ona manatu ifo faapea ua i ai so latou tiute e taofiofi umi ai le ola o se tasi i se faiga lē talafeagai. O nei faaiuga e sili ona tuu pea i tagata o le aiga pe a uma ona latou mau o se fautuuga faafomai atamai ma saili le taitaiga faalelagi e ala i le anapogi ma le tatalo.

21.3.9**Vaega mo le Malamalamaaga o le Tagata la Te la Lava**

E tele vaega tumaoti ma faalapotopotoga faapisinisi e i ai polokalama lea e faapea mai e faateleina ai le malamalama o le tagata ia te ia lava, lagona lelei o le tagata ia te ia lava, ma le faaleagaga. O nisi vaega ua folafola mai e faalauteleina ai le saolotoga o le tagata lava ia pe faaleleia ai sootaga faaleaiga. O nisi ua ofoina mai aoaoga “faataitai” pe “faamalosiā ai.”

O nisi o nei vaega ua latou tapa seseina pe faaataata atu faapea ua faamaonia a latou polokalama e le

Ekalesia po o nisi o le Au Pulega Aoao. Ae peitai, e le i faamaoniaina e le Ekalesia ni gaoioiga faapea, ma ua lapataia ai tagata o le Ekalesia ina ia le talitonu i na faaupuga. O le mea moni faapea e lei teena aloaia e le Ekalesia se gaoioiga faapena, e le tatau ona vaai atu i ai faapea o se faaataataga o le lagolagoina ma le faamaonia.

Ua lapataia foi tagata o le Ekalesia e faapea o nisi o nei vaega o loo lagolagoina manatu ma faaogaina ia auala e mafai ona faaleagaina ai. E faaopoopo atu i ai, o le tele o vaega faapea e totogiina ni pili ma uunaia ni tautinoga e faia mo ni vaitaimi uumi. O nisi ua fenuniaia mataupu a le lalolagi ma mataupu faavae o le talalelei lea e mafai ona faaitiitia ai le faaleagaga ma le faatuatua.

O nei vaega ua faamoemoe e folafola mai ni faaiuga vavave i faafitauli ia e masani ona manaomia ai se taimi ma taumafaiga a le tagata lava ia e faaleleia ai. E ui atonu e mafai e tagata o loo auai atu i ai ona iloa se toomaga le tumau o lagona, ae masani lava ona toe foi mai faafitauli tuai, lea e oo atu ai i le faaopoopoga o le faanoanoa ma le le fiafia.

E le tatau i taitai o le Ekalesia ona totogiina, pe uunaia le auai atu i ai, po o le faalauiloina o ia itu-aiga vaega ma faiga. Ma le isi, e le mafai foi ona faaogaina fale ma fanua o le Ekalesia mo nei gaoioiga.

E tatau i taitai ona fautuaina tagata e faapea, o le faaleleia moni lava o le tagata ia e mau mai lea i le ola ai i mataupu faavae o le talalelei. O tagata e i ai ni faafitauli tau le vafealoai po o lagona, e mafai ona latou fesootea ma taitai perisitua mo le taitaiga ma faailoa atu ai fesoasoaniga e ogatasi ma mataupu faavae o le talalelei.

21.3.10**Tamaiti e Fananau Mai ua Maliliu (O Tamaiti e Maliliu ae Lei Fananau Mai)**

E le faia ni sauniga o le malumalu mo tamaiti e fananau mai ua maliliu. Ae peitai, e le taofia ai e lenei tulaga le avanoa e mafai ai ona avea se tamaitiiti

na maliu ae lei fanau mai ma se vaega o le aiga i le faavavau. E faamalosiaina matua ina ia faatuatua i le Alii e foiaina ai tulaga faapea i le auala sili Na te silafia. E mafai e le aiga ona tusia le igoa o se tamaitiiti na maliu ae lei fanau mai i luga o le talafaamau-mau o le aiga ae sosoo ai ma le faaupuga *maliu ae lei fanau mai* e faapuipui.

E mafai ona faia sauniga i le tuugamau pe a filifili matua e fai.

O se mea moni le i ai o le ola i se tamaitiiti a o lei fanau mai. Ae peitai, e leai se faaaliga tuusao po o le a le taimi na ulufale ai le agaga i le tino.

21.3.11

Upu o le Poto

E na o le pau lava le faauigaga aloaia o “mea vevela” (MFF 89:9) i totonu o le Upu o le Poto o le sau-noaga lea a uluai taitai o le Ekalesia e faapea, o le faaupuga o “mea vevela” o lona uiga o le lauti ma le kofe.

E le tatau i tagata ona faaoga soo se mea o loo aofia ai ni fualaa faasaina. E le tatau foi i tagata ona faaoga mea matautia po o mea e mafai ona avea ma mausa sei vagana ai ua tuuina mai i se fautuaga a se fomai atamai.

21.4

Aiaiga Faavae e Faatatau i Amioga Mama

21.4.1

Faapau Pepe

Na poloai mai le Alii, “Aua e te . . . fasioti tagata, pe e te faia soo se mea faapena” (MFF 59:6). E tetee le Ekalesia i le filifiliga o le faapau pepe pe a manao i ai le tagata ia po o le lautele foi. E le tatau i tagata o le ekalesia ona gauai atu, faatino, pe fuafuaina, totogi, ioe i ai, pe fautuaina se faapa’ū o se pepe. E na o le pau se faatagaga pe afai:

1. O le maitaga na mafua mai i le toso faamalosi o le tamaitai po o le toe ui i fanau.
2. Ua fuafuaina e se fomai atamai faapea e lamatia ai le ola po o le soifua maloloina o le tina.
3. Ua fuafuaina e se fomai atamai faapea ua i ai ni faaletonu matuia i le pepe o le a le ola ai pe a fanau mai.

E ui i nei tuusaunoaga, ae le tauamiotonuina ai le te’i lava ua faapau se pepe. O le faapau pepe o se mataupu ogaoga ma e tatau ona iloiloina maeaea lelei pe afai ua maea ona feutagai ia tagata o loo fitoitonu i ai ma o latou epikopo ma mauaina le faamautuina mai le lagi e ala i le tatalo.

O tagata o le Ekalesia e gauai atu i ai, faatino-ina, fuafuaina, totogiina, ioe i ai, pe fautuaina se faapauina o se pepe e mafai ona faia se aoaiga faale-Ekalesia.

E tusa ai ma faaaliga ua tuuina mai, e mafai ona salamo ma faamagaloina le tagata mo le agasala o le faapau pepe.

21.4.2

Faatautala

O le sauaina o le agaleaga lea po o le tuulafoaiina o isi (e pei o se tamaitiiti po o se toalua, se toeaina po o se olomatua, po o se tagata e le atoa le malosi o le tino ma le mafaufau) i se auala e mafua ai ona manu’a faaletino, faalelagona, pe faalefeusuaiga. O le tulaga o le Ekalesia e le mafai ona taliaina le sauaina i soo se ituaiga. O i latou o e sau i o latou taitoalua, fanau, isi tagata o le aiga, po o se isi lava tagata, ua ia solia tulafono a le Atua ma tagata. O tagata o le au paia e sauaina isi, e tatau ona fai se aoaiga faale-Ekalesia.

O tagata uma lava, aemaise lava i matua ma taitai, ua uunaia ina ia mataala ma maelega ma faia mea uma latou te mafaia e puipuia ai fanau ma isi i le tetee atu i le sauaina. Afai e silafia e taitai po

o faiaoga ni tulaga o le sauaina, e tatau ona latou fefautuaai ma le epikopo.

E tatau i taitai o le Ekalesia ma ona tagata ona faa-taunuuna matafaioi uma faaletulafono e lipoti atu sauaga i taitai faalemalo. I nisi nofoaga, o taitai ma faiaoga e galulue faatasi ma tamaiti ma le autalavou ua iloaina o “fai lipoti tuupoloaiina” ma e tatau lava ona lipoti atu sauaga i pulega faaletulafono. E faapena foi, i le tele o nofoaga, soo se tagata e iloa se sauaga e manaomia ona ia lipoti atu i pulega faaletulafono.

O faatonuga mo peresitene o siteki ma epikopo o loo tuuina atu i le *Tusitaulima 1, 17.3.2*.

21.4.3

Tui Faato (Artificial Insemination)

E matua lē fautuaina malosi e le Ekalesia ia tui faato e faaoga ai sua tane mai i soo se tasi e ese mai le tane. Ae peitai, o se mataupu faaletagata lenei e fitoitonu lava i le faaiuga a le tane ma le ava. O le a pau i o laua lava luga le tiutetauave mo le faaiuga e faia.

O le tui faato o tuafafine nofofua e le faatagaina. O tuafafine nofofua e matuai mumusu lava e mulimuli i le fautuaga a o latou taitai o le Ekalesia i lenei mataupu, e mafai ona faia ni aoaiga faale-Ekalesia.

21.4.4

Taofiofia o le Fanauina Mai o Fanau

O se avanoa mo ulugalii faaiipoipo o e ua mafai ona fanauina mai fanau, le saunia o tino faaletino mo fanau agaga a le Atua, o e o le a nafa ma le faafaileleina ma le tausiga. O le faaiuga pe toafia le fanau o le a i ai, faapea ma le taimi e maua mai ai e matuai le faalauaitelaina lava, ma e tatau ona tuu atu lava i le va o le ulugalii ma le Alii. E le tatau i tagata o le Ekalesia ona fefaamasinoai i lenei mataupu.

E tatau foi i ulugalii faaiipoipo ona malamalama o sootaga faalefeusui i totonu o le faaiipoipoga na faamaonia mai le lagi ia le gata mo le faamoemoega

o le foafoaina o fanau, ae o se auala foi e faaali atu ai le alofa ma faamalolosia ai sootaga o lagona ma le faalecagaga i le va o le tane ma le ava.

21.4.5

Legavia ma le Faamaoni

O le tulafono a le Alii o amioga mama e faasaina ai faiga faalefeusui i fafo o faaiipoipoga faatulafonoina ma le faamaoni i le faaiipoipoga. O faiga feusuaiga ua tatau mo na o le va lava o se alii ma se tamaitai ua faaiipoipoina faaletulafono o se tane ma se ava e tatau ai. O le mulilua, faitaaga, sootaga faatauatane po o le faatauafafine, ma isi faiga uma e le paia, pe lē mama, ma le lē sa’o, e tausalaina. O tagata o le ekalesia e solia le tulafono a le Alii o le legavia pe faatosinaina isi e faia, e mafai ona faia aoaiga faale-Ekalesia.

21.4.6

Amioga Faatauatane po o le Faatauafafine ma le Tosina i Lau Lava Itupa

O amioga faatauatane po o le faatauafafine e solia ai poloaiga a le Atua, e feteenai ma faamoemoega o tulaga faalefeusui o tagata, e aveesea ai faamanu-iaga o tagata e mafai ona maua i le olaga faaleaiga ma sauniga faaola o le talalelei. O i latou o e tausisi pea i amioga faapea po o i latou o e ua faa-aafiaina isi ina ia faia, e ao ona faia ni aoaiga faale-Ekalesia. O amioga faatauatane pe faatauafafine e mafai ona faamagaloina e ala i le salamo faamaoni.

Afai e i ai ni tagata o le ekalesia o faia ni amioga faatauatane pe faatauafafine, e tatau i taitai o le Ekalesia ona fesoasoani ia i latou ina ia maua se malamalama manino i le faatuatua ia Iesu Keriso, o le faagasologa o le salamo, ma le faamoemoega o le olaga i le lalolagi.

A o tetee ai i amioga faatauatane po o le faatauafafine, o loo faapea foi ona aapa atu le Ekalesia ma le malamalama ma le faaaloalo i tagata taitoatasi o e o loo tosina atu i tagata o lana lava itupa.

Afai e lagona e tagata le tosina atu i lona lava itupa ae e le o faia ni amioga faatauatane pe faatauafafine, e tatau i taitai ona fesoasoani ma faamalosiua i latou i a latou faaiuga e ola i le tulafono o le legavia ma pulea lelei ni mafauauga lē amiotonu. E mafai e nei tagata ona maua ni valaauga i le Ekalesia. Afai e agavaa i latou ma ta'ugavaaina i soo se itu, e mafai foi ona maua o latou pepa faataga o le malumalu ma maua sauniga o le malumalu.

21.4.7

To Faamili

E matua lē fautuaina malosi e le Ekalesia se to faamili e faaoga ai suatane mai se isi lava e ese mai le tane po o se fua mai se tasi e ese mai le ava. Ae peitai, o se mataupu faaletagata leni e fitoitonu lava i le faaiuga a le tane ma le ava. O le a pau i o laua lava luga le tiutetauave mo le faaiuga e faia.

21.4.8

Aafiaga ma Vaega Faalilolilo

E le tatau i tagata o le Ekalesia ona auai i soo se ituaiga o tapuaiga a Satani pe faipaaga i soo se itu ma mea faataulaitu. “O ia gaoioiga e aofia ai i galuega a le pouliuli e pei ona ta'ua i tusitusiga paia. Ua fuafuaina ina ia faaumatia ai le faatautua o se tasi ia Keriso, ma o le a lamatia ai le faaolataga o i latou ua faalauiloaina atu ma le iloa leni amioleaga. O nei mea e le tatau ona sailia e pei o ni taaloga, pe ave ma autu i sauniga a le Ekalesia, pe suesue patino i ai i talanoaga faaletagata lava ia” (tusi a le Au Peresitene Sili, 18 Set, 1991).

21.4.9

Ponokalafi

E tete e le Ekalesia i ponokalafi o soo se ituaiga. O le fiafia i ponokalafi e faalecagaina ai olaga o tagata tai-toatasi, aiga, ma le lalolagi. O lea fiafia i ai e aveeseina ai le Agaga o le Alii. E tatau i tagata ona aloese mai soo se ituaiga ponokalafi ma ia tete atu foi i lona gaosiga, faasalalauina, ma le faaogaina.

O le tamaitusi o le *Tēuteu Ou Manatu i le Mama e le Aunoa* o loo maua ai foi fautuaga i le auala e aloese mai ai, ma le foiaina o faafitauli o ponokalafi.

21.4.10

Faaiipoipoga a Tagata o le Itupa Tutusa

I le ave ai ma se aoaoga faavae, e faavae mai tusitusiga paia, ua faamautuina ai e le Ekalesia e faapea o le faaiipoipoga i le va o se alii ma se tamaitai e taua i le fuafuaga a le Atua mo le taunuuga faavavau o Ana fanau.

O sootaga feusuai ua na o le va lava o se alii ma se tamaitai ua faaiipoipoina faaletulafono o se tane ma se ava e talafeagai ai. Soo se isi lava la sootaga feusuai, e aofia ai sootaga i le va o le itupa e tasi, e tausalaia ma faavaivaia ai le foafoaga faalelagi o le aiga. O le mea la lea ua faamautu ai e le Ekalesia le faauigaina o le faaiipoipoga o se tuufaatasiga faaletulafono i le va o se alii ma se tamaitai.

21.4.11

Aoaoga o Tulaga Faalefeusuai

Ua i ai i matua le tiutetauave muamua mo le aoaoina o tulaga faalefeusuai i a latou fanau. O le aoaoina o leni mataupu ma le faamaoni ma le mama i le aiga, o le a fesoasoani ai foi i tupulaga talavou e aloese mai solitulafono ogaoga o amioga mama. Ina ia fesoasoani i matua e aoao atu leni faamatalaga ma'ale'ale ma le taua, ua lomina ai e le Ekalesia le tamaitusi, *O Se Tāiala mo Matua*.

I aoga o loo faia ai aoaoga i tulaga faalefeusuai, e tatau i matua ona sailia ina ia mautinoa o aoaoga o loo tuuina atu i a latou fanau e ogatasi ma tulaga ma amioga o le ola mama.

21.4.12

Fafine Nofofua e Maitaga

O tagata o le Ekalesia e nofofua a ua maitaga, e fautuaina e o i o latou epikopo. I le paia o lona tofi o le perisitua ma le valaauga, e mafai ai ona ia fautuaina

i latou a o latou faia ni faaiuga taua lea e aafia ai lo latou lava soifua manuia faapea ma le pepe. E mafai foi ona ia fesoasoani ia i latou i le amataina o le faagasologa o le salamo, pe a talafeagai ai. O faatonuga mo le epikopo o loo maua i le *Tusitaulima 1*, 17.3.12.

Afai e fanauina e se alii ma se tamaitai se tamaitiiti ae lei faaipoipoina, e tatau ona faia taumafaiga uma e fautuaina ai i laua ina ia faaipoipoina. Pe a tulai mai se tulaga ua foliga mai ua le manuia se faaipoipoga ona o le matua po o isi tulaga, e tatau ona fautuaina matua e lei faaipoipo e mafaufau ma le agaga tatalo pe o le a le mea e sili mo la'ua tama.

O le vaetamaina o se faaiuga e le manatu faapito, ma alofa lea e faamanuiaina uma ai matua na fanau mai ai ma le tamaitiiti i lenei olaga ma le faavavau. Mo matua e lei faaipoipo e mananao e tuu atu fanau ia vaetamaina pe mo ulugalii ua faaipoipo o e o loo faamoemoe e vaetama mai, e mafai ona fesoasoani le Tautua a le AAG mo Aiga e faailoa mai ni Tautua onomea ua laiseneina mo le Vaetamaina. Ua faatulagaina ofisa ua i ai laisene e vaetama ai tamaiti latou te puipuia le manuia o le tamaitiiti, vailiili lelei ulugalii o le a liliu i ai a o lei vaetamaina aloaia, ma tuuina atu le vaavaaiga ma fautuaga e manaomia.

“O matua na fanau mai ai e lei faaipoipoina, e le tatau ona fautuaina e tuu ai pea le tamaitiiti e avea o se tuutuuga o le salamo po o se manatu faapea o se matafaioi le tausiga o le tama a se tagata lava ia. E le gata i lea, e le tatau ona lagona e matua matutua po o isi tagata o le aiga le faamalosiā o i latou e fesoasoani atu i le tausiga o le tamaitiiti e matua e le'i faaipoipoina, talu ai o le a le mafai lava e le tamaitiiti ona maua faamanuiaga o le feagaiga o le faamauga. Ma le isi, o matua e le'i faaipoipoina e le mafai lava ona tuuina atu se tulaga mautu ma se siosiomaga e faafailele ai lea e mafai e se tina ma se tamā ua faaipoipo ona tuuina atu. E tatau i matua e le i faaipoipo ona mafaufau ma le agaga tatalo mo le manuia sili o le tamaitiiti ma faamanuiaga e mafai ona maua e se pepe meamea, ua faamauina i se tina ma se tama (tagai i le tusi a le Au Peresitene Sili, 26 Iuni, 2002).

Afai e tonu i se tina maitaga na te tausia le tamaitiiti, e tatau i taitai ma isi tagata o le Ekalesia ona taulimaina ma le faactete le matua [po o le tina] ma le tamaitiiti ma saili ina ia faamalosiā tomā faamatua. E mafai ona fesoasoani le Tautua a le AAG mo Aiga i tulaga faapenei. E fautuaina e taitai le matua ina ia tuuina atu i le tamaitiiti se igoa ma se faamanuiaga (tagai 20.2).

Mo faamatalaga pe tatau i se tamaitai talavou ua maitaga ona alu i sauniga a le Aualofa po o Tamaitai Talavou, tagai i le 10.12.4.

Ua faavaeina e le Tautua a le AAG mo Aiga se tautua fesoasoani e leai se totogi mo matua e lei faaipoipoina ma isi ina ia maua ai le fesoasoani e faatatau i maitaga ma mataupu faapena (1-800-537-2229). O le laina fesoasoani o loo maua i eria uma o le Iunaite Setete ma Kanata. E mafai e tagata o le Ekalesia ma e le auai ona valaau sao atu i le numera pe valaau atu le ofisa o le Tautua a le AAG mo Aiga i le lotoifale. Afai e le silafia e taitai le numera o le ofisa i le lotoifale, e mafai ona latou valaau atu i le laina fesoasoani pe faaoga le itsaboutlove.org. O loo maua i lena uepisaite ni faamatalaga aoga mo i latou o e nofofua, ua maitaga, ma le iloiloina o mea latou te filifili i ai.

21.4.13

Foaiina Atu o Sua o le Tane

E matua lē fautuaina malosi e le Ekalesia le foai atu o sua o le tane.

21.4.14

Pule i le Ola

O se mea sese le aveeseina o le ola, e aofia ai ma le ola o le tagata lava ia. Peitai, o se tagata ua pule i le ola atonu e le pa'ū ia te ia ana gaioioiga. E na o le Atua e mafai ona faamasinoina lea mataupu.

O le aiga, i le feutagai ai ma le epikopo, e fuafuaina le nofoaga ma le natura o se sauniga o le maliu mo se tagata na maliu i ni tulaga faapena. E mafai ona

faaaogaina fale o le Ekalesia. Afai ua uma ona maua faaeega paia o le tagata, e mafai ona falelauasi pe tanu o ia i laei o le malumalu.

21.4.15

Taotoga e Faamuta ai le Fanau Mai (E Aofia ai le Aveeseina o Totoga Fanau)

E matuai le lagolagoina lava e le Ekalesia ia taotoga e faamuta ai le toe fanau e avea ma se auala e taofiofi ai le fanau mai. O taotoga e faamuta ai le fanau mai, e tatau ona mafaufau i ai i le na o le taimi lava pe afai (1) ua matua lamatia le tulaga o le ola po o le soifua maloloina po o se (2) faaletonu matuia i le fanau mai po o se mafatiaga tuga ua le sagatonu ai le mafaufau o se tagata ma ua le gafataulimaina ai e

ia ana matafaioi. O tulaga faapena e tatau ona iloilo-ina i se faautautaga faafomai atamai ma ia tusa ai ma le tulafono. E ui i lea, e tatau i le tagata e nafa ma lea faaiuga ona talatalanoa o le tasi ma le isi ma lo la'ua epikopo ma e tatau ona mauaina se faamautinoaga mai le lagi mo la la'ua faaiuga e ala i le tatalo.

21.4.16

Tina Suitulaga

E matua lē fautuaina lava e le Ekalesia le tina suitulaga. Ae peitai, o se mataupu faaletagata leni e fitoitonu lava i le faaiuga a le tane ma le ava. O le a pau i o laua lava luga le tiutetauave mo le faaiuga e faia.

Faaopoopoga: Lisi o Aitema e Faasino i Ai

Tusitaulima 2: Taitaiina o le Ekalesia e faasino i le tele o isi anomea e gaosia e le Ekalesia. O loo tuuina atu i lalo se lisi faa-alafapeta o nei punaoa. Afai ua i ai ni numera o aitema, o loo aofia atu ai i lenei lisi ae le o le anotusi o le tusitaulima O le tele o nei punaoa o loo maua i Faletusi Autu o le Ekalesia. O loo tuuina atu i lalo ia faamatalaga e faafesootai ai:

Faletusi

1999 West 1700 South

Salt Lake City, UT 84104-4233

Telefoni: 801-240-3800 (eria o le Aai o Sate Leki)

-800-537-5971 (I.S. ma Kanata)

-801-240-1126 (isi atunuu)

Initoneti: www.ldscatalog.com

Alualu i Luma o le Tagata Lava Ia o Tamaitai Talavou: Tu Atu e fai ma Molimau a le Atua (36035)

Aoao Atu, E Lei se Isi Valaauga E Sili Ai: O Se Taiala o Punaoa mo le Aoaoina Atu o le Talaelei (36123)

Asoa o le Aloaiaina o le Tulaga Faatamaitai Talavou (auro, 08602; siliva, 08603)

Asoa o le tagavai a Tamaitai Talavou (08601)

Church Facilities Artwork catalog (faafesootai le pule o fale ma fanua)

Dictionary of Sign Language Terms for The Church of Jesus Christ of Latter-day Saints (31121)

Faaeeina i le mana mai Luga: Semina Faasauniuni mo le Malumalu Tusi Lesona a le Faiaoga (36854)

Faamaoni i le Faatuatua: O Se Tusitaiala o le Talalelei (36863; o le numera o le aitema mo iunite e oka ai lenei lomiga e aunoa ma se totonu o le 37054)

Faamatalaga ma Fautuaga mo Peteriaka (31257)

Faamaumauga o le Alualu i Luma (36985)

Faamaumauga o le Faamanuiaga o le Tamaitiiti ma le Tusi Faamaonia (i eria ua i ai polokalama

faakomepiuta e tausia ai faamaumauga a le Ekalesia, e lolomi le pepa faamaumau ma le tusi faamaonia e iunite i le lotoifale; i isi eria, o le numera o le aitema o le 35972)

Faatonuga mo Mataupu Aoaoina (e faafouina faaletausaga)

Faatuatua i le Atua mo Tama (36812)

Faatuatua i le Atua mo Teine (36813)

Fomu mo le Fautuaina Atu o se Epikopo Fou (i eria e faaoga ai polokalama faakomepiuta o le tausiga o faamaumauga a le Ekalesia, e lolomi le fomu e iunite i le lotoifale; o isi eria, o le numera o le aitema o le 31747)

Fomu mo le Fuafuaina o Gaoioiga (o loo maua i luga o le initoneti i le ldscatalog.com ma le LDS.org; po o le numera o le aitema o le 33809)

Fomu mo le Lagolagoina o Taitai (i eria e faaoga ai polokalama faakomepiuta o le tausiga o faamaumauga a le Ekalesia, e lolomi nei fomu e iunite i le lotoifale; o isi eria o numera nei o aitema: siteki, 32300; itu, 32301; uarota po o le paranesi i le siteki, 32302; paranesi i le misiona, 32303)

Fomu o le Alualu i Luma o Tagata Fou ma Tagata ua Toe Foi Mai i le Ekalesia (i eria ua i ai polokalama faakomepiuta e tausia ai faamaumauga a le Ekalesia, e lolomi le fomu e iunite i le lotoifale; i isi eria, o le numera o le aitema o le 08616)

Fomu o le Faamaumauga o le Papatisoga ma le Faamauga (i eria e faaoga ai polokalama faakomepiuta o le tausiga o faamaumauga a le Ekalesia, e lolomi le fomu e iunite i le lotoifale; mo faifeautalai faamisiona ma eria e le faaogaina ai lea polokalama faakomepiuta, o le numera o le aitema o le 35971)

Fomu o le Faatagaga a Matua po o Le O Loo Vaaia ma Faamatalaga Faafomai ua Faamatuu Mai

(o loo maua i le initoneti i le ldscatalog.com ma le LDS.org; po o le numera o le aitema o le 33810)

Fomu o le Feagaiga o le Faafiafiaga (o loo maua i le ldscatalog.com ma le LDS.org; po o le numera o le aitema e 33811)

Fomu o le Iloiloga o Manaoga ma Punaoa (32290)

Fomu o le Pepa Faataga e Faia ai se Sauniga (32595)

Fomu o Oka a le Epikopo mo Oloa (e eseese lava numera o le aitema i eria)

Fomu o Talent and Interest Survey (o loo maua i le ldscatalog.com ma le LDS.org; po o le numera o le aitema e 33812)

Fonotaga Faaleaoaoga a Taitai i le Lalolagi Atoa: O Le Peteriaka (tamaitusi, 25240; DVD, 25241 090)

Ia Saunia Mea Tatau Uma: O Mea Tautupe a le Aiga (04007)

Ia Saunia Mea Tatau Uma: Teuina o Meaai a le Aiga (04008)

Keyboard Course Kit (33620)

Lipoti Faalekuata (i eria e faaoga ai polokalama faakomepiuta o le tausiga o faamaumauga a le Ekalesia, e maua le fomu faaeletonika ma auina mai foi faaeletonika; o isi eria, e auina atu e le ofisa o le pulega ua tofia le fomu i iunite)

Mataupu Faavae o le Talalelei (2009 lomiga, 06195)

Mo Le Malosi o le Autalavou (tamaitusi, 36550; kata, 36551)

O Faatonuga mo le Faaofuina o i Latou e Maliliu O ē Ua Uma ona Maua o Latou Faaeega Paia (31461)

O Le A Outou Maua Lau Upu (tusi lesona a le tamaitiiti aoga, 34476; taiala a le faiaoga, 34477; aoga mai le DVD, 00548)

O Le Saunia e Ulu Atu i le Malumalu Paia (36793)

O Se Taiala a le Tagata mo Galuega o le Malumalu ma Talafaasolopito o Aiga (36795)

O Se Taiala a Matua (31125)

Otootoga mo le taimi o fetufaaiga (e lolomiina faaletausaga)

Pepa Mo Taitai e Siaki ai le Alualu i Luma o Tamaitai Talavou (36655)

Pepa Talosaga mo se Faamanuiaga Faapeteriaka (i eria e faaoga ai polokalama faakomepiuta o le tausiga o faamaumauga a le Ekalesia, e lolomi le fomu e iunite i le lotoifale; o isi eria, o le numera o le aitema o le 32017)

Pusa o Mea e Taitaia ai le (33619)

Taiala a le Faiaoga mo Galuega o le Malumalu ma Talafaasolopito o Aiga (35804)

Taiala a le Faufautua o Talafaasolopito o Aiga mo Galuega o le Malumalu ma Talafaasolopito o Aiga (36797; o loo maua i le LDS.org)

Taiala a le Pulega o Fale ma Fania mo Falelotu ma Isi Meatotino a le Ekalesia (Iunaite Setete ma Kanata, 35860; i fafo atu o le Iunaite Setete ma Kanata, 36485)

Taiala Faaletaitaiga mo Talafaasolopito o Aiga (04397)

Taiala mo Tolauapiga i le Ao mo Sikauti e tai Sefulutasi Tausaga (31374)

Tala'i La'u Talalelei: O Se Taiala mo le Galuega Faafai feautalai (36617)

Teuteu Ou Manatu i le Mama e le Aunoa 00460)

Tiute ma Faamanuiaga o le Perisitua, Vaega A (31111)

Tiute ma Faamanuiaga o le Perisitua, Vaega E (31112)

Tolauapiga a Tamaitai Talavou: O Se Taiala mo Taitai Perisitua ma Tamaitai Talavou (04093)

Tusi Faamaonia o le Papatitoga ma le Faamauga (i eria e faaoga ai polokalama faakomepiuta o le tausiga o faamaumauga a le Ekalesia, e lolomi le

tusi faamaonia e iunite i le lotoifale; o isi eria, o le numera o le aitema o le 35920)

Tusi Faamaonia o le Siitaga (33237)

Tusi faamaonia o vaitausaga o Tamaitai Talavou (Ofagapi, 08563; Maea Meite, 08565; Lora, 08564)

Tusi Faamaumau ma le Tusi Faamaonia o le Faauga i le Perisitua Arona (i eria e faaoga ai polokalama faakomepiuta o le tausiga o faamaumau a le Ekalesia, e lolomi ia tusi faamaumau ma tusi faamaonia e iunite i le lotoifale; o isi eria, o le numera o le aitema o le 35857)

Tusi Faamaumau ma le Tusi Faamaonia o le Faauga i le Perisitua Mekisateko (i eria e faaoga ai polokalama faakomepiuta o le tausiga o faamaumau a le Ekalesia, e lolomi le tusi faamaumau ma le tusi faamaonia e iunite i le lotoifale; o isi eria, o le numera o le aitema o le 35858)

Tusi Lesona o Tolauapiga a Tamaitai Talavou (34573)

Tusipese a Tamaiti (35395)

Tusitaiala a le Paranesi (31179)

Tusitaiala Faafaiaoga (34595)

Tusitaiala mo le Aiga (31180)

Tusitaiala o le Polokalama a le Iunite Faavae (36717)

Tusitaulima a le Peresitene o le Misiona (36203)

Tusitaulima a Faifeautalai (35996)

Tusitaulima a le Sikauti (Kanata, 35810; Iunaite Setete, 35814)

Vaai ia i o Outou Tamaiti: Tusi Lesona a le Vasega Pepe (37108)

Viiga (31243)

O LE EKALESTIA A
IESU KERISO
O LE AU PAIA O ASO
E GATA AI